
ओं नमः परमात्मने, श्री महागणपतये नमः

श्री गुरुभ्यो नमः हरिः ओं

अच्छिद्रं, अश्वमेधं & काठकं

Contents

1	अच्छिद्रं	7
2	अश्वमेधं	68
2.1	तैत्तिरीय ब्राह्मणे तृतीयाष्टके अष्टम प्रपाठकः	68
2.2	अश्वमेधस्य द्वितीय-तृतीया हर्विधानम्	113
3	कृष्णयजुर्वेदीय काठकं	155
3.1	तैत्तिरीय यजुर्ब्राह्मणे काठके प्रथमः प्रश्नः	155
3.2	तैत्तिरीय यजुर्ब्राह्मणे काठके द्वितीयः प्रश्नः	179
3.3	तैत्तिरीय यजुर्ब्राह्मणे काठके तृतीयः प्रश्नः	208

Notes: This Book has been brought to you with the courtesy of some Veda learners who have collaborated to prepare this book.

Please give your feedback, comments and report errors to the e-mail id vedavms@gmail.com. We shall strive to make this book more accurate and error-free.

You may note that there are inherent “paata bedhas” when we compare various sources and books. We have made constant reference to the Taittiriya Sakhaa compiled and commented by Shri. Sayanacharya of 13th Century and Shri Bhatta Bhaskaracharya (period unknown). Their manuscript compilations were later converted into books by great Scholars. One of such sets of “Taittiriya” was printed and published during earlier 1900 A.D. at Govt. Branch Press, Mysore and another set later published under “Anandaashram Series”. These Books were referred to by us as our primary source material for this Book.

This book has not been prepared with any commercial purpose and is purely for studies.

Conventions used in Letters:

८ – is represented by (g)

८ – is represented by (gg)

८ – is represented by (gm)

८ – is represented as anunaasikam

(hyphen) – used between words indicate that the words has parts which need to be rendered together as per your Guru’s teachings. This sign is used in areas to split words which are long or where the words has been constructed through Sandhis which result in “different letters”, (which joins the original padam of words) and also for ease of reading/rendering. The usages of hyphens slightly vary in Sanskrit, Malayalam and Tamil books based on the usages in these languages.

The number references of four digits given at the beginning of a panchati, is the reference in Taitareeya Braahmanam, representing the Kandam, Prasna, Anuvaham and Panchati numbers respectively.

Important Note :

This version of the book is for learning under the guidance of a Guru. There are some mantras that need expansion when recited as a part of Karma (ritual/function). We are currently taking advice/explanations from reputed sources as to how they need proper expansion. We shall publish an Appendix or Annexure to this book to take care of the same.

1 अच्छिद्रं

तैत्तिरीय ब्राह्मणे तृतीयाष्टके सप्तम प्रपाठकः

॥ हरिः ओं ॥

T.B.3.7.1.1

सर्वान् वा एषोऽ॒ग्नौ॑ का॒मान् प्र॒वेश॑यति ।
 यो-॒ऽग्नी॑न॒न्वा॒धाय॑ व्र॒तमु॒पैति॑ । स यद॑नि॒ष्ट्वा प्र॒यायात् ।
 अ॒काम॑प्री॒ता ए॒नं का॒मा ना॒नु प्र॒यायुः॑ ।
 अ॒तेजा॑ अ॒वीर्यः॑ स्यात् । स जु॒हुयात् ।
 तु॒भ्यं ता अ॒ङ्गिर॑स्तम । वि॒श्वाः सु॒क्षित॑यः पृथक् ।
 अ॒ग्ने का॒माय॑ ये॒मिर॑ इति । का॒माने॑वा॒स्मिन् द॑धाति ॥ 1 ॥

T.B.3.7.1.2

का॒मप्री॒ता ए॒नं का॒मा अ॒नुप्र॑यान्ति । ते॒जस्वी॑ वी॒र्या॑वान् भवति ।
 सं॒तति॑र्वा ए॒षा य॒ज्ञस्य॑ । यो-॒ऽग्नी॑न॒न्वा॒धाय॑ व्र॒तमु॒पैति॑ ।

स॒ यदु॒द्वा॒यति॑ । वि॒च्छि॒त्ति-रे॒वा॒स्य॑ सा । तं प्रा॒ञ्चमु॒द्धृत्य॑ ।
मन॑सोपतिष्ठेत् । मनो॑ वै प्र॒जाप॑तिः । प्रा॒जाप॑त्यो य॒ज्ञः ॥ 2 ॥

T.B.3.7.1.3

मन॑सैव य॒ज्ञः संत॑नोति । भूरि॑त्याह । भूतो॑ वै प्र॒जाप॑तिः ।
भूति॑मेवोपैति । वि॒ वा ए॒ष इन्द्रि॑येण॒ वीर्ये॑ण॒र्द्ध्यते॑ ।
यस्या॑-हि॒ताग्ने॑-र॒ग्निरप॑क्षायति । याव॑च्छ॒म्यया॑ प्रवि॒ध्यैत् ॥
यदि॑ ताव॑दप॒क्षायै॑त् । त॒ संभ॑रेत् । इ॒दं त॒ एकं॑ पर॒ उत॑ एकं॑ ॥ 3 ॥

T.B.3.7.1.4

तृती॑येन॒ ज्योति॑षा सँवि॒शस्व॑ । सँवे॒शन॑स्तनुवै चारु॑रेधि ।
प्रि॒ये दे॒वानां॑ पर॒मे ज॒नित्र॑ इति । ब्र॒ह्मणै॑वैन॒ संभ॑रति ।
सैव॑ ततः प्रायश्चि॒त्तिः । यदि॑ पर॒स्त-राम॑पक्षायैत् ।
अनु॑ प्रया॒याव॑स्येत् । सो॒ एव॑ ततः प्रायश्चि॒त्तिः ।
ओष॑धीर्वा ए॒तस्य॑ प॒शून् प॒यः प्र॑विशति ।
यस्य॑ ह॒विषे॑ व॒थ्सा अ॒पाकृ॑ता॒ धय॑न्ति ॥ 4 ॥

T.B.3.7.1.5

तान्. यद्दु॒ह्यात् । या॒तया॒म्ना ह॒विषा॑ य॒जेत॑ । यन्न दु॒ह्यात् ।
 य॒ज्ञप॒रु-र॒न्तरि॑यात् । वा॒यव्यां॑ य॒वागूं॑ निर्व॒पेत् ।
 वा॒युर्वै प॒यसः॑ प्र॒दाप॑यिता । स ए॒वास्मै॑ प॒यः प्र॒दाप॑यति ।
 प॒यो वा ओ॒षध॑यः । प॒यः प॒यः । प॒यसै॒वास्मै॑ प॒योऽव॑रुन्धे ॥ 5 ॥

T.B.3.7.1.6

अथो॒त्तर॑स्मै ह॒विषे॑ व॒थ्सान॑पा कुर्यात् । सैव ततः प्रायश्चित्तिः ।
 अ॒न्यतरान्॑ वा ए॒ष दे॒वान् भा॒गधे॑येन व्य॒र्धय॑ति ।
 ये य॒जमा॑नस्य सा॒यं गृ॒हमा-ग॑च्छन्ति ।
 यस्य॑ सा॒यं दु॒ग्धं ह॒विरा॑र्ति-मा॒र्च्छति॑ ।
 इन्द्रा॑य व्री॒हीन्नि-रु॒व्यो-प॑वसेत् । प॒यो वा ओ॒षध॑यः ।
 प॒य ए॒वार॑भ्य गृ॒हीत्वो-प॑वसति । यत्प्रा॒तः स्या॑त् ।
 तच्छृ॑तं कुर्यात् ॥ 6 ॥

T.B.3.7.1.7

अथे॑तर ऐ॒न्द्रः पु॒रोडा॑शः स्यात् । इ॒न्द्रि॒ये ए॒वास्मै॑ समी॒ची द॑धाति ।
 पयो॑ वा ओष॑धयः । पयः॑ पयः॑ । पय॑सै॒वास्मै॑ पयो॑ऽव॒रुन्धे॑ ।
 अथो॑त्तर॒स्मै ह॒विषे॑ व॒थ्सान॑पा कुर्यात् । सै॒व ततः॑ प्रायश्चि॒त्तिः ।
 उ॒भया॑न् वा ए॒ष दे॒वान् भा॒गधे॑येन व्य॒र्धय॑ति ।
 ये य॒जमा॑नस्य सायं च प्रा॒तश्च गृ॑हमा-गच्छ॑न्ति ।
 य॒स्यो भ॑य॒ ह॒विरा॑र्त्ति-मा॒र्च्छति॑ ॥ 7 ॥

T.B.3.7.1.8

ऐ॒न्द्रं पञ्च॑शराव-मो॒दनं॑ निर्व॒पेत् । अ॒ग्निं दे॒वता॑नां प्रथ॒मं य॑जेत् ।
 अ॒ग्निमु॒खा ए॒व दे॒वताः॑ प्री॒णाति॑ । अ॒ग्निं वा॑ अ॒न्व॒न्या दे॒वताः॑ ।
 इ॒न्द्रम॒न्व॒न्याः । ता ए॒वोभ॑यीः प्री॒णाति॑ । पयो॑ वा ओष॑धयः ।
 पयः॑ पयः॑ । पय॑सै॒वास्मै॑ पयो॑ऽव॒रुन्धे॑ ।
 अथो॑त्तर॒स्मै ह॒विषे॑ व॒थ्सान॑पा कुर्यात् ॥ 8 ॥

T.B.3.7.1.9

सै॒व ततः॑ प्रा॒यश्चि॑त्तिः । अ॒र्धो वा ए॒तस्य॑ य॒ज्ञस्य॑ मी॒यते॑ ।
 यस्य॑ व्र॒त्येऽह॑न् प॒त्न्यना-ल॑म्भु॒का भ॑वति । ताम॑प॒रुध्य॑ य॒जेत॑ ।
 स॒र्वेणै॒व य॒ज्ञेन॑ य॒जते॑ । तामि॒ष्ट्वो-प॑ह्वयेत । अ॒मूह॑मस्मि ।
 सा त्वं । द्यौ॒रहं॑ । पृ॒थि॒वी त्वं । सा॒माहं॑ । ऋ॒क्त्वं ।
 तावे॒हि सं॑भ॒वाव॑ । स॒ह रे॒तो द॑धाव॒है । पु॒॒से पु॒त्राय॑ वे॒त्तवै॑ ।
 रा॒यस्पो॑षाय सु॒प्रजा॑स्त्वाय सु॒वीर्या॑येति । अ॒र्ध ए॒वैना॒मु-प॑ह्वयते ।
 सै॒व ततः॑ प्रा॒यश्चि॑त्तिः ॥ 9 ॥

[3.7.2.1

यद्वि॒ष्ण॒णेन॑ जुहु॒यात् । अ॒प्रजा॑ अ॒पशु॑र्य॒जमा॑नः स्यात् ।
 यद॒नाय॑तने॒ नि॒नये॑त् । अ॒नाय॑तन-स्स्यात् ।
 प्रा॒जाप॑त्यय॒र्चा व॑ल्मीक-व॒पायाम॑-व॒नये॑त् । प्रा॒जाप॑त्यो वै व॒ल्मीकः॑ ।
 य॒ज्ञः प्र॒जाप॑तिः । प्र॒जाप॑तावे॒व य॒ज्ञं प्र॑तिष्ठापयति । भू॒रित्या॑ह ।
 भू॒तो वै प्र॒जाप॑तिः ॥ 10 ॥

T.B.3.7.2.2

भू॒ति॒मे॒वो॒पै॒ति । तत् कृ॒त्वा । अ॒न्यां दु॒ग्ध्वा पुन॑र्. हो॒तव्यं॑ ॥
 सै॒व ततः॑ प्रायश्चि॒त्तिः । यत्की॒टा-व॒प॒न्नेन॑ जुहु॒यात् ।
 अ॒प्र॒जा अ॒प॒शु-र्य॑ज॒मानः॑ स्यात् । यद॒नाय॑तने नि॒नये॑त् ॥
 अ॒नाय॑तन-स्स्यात् ॥
 म॒ध्यमे॑न प॒र्णेन॑ द्या॒वा-पृ॑थि॒व्य-य॑र्चाऽन्तः॑ परि॒धि नि॒नये॑त् ।
 द्या॒वा पृ॑थि॒व्यो-रे॒वैन॑त्-प्रति॒ष्ठाप॑यति ॥ 11 ॥

T.B.3.7.2.3

तत्कृ॒त्वा । अ॒न्यां दु॒ग्ध्वा पुन॑र्. हो॒तव्यं॑ ॥
 सै॒व ततः॑ प्रायश्चि॒त्तिः । यद॒ववृ॑ष्टेन जुहु॒यात् ।
 अ॒परूप॑-मस्या॒त्म-ज्जा॑येत । कि॒ला॒सो वा स्या॑दर्.श॒सो वा ॥
 यत् प्र॒त्ये॒यात् । य॒ज्ञं वि॑च्छि॒न्धात् । स जुहु॒यात् ।
 मि॒त्रो ज॒नान् क॑ल्पयति प्र॒जान॑न् ॥ 12 ॥

T.B.3.7.2.4

मि॒त्रो दा॑धार पृ॒थिवी॑मु॒त द्यां॑ । मि॒त्रः कृ॒ष्टीर॑-नि॒मिषा॑ ऽभिच॑ष्टे ।
 स॒त्याय॑ ह॒व्यं घृ॒तव॑-ज्जुहो॑तेति । मि॒त्रेणै॑वैनत् कल्पयति ।
 तत्कृ॑त्वा । अ॒न्यां दु॒ग्ध्वा पुन॑र्. हो॒तव्यं॑ ॥ सै॒व ततः॑ प्रायश्चित्तिः ।
 यत् पूर्॑वस्या-माहु॑त्यां हु॒ताया॑-मु॒त्तरा॑-ऽऽहु॑तिः स्कन्दे॑त् ।
 द्वि॒पाद्भिः॑ प॒शुभि॑-र्यज॑मानो व्य॑द्ध्येत ।
 यदु॒त्तरया॑ ऽभिजु॑ह्यात् ॥ 13 ॥

T.B.3.7.2.5

चतु॑ष्पाद्भिः प॒शुभि॑र्-यज॑मानो व्य॑द्ध्येत ।
 यत्र वे॑त्थ वनस्प॑ते दे॒वानां॑ गु॒ह्या ना॑मानि ।
 तत्र ह॒व्यानि॑ गा॒मये॑ति वा॒नस्प॑त्य-य॒र्चा स॒मिध॑-मा॒धाय॑ ।
 तू॒ष्णीमे॒व पुन॑र् जुह्यात् ।
 वनस्प॑तिनै॒व य॒ज्ञस्या॑र्तां चा॒नार्तां॑ चाहु॑ती वि॒दाधा॑र ।
 तत्कृ॑त्वा । अ॒न्यां दु॒ग्ध्वा पुन॑र्. हो॒तव्यं॑ ॥

सै॒व ततः॑ प्रा॒यश्चि॑त्तिः । यत्पु॒रा प्र॑या॒जैभ्यः॑ प्राङ्ङ्गा॒रः स्क्वन्दे॑त् ॥
अध्व॒र्यवे॑ च यज॑मानाय चाक॑ स्यात् ॥ 14 ॥

T.B.3.7.2.6

यद् दक्षि॑णा । ब्र॒ह्मणे॑ च यज॑मानाय चाक॑ स्यात् ।
यत् प्र॒त्यक् । हो॒त्रे च॑ प॒त्नियै॑ च यज॑मानाय चाक॑ स्यात् ।
यदु॒दङ् । अ॒ग्नी॒धे च॑ प॒शुभ्य॑श्च यज॑मानाय चाक॑ स्यात् ॥
यद॑भि जुहु॒यात् । रु॒द्रोऽस्य॑ प॒शून् घा॑तुकः स्यात् ।
यन्ना॑भि जुहु॒यात् । अ॒शान्तः॑ प्र॒हिये॑त ॥ 15 ॥

T.B.3.7.2.7

स्रु॒वस्य॑ बु॒ध्नेना॑भि निद॑ध्यात् ।
मा त॒मो मा॑ य॒ज्ञस्त॑मन्मा यज॑मान-स्तमत् ।
नम॑स्ते अ॒स्त्वाय॑ते । नमो॑ रु॒द्र प॑रायते । नमो॑ यत्र नि॒षीद॑सि ।
अमुं॑ मा हि॒ंसी॒रमुं॑ मा हि॒ंसी॒रिति॑ येन स्क्वन्दे॑त् । तं प्र॒हरे॑त् ।
स॒हस्र॑शृ॒ङ्गो वृ॒षभो॑ जा॒तवे॑दाः । स्तो॒मपृ॑ष्ठो घृ॒तवा॑न्-थ्सु॒प्रती॑कः ।

मा नो॑ हा॒सीन्मे॒त्थितो॑ ने॒त्त्वा ज॒हाम॑ ।
 गो॒पोषं॑ नो॑ वी॒रपोषं॑ च॒ यच्छे॑ति ।
 ब्र॒ह्मणै॒वैनं॑ प्र॒हरति॑ । सै॒व ततः॑ प्रा॒यश्चि॑त्तिः ॥ 16 ॥

T.B.3.7.3.1

वि॒ वा ए॒ष इ॒न्द्रिये॑ण॒ वी॒र्ये॑ण॒ द्ध्यते॑ ।
 यस्या॑-हि॒ताग्ने॑-र॒ग्नि-र्म॑थ्यमा॒नो न॑ जा॒यते॑ ।
 य॒त्रान्यं॑ प॒श्येत्॑ । त॒त आ॑ह॒त्य हो॑त॒व्यं॑ ।
 अ॒ग्ना-वै॒वास्या॑-ग्नि॒होत्र॑ हु॒तं भ॑वति ।
 य॒द्यन्यं॑ न वि॒न्देत्॑ । अ॒जाया॑ हु॒तव्यं॑ । आ॒ग्नेयी॑ वा ऐ॒षा ।
 य॒दजा॑ । अ॒ग्ना-वै॒वास्या॑-ग्नि॒होत्र॑ हु॒तं भ॑वति ॥ 17 ॥

T.B.3.7.3.2

अ॒जस्य॑ तु ना॒श्जी॑यात् । य॒दज॑स्या-श्जी॒यात् ।
 या॒मेवा॒ग्ना-वा॑हु॒तिं जु॑हु॒यात् । ता॒मद्या॑त् । तस्मा॑द॒जस्य॑ ना॒श्यं॑ ।

यद्य॒जां न वि॒न्देत् । ब्रा॒ह्मण॑स्य दक्षि॒णे ह॑स्ते हो॒तव्यं॑ ॥

एष॒ वा अ॒ग्नि॒र्वै॒श्वान॑रः । यद्ब्रा॒ह्मणः॑ ॥

अ॒ग्ना-वै॒वास्या॑-ग्नि॒होत्र॑ ५ हु॒तं भ॑वति ॥ 18 ॥

T.B.3.7.3.3

ब्रा॒ह्मणं॑ तु वस॒त्यै ना॑परु॒न्ध्यात् । यद्ब्रा॒ह्मणं॑ वस॒त्या अ॑परु॒न्ध्यात् ।

यस्मि॒न्ने-वा॒ग्नावा॑हु॒तिं जु॑हु॒यात् । तं भा॑ग॒धेये॑न व्य॒र्धये॑त् ।

तस्मा॑द् ब्रा॒ह्मणो॑ वस॒त्यै ना॑परु॒ध्यः । यदि॑ ब्रा॒ह्मणं॑ न वि॒न्देत् ।

दर्भ॑स्त॒म्बे हो॒तव्यं॑ ॥ अ॒ग्नि॒वान् वै दर्भ॑स्त॒म्बः ।

अ॒ग्नावे॑-वा॒स्या-ग्नि॒होत्र॑ ५ हु॒तं भ॑वति । दर्भा॑स्तु ना॒ध्यासी॑त ॥ 19 ॥

T.B.3.7.3.4

यद्दर्भान॑ध्यासी॒त । यामे॑वा॒ग्ना-वा॑हु॒तिं जु॑हु॒यात् । ताम॑ध्यासी॒त ।

तस्मा॑द् दर्भा॑ ना॒ध्यासि॑तव्याः । यदि॑ दर्भान्न वि॒न्देत् ।

अ॒प्सु हो॒तव्यं॑ ॥ आ॒पो वै सर्वा॑ दे॒वताः॑ ॥

दे॒वता॑स्वे वा॒स्या-ग्नि॒होत्र॑ ५ हु॒तं भ॑वति ।

आ॒पस्तु॑ न परि॒चक्षी॑त । यदा॑पः परि॒चक्षी॑त ॥ 20 ॥

T.B.3.7.3.5

या॒ मे॒वा॒फ॒स्वा॒हु॒तिं॑ जु॒हु॒यात् । तां॑ परि॒चक्षी॑त ।
 तस्मा॑दा॒पो न॑ परि॒चक्ष्याः॑ ।
 मे॒ध्या च॑ वा ए॒तस्या॑मे॒ध्या च॑ त॒नुवौ॑ स॒सृज्ये॑ते ।
 यस्या॑-हि॒ताग्ने॑-र॒न्यैर॒ग्निभि॑-र॒ग्नयः॑ स॒सृज्यन्ते॑ ।
 अ॒ग्नये॑ वि॒विच॑ये पु॒रोडा॑श-म॒ष्टाक॑पालं निर्व॒पेत् ।
 मे॒ध्यां चै॒वास्या॑-मे॒ध्यां च॑ त॒नुवौ॑ व्याव॒र्तय॑ति ।
 अ॒ग्नये॑ व्र॒तप॑तये पु॒रोडा॑श-म॒ष्टाक॑पालं निर्व॒पेत् ।
 अ॒ग्निमे॒व व्र॒तप॑ति॒स्वेन॑ भा॒गधे॑ये-नो॒पधा॑वति ।
 स ए॒वैनं॑ व्र॒तमा॑-लं॒भय॑ति ॥ 21 ॥

T.B.3.7.3.6

गर्भ॑स्त्र॒वन्त॑म-ग॒दम॑कः । अ॒ग्नि-रि॒न्द्र-स्त्व॑ष्टा बृ॒हस्प॑तिः ।
 पृ॒थिव्या॑-म॒वचु॑श्चो-तै॒तत् । ना॒भि-प्रा॒प्नोति॑ निर्ऋ॒तिं प॑राचैः ।
 रे॒तो वा॑ ए॒तद्वा॑जिन-मा॒हिता॑ग्नेः । यद॑ग्नि॒होत्रं॑ । तद्य॑त्स्र॒वेत् ।

रेतोऽस्य वाजिनं स्रवेत् । गर्भं स्रवन्तम-गदमक-रित्याह ।
रेत एवास्मिन् वाजिनं दधाति ॥ 22 ॥

T.B.3.7.3.7

अग्निरित्याह । अग्निर्वै रेतोधाः । रेत एव तदधाति । इन्द्र इत्याह ।
इन्द्रिय-मेवास्मिन्-दधाति । त्वष्टेत्याह ।
त्वष्टा वै पशूनां मिथुनानां रूपकृत् ।
रूपमेव पशुषु दधाति । बृहस्पतिरित्याह ।
ब्रह्म वै देवानां बृहस्पतिः । ब्रह्मणैवास्मै प्रजाः प्रजनयति ।
पृथिव्या-मवचुश्चोतैत-दित्याह । अस्या-मेवैनत् प्रतिष्ठापयति ।
नाभि प्राप्नोति निर्ऋतिं पराचैरित्याह । रक्षसाम पहत्यै ॥ 23 ॥

T.B.3.7.4.1

याः पुरस्तात् प्रस्रवन्ति । उपरिष्ठाथ् सर्वतश्च याः ।
ताभी रश्मिपवित्राभिः । श्रद्धां यज्ञमारभे । देवा गातुविदः ।
गातुं यज्ञाय विन्दत । मनसस्पतिना देवेन ।

वा॒ताद्-य॒ज्ञः प्र॒यु॒ज्यतां॑ । तृ॒तीय॑स्यै दि॒वः ।

गा॒य॒त्रि॒या सो॒म आ॒भृतः॑ ॥ 24 ॥

T.B.3.7.4.2

सो॒मपी॑थाय॒ संन॑यितुं । व॒क्ल-म॑न्तर॒माद॑दे ।

आपो॑ दे॒वीः शु॒द्धाः स्थ॑ । इ॒मा पा॒त्राणि॑ शु॒न्धत॑ । उ॒पा॒त॒ङ्क्या॑य
दे॒वानां॑ । प॒र्ण॒व॒ल्क॒मु॒त शु॒न्धत॑ । प॒यो गृ॒हेषु॑ प॒यो अ॒घ्निया॑सु ।

प॒यो व॒थ्सो॑षु प॒य इ॒न्द्राय॑ ह॒विषे॑ ध्रि॒यस्व॑ ।

गा॒य॒त्री प॒र्ण॒व॒ल्के॑न । प॒यः सो॒मं क॑रो॒त्विमं॑ ॥ 25 ॥

T.B.3.7.4.3

अ॒ग्निं गृ॑ह्णामि सु॒रथं॑ यो॒ मयो॑ भूः ।

य उ॒द्यन्त॑मा रो॒हति॑ सू॒र्यम॑हे । आ॒दित्यं॑ ज्यो॒तिषां॑ ज्यो॒तिरु॑त्त॒मं ।

श्वो॑ य॒ज्ञाय॑ र॒मतां॑ दे॒वता॑भ्यः । व॒सून् रु॒द्राना॑दि॒त्यान् ।

इ॒न्द्रेण॑ स॒ह दे॒वताः॑ । ताः पू॒र्वः प॑रिगृह्णामि ।

स्व आय॑तने॑ मनी॒षया॑ । इ॒मामूर्जं॑ पञ्चद॒शीं ये॑ प्रवि॒ष्टाः ।
तान्दे॒वान् परि॑गृह्णामि॒ पूर्वः॑ ॥ 26 ॥

T.B.3.7.4.4

अ॒ग्निर् ह॒व्यवा॑डिह॒ ताना॑वहतु । पौ॒र्णमा॑सꣳ ह॒विरि॑दमेषां॒ मयि॑ ।
आ॒मावा॑स्यꣳ ह॒विरि॑दमेषां॒ मयि॑ । अ॒न्तरा॑ग्नी प॒शवः॑ ।
दे॒वसꣳ स॒दमा॑गमन् । तान् पूर्वः॑ परि॑गृह्णामि ।
स्व आय॑तने॑ मनी॒षया॑ । इ॒ह प्र॒जा वि॒श्वरू॑पा रमन्तां ।
अ॒ग्निं गृ॒हप॑तिमभि सँव॒सानाः॑ । ताः पूर्वः॑ परि॑गृह्णामि ॥ 27 ॥

T.B.3.7.4.5

स्व आय॑तने॑ मनी॒षया॑ । इ॒ह प॒शवो॑ वि॒श्वरू॑पा रमन्तां ।
अ॒ग्निं गृ॒हप॑तिमभि सँव॒सानाः॑ । तान् पूर्वः॑ परि॑गृह्णामि ।
स्व आय॑तने॑ मनी॒षया॑ । अ॒यं पि॒तृणा॑मग्निः ।
अवा॑ङ्ढ॒व्या पि॒तृभ्य॑ आ । तं पूर्वः॑ परि॑गृह्णामि ।
अ॒विषं॑ नः पि॒तुं क॑रत् । अ॒जस्रं॑ त्वाꣳ स॒भापा॑लाः ॥ 28 ॥

T.B.3.7.4.6

वि॒जय॑भा॒गꣳ स॒मि॒न्ध॑तां । अ॒ग्ने॑ दी॒दाय॑ मे॒ स॒भ्य ।
 वि॒जित्यै॑ श॒रदः॑ श॒तं । अ॒न्न॒मा॒व॒स॒थी॑यं । अ॒भि॒ह॒रा॒णि श॒रदः॑ श॒तं ।
 आ॒व॒स॒थे श्रि॑यं म॒न्त्रं । अ॒हि॒र्बु॒ध्नि॑यो॒ निय॑च्छतु ।
 इ॒द॒म॒ह-म॒ग्नि॑ ज्ये॒ष्ठेभ्यः॑ । व॒सु॒भ्यो य॒ज्ञं प्र॑ब्रवीमि ।
 इ॒द॒म॒ह-मि॒न्द्र॑ ज्ये॒ष्ठेभ्यः॑ ॥ 29 ॥

T.B.3.7.4.7

रु॒द्रेभ्यो॑ य॒ज्ञं प्र॑ब्रवीमि । इ॒द॒म॒हं व॑रुण-ज्ये॒ष्ठेभ्यः॑ ।
 आ॒दि॒त्येभ्यो॑ य॒ज्ञं प्र॑ब्रवीमि । प॒य॒स्व॒ती-रो॑ष॒धयः॑ ।
 प॒य॒स्व॒द्वी॒रु॒धां प॒यः॑ । अ॒पां प॒य॒सो य॑त्प॒यः॑ ।
 ते॒न मा॑मिन्द्र॑ सꣳ सृ॒ज । अ॒ग्ने॑ व्र॒त॒प॒ते व्र॑तं च॒रि॑ष्यामि ।
 त॒च्छ॒क्ये॒यं त॒न्मे रा॑ध्य॒तां । वा॒यो व्र॑त॒प॒त आ॑दि॒त्य व्र॑त॒प॒ते ॥ 30 ॥

T.B.3.7.4.8

व्र॒तानां॑ व्र॒तप॑ते व्र॒तं च॑रिष्यामि । तच्छ॑क्येयं तन्मे॑ रा॒ध्यतां॑ ।
 इ॒मां प्रा॒चीमु॒दीचीं॑ । इ॒षमूर्ज॑मभि स॒ऽस्कृ॒तां ।
 बहु॒पर्णाम॑-शु॒ष्का॒ग्रां । ह॒रामि॑ प॒शुपा॑म॒हं ।
 यत्कृ॑ष्णो रू॒पं कृ॒त्वा । प्रा॒विश॑स्त्वं व॒नस्प॑तीन् ।
 तत॑स्त्वामे॑-कवि॒ऽश॒ति॒धा । संभ॑रामि सु॒संभृ॑ता ॥ 31 ॥

T.B.3.7.4.9

त्रीन् परि॑धी॒ऽस्ति॒स्रः॑ समि॒धः । य॒ज्ञायु॑रनु संच॒रान् ।
 उप॒वेषं॑ मे॒क्षणं॑ धृ॒ष्टिं । संभ॑रामि सु॒संभृ॑ता ।
 या जा॒ता ओ॒षध॑यः । दे॒वेभ्य॑ स्त्रि॒युगं॑ पु॒रा । तासां॑ पर्व॑ रा॒ध्यासं॑ ।
 परि॒स्तर॑-मा॒हरन् । अ॒पां मे॒ध्यं य॒ज्ञियं॑ । सदे॒वः शि॒वम॑स्तु मे ॥ 32 ॥

T.B.3.7.4.10

आच्छे॑त्ता वो मा रिषं । जी॒वानि॑ श॒रदः॑ श॒तं ।
 अ॒परि॑मितानां परि॒मिताः॑ । सं॒नह्ये॑ सु॒कृता॑यकं ।
 ए॒नो मा॑ निगां क॒तम॑च्च ना॒हं । पु॒नरु॑त्थाय बहु॒ला भ॑वन्तु ।

सकृ॒दाच्छि॒न्नं ब॒र्हि॒रू॒र्णामृ॑दु । स्यो॒नं पि॒तृ॒भ्यस्त्वा॑ भ॒राम्य॑हं ।
 अ॒स्मिन् थ॒सी॑दन्तु मे पि॒तरः॑ सो॒म्याः ।
 पि॒ताम॑हाः प्र॒पिता॑महाश्चानु॒गैः सह॑ ॥ 33 ॥

T.B.3.7.4.11

त्रि॒वृत् प॒लाशे॑ दर्भः । इ॒यान् प्रा॑देश सं॒मितः॑ ।
 य॒ज्ञे प॒वित्रं॑ पो॒तृ॒तमं॑ । प॒यो ह॒व्यं क॑रोतु मे । इ॒मौ प्रा॑णापा॒नौ ।
 य॒ज्ञस्या॑ङ्गानि सर्व॒शः । आ॒प्याय॑यन्तौ संच॒रतां॑ ।
 प॒वित्रे॑ ह॒व्यशो॑धने । प॒वित्रे॑ स्थो॒ वैष्ण॑वी ।
 वा॒युर्वा॑ मन॒सा पु॑नातु ॥ 34 ॥

T.B.3.7.4.12

अ॒यं प्रा॑णश्चा॒पानश्च॑ । य॒ज॒मा॒नम॑पि॒गच्छ॑तां । य॒ज्ञे ह्य॑भू॒तां पो॑तारौ ।
 प॒वित्रे॑ ह॒व्यशो॑धने । त्वया वे॒दिं वि॑विदुः पृथि॒वीं ।
 त्वया य॒ज्ञो जा॑यते वि॒श्वदा॑निः । अ॒च्छि॒द्रं य॒ज्ञम॑न्वेषि वि॒द्वान् ।

त्वया होता संतनोत्यर्थ मासान् । त्रयस्त्रिंशोऽसि तन्तूनां ।
पवित्रेण सहागहि ॥ 35 ॥

T.B.3.7.4.13

शिवेयं रज्जुरभिधानी ॥ अघ्निया-मुपसेवतां ।
अप्रस्रं साय यज्ञस्य । उखे उपदधाम्यहं ।
पशुभिः संनीतं बिभृतां । इन्द्राय शृतं दधि ।
उपवेषोऽसि यज्ञाय । त्वां परिवेषम-धारयन् ।
इन्द्राय हविः कृण्वन्तः । शिवः शग्मो भवासि नः ॥ 36 ॥

T.B.3.7.4.14

अमृन्मयं देवपात्रं । यज्ञस्यायुषि प्रयुज्यतां ।
तिरः पवित्रमति नीताः । आपो धारय माऽतिगुः ।
देवेन सवित्रोत्पूताः । वसोः सूर्यस्य रश्मिभिः ।
गां दोहपवित्रे रज्जुं ॥ सर्वा पात्राणि शुन्धत ।
एता आचरन्ति मधुमद्बुहानाः । प्रजावती-र्यशसो विश्वरूपाः ॥ 37 ॥

T.B.3.7.4.15

ब॒ह्वी॑ र्भ॒वन्ती॑रु॒प जा॑यमा॒नाः । इ॒ह व॒ इन्द्रो॑ रम॒यतु॑ गा॒वः ।
 पू॒षा स्थ॑ । अ॒यक्ष्मा॑ वः प्र॒जया॑ स॒ꣳ सृ॑जामि ।
 रा॒यस्पो॑षेण॒ बहु॑ला भ॒वन्तीः॑ । ऊ॒र्जं प॒यः पि॒न्वमा॑ना घृ॒तं च॑ ।
 जी॒वो जी॑वन्तीरु॒प वः॑ स॒देयं॑ । द्यौश्चे॒मं य॑ज्ञं पृ॒थिवी॑ च स॒न्दुहा॑तां ।
 धा॒ता सो॑मे॒न स॒ह वा॑ते॒न वा॒युः । य॒जमा॑नाय॒ द्रवि॑णं दधातु ॥ 38 ॥

T.B.3.7.4.16

उ॒थ्सं दु॑हन्ति क॒लशं॑ चतु॒र्बिलं॑ । इ॒डां दे॒वीं म॑धु॒मती॑ꣳ सु॒वर्वि॑दं ॥
 तदिन्द्रा॒ग्नी जि॑न्वतꣳ सू॒नृता॑वत् । तद् य॒जमा॑नम॒मृत॑त्वे दधातु ।
 का॒मधु॑क्षः प्र॒णो ब्रू॑हि । इन्द्रा॒य ह॑विरिन्द्रि॒यं ।
 अ॒मूं य॑स्यां दे॒वानां॑ ॥ म॒नुष्या॑णां प॒यो हि॑तं ।
 बहु॑ दु॒ग्धीन्द्रा॑य दे॒वेभ्यः॑ । ह॒व्य-मा॑प्यायतां पुनः ॥ 39 ॥

T.B.3.7.4.17

व॒थ्सो॑भ्यो॒ मनु॑ष्ये॒भ्यः॑ । पु॒नर्दो॑हाय॒ कल्प॑तां । य॒ज्ञस्य॑ सं॒तति॑रसि ।
य॒ज्ञस्य॑ त्वा सं॒तति॑मनु॒ संत॑नोमि । अ॒दस्त॑मसि वि॒ष्णवे॑ त्वा ।
य॒ज्ञाया॑पि द॒धाम्य॑हं । अ॒द्भिर॑रिक्तेन पा॒त्रेण॑ । याः पू॒ताः परि॑शोरते ।
अ॒यं प॒यः सोमं॑ कृ॒त्वा । स्वां॑ यो॒निम॑पि-गच्छतु ॥ 40 ॥

T.B.3.7.4.18

पर्ण॑वल्कः पवि॒त्रं । सौ॒म्यः सो॒माद्धि॑ निर्मि॒तः ।
इ॒मौ पर्णं॑ च॒ दर्भं॑ च । दे॒वानां॑ ह॒व्यशो॑धनौ । प्रा॒तर्वे॑षाय गो॒पाय॑ ।
वि॒ष्णो ह॒व्यं हि॑ रक्ष॒सि । उ॒भाव॑ग्नी॒ उप॑स्तृणते ।
दे॒वता॑ उप॒वस॑न्तु मे । अ॒हं ग्रा॒म्यानु॑प व॒सामि॑ ।
म॒ह्यं गो॑पतये प॒शून् ॥ 41 ॥

T.B.3.7.5.1

दे॒वा दे॒वेषु॑ परा॒क्रम॑ध्वं । प्र॒थमा॑ द्विती॒येषु॑ । द्विती॒या-स्तृ॑ती॒येषु॑ ।
त्रि॒रेका॑दशा इ॒ह मा॑ऽवत । इ॒दं श॑के॒यं य॒दिदं॑ करोमि ।
आ॒त्मा करो॑त्वात्म॒ने । इ॒दं करि॑ष्ये भेष॒जं । इ॒दं मे॑ विश्व भेष॒जा ।

अ॒श्वि॒ना प्रा॒वतं॑ यु॒वं । इ॒दम॒हं॑ से॒नाया॑ अ॒भी॒त्व॒र्यै ॥ 42 ॥

T.B.3.7.5.2

मु॒खम॑पो॒हामि॑ । सू॒र्य ज्यो॑ति॒ वि॒भा॒हि । म॒हत॑ इ॒न्द्रि॒याय॑ ।
आ॒प्या॒यतां॑ घृ॒तयो॑निः । अ॒ग्नि॒र् ह॒व्या-ऽनु॑म॒न्यतां॑ ।
ख॒मङ्क्ष॑व॒ त्वच॑मङ्क्ष॒व । सु॒रूपं॑ त्वा वसु॒विदं॑ ॥ प॒शूनां॑ ते॒जसा॑ ।
अ॒ग्नये॑ जुष्ट॒मभि॑-घा॒रयामि॑ । स्यो॒नं ते॑ स॒दनं॑ करो॒मि ॥ 43 ॥

T.B.3.7.5.3

घृ॒तस्य॑ धा॒रया॑ सु॒शैवं॑ क॒ल्पयामि॑ । तस्मिन्-॑थ्सी॒दामृ॑ते॒ प्र॒ति॒तिष्ठ॑ ।
व्री॒हीणां॑ मे॒ध सु॒मन॑स्यमा॒नः । आ॒र्द्रः प्र॑थ॒स्नुर् भु॑वन॒स्य गो॒पाः ।
शृ॒त उ॒थ्स्ना॑ति॒ जनि॑ता म॒तीनां॑ । यस्त॑ आ॒त्मा प॑शुषु प्र॒विष्टः॑ ।
दे॒वानां॑ वि॒ष्टाम॑नु॒ यो वि॑त॒स्थे । आ॒त्म॒न्वान् थ्सो॑म घृ॒तवान्॑ ।
हि भू॒त्वा । दे॒वान् ग॑च्छ सु॒वर्वि॑न्द॒ यज॑मा॒नाय॑ म॒ह्यं ।
इ॒रा भू॑तिः पृ॒थि॒व्यै र॒सो मो॑त्क्र॒मीत् ॥ 44 ॥

T.B.3.7.5.4

दे॒वाः॑ पि॒तरः॑ पि॒तरो॑ दे॒वाः॑ । यो॑ऽह॒मस्मि॑ स सन्॒ यजे॑ ।
यस्या॑स्मि॒ न त॒मन्त॑रेमि । स्वं॑ म॒ इष्ट॑ऽ स्वं॒ दत्तं॑ ।
स्वं॒ पूर्त॑ऽ स्वं॒ श्रान्तं॑ । स्वं॒ हुतं॑ । तस्य॑ मे॒ऽग्नि॑-रुप॒द्रष्टा॑ ।
वा॒युरु॑प॒श्रोता॑ । आ॒दि॒त्यो-ऽनु॑ख्याता । द्यौः॑ पि॒ता ॥ 45 ॥

T.B.3.7.5.5

पृ॒थि॒वी मा॒ता । प्र॒जाप॑तिर् बन्धुः । य ए॒वास्मि॑ स सन्॒ यजे॑ ।
मा भे॒र्मा सँ॑वि॒क्था मा॒ त्वा हि॑ऽसिषं । मा ते ते॒जो-ऽप॑क्रमीत् ।
भर॑तमु॒द्धरे॑ मनु॒षिञ्च॑ । अ॒वदा॑नानि ते प्र॒त्यव॑दास्यामि ।
नम॑स्ते अस्तु मा मा हि॑ऽसीः । यद॒वदा॑नानि तेऽव॒द्यन् ।
वि॒लो-मा॑का॒र्ष-मा॒त्मनः॑ ॥ 46 ॥

T.B.3.7.5.6

आ॒ज्ये॑न प्र॒त्यन॑ज्म्ये॒नत् । तत्त॑ आ॒प्याय॑तां पुनः ।
अ॒ज्यायो॑ यवमा॒न्नात् । आ॒व्या॒धात् कृ॑त्यतामिदं ।
माऽरू॑रुपाम॒ यज्ञ॑स्य । शु॒द्धऽ स्वि॑ष्टमिदं॒ हविः॑ ।

मनु॑ना दृ॒ष्टां घृ॒तप॑दीं । मि॒त्रावरु॑ण-समी॒रितां॑ ।
 दक्षि॑णा-र्धाद॒संभि॑न्दन् । अव॑द्या-म्ये॒कतो॑ मु॒खां ॥ 47 ॥

T.B.3.7.5.7

इडे॑ भा॒गं जु॑षस्व नः । जि॒न्व गा जि॑न्वा॒र्वतः॑ ।
 तस्या॑स्ते भक्षि॒वाणः॑ स्याम । सर्वा॑त्मानः॒ सर्व॑गणाः ।
 ब्र॒ध्न पि॑न्वस्व । दद॑तो मे॒ मा क्षा॑यि । कु॒र्वतो॑ मे॒ मोप॑दसत् ।
 दि॒शां क्लृ॑प्तिरसि । दि॒शो मे॒ कल्प॑न्तां । कल्प॑न्तां मे॒ दि॒शः ॥ 48 ॥

T.B.3.7.5.8

दै॒वीश्च॑ मा॒नुषी॑श्च । अ॒होरा॑त्रे मे॒ कल्पे॑तां । अ॒र्धमा॑सा मे॒ कल्प॑न्तां ।
 मा॒सा मे॒ कल्प॑न्तां । ऋ॒तवो॑ मे॒ कल्प॑न्तां । सँ॒वत्स॑रो मे॒ कल्प॑तां ।
 क्लृ॑प्तिरसि कल्प॑तां मे॒ । आ॒शानां॑ त्वाऽऽशा॒पाले॑भ्यः ।
 च॒तुर्भ्यो॑ अ॒मृते॑भ्यः । इ॒दं भू॒तस्या॑-ध्यक्षे॑भ्यः ॥ 49 ॥

T.B.3.7.5.9

वि॒धेम॑ ह॒विषा॑ व॒यं । भ॒जतां॑ भा॒गी भा॒गं । माऽभा॒गो-ऽभ॑क्त ।
 नि॒रभा॒गं भ॒जामः॑ । अ॒पस्मि॑न्व । ओ॒षधी॑र्जि॒न्व । द्वि॒पात्पा॑हि ।
 चतु॑ष्पाद॒व । दि॒वो वृ॒ष्टिमे॑रय । ब्रा॒ह्मणा॑ना-मि॒दं ह॒विः ॥ 50 ॥

T.B.3.7.5.10

सो॒म्यानां॑ ऽ सो॒मपी॑थिनां॑ । नि॒र्भक्तो॑ ब्रा॒ह्मणः॑ । ने॒हा-ब्रा॒ह्मण॑स्यास्ति ।
 स॒मङ्क्तां॑ ब॒र्हि ह॒विषा॑ घृ॒तेन॑ । स॒मादि॑त्यै॒ र्वसु॑भिः॒ सं म॒रुद्भिः॑ ।
 स॒मिन्द्रे॑ण॒ विश्वे॑भिर् दे॒वेभि॑रङ्क्तां॑ । दि॒व्यं न॒भो ग॑च्छतु॒ यथ् स्वाहा॑ ।
 इ॒न्द्राणी॑ वा वि॒धवा॑ भू॒यासं॑ । अ॒दि॒तिरि॑व सु॒पुत्रा॑ ।
 अ॒स्थू॒रि त्वा॑ गा॒र्हप॑त्य ॥ 51 ॥

T.B.3.7.5.11

उ॒पनि॑षदे सु॒प्रजा॑स्त्वाय॑ । सं प॒त्नी प॒त्या सु॒कृते॑न गच्छतां॑ ।
 य॒ज्ञस्य॑ यु॒क्तौ धु॒र्याव॑भूतां॑ । सं॒जाना॑नौ वि॒जह॑ता-म॒रातीः॑ ।
 दि॒वि ज्यो॑ति॒रज-र॑मा॒रभे॑तां॑ । द॒श ते॑ त॒नुवो॑ य॒ज्ञ य॒ज्ञियाः॑ ।
 ताः प्री॑णातु॒ यज॑मानो॒ घृते॑न । ना॒रि॒ष्ठयोः॑ प्र॒शिष॑मीड॒मानः॑ ।

दे॒वानां॑ दै॒व्येऽपि॑ यज॑मानो-ऽमृतो॑-ऽभूत् ।
 यं वाँ दे॒वा अक॑ल्पयन् ॥ 52 ॥

T.B.3.7.5.12

ऊ॒र्जो भा॒गः श॑तक्र॒तू । ए॒तद्वां ते॑न प्री॒णानि॑ ।
 ते॑न तृ॒प्यत॑मः-ह॒हौ । अ॒हं दे॒वानां॑ सु॒कृता॑मस्मि लो॒के ।
 ममे॑दमिष्टं न मि॒थु भ॑वाति । अ॒हं ना॑रि॒ष्टा-व॑नुय॒जामि॑ वि॒द्वान् ।
 यदा॑भ्या-मिन्द्रो॑ अ॒दधा-द्वा॒गधे॑यं । अ॒दार-सृ॑द्धव॒त दे॒व सो॒म ।
 अ॒स्मिन् य॒ज्ञे म॑रुतो मृ॒डता॑ नः ।
 मा नो॑ वि॒दद॒भि भा॒मो अ॑श॒स्तिः ॥ 53 ॥

T.B.3.7.5.13

मा नो॑ वि॒दद्वृ॒जना॑ द्वे॒ष्या या॑ । ऋ॒षभं॑ वा॒जिनं॑ व॒यं ।
 पूर्ण॑मा॒सं य॑जामहे । स नो॑ दो॒हता॑ सु॒वीर्यं॑ ।
 रा॒यस्पोष॑ सह॒स्रिणं॑ । प्रा॒णाय॑ सु॒राध॑से । पूर्ण॑मा॒साय॑ स्वाहा॑ ।

अ॒मा॒वा॒स्या॒ सु॒भ॒गा॒ सु॒शै॒वा॒ ॥ धे॒नु॒रि॒व॒ भू॒य॒ आ॒प्या॒य॒मा॒ना॒ ।
सा॒ नो॒ दो॒ह॒ता॒ सु॒वी॒र्यं॑ ॥ रा॒य॒स्पो॒ष॒ सह॒स्रि॒णं॑ ॥
अ॒पा॒ना॒य॒ सु॒रा॒ध॒से॒ । अ॒मा॒वा॒स्या॒यै॒ स्वा॒हा॒ ॥
अ॒भि॒स्तृ॒णी॒हि॒ परि॒धे॒हि॒ वे॒दिं॑ ॥ जा॒मिं॒ मा॒ हि॒सी॒ र॒मु॒या॒ श॒या॒ना॒ ।
हो॒तृ॒ष॒द॒ना॒ ह॒रि॒ताः॒ सु॒व॒र्णाः॑ ॥ नि॒ष्का॒ इ॒मे॒ य॒ज॒मा॒न॒स्य॒ ब्र॒ध्ने॒ ॥ 54 ॥

T.B.3.7.6.1

परि॒स्तृ॒णी॒त॒ परि॒ध॒त्ता॒ग्निं॑ ॥ परि॒हि॒तो॒-ऽग्नि॒ र्य॒ज॒मा॒नं॑ भु॒नक्तु॑ ।
अ॒पा॒ र॒स॒ ओ॒ष॒धी॒ना॒ सु॒व॒र्णः॑ ॥
नि॒ष्का॒ इ॒मे॒ य॒ज॒मा॒न॒स्य॒ स॒न्तु॒ का॒म॒दु॒घाः॑ ॥
अ॒मु॒त्रा॒मु॒ष्मिन् लो॒के॒ । भू॒प॒ते॒ भु॒व॒न॒प॒ते॒ । म॒ह॒तो॒ भू॒त॒स्य॑ प॒ते॒ ।
ब्र॒ह्मा॒णं॒ त्वा॒ वृ॒णी॒महे॑ ॥ अ॒हं॒ भू॒प॒ति॒रहं॑ भु॒व॒न॒प॒तिः॑ ॥
अ॒हं॒ म॒ह॒तो॒ भू॒त॒स्य॑ प॒तिः॑ ॥ 55 ॥

T.B.3.7.6.2

दे॒वे॒न॒ स॒वि॒त्रा॒ प्र॒सू॒त॒ आ॒र्त्वि॒ज्यं॑ क॒रि॒ष्या॒मि॒ ।
दे॒व॒ स॒वि॒त॒रे॒तं॑ त्वा॒ वृ॒ण॒ते॒ । बृ॒ह॒स्प॒तिं॑ दै॒व्यं॑ ब्र॒ह्मा॒णं॑ ॥

तद॒हं॑ म॒न॒से॑ प्र॒ब्र॒वी॒मि॑ । म॒नो॑ गा॒य॒त्रि॒यै॑ । गा॒य॒त्री॒ त्रि॒ष्टु॒भे॑ ॥
 त्रि॒ष्टु॒ब् जग॑त्यै । जग॑त्यनु॒ष्टु॒भे॑ ॥ अनु॒ष्टु॒क् प॒ङ्क्त्यै॑ ।
 प॒ङ्क्तिः॑ प्र॒जाप॑तये ॥ 56 ॥

T.B.3.7.6.3

प्र॒जाप॑ति वि॒श्वे॑भ्यो दे॒वेभ्यः॑ । वि॒श्वे॑ दे॒वा बृ॒ह॒स्प॑तये ।
 बृ॒ह॒स्प॑ति ब्र॒ह्म॑णे । ब्र॒ह्म॑ भू॒र्भु॒वस्सु॑वः ।
 बृ॒ह॒स्प॑ति दे॒वानां॑ ब्र॒ह्मा । अ॒हं म॒नु॒ष्या॑णां ।
 बृ॒ह॒स्प॑ते य॒ज्ञं गो॑पाय । इ॒दं तस्मै॑ ह॒र्म्यं क॑रोमि ।
 यो वो॑ दे॒वाश्च॑रति ब्र॒ह्म॑चर्यं । मे॒धा॒वी दि॒क्षु म॑न॒सा त॑पस्वी ॥ 57 ॥

T.B.3.7.6.4

अ॒न्त॒र्दू॒तश्च॑रति मा॒नु॒षी॑षु । च॒तुः॑ शि॒ख॒ण्डा॑ यु॒व॒तिः सु॒पे॒शाः॑ ।
 घृ॒तप्र॑तीका भु॒वन॑स्य म॒ध्ये॑ । म॒र्म॒ज्य॑मा॒ना म॑ह॒ते सौ॒भ॒गाय॑ ।
 म॒ह्यं धु॑क्ष्व यज॑मा॒नाय॑ का॒मान् । भू॒मि॑ भू॒त्वा म॑हि॒मानं॑ पु॒पो॒ष ।
 ततो॑ दे॒वी वर्ध॑यते प॒याँ॒सि । य॒ज्ञिया॑ य॒ज्ञं वि॑च॒यन्ति॑ शं॒च ।

ओ॒ष॒धी॒राप॑ इ॒ह श॑क्वरीश्च । यो मा॑ ह॒दा मन॑सा यश्च॑ वा॒चा ॥ 58 ॥

T.B.3.7.6.5

यो ब्र॑ह्म॒णा क॑र्म॒णा द्वेष्टि॑ दे॒वाः । यः श्रु॑तेन हृद॒येने॑ष्णता च ।
तस्ये॑न्द्र॒ वज्रे॑ण शि॒रश्छि॑नन्नि । ऊ॒र्णामृ॑दु प्रथ॒मान॑ स्यो॒नं ।
दे॒वेभ्यो॑ जुष्टं॒ स॒दनाय॑ ब॒र्हिः । सु॒वर्गे लो॒के यज॑मानं॒ हि धे॑हि ।
मां ना॑कस्य पृ॒ष्ठे प॑रमे व्योमन् । चतुः शि॒खण्डा॑ यु॒वतिः॑ सु॒पेशाः॑ ।
घृ॒तप्र॑तीका व॒युना॑नि वस्ते । सा स्ती॒र्यमा॑णा म॒हते॑ सौ॒भगा॑य ॥ 59 ॥

T.B.3.7.6.6

सा मे॑ धु॒क्ष्व यज॑मानाय का॒मान् । शि॒वा च मे॑ श॒ग्मा चै॑धि ।
स्यो॒ना च मे॑ सु॒षदा॑ चै॒धि । ऊ॒र्जस्व॑ती च मे॑ प॒यस्व॑ती चै॒धि ।
इ॒षमूर्जं॑ मे॑ पि॒न्वस्व॑ । ब्र॒ह्मते॑जो मे॑ पि॒न्वस्व॑ ।
क्ष॒त्रमो॑जो मे॑ पि॒न्वस्व॑ । वि॒शं पु॑ष्टिं मे॑ पि॒न्वस्व॑ ।
आयु॑र॒न्नाद्यं॑ मे॑ पि॒न्वस्व॑ । प्र॒जां प॑शून् मे॑ पि॒न्वस्व॑ ॥ 60 ॥

T.B.3.7.6.7

अ॒स्मिन् य॒ज्ञ उ॒प भू॒य इ॒न्नु मे॑ । अ॒वि॒क्षो॒भाय॑ प॒रि॒धी॒न्द॒धामि॑ ।
 ध॒र्ता ध॒रु॒णो ध॒री॒यान् । अ॒ग्नि॒र्द्वेषा॑ँ॒सि नि॒रि॒तो नु॒दा॒तै ।
 वि॒च्छि॒न॒न् वि॒धृ॒ती॒भ्याँ स॒प॒त्नान् ।
 जा॒तान् भ्रा॒तृ॒व्यान् ये च॑ ज॒नि॒ष्यमा॑णाः ।
 वि॒शो य॒न्त्रा॒भ्यां वि॒ध॒माम्ये॑नान् । अ॒हँ॒स्वाना॑-मु॒त्त॒मोऽसा॑नि दे॒वाः ।
 वि॒शो य॒न्त्रे नु॒द॒माने॑ अ॒रा॒तिं । वि॒श्वं पा॒प्मान॑म॒मतिं॑ दु॒र्म॒रायुं॑ ॥ 61 ॥

T.B.3.7.6.8

सी॒द॒न्ती दे॒वी सु॒कृ॒तस्य॑ लो॒के । धृ॒ती॒ स्थो वि॒धृ॒ती स्व॒धृ॒ती ।
 प्रा॒णा॒न्म॒यि धा॑रय॒तं । प्र॒जां म॒यि धा॑रय॒तं । प॒शू॒न्म॒यि धा॑रय॒तं ।
 अ॒यं प्र॒स्तर॑ उ॒भय॑स्य ध॒र्ता । ध॒र्ता प्र॒या॒जाना॑-मु॒ता॒नू॒या॒जानां॑ ।
 स दा॒धार स॒मि॒धो वि॒श्वरू॑पाः । तस्मि॒न्त् सु॒चो अ॒ध्या-सा॑दयामि ।
 आ॒रो॒ह प॒थो जु॒हु दे॒व॒या॒नान् ॥ 62 ॥

T.B.3.7.6.9

य॒त्र॒र्ष॒यः॑ प्र॒थ॒म॒जा॒ ये॑ पु॒रा॒णाः॑ । हि॒र॒ण्य॑-प॒क्षाऽजि॒रा सं॒भृ॒ताङ्गा॑ ।
व॒हा॒सि॒ मा सु॒कृ॒तां य॑त्र लो॒काः॑ । अ॒वा॒हं बा॒ध उप॒भृ॒ता स॒प॒त्नान्॑ ।
जा॒तान् भ्रा॒तृ॒व्यान्॒ ये च॑ ज॒नि॒ष्य॒माणाः॑ । दो॒है य॒ज्ञं
सु॒दु॒घा॒मि॒व धे॒नुं । अ॒ह॒मु॒त्त॒रो भू॒यासं॑ । अ॒ध॒रे म॒थ्स॒प॒त्नाः॑ ।
यो मा॑ वा॒चा म॒न॒सा दु॒र्म॒रा॒युः॑ । हृ॒दा-ऽरा॒ती॒या-द॒भि॒दा॒स-द॒ग्ने॑ ॥ 63 ॥

T.B.3.7.6.10

इ॒द॒म॒स्य॑ चि॒त्त॒म॒ध॒रं ध्रु॒वा॒याः॑ । अ॒ह॒मु॒त्त॒रो भू॒यासं॑ ।
अ॒ध॒रे म॒थ्स॒प॒त्नाः॑ । ऋ॒ष॒भोऽसि॑ शा॒क्व॒रः॑ । घृ॒ता॒ची॒नां सू॒नुः॑ ।
प्रि॒ये॒ण ना॒म्ना प्रि॒ये स॒द॒सि॑ सी॒द । स्यो॒नो मे॑ सी॒द सु॒ष॒दः॑
पृ॒थि॒व्यां । प्र॒थ॒यि प्र॒ज॒या प॒शु॒भिः॑ सु॒व॒र्गे लो॒के ।
दि॒वि सी॒द पृ॒थि॒व्या-म॒न्त॒रि॒क्षे॑ । अ॒ह॒मु॒त्त॒रो भू॒यासं॑ ॥ 64 ॥

T.B.3.7.6.11

अ॒ध॒रे म॒थ्स॒प॒त्नाः॑ । इ॒यं स्था॒ली घृ॒त॒स्य॑ पूर्णा॑ ।
अ॒च्छि॒न्न॒प॒याः श॒त॒धा॒र उ॒त्सः॑ । मा॒रु॒ते॒न श॒र्म॒णा दै॒व्ये॑न ।

य॒ज्ञो॑ऽसि॒ सर्व॑तः॒ श्रि॒तः । सर्व॑तो मां भू॒तं भ॑विष्य-च्छ्र॒यतां॑ ।
 श॒तं मे॑ स॒न्त्वाशि॑षः । स॒हस्रं॑ मे स॒न्तु सू॒नृताः॑ ॥
 इ॒राव॑तीः प॒शुम॑तीः । प्र॒जाप॑तिरसि॒ सर्व॑तः॒ श्रि॒तः ॥ 65 ॥

T.B.3.7.6.12

सर्व॑तो मां भू॒तं भ॑विष्य-च्छ्र॒यतां॑ । श॒तं मे॑ स॒न्त्वाशि॑षः ।
 स॒हस्रं॑ मे स॒न्तु सू॒नृताः॑ । इ॒राव॑तीः प॒शुम॑तीः ।
 इ॒दमि॑न्द्रि॒य-म॑मृतं॒ वी॒र्यं॑ ॥ अ॒नेने॑न्द्राय प॒शवो॑-ऽचि॒किथ्स॑न् ।
 तेन॑ दे॒वा अव॑तोप मां । इ॒हो॒षमू॒र्जं य॑शः स॒ह ओ॒जः स॑नेयं ।
 श॒तं म॑यि श्र॒यतां॑ । यत् पृ॒थि॒वी-म॑च॒रत्तत्-प्र॑विष्टं ॥ 66 ॥

T.B.3.7.6.13

ये॒नासि॑ञ्चद् ब॒लमि॑न्द्रे प्र॒जाप॑तिः । इ॒दं तच्छु॑क्रं म॒धु वा॒जिनी॑वत् ।
 ये॒नो-परि॑ष्ठादधि॒नोन्-म॑हेन्द्रं । दधि॑ मां धि॒नोतु॑ ।
 अ॒यं वे॒दः पृ॒थि॒वी-म॑न्वविन्दत् । गु॒हा स॒तीं ग॑ह॒ने ग॑ह्वरेषु ।

स वि॒न्दतु॑ यज॑मानाय लो॒कं । अ॒च्छि॒द्रं य॑ज्ञं भू॒रि॒कर्मा॑ करोतु ।
 अयं य॑ज्ञः सम॑सद॒द्ध-वि॒ष्मान् ।
 ऋ॒चा सा॒म्ना य॑जुषा दे॒वता॑भिः ॥ 67

T.B.3.7.6.14

तेन॑ लो॒कान्त् सूर्य॑वतो जये॑म । इन्द्र॑स्य स॒ख्य-म॑मृत॒त्व-म॑श्यां ।
 यो नः॑ कनी॑य इ॒ह का॑मया॒तै । अ॒स्मिन् य॑ज्ञे यज॑मानाय म॒ह्यं ।
 अप॑ तमिन्द्रा॒ग्नी भु॑वनान्नुदे॒तां । अ॒हं प्र॑जां वी॒रव॑तीं वि॒देय॑ ।
 अ॒ग्ने वा॑जजि॒त् । वा॒जं त्वा स॑रिष्यन्तं ॥
 वा॒जं जे॑ष्यन्तं । वा॒जिनं॑ वा॒जजि॑तं ॥ 68 ॥

T.B.3.7.6.15

वा॒जजि॑त्यायै सं॒मा॒र्जि॑म् । अ॒ग्नि॑मन्ना-द॒मन्ना॑द्याय ।
 उ॒प॒हूतो॑ द्यौः पि॒ता । उ॒प मां॑ द्यौः पि॒ता ह॑वतां ।
 अ॒ग्नि-रा॒ग्नी॑द्धा॒त् । आ॒यु॒षे वर्च॑से । जी॒वा॒त्वै पु॑ण्याय ।
 उ॒प॒हूता॑ पृ॒थि॒वी मा॒ता । उ॒प मां॑ मा॒ता पृ॒थि॒वी ह॑वतां ।

अ॒ग्नि-रा॒ग्नी॑द्धा॒त् ॥ 69 ॥

T.B.3.7.6.16

आ॒यु॒षे॒ वर्च॑से । जी॒वा॒त्वै पु॒ण्या॒य । म॒नो॒ ज्यो॑ति॒ र्जु॒षता॑मा॒ज्यं॑ ।
 वि॒च्छि॒न्नं य॒ज्ञं॑ स॒मि॒मं द॑धातु । बृ॒ह॒स्प॒ति-स्त॑नु॒तामि॒मं नः॑ ।
 वि॒श्वे दे॒वा इ॒ह मा॑दयन्तां । यं ते॒ अ॒ग्न आ॑वृ॒शामि॑ ।
 अ॒हं वा॑ क्षि॒पित॑श्चरन् । प्र॒जां च॒ तस्य॑ मूलं च ।
 नी॒चैर्दे॒वा नि॑वृ॒श्चत॑ ॥ 70 ॥

T.B.3.7.6.17

अ॒ग्ने यो नो॑ऽभि॒दा॒सति॑ । स॒मा॒नो यश्च॑ नि॒ष्ट्यः॑ ।
 इ॒ध्मस्ये॑व प्र॒क्षाय॑तः । मा तस्यो॒च्छे॑षि किं॒चन॑ ।
 यो मां॑ द्वेष्टि॒ जा॒तवे॑दः । यं चा॒हं द्वे॑ष्मि यश्च॒ मां ।
 सर्वा॑ऽस्तान॒ग्ने सं॑द॒ह । या॑ऽश्वा॒हं द्वे॑ष्मि ये च॒ मां ।
 अ॒ग्ने वा॑ज॒जित् । वा॒जं त्वा॑ स॒सृवा॑ऽसं ॥ 71 ॥

T.B.3.7.6.18

वा॒जं जि॒गिवा॑ꣳसं॑ । वा॒जिनं॑ वा॒जजि॑तं॑ । वा॒जजि॑त्यायै॑ संमा॑र्जिम् ।
 अ॒ग्नि-म॒न्नाद॑-म॒न्नाद्या॑य । वेदि॑र् ब॒र्हिः शृ॒तꣳ ह॒विः ।
 इ॒ध्मः परि॑धयः॒ स्रुचः॑ । आ॒ज्यं य॑ज्ञ ऋ॒चो य॑जुः ।
 या॒ज्याश्च॑ व॒षट्का॑राः । सं मे॑ सं॒नत॑यो नम॒न्तां ।
 इ॒ध्मसं॑-न॒हने॑ हु॒ते ॥ 72 ॥

T.B.3.7.6.19

दि॒वः खी॑लोऽव॒ततः॑ । पृ॒थि॒व्या अ॒ध्युत्थि॑तः । तेना॑ स॒हस्र॑काण्डेन ।
 द्विष॑न्तꣳ शोच॑याम॒सि । द्विष॑न्मे बहु॑ शोच॑तु ।
 ओष॑धे मो अ॒हꣳ शु॒चं । य॑ज्ञ नम॒स्ते य॑ज्ञ ।
 नमो॑ नम॒श्च ते॑ य॒ज्ञ । शि॒वेन॑ मे॒ संति॑ष्ठस्व ।
 स्यो॒नेन॑ मे॒ संति॑ष्ठस्व ॥ 73 ॥

T.B.3.7.6.20

सु॒भूतेन॑ मे॒ संति॑ष्ठस्व । ब्र॒ह्मव॑र्च॒सेन॑ मे॒ संति॑ष्ठस्व ।
 य॒ज्ञस्य॑र्द्धि॒मनु॑ संति॑ष्ठस्व । उप॑ ते य॒ज्ञ नमः॑ ।

उप॑ ते नमः॑ । उप॑ ते नमः॑ । त्रि॒ष्फली॑ क्रि॒यमा॑णानां ।

यो न्य॒ङ्गो अव॑शिष्यते । रक्ष॑सां भा॒गधे॑यं ।

आप॑स्तत् प्रव॒हता॑दितः॥ 74

T.B.3.7.6.21

उ॒लू॒खले॑ मु॒सले॑ यच्च॑ शूर्पे॑ । आ॒शि॒श्लेष॑ दू॒षदि॑ यत्क॒पाले॑ ।

अ॒व॒प्रुषो॑ वि॒प्रुषः॑ सँय॑जामि । वि॒श्वे दे॒वा ह॒विरि॑दं जु॒षन्तां॑ ।

य॒ज्ञे या वि॒प्रुषः॑ सन्ति॑ ब॒ह्वीः ।

अ॒ग्नौ ताः॑ सर्वाः॑ स्वि॒ष्टाः सु॒हुता॑ जुहोमि । उ॒द्यन्न॑द्य मि॒त्रम॑हः ।

स॒प॒त्नान्मे॑ अ॒नीन॑शः । दि॒वैनान्॑ वि॒द्युता॑ जहि ।

नि॒म्रोच॑न्न॒धरान्॑ कृ॒धि ॥ 75 ॥

T.B.3.7.6.22

उ॒द्यन्न॑द्य वि नो॑ भज । पि॒ता पु॒त्रेभ्यो॑ यथा॑ । दी॒र्घायु॑त्वस्य॑ हे॒शिषे॑ ।

तस्य॑ नो दे॒हि सूर्य॑ । उ॒द्यन्न॑द्य मि॒त्रम॑हः । आ॒रोह॑न्नु॒त्तरां॑ दि॒वं ।

ह॒द्रो॒गं मम॑ सूर्य॑ । ह॒रि॒माणं॑ च नाशय । शु॒क्लेषु॑ मे ह॒रि॒माणं॑ ।

रोपणाकासु दध्मसि ॥ 76 ॥

T.B.3.7.6.23

अथो॑ हारिद्र॑वेषु॑ मे॑ । हरि॑माणं॒ निद॑ध्मसि । उद॑गादय-मा॑दित्यः ।
विश्वे॑न सह॒सा सह॑ । द्विष॑न्तं मम॒ रन्ध॑यन् । मो॒ अहं॑ द्विष॒तो र॑धं ।
यो नः॑ श॒पाद॑श॒पतः॑ । यश्च॑ नः॑ श॒पतः॑ श॒पात् ॥
उषा॑श्च तस्मै॑ नि॒मृक्च॑ । सर्वं॑ पा॒पञ् समू॑हतां ॥ 77 ॥

T.B.3.7.6.24

यो नः॑ स॒पत्नो॑ यो रणः॑ । मर्तो॑ऽभिदा॒सति॑ दे॒वाः । इ॒ध्मस्ये॑व प्र॒क्षाय॑तः ।
मा तस्यो॑च्छे॒षि किञ्च॑न । अव॑सृष्टः प॒राप॑त । श॒रो ब्र॑ह्मसञ् शि॒तः ।
गच्छा॑ऽमि॒त्रान् प्र॑विश । मै॒षां कं॑चनोच्छि॒षः ॥ 78 ॥

T.B.3.7.7.1

सक्षे॑दं पश्य । वि॒धर्त॑रि॒दं पश्य॑ । नाके॑दं पश्य । र॒मतिः॑ प॒निष्ठा ।
ऋ॒तं ँ॒वर्षि॑ष्ठं । अ॒मृता॑ या॒न्याहुः॑ । सूर्यो॑ वरि॒ष्ठो अक्ष॑भिर्वि॒भाति॑ ।
अनु॑ द्यावापृथि॒वी दे॒वपु॑त्रे । दी॒क्षाऽसि॑ तप॒सो योनिः॑ ।
तपो॑ऽसि ब्र॒ह्मणो॑ योनिः ॥ 79 ॥

T.B.3.7.7.2

ब्र॒ह्मा॒सि॒ क्ष॒त्र॒स्य॒ यो॒निः॑ । क्ष॒त्र॒म॒स्य॒त॒स्य॒ यो॒निः॑ ।
 ऋ॒त॒म॒सि॒ भू॒रा॒र॒भे॑ । श्र॒द्धां॒ म॒न॒सा॒ । दी॒क्षां॒ तप॑सा ।
 वि॒श्व॒स्य॒ भु॒व॒न॒स्याधि॑ प॒त्नीं॑ । स॒र्वे॒ का॒मा॒ यज॑मानस्य सन्तु ।
 वा॒तं॒ प्रा॒णं॒ म॒न॒सा॒ ऽन्वा॑रभामहे । प्र॒जा॒प॒तिं॒ यो॒ भु॒व॒न॒स्य॒ गो॒पाः॑ ।
 स॒ नो॒ मृ॒त्यो॒स्त्रा॒य॒तां॒ पा॒त्व॒ह॒सः॑ ॥ 80 ॥

T.B.3.7.7.3

ज्यो॒ग्जी॒वा॒ ज॒रा॒म॒शी॒म॒हि॑ । इ॒न्द्र॒ शा॒क्व॒र॒ गा॒य॒त्रीं॑ प्रपद्ये ।
 तां॑ ते॒ यु॒न॒ज्मि॑ । इ॒न्द्र॒ शा॒क्व॒र॒ त्रि॒ष्टु॒भं॑ प्रपद्ये । तां॑ ते॒ यु॒न॒ज्मि॑ ।
 इ॒न्द्र॒ शा॒क्व॒र॒ ज॒ग॒तीं॑ प्रपद्ये । तां॑ ते॒ यु॒न॒ज्मि॑ ।
 इ॒न्द्र॒ शा॒क्व॒रा॒नु॒ष्टु॒भं॑ प्रपद्ये । तां॑ ते॒ यु॒न॒ज्मि॑ ।
 इ॒न्द्र॒ शा॒क्व॒र॒ प॒ङ्क्तिं॑ प्रपद्ये ॥ 81 ॥

T.B.3.7.7.4

तां ते॑ यु॒नज्मि॑ । आ॒ऽहं दी॒क्षाम॑रुह-मृ॒तस्य॑ पत्नीं॑ ।
 गा॒य॒त्रेण॑ छ॒न्दसा॑ ब्र॒ह्मणा॑ च । ऋ॒तं स॒त्येऽधा॑यि ।
 स॒त्यमृ॑तेऽधा॑यि । ऋ॒तं च॑ मे स॒त्यं चा॑भूतां ।
 ज्योति॑रभू॒वः सु॒व॒रग॑मं । सु॒व॒र्गं लो॒कं ना॑कस्य॑ पृ॒ष्ठं ।
 ब्र॒ध्नस्य॑ वि॒ष्टप॑मगमं । पृ॒थि॒वी दी॒क्षा ॥ 82 ॥

T.B.3.7.7.5

तया॑ऽग्नि दी॒क्षया॑ दी॒क्षितः॑ । यया॑ऽग्नि दी॒क्षया॑ दी॒क्षितः॑ ।
 तया॑ त्वा दी॒क्षया॑ दी॒क्षयामि॑ । अ॒न्तरि॑क्षं दी॒क्षा ।
 तया॑ वा॒यु दी॒क्षया॑ दी॒क्षितः॑ । यया॑ वा॒यु दी॒क्षया॑ दी॒क्षितः॑ ।
 तया॑ त्वा दी॒क्षया॑ दी॒क्षयामि॑ । द्यौ दी॒क्षा ।
 तया॑ऽऽदि॒त्यो दी॒क्षया॑ दी॒क्षितः॑ । यया॑ऽऽदि॒त्यो दी॒क्षया॑ दी॒क्षितः॑ ॥ 83 ॥

T.B.3.7.7.6

तया॑ त्वा दी॒क्षया॑ दी॒क्षयामि॑ । दि॒शो दी॒क्षा ।
 तया॑ च॒न्द्र॒मा दी॒क्षया॑ दी॒क्षितः॑ ।

यया॑ च॒न्द्र॒मा दी॒क्षया॑ दी॒क्षितः॑ । तया॑ त्वा दी॒क्षया॑ दी॒क्षयामि॑ ।
 आपो॑ दी॒क्षा । तया॑ वरु॒णो राजा॑ दी॒क्षया॑ दी॒क्षितः॑ ।
 यया॑ वरु॒णो राजा॑ दी॒क्षया॑ दी॒क्षितः॑ । तया॑ त्वा दी॒क्षया॑ दी॒क्षयामि॑ ।
 ओष॑धयो दी॒क्षा ॥ 84 ॥

T.B.3.7.7.7

तया॑ सोमो॑ राजा॑ दी॒क्षया॑ दी॒क्षितः॑ । यया॑ सोमो॑ राजा॑ दी॒क्षया॑
 दी॒क्षितः॑ । तया॑ त्वा दी॒क्षया॑ दी॒क्षयामि॑ । वाग् दी॒क्षा ।
 तया॑ प्रा॒णो दी॒क्षया॑ दी॒क्षितः॑ । यया॑ प्रा॒णो दी॒क्षया॑ दी॒क्षितः॑ ।
 तया॑ त्वा दी॒क्षया॑ दी॒क्षयामि॑ । पृ॒थि॒वी त्वा दी॒क्षमा॑णमनु॑ दी॒क्षतां॑ ।
 अ॒न्तरि॑क्षं त्वा दी॒क्षमा॑णमनु॑ दी॒क्षतां॑ ।
 द्यौस्त्वा॑ दी॒क्षमा॑णमनु॑ दी॒क्षतां॑ ॥ 85 ॥

T.B.3.7.7.8

दि॒शस्त्वा दी॑क्षमाणमनु दीक्षन्तां ।

आप॑स्त्वा दी॒क्षमाणमनु दीक्षन्तां ।

ओष॑धयस्त्वा दी॒क्षमाणमनु दीक्षन्तां ।

वाक्त्वा दी॒क्षमाणमनु दीक्षतां ।

ऋच॑स्त्वा दी॒क्षमाणमनु दीक्षन्तां ।

सामा॑नि त्वा दी॒क्षमाणमनु दीक्षन्तां ।

यजू॑षि त्वा दी॒क्षमाणमनु दीक्षन्तां ।

अह॑श्च रा॒त्रिश्च । कृ॒षिश्च वृ॒ष्टिश्च । त्वि॒षिश्चा-प॑चितिश्च ॥ 86 ॥

T.B.3.7.7.9

आप॑श्चौष॒धयश्च । ऊ॒र्क्च सू॒नृता च ।

तास्त्वा दी॒क्षमाणमनु दीक्षन्तां । स्वे दक्षे दक्षपि॑तेह सीद ।

दे॒वानां॑ सु॒म्नो मह॑ते रणाय । स्वा॒सस्थ-स्त॑नुवा सँवि॑शस्व ।

पि॑तेवैधि सू॒नव आ॒सुशे॑वः । शि॒वो मा शि॒वमा॑विश ।

स॒त्यं म आ॒त्मा । श्र॒द्धा मे ऽक्षि॑तिः ॥ 87 ॥

T.B.3.7.7.10

तपो॑ मे॒ प्रति॑ष्ठा । स॒वि॒तृ-प्र॑सू॒ता मा॒ दि॒शो॑ दी॒क्षय॑न्तु । स॒त्यम॑स्मि ।
 अ॒हं त्वद॑स्मि म॒दसि॑ त्वमे॒तत् । म॒मा॒सि यो॑निस्त॒व यो॑निर॒स्मि ।
 म॒मै॒व स॒न्वह॑ ह॒व्या॒न्यग्ने॑ । पु॒त्रः पि॒त्रे लो॒ककृ॑-ज्जा॒तवे॑दः ।
 आ॒जु॒ह्वानः॑ सु॒प्रती॑कः पु॒रस्ता॑त् । अ॒ग्ने स्वां॑ यो॒निमा॑सीद सा॒ध्या ।
 अ॒स्मिन्त् स॒धस्थे॑ अ॒ध्युत्तर॑स्मिन् ॥ 88 ॥

T.B.3.7.7.11

वि॒श्वे दे॒वा य॑ज॒मानश्च॑ सी॒दत॑ । ए॒कमि॑षे वि॒ष्णु॒स्त्वा-ऽन्वे॑तु ।
 द्वे ऊ॒र्जे वि॒ष्णु॒स्त्वाऽन्वे॑तु । त्री॒णि व्र॑ताय वि॒ष्णु॒स्त्वा-ऽन्वे॑तु ।
 च॒त्वारि॑ मा॒यो भ॒वाय॑ वि॒ष्णु॒स्त्वा-ऽन्वे॑तु ।
 पञ्च॑ प॒शुभ्यो॑ वि॒ष्णु॒स्त्वा-ऽन्वे॑तु ।
 ष॒ड्रा॒यस्पो॑षाय वि॒ष्णु॒स्त्वा-ऽन्वे॑तु ।
 स॒प्त स॒प्तभ्यो॑ हो॒त्राभ्यो॑ वि॒ष्णु॒स्त्वा-ऽन्वे॑तु ।
 स॒खायः॑ स॒प्तप॑दा अ॒भूम॑ । स॒ख्यं ते॑ ग॒मेयं॑ ॥ 89 ॥

T.B.3.7.7.12

स॒ख्यात्ते॑ मा योषं॑ । स॒ख्यान्मे॑ मा यो॒ष्ठाः॑ ।
 सा॒ऽसि॑ सु॒ब्रह्म॑ण्ये । तस्या॑स्ते पृ॒थि॒वी पा॑दः ।
 सा॒ऽसि॑ सु॒ब्रह्म॑ण्ये । तस्या॑स्तेऽन्त॒रि॒क्षं पा॑दः ।
 सा॒ऽसि॑ सु॒ब्रह्म॑ण्ये । तस्या॑स्ते द्यौः॑ पा॑दः ।
 सा॒ऽसि॑ सु॒ब्रह्म॑ण्ये । तस्या॑स्ते दि॒शः पा॑दः ॥ 90 ॥

T.B.3.7.7.13

प॒रो र॒जास्ते॑ पञ्च॒मः पा॑दः । सा न इ॒षमूर्जं॑ धु॒क्ष्व ।
 तेज॑ इन्द्रि॒यं । ब्र॒ह्मव॑र्च॒स-म॒न्नाद्यं॑ । वि॒मिमे॑ त्वा प॒यस्व॑तीं ।
 दे॒वानां॑ धे॒नुः सु॒दु॒घा-म॑न॒प-स्फु॑रन्तीं । इन्द्रः॑ सोमं॑ पि॒बतु॑ ।
 क्षे॒मो अस्तु॑ नः । इ॒मां न॑राः कृ॒णुत॑ वे॒दिमे॑त्य ।
 वसु॑मतीं रु॒द्रव॑तीमा-दि॒त्यव॑तीं ॥ 91 ॥

T.B.3.7.7.14

व॒र्ष्मन्दि॑वः । ना॒भा पृ॒थि॒व्याः । यथा॑ऽयं य॒जमा॑नो न रि॒ष्येत्॑ ।
 दे॒वस्य॑ स॒वितुः॑ स॒वे । चतुः॑ शि॒खण्डा॑ यु॒वतिः॑ सु॒पे॒शाः॑ ।

घृतप्रतीका भुवनस्य मध्ये॥ । तस्याँ सुपर्णावधि यौ निविष्टौ ।
 तयोर्देवानामधि भागधेयं॥ । अप जन्यं भयं नुद ।
 अप चक्राणि वर्तय । गृहँ सोमस्य गच्छतं ।
 न वा उवेतन्म्रियसे न रिष्यसि । देवाँ इदेषि पथिभिः सुगेभिः ।
 यत्र यन्ति सुकृतो नापि दुष्कृतः ।
 तत्र त्वा देवः सविता दधातु ॥ 92 ॥

T.B.3.7.8.1

यदस्य पारे रजसः । शुक्रं ज्योति-रजायत ।
 तन्नः पर्षदति द्विषः । अग्ने वैश्वानर स्वाहा॥ ।
 यस्माद्दीषा-ऽवाशिष्ठाः । ततो नो अभयं कृधि ।
 प्रजाभ्यः सर्वाभ्यो मृड । नमो रुद्राय मीढुषे॥ ।
 यस्माद्दीषा न्यषदः । ततो नो अभयं कृधि ॥ 93 ॥

T.B.3.7.8.2

प्र॒जा॒भ्यः॑ सर्वा॒भ्यो मृ॒ड । नमो॑ रु॒द्राय॑ मी॒ढुषे॑ ॥
उदु॒स्र तिष्ठ॑ प्र॒ति॒तिष्ठ॑ मा रि॒षः । मेमं॑ य॒ज्ञं य॑ज॒मानं॑ च री॒रिषः॑ ।
सुव॒र्गे लो॒के य॑ज॒मानं॑ हि धे॒हि । शं न ए॒धि द्वि॒पदे॑ शं चतु॑ष्पदे ।
यस्मा॑द्भीषा-ज्वे॒पिष्ठाः प॒लायि॑ष्ठाः स॒म॒ज्ञा॒स्थाः ॥
ततो॑ नो अ॒भयं॑ कृ॒धि । प्र॒जा॒भ्यः सर्वा॒भ्यो मृ॒ड ।
नमो॑ रु॒द्राय॑ मी॒ढुषे॑ ॥ 94 ॥

T.B.3.7.8.3

य इ॒दम॑कः । तस्मै॑ नमः । तस्मै॑ स्वाहा॑ । न वा उ वे॒तन्मि॑यसे ।
आशा॑नां त्वा वि॒श्वा आ॒शाः । य॒ज्ञस्य॑ हि स्थ ऋ॒त्वियौ॑ ॥
इन्द्रा॑ग्नी चे॒तन॑स्य च । हु॒ताहु॒तस्य॑ तृ॒प्यतं॑ ।
अहु॑तस्य हु॒तस्य॑ च । हु॒तस्य॑ चाहु॒तस्य॑ च । अहु॑तस्य हु॒तस्य॑ च ।
इन्द्रा॑ग्नी अ॒स्य सोम॑स्य । वी॒तं पि॒बतं॑ जु॒षेथां॑ ॥
मा य॑ज॒मानं॑ तमो॑ वि॒दत् । म॒र्त्वि॒जो मो इ॒माः प्र॒जाः ।
मा यः॑ सोम॑मि॒मं पि॒बात् । स॒सृष्ट॑मु॒भयं॑ कृ॒तं ॥ 95 ॥

T.B.3.7.9.1

अ॒ना॒ग॒स॒स्त्वा॒ व॒यं॑ । इ॒न्द्रे॒ण॒ प्रे॒षि॒ता॒ उप॑ । वा॒यु॒ष्टे॑ अ॒स्त्व॒ञ् श॒भूः॑ ।
 मि॒त्र॒स्ते॑ अ॒स्त्व॒ञ् श॒भूः॑ । व॒रु॒ण॒स्ते॑ अ॒स्त्व॒ञ् श॒भूः॑ ।
 अ॒पां॑ क्ष॒या ऋ॒त॒स्य॑ ग॒र्भाः॑ । भु॒व॒न॒स्य॑ गो॒पाः॑ श्ये॒ना अ॒ति॒थ॒यः॑ ।
 प॒र्व॒ता॒नां॑ क॒कु॒भः॑ प्र॒यु॒तो॑ न॒पा॒तारः॑ । व॒ग्नु॒ने॒न्द्र॒ञ् ह॒व॒य॒त॑ ।
 घो॒षे॒णामी॑-वा॒ञ्श्चा॒त॒य॒त॑ ॥ 96 ॥

T.B.3.7.9.2

यु॒क्ताः॑ स्थ॒ वह॑त । दे॒वा ग्रा॒वा॒ण इ॒न्द्रु॒रि॒न्द्र इ॒त्य॒वा॒दि॒षुः॑ ।
 ऐ॒न्द्र॒म-चु॒च्य॒वुः॑ प॒र॒म॒स्याः॑ प॒रा॒व॒तः॑ । आ॒ऽस्मा॒त् स॒ध॒स्था॒त् ॥
 ओ॒रो॒र॒न्त॒रि॒क्षा॒त् । आ सु॒भू॒त॒म॒सु॒ष॒वुः॑ । ब्र॒ह्म॒व॒र्च॒सं॒ म आ॒ऽसु॒ष॒वुः॑ ।
 स॒म॒रे॒ र॒क्षा॒ञ् स्य॒व॒धि॒षुः॑ । अ॒प॒ह॒तं॑ ब्र॒ह्म॒ज्य॒स्य॑ ।
 वाक्च॑ त्वा॒ मन॑श्च श्रिणी॒तां ॥ 97 ॥

T.B.3.7.9.3

प्रा॒णश्च॑ त्वा॒ऽपान॑श्च श्रीणी॒तां । चक्षु॑श्च त्वा॒ श्रो॒त्रं॑ च श्रीणी॒तां ।

दक्षश्च त्वा बलं च श्रीणीतां । ओजश्च त्वा सहश्च श्रीणीतां ।
 आयुश्च त्वा जरा च श्रीणीतां । आत्मा च त्वा तनूश्च श्रीणीतां ।
 शृतोऽसि शृतं कृतः । शृताय त्वा शृतेभ्यस्त्वा ।
 यमिन्द्रमाहुर्वरुणं यमाहुः । यं मित्रमाहुर् यमु सत्यमाहुः ॥ 98 ॥

T.B.3.7.9.4

यो देवानां देवतम-स्तपोजाः । तस्मै त्वा तेभ्यस्त्वा ।
 मयि त्यदिन्द्रियं महत् । मयि दक्षो मयि क्रतुः ।
 मयि धायि सुवीर्यं । त्रिशुग्धर्मो विभातु मे । आकूत्या मनसा सह ।
 विराजा ज्योतिषा सह । यज्ञेन पयसा सह ।
 तस्य दोहमशीमहि ॥ 99 ॥

T.B.3.7.9.5

तस्य सुम्नमशीमहि । तस्य भक्षमशीमहि ।
 वाग्जुषाणा सोमस्य तृप्यतु । मित्रो जनान्प्र स मित्र ।
 यस्मान्न जातः परो अन्यो अस्ति । य आविवेश भुवनानि विश्वा ।
 प्रजापतिः प्रजया सँविदानः ।

त्रीणि॑ ज्योती॑षि सच॒ते स षोड॑शी । ए॒ष ब्र॒ह्मा य ऋ॒त्वियः॑ ।
इन्द्रो॑ नाम॒ श्रुतो॑ ग॒णे ॥ 100 ॥

T.B.3.7.9.6

प्र ते॑ म॒हे वि॒दथे॑ श॒सिष॑ ह॒री ॥
य ऋ॒त्वियः॑ प्र ते॑ व॒न्वे । व॒नुषो॑ ह॒र्यतं॑ म॒दं ॥
इन्द्रो॑ नाम॒ घृतं॑ न यः । ह॒रिभि॑श्चारु॒ सेच॑ते ।
श्रुतो॑ ग॒ण आ त्वा॑ वि॒शन्तु॑ । ह॒रिर्व॑र्प॒सं गिरः॑ ।
इन्द्रा॑धि॒पते॑-ऽधि॒पति॑स्त्वं दे॒वाना॑म॒सि । अ॒धिप॑तिं मां ।
आयु॑ष्मन्तं॒ वर्च॑स्वन्तं॒ मनु॑ष्येषु कुरु ॥ 101 ॥

T.B.3.7.9.7

इन्द्र॑श्च स॒म्राड् व॒रुण॑श्च रा॒जा ॥ तौ ते॑ भ॒क्षं च॑क्र॒तुरग्र॑ ए॒तं ।
तयो॑रनु॒ भक्षं॑ भ॒क्षयामि॑ । वा॒ग्जुषा॑णा सोम॒स्य तृ॑प्यतु ।
प्र॒जाप॑ति वि॒श्वक॑र्मा । तस्य॒ मनो॑ दे॒वं य॒ज्ञेन॑ रा॒ध्यासं॑ ।
अ॒र्थे गा अ॒स्य ज॑हितः । अ॒वसा॑नप॒ते-ऽव॑सानं मे वि॒न्द ।

नमो॑ रु॒द्राय॑ वा॒स्तो॒ष्पतये॑ । आ॒यने॑ वि॒द्रव॑णे ॥ 102 ॥

T.B.3.7.9.8

उ॒द्याने॑ यत्प॒राय॑णे । आ॒वर्त॑ने वि॒वर्त॑ने । यो गो॑पायति त॒ ॐ हु॑वे ।
या॒न्यपा॑मित्या-न्य॒प्रती॑त्ता-न्यस्मि । य॒मस्य॑ ब॒लिना॑ च॒रामि॑ ।
इ॒हैव॑ स॒न्तः प्र॑ति त॒द्यात॑यामः । जी॒वा जी॑वेभ्यो नि॒हराम॑ ए॒नत् ।
अ॒नृणा॑ अ॒स्मिन्न॑-नृ॒णाः पर॑स्मिन् । तृ॒तीये॑ लो॒के अ॒नृणाः॑ स्या॒म ।
ये दे॒वया॑ना उ॒त पि॒तृया॑णाः ॥ 103 ॥

T.B.3.7.9.9

स॒र्वान् प॑थो अ॒नृणा॑ आ॒क्षीये॑म । इ॒दमू॒ नु श्रे॑यो-ऽव॒सान-मा॑गन्म ।
शि॒वे नो॑ द्या॒वा पृ॑थि॒वी उ॒भे इ॒मे । गो॒म॒द्धन॑-व॒दश्च॑व-दूर्ज॒स्वत् ।
सु॒वीरा॑ वी॒रैर॑नु संच॒रेम॑ । अ॒र्कः प॑वि॒त्र ॐ र॑ज॒सो वि॑मानः ।
पु॒नाति॑ दे॒वानां॑ भु॒वनानि॑ वि॒श्वा । द्या॒वा पृ॑थि॒वी प॑य॒सा सँ॑वि॒दाने॑ ।
घृ॒तं दु॑हाते अ॒मृतं॑ प्र॒पीने॑ । प॑वि॒त्रम॒र्को र॑ज॒सो वि॑मानः ।
पु॒नाति॑ दे॒वानां॑ भु॒वनानि॑ वि॒श्वा । सु॒व ज्यो॑ति॒र्यशो॑ म॒हत् ।
अ॒शीम॑हि गा॒धमु॑त प्र॒तिष्ठां॑ ॥ 104 ॥

T.B.3.7.10.1

उदस्तां॑फसी॒थ् स॒विता॑ मि॒त्रो अ॒र्य॒मा । स॒र्वान॑-मि॒त्रान॑-व॒धीद्यु॑गेन ।
 बृ॒हन्तं॑ मा॒मकर॑-द्वी॒रव॑न्तं । रथ॑न्तरे श्रय॑स्व स्वा॒हा पृ॒थि॒व्यां ।
 वा॒मदे॒व्ये श्रय॑स्व स्वा॒हा-ऽन्तरि॑क्षे । बृ॒हति॑ श्रय॑स्व स्वा॒हा दि॒वि ।
 बृ॒हता॑ त्वोप॑स्त॒भ्नोमि॑ । आ त्वा॑ ददे॒ यश॑से वी॒र्या॑य च ।
 अ॒स्मास्व॑-घ्नि॒या यू॒यं द॑धाथेन्द्रि॒यं प॑यः ।
 यस्तौ॑ द्र॒प्सो यस्त॑ उद॒र्षः ॥ 105 ॥

T.B.3.7.10.2

दै॒व्यः के॒तु वि॒श्वं भु॒वन॑-मा॒वि॒वेश॑ । स नः॑ पा॒ह्यरि॑ष्ट्यै स्वा॒हा ॥
 अनु॑ मा॒ सर्वो॑ य॒ज्ञो-ऽय॑मेतु । वि॒श्वे दे॒वा म॑रुतः सा॒मार्कः॑ ।
 आ॒प्रि॒य-श्छ॑न्दा॒सि नि॒विदो॑ यजू॒षि । अ॒स्यै पृ॒थि॒व्यै य॒द्यज्ञि॑यं ॥
 प्र॒जाप॑ते॒ वर्त॑निमनु॒ वर्त॑स्व । अनु॑ वी॒रैर॑नु रा॒ध्याम॑ गो॒भिः ।
 अ॒न्वश्चै॑रनु॒ सर्वै॑रु पु॒ष्टैः । अनु॑ प्र॒जया॑-ऽन्विन्द्रि॒येण॑ ॥ 106 ॥

T.B.3.7.10.3

दे॒वा नो॑ य॒ज्ञ-मृ॒जु॒धा न॑यन्तु । प्र॒ति क्ष॒त्रे प्र॒ति ति॑ष्ठामि रा॒ष्ट्रे ।
 प्र॒त्यश्चे॑षु प्र॒तिति॑ष्ठामि गो॒षु । प्र॒ति प्र॒जायां॑ प्र॒ति ति॑ष्ठामि भ॒व्ये ॥
 वि॒श्वम॑न्याऽभि वावृ॒धे । तद॑न्यस्या-म॒धि॒श्रितं॑ ।
 दि॒वे च॑ वि॒श्वक॑र्मणे । पृ॒थि॒व्यै चा॑करं नमः ।
 अ॒स्कान्द्यौः पृ॒थि॒वीं । अ॒स्कानृ॑षभो यु॒वा गाः ॥ 107 ॥

T.B.3.7.10.4

स्क॒न्ने॒मा वि॒श्वा भु॑वना । स्क॒न्नो य॒ज्ञः प्र॑जनयतु ।
 अ॒स्कान॑जनि प्राजनि । आ स्क॒न्नाज्जा॑यते वृ॒षा ॥
 स्क॒न्नात् प्र॑जनिषीमहि । ये दे॒वा ये॑षामिदं भा॒गधे॑यं ब॒भूव॑ ।
 ये॑षां प्र॒याजा॑ उ॒तानू॑याजाः । इन्द्र॑ज्येष्ठेभ्यो वरु॒णरा॑जभ्यः ।
 अ॒ग्निहो॑तृभ्यो दे॒वेभ्यः॑ स्वाहा ॥ उ॒त त्या नो॑ दि॒वा म॒तिः ॥ 108 ॥

T.B.3.7.10.5

अ॒दि॒तिरू॑त्या-ऽऽग॒मत् । सा श॑न्ताची म॒यस्कर॑त् । अ॒प सि॑धः ।
 उ॒त त्या॑ दै॒व्या भि॑षजा ॥ शं न॑स्करतो अ॒श्विना॑ ॥
 यू॒याता॑-म॒स्मद्र॑पः । अ॒प सि॑धः । श॒म॒ग्नि-र॒ग्निभि॑स्करत् ।

शं॑ न॒स्तप॑तु॒ सूर्यः॑ । शं॑ वा॒तो वा॒त्वर॑पाः ॥ 109 ॥

T.B.3.7.10.6

अप॑ सि॒धः । तदि॒त्पदं॑ न वि॒चिके॑त वि॒द्वान् ।
यन्मृ॑तः पुन॑रप्येति जी॒वान् । त्रि॒वृ॒द्यद् भु॑वनस्य रथ॒वृत् ।
जी॒वो गर्भो॑ न मृ॒तः स जी॑वात् । प्रत्य॑स्मै पिपी॒षते॑ ।
वि॒श्वानि॑ वि॒दुषे॑ भर । अ॒रं ग॒माय॑ जग्म॒वे ।
अप॑श्चाद्द्व॒वने॑ नरे॑ । इ॒न्दुरि॒न्दुम॑-वा॒गात् । इ॒न्दोरि॒न्द्रो-ऽपा॑त् ।
तस्य॑ त इ॒न्दवि॒न्द्र-पी॑तस्य मधु॒मतः॑ ।
उप॑हू॒तस्यो॑ प॒हूतो॑ भक्ष॒यामि॑ ॥ 110 ॥

T.B.3.7.11.1

ब्र॒ह्म प्र॑तिष्ठा मन॒सो ब्र॒ह्म वा॒चः । ब्र॒ह्म य॒ज्ञाना॑ ह॒विषा॑-मा॒ज्यस्य॑ ।
अति॑रिक्तं कर्म॒णो यच्च॑ ही॒नं । य॒ज्ञः पर्वा॑णि प्र॒तिर॑न्नेति क॒ल्पय॑न् ।
स्वाहा॑कृ॒ता-ऽऽहु॑तिरेतु दे॒वान् । आ॒श्रावि॑तम॒त्या श्रा॑वितं ।
वषट्कृ॑त-म॒त्यनू॑क्तं च य॒ज्ञे । अति॑रिक्तं कर्म॒णो यच्च॑ ही॒नं ।

य॒ज्ञः प॒र्वाणि॑ प्र॒तिर॒न्नेति॑ क॒ल्पय॑न् ।
स्वा॒हाकृ॒ता-ऽऽहु॑तिरेतु दे॒वान् ॥ 111 ॥

T.B.3.7.11.2

यद्वो॑ दे॒वा अति॑पा॒दया॑नि । वा॒चा चि॒त्प्रय॑तं दे॒व हे॑डनं ।
अ॒रायो॑ अ॒स्मा॒ अ॒भि-दु॑च्छुनायते । अ॒न्यत्रा॑स्मन्-म॒रुत॑स्त-न्नि॒धैत॑न ।
ततं॑ म॒ आप॑स्तदु॒ ताय॑ते पुनः । स्वा॒दिष्ठा॑ धी॒तिरु॑च॒थाय॑ शस्यते ।
अ॒य॒ समु॑द्र उ॒त वि॒श्वभे॑षजः । स्वा॒हा-कृ॒तस्य॑ स॒मुत्तृ॑णुत भु॒वः ।
उ॒द्वयं॑ तम॒सस्परि॑ । उ॒दु॒ त्यं चि॒त्रं ॥ 112 ॥

T.B.3.7.11.3

इ॒मं मे॑ वरु॒ण तत्त्वा॑ यामि । त्वं नो॑ अ॒ग्ने स त्वं नो॑ अ॒ग्ने ।
त्वम॒ग्ने अ॒यासि॑ प्र॒जाप॑ते । इ॒मं जी॒वेभ्यः॑ परि॒धिं द॑धामि ।
मै॒षां नु॑ गा॒दप॑रो अ॒र्धमे॑तं । श॒तं जी॒वन्तु॑ श॒रदः॑ पु॒रूचीः॑ ।
ति॒रो मृ॒त्युं द॑धतां प॒र्वते॑न । इ॒ष्टेभ्यः॑ स्वा॒हा व॒षड॑नि॒ष्टेभ्यः॑ स्वा॒हा ॥
भे॒षजं॑ दु॒रिष्ट्यै॑ स्वा॒हा नि॒ष्कृत्यै॑ स्वा॒हा ॥
दौ॒राद्ध्यै॑ स्वा॒हा दै॒वीभ्यः॑-स्त॒नूभ्यः॑ स्वा॒हा ॥ 113 ॥

T.B.3.7.11.4

ऋ॒द्ध्यै॑ स्वा॒हा समृ॑द्ध्यै स्वा॒हा । य॒त इन्द्र॑ भ॒याम॑हे ।
 ततो॑ नो॒ अभ॑यं कृ॒धि । म॒घव॑ञ्छ॒ग्धि तव॑ तन्न॒ ऊ॒तये॑ ॥
 वि॒ द्विषो॑ वि॒ मृ॒धो ज॑हि । स्व॒स्ति॒दा वि॒शस्प॑तिः ।
 वृ॒त्रहा॑ वि॒मृ॒धो व॑शी । वृ॒षेन्द्रः॑ पु॒र ऐ॒तु नः॑ ।
 स्व॒स्ति॒दा अभ॑यं क॒रः । आ॒भि गी॑र्भि र्य॒दतो॑ न ऊ॒नं ॥ 114 ॥

T.B.3.7.11.5

आप्या॑यय ह॒रिवो॑ वर्ध॒मानः॑ । य॒दा स्तो॑तृ॒भ्यो म॑हि गो॒त्रा रु॒जासि॑ ।
 भू॒यिष्ठ॑भाजो॒ अध॑ ते स्याम । अ॒ना॒ज्ञातं॑ य॒दा॒ज्ञातं॑ ।
 य॒ज्ञस्य॑ क्रि॒यते॑ मि॒थु । अ॒ग्ने त॑दस्य क॒ल्पय॑ ।
 त्व॒ हि वे॑त्थ यथा॒तथं॑ । पु॒रुष॑ सं॒मितो॑ य॒ज्ञः ।
 य॒ज्ञः पु॒रुष॑ सं॒मितः॑ । अ॒ग्ने त॑दस्य क॒ल्पय॑ ।
 त्व॒ हि वे॑त्थ यथा॒तथं॑ । यत् पा॑क॒त्रा म॑न॒सा दी॒नद॑क्षा न ।

य॒ज्ञस्य॑ म॒न्वते॑ म॒र्तासः॑ । अ॒ग्नि॒ष्ट॒द्धो॒ता कृ॒तुवि॒द्वि॒जान॑न् ।
य॒जि॒ष्ठो दे॒वाँ ऋ॒तुशो॑ य॒जाति॑ ॥ 115 ॥

T.B.3.7.12.1

य॒दे॒वा दे॒वहे॑ड॒नं । दे॒वास॑श्च॒कृ॒मा व॒यं ।
आ॒दि॒त्या-स्त॑स्मा॒न्मा मु॒ञ्चत॑ । ऋ॒तस्य॑र्ते॒न मा॒मु॒त ।
दे॒वा जी॒वन॑का॒म्या यत् । वा॒चाऽनृ॑त॒मूदि॑म ।
अ॒ग्नि॒र्मा त॑स्मा॒दे॒नसः॑ । गा॒र्ह॒प॒त्यः प्र॑मु॒ञ्चतु॑ ।
दु॒रि॒ता या॒नि च॒कृ॒म । क॒रो॒तु मा॒मने॑ न॒सं ॥ 116 ॥

T.B.3.7.12.2

ऋ॒ते॒न द्या॒वा पृ॑थि॒वी । ऋ॒ते॒न त्व॑ँ स॒रस्व॑ति ।
ऋ॒ता॒न्मा मु॒ञ्च॒ताँ ह॑सः । य॒दन्य॑ कृ॒तमा॑रि॒म ।
स॒जा॒त॒शँ सा॒दु॒त वा॑ जा॒मि॒शँ सा॒त् ।
ज्या॒य॒सः शँ सा॒दु॒त वा॑ क॒नी॒य॒सः । अ॒ना॒ज्ञा॒तं दे॒वकृ॑तं य॒दे॒नः ।
त॒स्मा॒त्व-म॒स्मा-ज्जा॑त॒वे॒दो मु॑मु॒ग्धि । य॒द्वा॒चा य॒न्म॑न॒सा ।

बा॒हु॒भ्या॑-मू॒रु॒भ्या॑-म॒ष्टी॒वद्भ्यां॑ ॥ 117 ॥

T.B.3.7.12.3

शि॒श्नै॑ र्यद॒नृतं॑ च॒कृ॒मा व॒यं । अ॒ग्नि॒र्मा तस्मा॑दे॒नसः॑ ।
 यद्ध॒स्ता॒भ्यां॑ च॒कर॑ कि॒ल्बिषा॑णि । अ॒क्षाणां॑ व॒ग्नुमु॑प जिघ्न॒मानः॑ ।
 दू॒रेप॑श्या च रा॒ष्ट्रभृ॑च्च । ता॒न्यप्सर॑सा-व॒नुद॑त्ता-मृ॒णानि॑ ।
 अदी॒व्यन्नृ॑णं यद॒हं च॑का॒र । यद्वा॒ऽदा॒स्यन्थ् संज॑गारा जने॒भ्यः॑ ।
 अ॒ग्नि॒र्मा तस्मा॑दे॒नसः॑ । यन्म॑यि मा॒ता गर्भे॑ सति ॥ 118 ॥

T.B.3.7.12.4

ए॒नश्च॑का॒र यत्पि॑ता । अ॒ग्नि॒र्मा तस्मा॑दे॒नसः॑ ।
 यदा॑ पि॒पेष॑ मा॒तरं॑ पि॒तरं॑ । पु॒त्रः प्र॑मु॒दितो॑ ध॒यन् ।
 अहि॑सि॒तौ पि॒तरौ॑ म॒या तत् । तद॑ग्ने अ॒नृणो॑ भ॒वामि॑ ।
 यद॑न्त॒रिक्षं॑ पृ॒थि॒वीमु॑त द्यां । यन्मा॑तरं पि॒तरं॑ वा जिहि॑सि॒म ।
 अ॒ग्नि॒र्मा तस्मा॑दे॒नसः॑ । यदा॑श॒सा नि॒शसा॑ यत्प॒राश॑सा ॥ 119 ॥

T.B.3.7.12.5

यदे॒नश्च॑ कृ॒मा नू॒तनं॑ य॒त्पु॒राणं॑ । अ॒ग्नि॒र्मा तस्मा॑दे॒नसः॑ ।
 अ॒ति॒क्रा॒मामि॑ दु॒रितं॑ य॒देनः॑ । ज॒हामि॑ रि॒प्रं प॒रमे॑ स॒धस्थे॑ ॥
 यत्र॑ य॒न्ति सु॒कृ॒तो ना॒पि दु॒ष्कृ॒तः । तमा॑रो॒हामि॑ सु॒कृ॒तां नु॒ लो॒कं ।
 त्रि॒ते दे॒वा अ॒मृ॒जतै॑-तदे॒नः । त्रि॒त ए॒तन्म॑नु॒ष्येषु॑ मा॒मृ॒जे ।
 ततो॑ मा॒ यदि॑ कि॒ञ्चि॒दान॒शे । अ॒ग्नि॒र्मा तस्मा॑दे॒नसः॑ ॥ 120 ॥

T.B.3.7.12.6

गा॒र्ह॒प॒त्यः प्र॑मु॒ञ्चतु॑ । दु॒रि॒ता या॒नि च॑कृ॒म । क॒रोतु॑ मा॒मने॑ न॒सं ॥
 दि॒वि जा॒ता अ॒प्सु जा॒ताः । या॒ जा॒ता ओ॒षधी॑भ्यः ।
 अ॒थो या॒ अ॒ग्नि॒जा आ॒पः । ता॒ नः॑ शु॒न्धन्तु॑ शु॒न्धनीः॑ ।
 यदा॑पो॒ नक्तं॑ दु॒रितं॑ च॒राम॑ । यद्वा॒ दि॒वा नू॒तनं॑ य॒त्पु॒राणं॑ ।
 हि॒र॒ण्य-व॒र्णास्त॑त॒ उत्पु॑नी॒त नः॑ । इ॒मं मे॑ व॒रुण॑ तत्त्वा॒ यामि॑ ।
 त्वं नो॑ अ॒ग्ने स॒ त्वं नो॑ अ॒ग्ने । त्वम॑ग्ने॒ अया॑ऽसि ॥ 121 ॥

T.B.3.7.13.1

यत्ते॑ ग्रा॒व्णा॑ चिच्छि॒दुः॑ सो॒म रा॒जन् । प्रि॒याण्य॑ङ्गानि॒ स्वधि॑ता
प॒रू॒षि । तथ्सं॑ध॒त् स्वा॒ज्ये॑नो॒त वर्ध॑यस्व ।

अना॒गसो॑ अध॒मि॒त्संक्ष॑ये॒म । यत्ते॑ ग्रा॒वा बा॒हुच्यु॑तो॒ अचु॑च्यवुः ।
नरो॑ यत्ते॑ दु॒दुहु॑ र्दक्षि॒णेन॑ । तत्त॑ आ॒प्याय॑तां॒ तत्ते॑ ॥

निष्प्या॑यतां॒ देव॑ सो॒म । यत्ते॑ त्वचं॑ बि॒भिदु॑र्यच्च॒ योनिं॑ ॥

यदा॒स्थाना॑त् प्रच्यु॒तो वे॑न॒सि त्मना॑ ॥ 122 ॥

T.B.3.7.13.2

त्वया॑ तथ्सो॒म गु॒प्तम॑स्तु नः । सा नः॑ सं॒धा-ऽस॑त्परमे॒ व्योम॑न् ।

अहा॑च्छरी॒रं प॑यसा॒ समे॑त्य । अ॒न्योऽन्यो॑ भवति॒ वर्णो॑ अस्य ।

तस्मिन्॑ व॒यमु॑प॒हूता॑स्तव॒ स्मः । आ नो॑ भज॒ सद॑सि॒ विश्व॑रूपे ।

नृच॑क्षाः सो॒म उ॒त शु॒श्रुग॑स्तु । मा नो॑ विहा॒सीद्भि॑रि॒ आवृ॑णानः ।

अना॒गा-स्त॑नुवो॒ वावृ॑धानः । आ नो॑ रू॒पं वह॑तु॒ जाय॑मानः ॥ 123 ॥

T.B.3.7.13.3

उप॑क्षर॑न्ति जु॒हो॑ घृ॒तेन॑ । प्रि॒याण्य॑ङ्गानि॒ तव॑ वर्ध॑यन्तीः ।
तस्मै॑ ते सोम॒ नम॒ इद्व॑षट्च । उप॑ मा राजन्थ् सुकृ॒ते ह्य॑स्व ।
सं प्रा॑णापानाभ्या॒ञ् समु॒ चक्षु॑षा त्वं ।
सञ् श्रो॑त्रेण गच्छस्व सोम राजन् ।
यत्त॑ आस्थि॒तञ् शमु॒ तत्ते॑ अस्तु ।
जानी॑तान्नः संगम॑ने पथी॒नां । ए॒तं जानी॑तात्पर॒मे व्यो॑मन् ।
वृ॒काः सध॑स्था वि॒द रूप॑मस्य ॥ 124 ॥

T.B.3.7.13.4

यदा॑ गच्छा॒त् पथि॑भिर्दे॒वयानैः॑ । इ॒ष्टापूर्ते॑ कृ॒णुता॑-दावि॒रस्मै॑ ।
अरि॑ष्ठो राजन्गदः प॒रेहि॑ । नम॑स्ते अस्तु चक्ष॑से रघू॒यते॑ ।
नाक॑मारोह सह यज॑मानेन । सूर्य॑ गच्छतात्पर॒मे व्यो॑मन् ।
अभू॑द्दे॒वः सवि॑ता वन्द्योऽनु॒ नः । इ॒दानी॑मह॒ उपवा॑च्यो नृ॒भिः ।
वि यो॑ रत्ना भज॑ति मानवे॒भ्यः । श्रेष्ठं॑ नो अत्र द्र॒विणं॑ यथा दध॑त् ।
उप॑ नो मि॒त्रावरु॑णा-विहा॒वतं॑ । अन्वादी॑ध्या-थामिह॒ नः सखा॑या ।

आ॒दि॒त्यानां॑ प्र॒सि॒तिर् हे॒तिः । उ॒ग्रा श॒तापा॑ष्ठा घ॒विषा॑ परि॒णो वृ॑णक्तु ।
आ॒प्याय॑स्व सं ते ॥ 125 ॥

T.B.3.7.14.1

यद्वि॑दी॒क्षे॒ मन॑सा यच्च॑ वा॒चा । यद्वा॑ प्रा॒णैश्चक्षु॑षा यच्च॑ श्रो॒त्रेण॑ ।
यद्रे॑तसा मि॒थुने॑ना-प्या॒त्मना॑ । अ॒द्भ्यो लो॒का दधि॑रे तेज॑ इन्द्रि॒यं ।
शु॒क्रा दी॒क्षायै॑ तप॑सो वि॒मोच॑नीः ।
आपो॑ वि॒मोक्त्री॑ र्मयि॑ तेज॑ इन्द्रि॒यं ।
यदृ॑चा सा॒म्ना यजु॑षा । प॒शूनां॑ च॒र्मन् ह॒विषा॑ दि॒दीक्षे॑ ।
यच्छ॑न्दोभि-रोष॑धीभि-र्व॒नस्प॑तौ ।
अ॒द्भ्यो लो॒का दधि॑रे तेज॑ इन्द्रि॒यं ॥ 126 ॥

T.B.3.7.14.2

शु॒क्रा दी॒क्षायै॑ तप॑सो वि॒मोच॑नीः ।
आपो॑ वि॒मोक्त्री॑ र्मयि॑ तेज॑ इन्द्रि॒यं ।

ये॒न ब्र॒ह्म ये॒न क्ष॒त्रं । ये॒नै॒न्द्रा॒ग्नी प्र॒जाप॑तिः सोमो वरु॑णो
ये॒न रा॒जा । वि॒श्वे दे॒वा ऋ॒षयो॑ ये॒न प्रा॒णाः । अ॒द्भ्यो लो॒का
दधि॑रे तेज इन्द्रि॒यं । शु॒क्रा दी॒क्षायै॑ तप॒सो वि॒मोच॑नीः ।
आपो॑ विमो॒क्त्री र्मयि॑ तेज इन्द्रि॒यं ।
अपां॑ पु॒ष्पम॒स्यो-ष॑धीनाँ॒ रसः॑ । सोम॑स्य प्रि॒यं धाम॑ ॥ 127 ॥

T.B.3.7.14.3

अ॒ग्नेः प्रि॒यत॑मँ ह॒विः स्वाहा॑ ॥ अ॒पां पु॒ष्प-म॒स्योष॑धीनाँ॒ रसः॑ ।
सोम॑स्य प्रि॒यं धाम॑ । इन्द्र॑स्य प्रि॒यत॑मँ ह॒विः स्वाहा॑ ॥
अ॒पां पु॒ष्पम॒स्यो-ष॑धीनाँ॒ रसः॑ । सोम॑स्य प्रि॒यं धाम॑ ।
वि॒श्वेषां॑ दे॒वानां॑ प्रि॒यत॑मँ ह॒विः स्वाहा॑ ॥ व॒यँ सोम॑ व्र॒ते तव॑ ।
मन॑स्तनूषु पिप्र॒तः । प्र॒जाव॑न्तो अशीमहि ॥ 128 ॥

T.B.3.7.14.4

दे॒वेभ्यः॑ पि॒तृभ्यः॑ स्वाहा॑ ॥ सोम्ये॑भ्यः पि॒तृभ्यः॑ स्वाहा॑ ॥
क॒व्येभ्यः॑ पि॒तृभ्यः॑ स्वाहा॑ ॥ दे॒वास इ॒ह मा॑दयध्वं ।
सोम्या॑स इ॒ह मा॑दयध्वं । क॒व्यास इ॒ह मा॑दयध्वं ।

अ॒न॒न्त॒रि॒ताः पि॒तरः॑ सो॒म्याः सो॒मपी॒थात् ।
 अ॒पै॒तु मृ॒त्यु॒रमृ॒तं न॒ आ॒गन् । वै॒व॒स्व॒तो नो॒ अभ॑यं कृ॒णोतु॑ ।
 पर्णं॑ व॒नस्प॑ते॒रिव ॥ 129 ॥

T.B.3.7.14.5

अ॒भि नः॑ शी॒यता॑ र॒यिः । स॒च॒तां नः॑ श॒ची॒पतिः॑ ।
 परं॑ मृ॒त्यो अ॒नु॒प॒रे॒हि प॒न्थां॑ ॥ य॒स्ते स्व॑ इ॒तरो॑ दे॒वया॑नात् ॥
 चक्षु॑ष्मते शृ॒ण्वते॑ ते ब्र॒वीमि॑ । मा नः॑ प्र॒जा री॑रिषो मो॒त वी॒रान् ।
 इ॒दमू॒ नु श्रे॒योऽव॑सान॒-मा॒गन्म॑ । य॒द्वो जि॑द्धन॒-जि॒दश्च॑-जि॒द्यत् ।
 पर्णं॑ व॒नस्प॑ते॒रिव । अ॒भि नः॑ शी॒यता॑ र॒यिः ।
 स॒च॒तां नः॑ श॒ची॒पतिः॑ ॥ 130 ॥

॥ हरिः॑ ओं ॥

2 अश्वमेधं

2.1 तैत्तिरीय ब्राह्मणे तृतीयाष्टके अष्टम प्रपाठकः

॥ हरिः ओम् ॥

T.B.3.8.1.1

सांग्रहण्येष्ट्या यजते । इमां जनतां संगृह्णानीति ।
द्वादशारत्नी रशना भवति । द्वादश मासाः सँवथ्सरः ।
सँवथ्सरमेवा वरुन्धे । मौञ्जी भवति । ऊर्ग्वै मुञ्जाः ।
ऊर्जमे वा वरुन्धे । चित्रा नक्षत्रं भवति । चित्रं वा एतत्कर्म ॥ 1 ॥

T.B.3.8.1.2

यदश्वमेधः समृद्ध्यै । पुण्यनाम देवयजन-मध्यवस्यति ।
पुण्यामेव तेन कीर्तिमभि जयति ।
अपदाती-नृत्विजः समावहन्त्या सुब्रह्मण्यायाः ।
सुवर्गस्य लोकस्य समष्ट्यै । केशश्मश्रु वपते ।
नखानि निकृन्तते । दतो धावते । स्नाति । अहतं वासः परिधत्ते ।

पा॒प्मनो॑ऽप॒हत्यै॑ । वाचं॑ य॒त्वोप॑वसति । सु॒वर्ग॑स्य लो॒कस्य॑ गु॒प्त्यै॑ ॥
रा॒त्रिं जा॑गरयन्त आसते । सु॒वर्ग॑स्य लो॒कस्य॑ सम॒ष्ट्यै॑ ॥ 2 ॥

T.B.3.8.2.1

चतु॑ष्टय्य आपो॑ भवन्ति । चतु॑श्शफो॒ वा अश्वः॑ प्राजापत्यः
समृ॑द्ध्यै । ता दिग्भ्यः॑ समा॒भृता॑ भवन्ति । दिक्षु॑ वा आपः॑ ।
अन्नं॑ वा आपः॑ । अद्भ्यो॑ वा अन्नं॑ जायते ।
यदे॒वाद्भ्यो॑ऽन्नं॑ जायते । तदव॑रुन्धे । तासु॑ ब्रह्मौदनं॑ पचति ।
रेत॑ ए॒व तद्द॑धाति ॥ 3 ॥

T.B.3.8.2.2

चतु॑श्शरावो भवति । दिक्ष्वे॑व प्र॒तिति॑ष्ठति ॥ उ॒भयतो॑ रुक्मौ॒ भवतः॑ ।
उ॒भयत॑ ए॒वास्मिन्-रुचं॑ दधाति । उ॒द्धरति॑ शृ॒तत्वाय॑ ।
सर्पि॑ष्वान् भवति मे॒ध्यत्वाय॑ । च॒त्वार आ॒र्षेयाः॑ प्राश्नन्ति ।
दिशा॑मे॒व ज्योति॑षि जुहोति । च॒त्वारि॑ हि॒रण्यानि॑ ददाति ।
दिशा॑मे॒व ज्योती॑ऽप्य वरुन्धे ॥ 4 ॥

T.B.3.8.2.3

यदा॑ज्य-मु॒च्छिष्य॑ते । तस्मिन्-र॒शनां॑ न्यु॒नत्ति॑ । प्र॒जाप॑तिर्वा ओ॒दनः॑ ।
 रेत॑ आ॒ज्यम् । यदा॑ज्ये र॒शनां॑ न्यु॒नत्ति॑ । प्र॒जाप॑तिमे॒व रेत॑सा
 सम॑र्धयति । दर्भ॑मयी र॒शना॑ भवति । बहु॑ वा ए॒ष कु॒चरो-
 ऽमे॒ध्यमु॑प गच्छति । यदश्वः॑ । प॒वित्रं॑ वै दर्भाः॑ ॥ 5 ॥

T.B.3.8.2.4

यद्दर्भ॑मयी र॒शना॑ भवति । पु॒नात्ये॑वैनम् । पू॒तमे॑नं मे॒ध्य-मा॑लभते ।
 अश्व॑स्य वा आल॒ब्धस्य॑ म॒हिमो॑द-क्रामत् । स म॒हर्त्वि॑जः प्रावि॒शत् ।
 तन्म॒हर्त्वि॑जां म॒हर्त्वि॑क्त्वम् । यन्म॒हर्त्वि॑जः प्रा॒श्नन्ति॑ । म॒हिमा॑न-
 मे॒वास्मि॑न्त-द॒धति॑ । अश्व॑स्य वा आल॒ब्धस्य॑ रेत॑ उदक्रामत् ।
 तथ्सु॒वर्णं॑ हिर॒ण्यम॑-भवत् । यथ्सु॒वर्णं॑ हिर॒ण्यं द॑दाति ।
 रेत॑ ए॒व तद॑धाति । ओ॒दने॑ ददाति । रेतो॑ वा ओ॒दनः॑ ।
 रेतो॑ हिर॒ण्यम् । रेत॑सै॒वास्मि॑न् रेतो॑ दधाति ॥ 6 ॥

T.B.3.8.3.1

यो वै ब्रह्मणे देवेभ्यः प्रजापतये-ऽप्रति-प्रोच्याश्वं मेध्यं बध्नाति ।
 आ देवताभ्यो वृश्च्यते । पापीयान्भवति । यः प्रतिप्रोच्य ।
 न देवताभ्य आवृश्च्यते । वसीयान्भवति । यदाह । ब्रह्मन्नश्वं मेध्यं
 भन्त्स्यामि देवेभ्यः प्रजापतये तेन राध्या समिति । ब्रह्म वै ब्रह्मा ।
 ब्रह्मण एव देवेभ्यः प्रजापतये प्रतिप्रोच्याश्वं मेध्यं बध्नाति ॥ 7 ॥

T.B.3.8.3.2

न देवताभ्य आवृश्च्यते । वसीयान् भवति ।
 देवस्य त्वा सवितुः प्रसव इति रशना-मादत्ते प्रसूत्यै ।
 अश्विनौ-र्बाहुभ्या-मित्याह । अश्विनौ हि देवाना-मध्वर्यू
 आस्ताम् । पूष्णो हस्ताभ्या-मित्याह यत्यै ।
 व्यृद्धं वा एतद्यज्ञस्य । यदयजुष्केण क्रियते ।
 इमाम-गृभ्ण-न्नशना-मृतस्ये-त्यधि वदति यजुष्कृत्यै ।
 यज्ञस्य समृद्ध्यै ॥ 8 ॥

T.B.3.8.3.3

तदाहुः । द्वाद॑शार॒त्नी र॒शना॑ क॒र्तव्या॑(३) त्रयो॑द॒शार॒त्नी(३)रि॒ति ।
 ऋ॒षभो॑ वा ए॒ष ऋ॒तूना॑म् । यथ्सँ॑व॒त्सरः॑ ।
 तस्य॑ त्रयो॑द॒शो मा॒सो वि॒ष्टप॑म् । ऋ॒षभ॑ ए॒ष य॒ज्ञा॒ना॑म् ।
 यद॑श्चमे॒धः । यथा॑ वा ऋ॒षभ॑स्य वि॒ष्टप॑म् । ए॒वमे॒तस्य॑ वि॒ष्टप॑म् ।
 त्रयो॑ द॒शम॑र॒त्निꣳ र॒शना॑या-मु॒पाद॑धाति ॥ ९ ॥

T.B.3.8.3.4

यथर्ष॑भस्य वि॒ष्टप॑ꣳ सꣳस्क्रोति॑ । तादृ॑गे॒व तत् ।
 पूर्॒व आयु॑षि वि॒दथे॑षु क॒व्ये॒त्याह॑ । आयु॑रे॒वास्मि॑-न्द॒धाति॑ ।
 तया॑ दे॒वाः सु॒तमा॑-ब॒भूवु॑-रि॒त्याह॑ । भू॒तिमे॒ वो पा॑वर्तते ।
 ऋ॒तस्य॑ सा॒मन्त्स॑र-मा॒रप॑न्तीत्याह । स॒त्यं वा॑ ऋ॒तम् ।
 स॒त्येनै॒वैन॑ मृ॒तेना॑र॒भते॑ । अ॒भि॒धा अ॒सी॒त्याह॑ ॥ १० ॥

T.B.3.8.3.5

तस्मा॑द॒श्च-मे॒धया॑जी सर्वा॑णि भू॒तान्य॑भि॒ भव॑ति । भु॒वन॑-म॒सी॒त्याह॑ ।
 भू॒मान॑-मे॒वोपै॑ति । य॒न्ता-ऽसी॒त्याह॑ । य॒न्ता॒रमे॒वैनं॑ क॒रोति॑ ।

ध॒र्ताऽसी॒त्याह॑ । ध॒र्ता॒रि॒मे॒वैनं॑ क॒रोति॑ । सौ॒ऽग्निं॑ वै॒श्वान॒र-मि॒त्याह॑ ।
अ॒ग्ना-वे॒वैनं॑ वै॒श्वान॒रे जु॒होति॑ । स॒प्रथ॑स॒मि॒त्याह॑ ॥ 11 ॥

T.B.3.8.3.6

प्र॒जयै॒वैनं॑ प॒शुभिः॑ प्र॒थय॑ति । स्वा॒हाकृ॑त इ॒त्याह॑ । हो॒म ए॒वा॒स्यैषः॑ ।
पृ॒थि॒व्या-मि॒त्याह॑ । अ॒स्यामे॒वैनं॑ प्र॒तिष्ठा॑पयति ।
य॒न्ता रा॒ज्यन्ता॑ऽसि॒ यम॑नो ध॒र्ताऽसि॑ ध॒रुण॑ इ॒त्याह॑ ।
रू॒पमे॒वा॒स्यै-त॑न्महि॒मानं॑ व्या॒चष्टे॑ । कृ॒ष्यै त्वा क्षे॑माय॒ त्वा र॒य्यै
त्वा पो॑षाय॒ त्वे॒त्याह॑ । आ॒शिष॑मे॒ वै ता-मा॑शास्ते ।
स्व॒गा त्वा दे॒वेभ्य॑ इ॒त्याह॑ । दे॒वेभ्य॑ ए॒वैनं॑ स्व॒गा क॑रोति ।
स्वा॒हा त्वा प्र॒जाप॑तय इ॒त्याह॑ । प्रा॒जाप॑त्यो वा अ॒श्वः ।
य॒स्या ए॒व दे॒वता॑या आ॒लभ्य॑ते । त॒यैवैनं॑ स॒मर्ध॑यति ॥ 12

T.B.3.8.4.1

यः पि॒तुरनु॑जायाः पु॒त्रः । स पु॒रस्ता॑न्नयति ।
यो मा॒तुरनु॑जायाः पु॒त्रः । स प॒श्चान्न॑यति ।

विष्वञ्चमे॑ वा॒स्मा-॑त्पा॒प्मानं॑ वि॒वृ॒हतः॑ ।
यो अ॒र्वन्तं॑ जि॒घा॒सति॑ तम॒भ्यमी॑ति वरु॒ण इति॑ श्वानं
चतु॒रक्षं॑ प्रसौ॒ति । परो॑ म॒र्तः परः॑ श्वेति॒ शुनश्च॑तु-रक्षस्य॒ प्रह॑न्ति ।
श्वे॒व वै पा॒प्मा भ्रातृ॑व्यः । पा॒प्मान-मे॒वास्य॑ भ्रातृ॑व्यञ् हन्ति ।
सै॒ध्रकं॑ मु॒सलं॑ भवति ॥ 13 ॥

T.B.3.8.4.2

कर्म॑ क॒र्मैवा॒स्मै सा॑धयति । पौ॒ञ्च॒ल्ले॒यो ह॑न्ति ।
पु॒ञ्च॒ श्र॒ल्वां वै दे॒वाः शु॒चं न्य॑दधुः । शु॒चैवा॒स्य शु॒चञ् ह॑न्ति ।
पा॒प्मा वा ए॒तमी॒प्स-ती॒त्याहुः॑ । योऽश्व॑मे॒धेन॑ यज॒त इति॑ ।
अश्व॑स्या-ध॒स्पद॑-मु॒पास्य॑ति । वज्री॑ वा अश्वः॒ प्राजा॑पत्यः ।
वज्रे॑णै॒व पा॒प्मानं॑ भ्रातृ॑व्य-मव॒क्राम॑ति । दक्षि॑णा-ऽप॒प्ला॑वयति ॥ 14

T.B.3.8.4.3

पा॒प्मान-मे॒वास्मा॑-च्छ॒मल॑-मप॒प्ला॑वयति । ऐ॒षी॒क उ॒दूहो॑ भवति ।
आ॒यु॒र्वा इ॒षीकाः॑ । आ॒यु॒रे-वा॒स्मिन्द॑धति । अ॒मृतं॑ वा इ॒षीकाः॑ ।

अ॒मृत॑मे॒-वा॒स्मि॒न्द॑धति । वे॒त॒स॒शा॒खो॒प-सं॑बद्धा भवति ।
 अ॒प्सु-यो॒नि॒र्वा अ॑श्वः । अ॒प्सु॒जो वे॑त॒सः ।
 स्वा॒दे॒वैनं॑ यो॒नेर्नि॑-मि॒मी॒ते । पु॒र॒स्ता-त्प्र॑त्यञ्च॒मभ्यु॑-दू॒हति॑ ।
 पु॒र॒स्ता-दे॒वास्मि॑न् प्र॒ती॒च्य मृ॑तं दधाति ।
 अ॒हं च॒ त्वं च॒ वृ॒त्र॒ह॒न्नि॒ति ब्र॑ह्मा यज॑मानस्य ह॒स्तं गृ॑ह्णाति ।
 ब्र॒ह्म॒क्ष॒त्रे ए॒व सं॑दधाति । अ॒भि क्र॑त्वेन्द्र॒ भू॒र॒ध ज॑मन्नित्य-
 ध्व॒र्यु-र्य॑ज॒मानं॑ वा॒च॒य॒त्य-भि॑जित्यै ॥ 15 ॥

T.B.3.8.5.1

च॒त्वार॑ ऋ॒त्वि॒जः॒ समु॑क्षन्ति ।
 आ॒भ्य ए॒वैनं॑ च॒त॒सृ॒भ्यो दि॒ग्भ्यो॑-ऽभि॒समी॑रयन्ति ।
 श॒तेन॑ रा॒ज॒पु॒त्रैः स॒हाध्व॑र्युः । पु॒र॒स्ता-त्प्र॑त्यङ्क्ति॒ष्ठन् प्रो॑क्षति ।
 अ॒ने॒नाश्वे॑न मे॒ध्ये॒नेष्ट्वा॑ । अ॒यं राजा॑ वृ॒त्रं वा॑ध्यादिति ।
 रा॒ज्यं वा॑ अध्व॒र्युः । क्ष॒त्रं राज॑पु॒त्रः । रा॒ज्ये॒नै-वा॒स्मिन्
 क्ष॒त्रं द॑धाति । श॒ते॒ना-रा॒ज॒भि॒रु॒ग्रैः स॒ह ब्र॑ह्मा ॥ 16 ॥

T.B.3.8.5.2

दक्षिणत उदङ्क्तिष्ठन् प्रोक्षति । अनेनाश्वेन मेध्येनेष्ट्वा ।
 अयञ् राजा-ऽप्रतिधृष्यो-ऽस्त्विति । बलं वै ब्रह्मा ।
 बलमराजोग्रः । बलैर्नै-वास्मिन् बलं दधाति ।
 शतेन सूतग्रामणिभिः सह होता । पश्चा-त्प्राङ्क्तिष्ठन् प्रोक्षति ।
 अनेनाश्वेन मेध्येनेष्ट्वा । अयञ् राजाऽस्यै विशः ॥ 17 ॥

T.B.3.8.5.3

बहुग्वै बह्वश्वायै बह्वजाविकायै । बहुव्रीहियवायै बहुमाषतिलायै ।
 बहुहिरण्यायै बहुहस्तिकायै । बहुदासपूरुषायै रयिमत्यै पुष्टिमत्यै ।
 बहुरायस्पोषायै राजाऽस्त्विति । भूमा वै होता । भूमा सूतग्रामण्यः ।
 भूमनैवास्मिन् भूमानं दधाति । शतेन क्षत्त-संग्रहीतृभिः सहोद्गाता ।
 उत्तरतो दक्षिणा तिष्ठन् प्रोक्षति ॥ 18 ॥

T.B.3.8.5.4

अनेनाश्वेन मेध्ये नेष्ट्वा । अयञ् राजा सर्वमायुरेत्विति ।
 आयुर्वा उद्गाता । आयुः क्षत्त-संग्रहीतारः । आयुषै-वास्मिन्नायु-

ॠ॒धा॒ति । श॒त॒ꣳ श॒तं॑ भ॒वन्ति॑ । श॒ता॒युः॑ पु॒रुषः॑ श॒तेन्द्रि॑यः ।
 आ॒युष्ये॑वेन्द्रि॒ये प्र॑ति॒तिष्ठ॑ति । च॒तुः॑ श॒ता भ॒वन्ति॑ । च॒तस्रो॑ दि॒शः ।
 दि॒क्ष्वे॒व प्र॑ति॒तिष्ठ॑ति ॥ 19 ॥

T.B.3.8.6.1

य॒था वै॑ ह॒विषो॑ गृ॒हीत॑स्य स्क॒न्दति॑ । ए॒वं वा॑ ए॒तद॑श्च॒स्य स्क॒न्दति॑ ।
 य॒न्नि॒क्त॒मना॑-ल॒ब्ध-मु॒थ्सृ॑जन्ति । य॒थ्स्तो॒क्या अ॒न्वाह॑ ।
 स॒र्व॒हु॒त-मे॒वैनं॑ क॒रोत्य॑-स्क॒न्दाय॑ । अ॒स्क॒न्नꣳ हि॑ तत् ।
 य॒द्भु॒त॒स्य स्क॒न्दति॑ । स॒हस्र॑-म॒न्वाह॑ । स॒हस्र॑ सं॒मितः॑ सु॒वर्गो॑
 लो॒कः । सु॒वर्ग॑स्य लो॒कस्या॑-भि॒जित्यै॑ ॥ 20 ॥

T.B.3.8.6.2

य॒त्प॒रि॒मिता॑ अ॒नुब्रू॑यात् । प॒रि॒मित॑म-व॒रुन्धी॑त । अ॒प॒रि॒मिता॑ अ॒न्वाह॑ ।
 अ॒प॒रि॒मितः॑ सु॒वर्गो॑ लो॒कः । सु॒वर्ग॑स्य लो॒कस्य॑ स॒म॒ष्ट्यै ।
 स्तो॒क्या जु॑होति । या ए॒व व॒र्ष्या॑ आ॒पः । ता अ॒व॒रुन्धे॑ ।
 अ॒स्यां जु॑होति । इ॒यं वा॑ अ॒ग्निर्वै॑श्वा॒नरः॑ ॥ 21 ॥

T.B.3.8.6.3

अस्या॑मे॒वैनाः॑ प्र॒तिष्ठा॑पयति । उवाच॑ ह प्र॒जाप॑तिः ।
 स्तो॒क्या॒सु वा अ॒हम॑श्चमे॒धꣳ सꣳ स्था॑पयामि ।
 तेन॑ ततः सꣳस्थि॑तेन च॒रामी॑ति । अ॒ग्नये॑ स्वाहे॒त्याह॑ ।
 अ॒ग्नय॑ ए॒वैनं॑ जुहोति । सो॒माय॑ स्वाहे॒त्याह॑ । सो॒मायै॑वैनं॑ जुहोति ।
 स॒वित्रे॑ स्वाहे॒त्याह॑ । स॒वित्र॑ ए॒वैनं॑ जुहोति ॥ 22 ॥

T.B.3.8.6.4

सर॑स्वत्यै स्वाहे॒त्याह॑ । सर॑स्वत्या ए॒वैनं॑ जुहोति । पू॒ष्णे स्वाहे॒त्याह॑ ।
 पू॒ष्ण ए॒वैनं॑ जुहोति । बृ॒हस्प॑तये स्वाहे॒त्याह॑ ।
 बृ॒हस्प॑तय ए॒वैनं॑ जुहोति । अ॒पां मो॑दाय स्वाहे॒त्याह॑ ।
 अ॒द्भ्य ए॒वैनं॑ जुहोति । वा॒यवे॑ स्वाहे॒त्याह॑ ।
 वा॒यव॑ ए॒वैनं॑ जुहोति ॥ 23 ॥

T.B.3.8.6.5

मि॒त्राय॑ स्वाहे॒त्याह॑ । मि॒त्रायै॑वैनं॑ जुहोति । वरु॑णाय स्वाहे॒त्याह॑ ।
 वरु॑णायै॑वैनं॑ जुहोति ॥ ए॒ताभ्य॑ ए॒वैनं॑ दे॒वता॑भ्यो जुहोति ।

द॒श॑ द॒श॑ संपादं॑ जुहोति । द॒शाक्ष॑रा वि॒राट् । अन्नं॑ वि॒राट् ।
 वि॒राजै॑-वा॒न्नाद्य॑म-व॒रुन्धे॑ । प्र॒ वा ए॒षो-ऽस्माँल्लो॑का-च॒च्यव॑ते ।
 यः प॒राची॑राहु॒ती-जु॑होति । पुनः॑ पुन॒रभ्या॑ वर्तं जुहोति ।
 अ॒स्मिन्ने॒व लो॒के प्र॑ति॒तिष्ठ॑ति ।
 ए॒ता॒ ह वा॒व सोऽश्व॑मे॒धस्य॑ स॒स्थि॑ति मु॒वाचा॑-स्क॒न्दाय॑ ।
 अ॒स्क॒न्न॒ हि तत् । यद्य॑ज्ञ॒स्य स॒स्थि॑तस्य स्क॒न्दति॑ ॥ 24 ॥

T.B.3.8.7.1

प्र॒जाप॑तये॒ त्वा जु॑ष्टं प्रो॒क्षामी॑ति पु॒रस्ता॑-त्प्र॒त्यङ्कि॑ष्ठन् प्रो॒क्षति॑ ।
 प्र॒जाप॑तिर्वै दे॒वाना॑-म॒न्नादो॑ वी॒र्या॑वान् ।
 अ॒न्नाद्य॑मे॒वास्मिन्॑ वी॒र्यं॑ दधाति ।
 तस्मा॑द॒श्वः प॒शूना॑-म॒न्नादो॑ वी॒र्या॑वत्तमः ।
 इ॒न्द्राग्नि॑भ्यां त्वेति दक्षि॒णतः॑ । इ॒न्द्राग्नी॑ वै दे॒वानामो॑जिष्ठौ ब॒लिष्ठौ॑ ।
 ओज॑ ए॒वास्मिन्॑ ब॒लं दधा॑ति । तस्मा॑द॒श्वः प॒शूना॑मो॒जिष्ठो॑ ब॒लिष्ठः॑ ।
 वा॒यवे॑ त्वेति प॒श्चात् । वा॒युर्वै दे॒वानामा॑शुः सा॒रसा॑रितमः ॥ 25 ॥

T.B.3.8.7.2

ज॒वमे॑-वा॒स्मि॒न्दधा॑ति । तस्मा॑द॒श्वः प॒शूना॑मा॒शुः सा॒रसा॑रि॒तमः॑ ।
वि॒श्वे॑भ्य॒स्त्वा दे॒वेभ्य॑ इत्यु॒त्तर॑तः ।
वि॒श्वे वै दे॒वा दे॒वानां॑ य॒शस्वि॑त॒माः । य॒श ए॒वास्मि॑-न्दधा॑ति ।
तस्मा॑द॒श्वः प॒शूनां॑ य॒शस्वि॑त॒मः । दे॒वेभ्य॑-स्त्वे॒त्यध॑स्तात् ।
दे॒वा वै दे॒वाना॑म-प॒चित॑त॒माः । अ॒पचि॑ति-मे॒वास्मि॑-न्दधा॑ति ।
तस्मा॑द॒श्वः प॒शूना॑म-प॒चित॑त॒मः ॥ 26 ॥

T.B.3.8.7.3

स॒र्वे॑भ्य॒स्त्वा दे॒वेभ्य॑ इत्यु॒परि॑ष्ठात् । स॒र्वे वै दे॒वास्त्वि॑षि॒मन्तो॑
हर॑स्वि॒नः । त्वि॑षिमे॒-वा॒स्मिन् ह॑रो दधा॑ति । तस्मा॑द॒श्वः प॒शूनां॑
त्वि॑षि॒मान् हर॑स्वि॒तमः॑ । दि॒वे त्वाऽन्त॑रि॒क्षाय॑ त्वा पृ॒थिव्यै॑ त्वे॒त्याह॑ ।
ए॒भ्य ए॒वैनं॑ लो॒केभ्यः॑ प्रो॒क्षति॑ । स॒ते त्वाऽस॑ते त्वा-
ऽद्भ्य॑स्त्वौ-ष॒धीभ्य॑स्त्वा वि॒श्वेभ्य॑स्त्वा भू॒तेभ्य॑ इत्या॒ह ।
तस्मा॑द॒श्व-मे॒धया॑जि॒न् सर्वा॑णि भू॒तान्यु॑प जी॒वन्ति॑ ।
ब्र॒ह्मवा॑दि॒नो वद॑न्ति । यत्प्रा॑जाप॒त्योऽश्वः॑ ।

अथ कस्मादेन-मन्याभ्यो देवताभ्योऽपि प्रोक्षतीति ।

अश्वे वै सर्वा देवता अन्वायत्ताः ।

तं यद्विश्वेभ्यस्त्वा भूतेभ्य इति प्रोक्षति ।

देवता एवास्मि-न्नन्वायातयति ।

तस्मादश्वे सर्वा देवता अन्वायत्ताः ॥ 27 ॥

T.B.3.8.8.1

यथा वै हविषो गृहीतस्य स्कन्दति । एवं वा एतदश्वस्य स्कन्दति ।

यत्प्रोक्षित-मनालब्ध-मुत्सृजन्ति । यदश्व-चरितानि जुहोति ।

सर्वहुत-मेवैनं करोत्य-स्कन्दाय । अस्कन्नं हि तत् ।

यद्धुतस्य स्कन्दति । ईकाराय स्वाहेनं कृताय स्वाहेत्याह ।

एतानि वा अश्वचरितानि । चरितैरेवैनं समर्धयति ॥ 28 ॥

T.B.3.8.8.2

तदाहुः । अनाहुतयो वा अश्वचरितानि । नैता होतव्या इति ।

अथो खल्वाहुः । होतव्या एव । अत्र वावैवं विद्वानश्वमेधं

स७ स्थापयति । यदश्व-चरितानि जुहोति । तस्मा-द्धोतव्या इति ।
बहिर्धा वा एन मेतदायत नादधाति । भ्रातृव्यमस्मै जनयति ॥ 29 ॥

T.B.3.8.8.3

यस्या नायतने-ऽन्यत्राग्ने-राहुतीर् जुहोति । सावित्रिया इष्ट्याः
पुरस्तात्स्विष्ट कृतः । आहवनीये-ऽश्वचरितानि जुहोति ।
आयतन एवास्याहुतीर् जुहोति । नास्मै भ्रातृव्यं जनयति । तदाहुः ।
यज्ञमुखे यज्ञमुखे होतव्याः । यज्ञस्य क्लृप्त्यै ।
सुवर्गस्य लोकस्या-नुख्यात्या इति । अथो खल्वाहुः ॥ 30 ॥

T.B.3.8.8.4

यद्यज्ञमुखे यज्ञमुखे जुहुयात् । पशुभि-र्यजमानं व्यर्धयेत् ।
अव सुवर्गाँ ल्लोका-त्पद्येत । पापीयान्त्स्यादिति ।
सकृदेव होतव्याः । न यजमानं पशुभि-र्व्यर्धयति ।
अभि सुवर्गाँ लोकं जयति । न पापीयान् भवति ।
अष्टाचत्वारिंशत् शतमश्व रूपाणि जुहोति ।
अष्टाचत्वारिंशत् शदक्षरा जगती । जागतोऽश्वः प्राजापत्यः समृद्ध्यै ।

ए॒क॒म॒ति॒रि॒क्तं जु॒होति॑ । तस्मा॒दे॒कः प्र॒जास्व॑र्धु॒कः ॥ ३१ ॥

T.B.3.8.9.1

वि॒भूर्मा॒त्रा प्र॒भूः पि॒त्रेत्या॑ह । इ॒यं वै मा॒ता । अ॒सौ पि॒ता ।
 आ॒भ्यामे॒वैनं॑ परि॒ददा॑ति । अ॒श्वोऽसि॑ ह॒योऽसी॑त्याह ।
 शा॒स्त्ये-वैन॑मे॒तत् । तस्मा॑च्छि॒ष्टाः प्र॒जा जा॑यन्ते । अ॒त्योऽसी॑त्याह ।
 तस्मा॑द॒श्वः सर्वा॑न् प॒शून॑त्ये॒ति ।
 तस्मा॑द॒श्वः सर्वे॑षां प॒शूना॑ञ् श्रैष्॒ठ्यं ग॑च्छति ॥ ३२ ॥

T.B.3.8.9.2

प्र य॒शः श्रैष्॑ठ्यमा॒प्नोति॑ । य ए॒वं वै॒द । न॒रोऽस्य॑र्वा॒सि स॒प्तिर॑सि
 वा॒ज्यसी॑त्याह । रू॒पमे॒वा॒स्यै-त॑न्महि॒मानं॑ व्या॒चष्टे॑ ।
 य॒युर्ना॒मा-ऽसी॑त्याह । ए॒तद्वा अ॒श्वस्य॑ प्रि॒यं ना॒मधे॑यम् ।
 प्रि॒येणै॒वैनं॑ ना॒मधे॑ये-ना॒भिव॑दति । तस्मा॑द॒प्या-मि॒त्रौ सं॒गत्य॑ ।
 ना॒म्ना चे॒द्ध्वये॑ते । मि॒त्रमे॒व भ॑वतः ॥ ३३ ॥

T.B.3.8.9.3

आ॒दि॒त्यानां॑ प॒त्वा-ऽन्वि॑ही॒त्याह॑ । आ॒दि॒त्याने॒वैनं॑ ग॒मय॑ति ॥
 अ॒ग्नये॑ स्वा॒हा स्वा॒हेन्द्रा॑-ग्नि॒भ्यामि॑ति पू॒र्वहो॑मा-ञ्जु॒होति॑ ।
 पू॒र्व ए॒व द्वि॒षन्तं॑ भ्रातृ॒व्य-म॑ति॒क्राम॑ति ।
 भूर॑सि भु॒वे त्वा॑ भ॒व्याय॑ त्वा भ॒विष्य॑ते त्वे॒त्युत्सृ॑जति सर्व॒त्वाय॑ ।
 दे॒वा आ॑शा॒पाला॑ ए॒तं दे॒वेभ्यो॑ऽश्वं॑ मे॒धाय॑ प्रो॒क्षितं॑ गो॒पाय॑ते॒त्याह॑ ।
 श॒तं वै त॑ल्प्या॒ राज॑पु॒त्रा दे॒वा आ॑शा॒पालाः॑ ।
 तेभ्य॑ ए॒वैनं॑ परि॒ददा॑ति । ई॒श्वरो॑ वा अ॒श्वः प्र॑मु॒क्तः परां॑ प॒राव॑तं
 ग॒न्तोः॑ । इ॒ह धृ॑तिः स्वा॒हेह वि॑धृतिः स्वा॒हेह र॑न्तिः स्वा॒हेह र॑मतिः
 स्वा॒हेति॑ च॒तृषु॑ प॒थ्सु॑ जु॒होति॑ ॥ 34 ॥

T.B.3.8.9.4

ए॒ता वा अ॑श्व॒स्य ब॑न्ध॒नम् । ता॒भिरे॒वैनं॑ ब॒ध्नाति॑ ।
 तस्मा॑द॒श्वः प्र॑मु॒क्तो ब॑न्ध॒न-मा॑गच्छति ।
 तस्मा॑द॒श्वः प्र॑मु॒क्तो ब॑न्ध॒नं न॑ जहाति ।

राष्ट्रं॑ वा॑ अ॒श्वमे॒धः । रा॒ष्ट्रे ख॒लु वा ए॒ते व्या॑यच्छन्ते ।
 येऽश्वं॑ मे॒ध्यं र॒क्षन्ति॑ । तेषां॑ यं उ॒दृचं॑ गच्छन्ति ।
 रा॒ष्ट्रादे॒व ते रा॒ष्ट्रं ग॑च्छन्ति । अ॒थ य उ॒दृचं॑ न गच्छन्ति ॥ 35 ॥

रा॒ष्ट्रादे॒व ते व्य॑वच्छिद्यन्ते । प॒रा वा ए॒ष सि॑च्यते ।
 यो-ऽब॒लौ-ऽश्वमे॒धेन॑ यजते । यद॒मित्रा॑ अ॒श्वं वि॑न्देरन् ।
 ह॒न्येता॑स्य य॒ज्ञः । च॒तुश्श॑ता र॒क्षन्ति॑ । य॒ज्ञस्या-॑घा॒ताय॑ ।
 अ॒थान्य॑-मा॒नीय॑ प्रो॒क्षेयुः॑ । सै॒व ततः॑ प्रायश्चित्तिः ॥ 4 ॥ 36

T.B.3.8.10.1

प्र॒जाप॑तिर-का॒मय॑ता-श्वमे॒धेन॑ यजेयेति । स तपो॑ऽतप्यत ।
 तस्य॑ ते॒पान॑स्य । स॒प्तात्म॑नो दे॒वता॑ उदक्रामन् ।
 सा दी॒क्षा-ऽभ॑वत् । स ए॒तानि॑ वैश्व दे॒वान्य॑ पश्यत् । तान्य॑ जुहोत् ।
 तैर्वै॑ स दी॒क्षाम॑-वा॒रुन्ध॑ । यद्वैश्व॑ दे॒वानि॑ जुहोति ।
 दी॒क्षामे॒वतै॑-र्यज॑मानो-ऽव॒रुन्धे॑ ॥ 37 ॥

T.B.3.8.10.2

सप्त जुहोति । सप्त हि ता देवता उदक्रामन् । अन्वहं जुहोति ।
 अन्वहमेव दीक्षाम-वरुन्धे । त्रीणि वैश्वदेवानि जुहोति ।
 चत्वार्यो-द्ग्रहणानि । सप्त संपद्यन्ते ।
 सप्त वै शीरषण्याः प्राणाः । प्राणा दीक्षा ।
 प्राणैरेव प्राणान्दीक्षाम-वरुन्धे ॥ 38 ॥

T.B.3.8.10.3

एकविंशतिं वैश्वदेवानि जुहोति । एकविंशतिर्वै देवल्लोकाः ।
 द्वादश मासाः पञ्चर्तवः । त्रय इमे लोकाः ।
 असावादित्य एकविंशः । एष सुवर्गो लोकः । तद्वैव्यं क्षत्रम् ।
 सा श्रीः । तद्ब्रध्नस्य विष्टपम् । तत्स्वाराज्य-मुच्यते ॥ 39 ॥

T.B.3.8.10.4

त्रिंशत्तमौ-द्ग्रहणानि जुहोति । त्रिंशदक्षरा विराट् ।
 अन्नं विराट् । विराजै-वान्नाद्यम वरुन्धे ।
 त्रेधा विभज्य देवतां जुहोति । त्र्यावृतो वै देवाः ।

१
त्र्या॒वृत॑ इ॒मे लो॒काः । ए॒षां लो॒काना॑माप्त्यै ॥

ए॒षां लो॒कानां॑ क्लृ॒प्त्यै ॥ अ॒प॒ वा ए॒तस्मात्प्रा॑णाः क्रा॒मन्ति ॥ 40 ॥

T.B.3.8.10.5

यो दी॒क्षाम॑ति-रेच॑यति । स॒प्ता॒हं प्र॑चरन्ति ।

स॒प्त वै शी॑र्ष॒ण्याः प्रा॒णः । प्रा॒णा दी॒क्षा ।

प्रा॒णैरे॒व प्रा॒णान्दी॒क्षाम-व॑रुन्धे । पू॒र्णाहु॒ति-मु॑त्त॒मां जु॑होति ।

सर्वं॑ वै पू॒र्णाहु॒तिः । सर्व॑मे॒वाप्नो॑ति । अथो॑ इ॒यं वै पू॒र्णाहु॒तिः ।

अ॒स्यामे॒व प्र॑ति॒तिष्ठ॑ति ॥ 41 ॥

T.B.3.8.11.1

प्र॒जाप॑ति-रश्व॑मे॒धम-सृ॑जत । त॒ꣳ सृ॑ष्टं न किञ्च॑नो-दय॑च्छत् ।

तं वै॑ श्वदे॒वान्ये-वो॑दय॑च्छन् । यद्वै॑ श्वदे॒वानि जु॑होति ।

य॒ज्ञस्यो॑द्य॒त्यै । स्वा॒हा-ऽऽधि॑मा॒धीता॒य स्वा॒हा ।

स्वा॒हा-ऽऽधी॑तं॒ मन॑से स्वा॒हा । स्वा॒हा मनः॑ प्र॒जाप॑तये स्वा॒हा ।

का॒य स्वा॒हा कस्मै॑ स्वा॒हा क॒तम॑स्मै स्वा॒हेति॑ प्रा॒जाप॑त्ये॒ मुख्ये॑

भवतः । प्र॒जाप॑ति-मु॒खाभि॑रेवैनं दे॒वता॑भि-रु॒द्यच्छ॑ते ॥ 42 ॥

T.B.3.8.11.2

अदि॑त्यै स्वा॒हाऽदि॑त्यै म॒ह्यै स्वा॒हाऽदि॑त्यै सु॒मृ॒डीका॑यै स्वा॒हेत्या॑ह ।
 इ॒यं वा॑ अदि॑तिः । अ॒स्या ए॒वैनं॑ प्र॒तिष्ठा॑-यो॒द्यच्छ॑ते ।
 सर॑स्वत्यै स्वा॒हा सर॑स्वत्यै बृ॒हत्यै॑ स्वा॒हा सर॑स्वत्यै पा॒वका॑यै
 स्वा॒हेत्या॑ह । वा॒ग्वै सर॑स्वती । वा॒चैवै॑-नमु॒द्यच्छ॑ते ।
 पू॒ष्णे स्वा॒हा पू॒ष्णे प्र॒प॒थ्याय॑ स्वा॒हा पू॒ष्णे न॒रन्धि॑षाय॒ स्व॒हेत्या॑ह ।
 प॒शवो॑ वै पू॒षा । प॒शुभि॑रेवैन-मु॒द्यच्छ॑ते ।
 त्वष्ट्रे॑ स्वा॒हा त्वष्ट्रे॑ तु॒रीपा॑य स्वा॒हा त्वष्ट्रे॑ पु॒रुरूपा॑य स्वा॒हेत्या॑ह ।
 त्वष्टा॑ वै प॒शूनां॑ मि॒थुना॑नाꣳ रू॒पकृ॑त् । रू॒पमे॒व प॒शुषु॑ दधाति ।
 अथो॑ रू॒पैरे॒वैन-मु॒द्यच्छ॑ते । वि॒ष्णावे॑ स्वा॒हा वि॒ष्णावे॑ नि॒खुर्य॑पाय॒ स्वा॒हा वि॒ष्णावे॑ नि॒भूय॑पाय स्वा॒हेत्या॑ह । य॒ज्ञो वै वि॒ष्णुः॑ ।
 य॒ज्ञायै॑वैन-मु॒द्यच्छ॑ते । पू॒र्णाहु॑ति-मु॒त्तमां॑ जुहोति ।
 प्र॒त्युत्त॑ब्ध्यै स॒यत्वा॑य ॥ 43 ॥

T.B.3.8.12.1

सा॒वि॒त्र-म॒ष्टाक॑पालं प्रा॒तर्निर्व॑पति । अ॒ष्टाक्ष॑रा गाय॒त्री ।
 गाय॒त्रं प्रा॒तः स॒वनं॑ । प्रा॒तः स॒वना॑ दे॒वैनं॑ गाय॒त्रिया-श्छ॑न्दसोऽधि
 निर्मि॑मीते । अथो॑ प्रा॒तः स॒वनमे॒व तेना॑प्नोति । गाय॒त्रीं छ॑न्दः ।
 स॒वि॒त्रे प्र॑स॒वि॒त्र ए॒काद॑श-क॒पालं म॑ध्य॒न्दिने॑ ।
 ए॒काद॑शाक्ष॒रा त्रि॒ष्टुप् । त्रै॒ष्टुभं॑ मा॒ध्यन्दि॑नं स॒वनम् ।
 मा॒ध्यन्दि॑ना-दे॒वैनं॑ स॒वना॑त्त्रि॒ष्टुभ-श्छ॑न्दसोऽधि निर्मि॑मीते ॥ 44 ॥

T.B.3.8.12.2

अथो॑ मा॒ध्यन्दि॑नमे॒व स॒वनं॑ तेना॑प्नोति । त्रि॒ष्टुभं॑ छ॑न्दः ।
 स॒वि॒त्र आ॑स॒वि॒त्रे द्वा॒दश॑-क॒पाल-म॑परा॒ह्णे । द्वा॒दशा॑क्ष॒रा ज॑गती ।
 जा॒गतं॑ तृ॒तीय स॒वनम् । तृ॒तीय स॒वना॑दे॒वैनं॑ ज॒गत्या॑-श्छ॑न्दसोऽधि
 निर्मि॑मीते । अथो॑ तृ॒तीय स॒वनमे॒व तेना॑प्नोति ।
 ज॒गतीं॑ च॒न्दः । ई॒श्वरो॑ वा अ॒श्वः प्र॑मु॒क्तः प॑रां प॒राव॑तं ग॒न्तोः॑ ।
 इ॒ह धृ॑तिः स्वा॒हेह वि॑धृतिः स्वा॒हेह र॑न्तिः स्वा॒हेह र॑मतिः

स्वा॑हेति॒ चत॑स्र॒ आहु॑ती-र्जु॑होति ॥ 45 ॥

चत॑स्रो दि॒शः । दि॒ग्भिरे॑वैनं॒ परि॑गृह्णाति । आश्व॑त्थो व्र॒जो भ॑वति ।
 प्रजा॑पति-र्दे॒वेभ्यो॑ नि॒लाय॑त । अश्वो॑ रू॒पं कृ॑त्वा ।
 सोऽश्व॑त्थे सँव॑त्सर॒म-ति॑ष्ठत् । तदश्व॑त्थस्या-श्व॑त्थत्वम् ।
 यदाश्व॑त्थो व्र॒जो भ॑वति । स्व ए॒वैनं॑ यो॒नौ प्र॑तिष्ठापयति ॥ 46 ॥

T.B.3.8.13.1

आ ब्र॑ह्मन् ब्रा॒ह्मणो ब्र॑ह्मवर्च॒सी जा॑यता-मि॒त्याह॑ ।
 ब्रा॒ह्मण ए॒व ब्र॑ह्मवर्च॒सं द॑धाति । तस्मा॑त्पु॒रा ब्रा॑ह्मणो ब्र॑ह्मवर्च॒स्य
 जा॑यत । आऽस्मि॒न्नाष्ट्रे॑ रा॒जन्य इ॑षव्यः शू॒रो म॑हार॒थो जा॑यता-
 मि॒त्याह॑ । रा॒जन्य ए॒व शौ॑र्यं म॒हिमा॑नं द॑धाति ।
 तस्मा॑त्पु॒रा रा॒जन्य इ॑षव्यः शू॒रो म॑हार॒थो-ऽजा॑यत ।
 दोग्ध्री॑ धे॒नुरि॑त्याह । धे॒न्वामे॑व प॒यो द॑धाति ।
 तस्मा॑त्पु॒रा दोग्ध्री॑ धे॒नुर॑जायत । वो॒ढाऽन॑ड्वा-नि॒त्याह॑ ॥ 47 ॥

T.B.3.8.13.2

अ॒न॒डु॒ह्ये॒व वी॒र्यं॑ द॒धाति॑ । तस्मा॑त्पु॒रा वो॒ढाऽन॑ड्वान॒ जाय॑त ॥
 आ॒शुः स॒प्तिरि॒त्याह॑ । अ॒श्व ए॒व ज॒वं द॒धाति॑ ।
 तस्मा॑-त्पु॒रा-ऽऽशु॑रश्चो-ऽजा॒यत॑ । पु॒रंधि॑र्योषे॒त्याह॑ । योषि॑त्ये॒व रू॒पं
 द॒धाति॑ । तस्मा॑त्स्त्री॒ यु॒वतिः॑ प्रि॒या भा॒वुका॑ । जि॒ष्णू र॒थेष्ठा॑ इ॒त्याह॑ ।
 आ॒ ह॒ वै तत्र॑ जि॒ष्णू र॒थेष्ठा॑ जा॒यते॑ ॥ 48 ॥

T.B.3.8.13.3

यत्रै॑तेन॒ य॒ज्ञेन॑ य॒जन्ते॑ । स॒भेयो॑ यु॒वेत्या॑ह । यो॒ वै पू॒र्वव॑यसी ।
 स स॒भेयो॑ यु॒वा । तस्मा॑द्यु॒वा पु॒मान् प्रि॒यो भा॒वुकः॑ ।
 आऽस्य॑ य॒जमा॑नस्य॒ वी॒रो जा॒यता॑-मि॒त्याह॑ ।
 आ॒ ह॒ वै तत्र॑ य॒जमा॑नस्य॒ वी॒रो जा॒यते॑ ।
 यत्रै॑तेन॒ य॒ज्ञेन॑ य॒जन्ते॑ । नि॒कामे॑ नि॒कामे॑ नः प॒र्जन्यो॑ व॒र्ष॒त्वि॒त्याह॑ ।
 नि॒कामे॑ नि॒कामे॑ ह॒ वै तत्र॑ प॒र्जन्यो॑ व॒र्ष॒ति ।
 यत्रै॑तेन॒ य॒ज्ञेन॑ य॒जन्ते॑ । फ॒लि॒न्यो न॑ ओष॒धयः॑ प॒च्यन्ता॑-मि॒त्याह॑ ।

फ॒लि॒न्यो॑ ह॒ वै तत्रौ॑ष॒धयः॑ प॒च्यन्ते॑ । यत्रै॑तेन॒ यज्ञे॑न यज॒न्ते ।
 यो॒गक्षे॑मो नः क॒ल्पता॑-मि॒त्याह॑ । क॒ल्पते॑ ह॒ वै तत्र॑ प्र॒जाभ्यो॑
 यो॒गक्षे॑मः । यत्रै॑तेन॒ यज्ञे॑न यज॒न्ते । ॥ 49 ॥

T.B.3.8.14.1

प्र॒जाप॑ति-र्दे॒वेभ्यो॑ य॒ज्ञान्व्यादि॑शत् । स आ॒त्मन्न॑-श्वमे॒धम॑धत्त ।
 तं दे॒वा अब्रु॑वन् । ए॒ष वाव॑ य॒ज्ञः । यद॑श्वमे॒धः ।
 अ॒प्येव॑ नोऽत्रा॒स्त्विति॑ । तेभ्य॑ ए॒तान॑न्न-हो॒मान् प्राय॑च्छत् ।
 तान॑ जुहोत् । तैर्वै॑ स दे॒वान॑ प्रीणात् । यद॑न्न-हो॒माञ्जु॑होति ॥ 50 ॥

T.B.3.8.14.2

दे॒वाने॒व तैर्य॑ज॒मानः॑ प्रीणाति । आ॒ज्ये॑न जुहोति ।
 अ॒ग्नेर्वा॑ ए॒तद्रू॑पम् । यदा॒ज्यम्॑ । यदा॒ज्ये॑न जुहोति ।
 अ॒ग्निमे॒व तत्प्री॑णाति । म॒धुना॑ जुहोति ।
 म॒हत्यै॑ वा ए॒तद्दे॒वता॑यै रू॒पम् । यन्म॑धु । यन्म॑धुना जुहोति ॥ 51 ॥

T.B.3.8.14.3

म॒हती॑मे॒व तद्दे॒वतां॑ प्री॒णाति॑ । त॒ण्डु॒लै-र्जु॑होति ।
 व॒सूनां॑ ँ॒वा ए॒तद्रू॒पम् । य॒त्तण्डु॒लाः । य॒त्तण्डु॒लै-र्जु॑होति ।
 व॒सूने॒व तत्प्री॑णाति । पृ॒थु॒कै-र्जु॑होति । रु॒द्राणां॑ ँ॒वा ए॒तद्रू॒पम् ।
 य॒त्पृ॒थु॒काः । य॒त्पृ॒थु॒कै-र्जु॑होति ॥ 52 ॥

T.B.3.8.14.4

रु॒द्राने॒व तत्प्री॑णाति । ला॒जैर्जु॑होति । आ॒दि॒त्यानां॑ ँ॒वा ए॒तद्रू॒पम् ।
 य॒ल्ला॒जाः । य॒ल्ला॒जै-र्जु॑होति । आ॒दि॒त्याने॒व तत्प्री॑णाति ।
 क॒र॒म्बै-र्जु॑होति । वि॒श्वे॒षां ँ॒वा ए॒तद्दे॒वानां॑ रू॒पम् । य॒त्क॒र॒म्बाः ।
 य॒त्क॒र॒म्बै-र्जु॑होति ॥ 53 ॥

T.B.3.8.14.5

वि॒श्वाने॒व तद्दे॒वान् प्री॑णाति । धा॒नाभि॑-र्जुहोति ।
 नक्ष॑त्राणां ँ॒वा ए॒तद्रू॒पम् । य॒द्धानाः॑ । य॒द्धाना॑भि-र्जुहोति ।
 नक्ष॑त्राण्ये॒व तत्प्री॑णाति । स॒क्तु॒भि-र्जु॑होति । प्र॒जाप॑ते॒र्वा ए॒तद्रू॒पम् ।
 य॒थ्स॒क्तवः॑ । य॒थ्स॒क्तु॒भि-र्जु॑होति ॥ 54 ॥

T.B.3.8.14.6

प्र॒जा॒प॒ति॒मे॒व॒ तत्प्री॑णाति । म॒सू॒स्यै॑र्जु॒होति॑ ।
 सर्वा॑सां वा॒ ए॒तद्दे॒वता॑नां रूपम् । यन्म॒सू॒स्यानि॑ ।
 यन्म॒सू॒स्यै॑-र्जु॒होति॑ । सर्वा॑ ए॒व तद्दे॒वताः॑ प्रीणाति ।
 प्रि॒यङ्गु॒तण्डु॒लै-र्जु॒होति॑ । प्रि॒याङ्गा॑ ह॒ वै ना॒मैते॑ ।
 ए॒तैर्वै॑ दे॒वा अ॒श्वस्या॑ङ्गानि॒ सम॑दधुः । यत्प्रि॒यङ्गु॒तण्डु॒लै-र्जु॒होति॑ ।
 अ॒श्वस्यै॑-वाङ्गानि॒ संद॑धाति । द॒शान्ना॑नि जुहोति । द॒शाक्ष॑रा वि॒राट् ।
 वि॒राट्-कृ॒थ॒स्नस्या॑-न्नाद्य॒स्या-वरु॑द्ध्यै ॥ 55 ॥

T.B.3.8.15.1

प्र॒जा॒प॒ति-र॒श्वमे॑धम॒ सृज॑त । तं सृष्टुं र॒क्षाञ्च॑स्य जिघाञ्च॑सन् ।
 स ए॒तान् प्र॒जा॒प॒तिर्न॑क्तञ्च॒ होमा॑न-पश्यत् । तान् जुहोत् ।
 तैर्वै॑ स य॒ज्ञाद्र॑क्षाञ्च॒स्य पा॑हन् । यन्न॑क्तञ्च॒ होमाञ्जु॑होति ।
 य॒ज्ञादे॒व तैर्य॑ज॒मानो॑ र॒क्षाञ्च॑स्य प॑हन्ति । आ॒ज्ये॑न जुहोति ।
 वज्रो॑ वा आ॒ज्यम् । वज्रे॑णै॒व य॒ज्ञाद्र॑क्षाञ्च॒स्य प॑हन्ति ॥ 56 ॥

T.B.3.8.15.2

आज्यस्य॑ प्रतिपदं॑ करोति॑ । प्राणो॑ वा आज्यम्॑ ॥
 मुखत॑ एवास्य॑ प्राणं॑ दधाति॑ । अन्नहो॑मा-ञ्जुहोति॑ । शरीरवदे॑वा-
 वरुन्धे॑ । व्यत्यासं॑ जुहोति॑ । उभयस्या॑ वरुध्यै॑ । नक्तं॑ जुहोति॑ ।
 रक्षसाम॑ पहत्यै॑ । आज्ये॑नान्ततो॑ जुहोति॑ ॥ 57 ॥

T.B.3.8.15.3

प्राणो॑ वा आज्यम्॑ । उभयत॑ एवास्य॑ प्राणं॑ दधाति॑ ।
 पुरस्ता॑-च्चोपरि॑ष्टाच्च॑ । एकस्मै॑ स्वाहेत्याह॑ ।
 अस्मिन्ने॒व लो॒के प्र॒तिति॑ष्ठति॑ । द्वाभ्याञ् स्वाहेत्याह॑ ।
 अमुष्मिन्ने॒व लो॒के प्र॒तिति॑ष्ठति॑ । उभयो॑रेव लो॒कयोः॑ प्र॒तिति॑ष्ठति॑ ।
 अस्मिञ्श्चा॑-मुष्मिञ्श्च॑ । शताय॑ स्वाहेत्याह॑ ।
 शतायुर्वै॑ पुरुषः॑ शतवी॒र्यः॑ । आयु॑रेव वी॒र्यम॑वरुन्धे॑ ।
 सहस्राय॑ स्वाहेत्याह॑ । आयुर्वै॑ सहस्रम्॑ । आयु॑रेवा-वरुन्धे॑ ।
 सर्वस्मै॑ स्वाहेत्याह॑ । अपरि॑मितमे॒वा वरु॑न्धे ॥ 58 ॥

T.B.3.8.16.1

प्र॒जाप॑तिं वा॒ ए॒ष ई॒प्स॑तीत्याहुः । योऽश्व॑मे॒धेन॑ यज॑त इति॑ ।
 अथो॑ आहुः । सर्वा॑णि भू॒तानी॑ति । एक॑स्मै स्वा॒हेत्या॑ह ।
 प्र॒जाप॑तिर्वा एकः॑ । तमे॒वाप्नो॑ति । एक॑स्मै स्वा॒हा द्वा॒भ्याऽ॒
 स्वा॒हेत्य॑भि-पूर्व॑माहु॒ती-जु॑होति ।
 अ॒भिपूर्व॑मे॒व सु॒वर्गं॑ लो॒कमे॑ति । ए॒कोत्तरं॑ जुहोति ॥ 59 ॥

T.B.3.8.16.2

ए॒क॒वदे॑व सु॒वर्गं॑ लो॒कमे॑ति । स॒न्त॒तं जु॑होति ।
 सु॒वर्ग॑स्य लो॒कस्य॑ स॒न्त॒त्यै । श॒ताय॑ स्वा॒हेत्या॑ह ।
 श॒तायु॑र्वै पु॒रुशः॑ श॒तवी॑र्यः । आ॒यु॒रे॒व वी॑र्य॒मव॑रुन्धे ।
 स॒हस्रा॑य स्वा॒हेत्या॑ह । आ॒युर्वै स॒हस्र॑म् । आ॒यु॒रे॒वा व॑रुन्धे ।
 अ॒यु॒ताय॑ स्वा॒हा नि॒यु॒ताय॑ स्वा॒हा प्र॒यु॒ताय॑ स्वा॒हेत्या॑ह ॥ 60 ॥

T.B.3.8.16.3

त्रय॑ इ॒मे लो॒काः । इ॒माने॒व लो॒कान-वरु॑न्धे । अ॒र्बु॒दाय॑ स्वा॒हेत्या॑ह ।
वाग्वा॑ अ॒र्बु॒दम् । वाच॑मे॒वा वरु॑न्धे । न्य॒र्बु॒दाय॑ स्वा॒हेत्या॑ह ।
यो वै वा॒चो भू॒मा । तन्न्य॑र्बु॒दम् । वा॒च ए॒व भू॒मान॑म वरु॑न्धे ।
समु॒द्राय॑ स्वा॒हेत्या॑ह ॥ 61 ॥

T.B.3.8.16.4

समु॒द्रमे॒वाप्नो॑ति । म॒ध्याय॑ स्वा॒हेत्या॑ह । म॒ध्यमे॒वाप्नो॑ति ।
अन्ता॑य स्वा॒हेत्या॑ह । अन्त॑मे-वाप्नो॑ति । प॒रार्था॑य स्वा॒हेत्या॑ह ।
प॒रार्ध॑मे॒वाप्नो॑ति । उ॒षसे॑ स्वा॒हा व्यु॑ष्ट्यै स्वा॒हेत्या॑ह । रा॒त्रिर्वा उ॒षाः ।
अ॒हर्व्यु॑ष्टिः । अ॒हो॒रात्रे॑ ए॒वावरु॑न्धे । अथो॑ अ॒हो॒रात्रयो॑रे॒व प्र॑ति॒तिष्ठ॑ति ।
ता यदु॒भयी॑र्दि॒वा वा न॑क्तं वा जुहु॒यात् । अ॒हो॒रात्रे॑ मो॒हये॑त् ।
उ॒षसे॑ स्वा॒हा व्यु॑ष्ट्यै स्वा॒हो॒दे॒ष्यते॑ स्वा॒हो॒द्यते॑ स्वा॒हेत्यनु॑दि॒ते
जुहो॑ति । उ॒दि॒ताय॑ स्वा॒हा सु॒वर्गा॑य स्वा॒हा लो॒काय॑ स्वा॒हेत्यु॑दि॒ते
जुहो॑ति । अ॒हो॒रात्रयो॑-र॒व्यति॑मो॒हाय॑ ॥ 62 ॥

T.B.3.8.17.1

वि॒भूर्मा॒त्रा प्र॒भूः पि॒त्रेत्य॑श्च-ना॒मानि॑ जु॒होति॑ ।
 उ॒भयो॑रे॒वैनं॑ लो॒कयो॑-र्ना॒मधे॑यं गमयति ।
 आ॒यना॑य स्वाहा प्रा॒यणा॑य स्वाहेत्युद्-द्रा॒वाञ्जु॑होति ।
 सर्व॑मे॒वैन-म॑स्क॒न्नञ् सु॒वर्गं॑ लो॒कं गम॑यति ।
 अ॒ग्नये॑ स्वाहा सो॒माय॑ स्वाहेति पूर्॒वहो॑मा-ञ्जु॒होति॑ ।
 पूर्॒व ए॒व द्वि॒षन्तं॑ भ्रातृ॒व्य-म॑तिक्रामति ।
 पृ॒थि॒व्यै स्वाहा॑ऽन्तरि॒क्षाय॑ स्वाहेत्याह । यथा॑ य॒जुरे॒वैतत् ।
 अ॒ग्नये॑ स्वाहा सो॒माय॑ स्वाहेति पूर्॒वदी॒क्षा जु॑होति ।
 पूर्॒व ए॒व द्वि॒षन्तं॑ भ्रातृ॒व्य-म॑तिक्रामति ॥ 63 ॥

T.B.3.8.17.2

पृ॒थि॒व्यै स्वाहा॑ऽन्तरि॒क्षाय॑ स्वाहेत्ये-क॒विञ्शि॒नीं दी॒क्षां जु॑होति ।
 ए॒क॒विञ्श॑तिर्वै दे॒वल॑ोकाः । द्वा॒दश॑ मा॒साः पञ्च॑र्त॒वः ।
 त्रय॑ इ॒मे लो॒काः । अ॒सा॒वादि॑त्य ए॒क॒विञ्शः॑ । ए॒ष सु॒वर्गो॑ लो॒कः ।

सु॒वर्ग॑स्य॒ लो॒कस्य॒ सम॑ष्ट्यै । भुवो॑ दे॒वानां॒ कर्म॑णे॒त्यृ॒तु-दी॒क्षा
 जु॒होति॑ । ऋ॒तू॒ने-वा॒स्मै क॑ल्पयति ।
 अ॒ग्नये॒ स्वाहा॒ वा॒यवे॒ स्वाहे॑ति जु॒होत्य॑-न॒न्तरि॑त्यै ॥ 64 ॥

T.B.3.8.17.3

अ॒र्वाङ्य॒ज्ञः संक्रा॑म॒त्वि-त्या॒प्ती-र्जु॑होति । सु॒वर्ग॑स्य॒ लो॒कस्या॒प्त्यै॑ ।
 भू॒तं भव्यं॑ भवि॒ष्यदि॑ति पर्या॒प्ती-र्जु॑होति ।
 सु॒वर्ग॑स्य॒ लो॒कस्य॒ पर्या॑प्त्यै ।
 आ मे॑ गृ॒हा भव॑न्त्वित्या॒भू-र्जु॑होति । सु॒वर्ग॑स्य॒ लो॒कस्या॒ भू॒त्यै ।
 अ॒ग्निना॒ तपो॑-ऽन्व॒भव॑दित्यनु॒भू-र्जु॑होति ।
 सु॒वर्ग॑स्य॒ लो॒कस्यानु॑-भू॒त्यै ।
 स्वाहा-ऽऽधि॑माधी॒ताय॒ स्वाहे॑ति सम॑स्तानि वैश्व॒दे॒वानि॑ जु॒होति॑ ।
 सम॑स्तमे॒व द्वि॒षन्तं॒ भ्रातृ॑व्य-मति॑क्रामति ॥ 65 ॥

T.B.3.8.17.4

दद्भ्यः॑ स्वाहा॑ ह॒नू॒भ्या॑ꣳ स्वाहे॑त्यङ्ग॒हो॒मा-ज्जु॑होति ।

अङ्गे॑ अङ्गे॑ वै पु॒रुष॑स्य पा॒प्मो॑प॒श्लिष्टः॑ ।

अङ्गा॑दङ्गा॑ दे॒वैनं॑ पा॒प्मन॑स्तेन मुञ्चति ।

अज्ज्ये॑ताय स्वाहा॑ कृ॒ष्णाय॑ स्वाहा॑ श्वे॒ताय॑ स्वाहे॑त्य-श्वरूपाणि॑
जुहोति । रू॒पैरे॒वैनꣳ॑ स॒मर्ध॑यति । ओष॑धीभ्यः स्वाहा॑ मू॒ले॒भ्यः॑

स्वाहे॑त्योष॑धि हो॒माज्जु॑होति । द्वय्यो॑ वा ओष॑धयः ।

पु॒ष्पे॒भ्योऽन्याः॑ फ॒लं गृ॑ह्णन्ति । मू॒ले॒भ्योऽन्याः॑ ।

ता ए॒वोभ॑यीर-वरुन्धे ॥ 66 ॥

T.B.3.8.17.5

व॒नस्प॑तिभ्यः स्वाहे॑ति व॒नस्प॑ति-हो॒माज्जु॑होति ।

आ॒रण्य-स्या॑न्नाद्यस्या-वरु॑ध्यै ।

मे॒षस्त्वा॑ प॒चतै॑-र॒वत्वित्य॑-पा॒व्यानि॑ जुहोति । प्रा॒णा वै दे॒वा

अपा॑व्याः । प्रा॒णाने॒वा वरु॑न्धे । कू॒प्या॒भ्यः स्वाहा॑ऽद्भ्यः

स्वाहे॑त्यपाꣳ हो॒माज्जु॑होति । अ॒प्सु वा आ॑पः । अ॒न्नं वा आ॑पः ।

अ॒द्भ्यो॑ वा अ॒न्नं जा॑यते । यदे॒वाद्भ्यो॑ऽन्नं जा॑यते । तद॒वरु॑न्धे ॥ 67

T.B.3.8.18.1

अ॒म्भा॑ऽसि जुहोति । अ॒यं वै लो॒को-ऽम्भा॑ऽसि ।
 तस्य॑ वस॒वो-ऽधि॑पतयः । अ॒ग्नि॒ज्योतिः॑ । यद॒म्भा॑ऽसि जुहोति ।
 इ॒ममे॒व लो॒कम॑वरुन्धे । वसू॒नाऽसा॑युज्यं गच्छति ।
 अ॒ग्निं ज्योति॑र-वरुन्धे । न॒भाऽसि॑ जुहोति ।
 अ॒न्तरि॑क्षं वै न॒भाऽसि॑ ॥ 68 ॥

T.B.3.8.18.2

तस्य॑ रु॒द्रा अ॒धि॑पतयः । वा॒यु॒ज्योतिः॑ । यन्न॒भाऽसि॑ जुहोति ।
 अ॒न्तरि॑क्षमे॒वा-वरु॑न्धे । रु॒द्राणा॑ऽसा॑युज्यं गच्छति ।
 वा॒युं ज्योति॑र-वरुन्धे । म॒हाऽसि॑ जुहोति ।
 अ॒सौ वै लो॒को म॒हाऽसि॑ । तस्या॑दि॒त्या अ॒धि॑पतयः ।
 सूर्यो॑ ज्योतिः ॥ 69 ॥

T.B.3.8.18.3

यन्महा॑सि जु॒होति॑ । अ॒मुमे॒व लो॒कम॒-वरु॑न्धे ।
 आ॒दि॒त्याना॑सि॒ सायु॑ज्यं गच्छति । सूर्यं॑ ज्योति॒र-वरु॑न्धे ।
 नमो॑ रा॒ज्ञे नमो॑ वरु॒णायेति॑ य॒व्यानि॑ जुहोति ।
 अ॒न्नाद्य॑स्या-वरु॒ध्यै । मयो॑भूर्वा॒तो अ॒भि वा॑तू॒स्रा इति॑ ग॒व्यानि॑
 जुहोति॑ । प॒शूना॑म-वरु॒ध्यै । प्रा॒णाय॑ स्वाहा॒ व्याना॑य स्वाहेति॑
 संतति॑-हो॒माञ्जु॑होति । सु॒वर्ग॑स्य लो॒कस्य॑ संतत्यै ॥ 70 ॥

T.B.3.8.18.4

सि॒ताय॑ स्वाहा-ऽसि॒ताय॑ स्वाहेति॑ प्रमु॒क्ती-र्जु॑होति ।
 सु॒वर्ग॑स्य लो॒कस्य॑ प्रमु॒क्त्यै । पृ॒थिव्यै॑ स्वाहा-ऽन्तरि॑क्षाय
 स्वाहेत्याह॑ । यथा॑ यजु॒रेवै॑तत् । द॒त्त्वते॑ स्वाहा-ऽद॒न्तका॑य स्वाहेति॑
 शरी॑र-हो॒माञ्जु॑होति । पि॒तृलो॒कमे॒वतै॑-र्यज॑मानो-ऽवरु॑न्धे ।
 क॒स्त्वा यु॑नक्ति॒ स त्वा॑ यु॒नक्ति॑ति परि॒धीन्यु॑नक्ति ।
 इ॒मे वै लो॒काः परि॑धयः । इ॒माने॒वास्मै॑ लो॒कान् यु॑नक्ति ।
 सु॒वर्ग॑स्य लो॒कस्य॑ सम॒ष्ट्यै ॥ 71 ॥

T.B.3.8.18.5

यः प्रा॒णतो॑ य आ॒त्मदा॑ इति॑ म॒हिमा॑नौ जुहोति ।
 सु॒वर्गो॑ वै लो॒को महः॑ । सु॒वर्गमे॒व ताभ्यां॑ लो॒कं यज॑मानोऽव॒रुन्धे॑ ।
 आ ब्र॒ह्मन् ब्रा॒ह्मणो॑ ब्र॒ह्मव॑र्चसी जा॒यता॑मिति॒ सम॑स्तानि
 ब्र॒ह्मव॑र्चसानि जुहोति । ब्र॒ह्मव॑र्चस-मे॒वतै-र्यज॑मानोऽव॒रुन्धे॑ ।
 ज॒ज्ञि बी॒जमि॑ति जुहोत्य-नन्त॑रित्यै ।
 अ॒ग्नये॑ सम॒नम-तृ॑थिव्यै सम॒नम॑दिति॒ सन्न॑ति हो॒माञ्जु॑होति ।
 सु॒वर्गस्य॑ लो॒कस्य॑ सं॒नत्यै॑ । भू॒ताय॑ स्वाहा भवि॒ष्यते॑ स्वाहेति॒
 भू॒ताभ॑व्यौ हो॒मौ जुहोति॑ । अ॒यं वै लो॒को भू॒तम् ॥ 72 ॥

T.B.3.8.18.6

असौ भवि॒ष्यत् । अ॒नयो॑रेव लो॒कयोः॑ प्र॒ति॒तिष्ठ॑ति । सर्व॑स्याप्त्यै॑ ।
 सर्व॑स्या-व॒रुद्ध्यै॑ । यद॒क्रन्दः॑ प्रथ॒मं जा॑यमान इत्य॑श्चस्तोमीयं
 जुहोति । सर्व॑स्याप्त्यै॑ । सर्व॑स्य जि॒त्यै॑ । सर्व॑मे॒व तेना॑प्नोति ।
 सर्वं॑ जयति । योऽश्व॑मे॒धेन॑ यजते ॥ 73 ॥

T.B.3.8.18.7

य॒ उ॒ चैन॑मे॒वं वै॑द । य॒ज्ञ॒ꣳ र॒क्षाꣳस्य॑ जि॒घाꣳस॒न् ।
 स ए॒तान् प्र॒जाप॑ति-र्न॒क्तꣳ हो॒मान्-प॑श्यत् । तान॑जुहोत् ।
 तैर्वै स य॒ज्ञाद्र॑क्षाꣳस्य॑ पा॒हन् । यन्न॑क्तꣳ हो॒माञ्जु॑होति ।
 य॒ज्ञादे॒वतै॑-र्य॒जमा॑नो र॒क्षाꣳस्य॑ प॒हन्ति॑ ।
 उ॒षसे॑ स्वा॒हा व्यु॑ष्ट्यै स्वा॒हेत्य॑न्त॒तो जु॑होति ।
 सु॒वर्ग॑स्य॒ लो॒कस्य॑ स॒मष्ट्यै॑ ॥ 74 ॥

T.B.3.8.19.1

ए॒क॒यू॒पो वै॑का॒दशि॑नी॒ वा । अ॒न्ये॒षां य॑ज्ञा॒नां यू॑पा भवन्ति ।
 ए॒क॒वि॒ꣳशि॒न्य-श्व॑मे॒धस्य॑ । सु॒वर्ग॑स्य॒ लो॒कस्या॑-भि॒जित्यै॑ ।
 बै॒ल्वो वा॑ खा॒दिरो॑ वा पा॒लाशो॑ वा । अ॒न्ये॒षां य॑ज्ञ॒क्रतू॑नां यू॒पा
 भव॑न्ति । रा॒ज्जु॑दा॒ल ए॒क॒वि॒ꣳश॒त्य-र॒त्निर॑श्वमे॒धस्य॑ ।
 सु॒वर्ग॑स्य॒ लो॒कस्य॑ स॒मष्ट्यै॑ । ना॒न्ये॒षां प॑शू॒नां ते॒जन्या॑ अ॒वद्य॑न्ति ।
 अ॒वद्य॑न्त्यश्व॒स्य ॥ 75 ॥

T.B.3.8.19.2

पाप्मा॑ वै ते॒जनी॑ । पाप्मनो॑ऽप॒हत्यै॑ । प्लक्ष॑शा-खाया॑मन्येषां॑
 प॒शूना॑मव॒द्यन्ति॑ । वेत॑स-शाखाया॑-मश्व॑स्य । अ॒प्सुयो॑निर्वा अश्वः॑ ।
 अ॒प्सुजो॑ वेत॑सः । स्व ए॒वास्य॑ योनाव॑-वद्यति॑ ।
 यू॒पेषु॑ ग्रा॒म्यान् प॒शून्नि॒-यु॒ञ्जन्ति॑ । आ॒रोके॑ष्वा-र॒ण्यान्धा॑रयन्ति ।
 प॒शूनां॑ व्यावृ॑त्त्यै । आ ग्रा॒म्यान् प॒शून्-ल॑भन्ते ।
 प्रा॒र॒ण्या-न्त्सृ॑जन्ति । पाप्मनो॑-ऽप॒हत्यै॑ ॥ 76 ॥

T.B.3.8.20.1

राज्जु॑दाल-मग्नि॑ष्ठं मि॒नोति॑ । भ्रू॒णह॑त्याया अप॒हत्यै॑ ।
 पौतु॑द्रवावभि॒तो भव॑तः । पु॒ण्यस्य॑ गन्ध॒स्या व॑रु॒ध्यै ।
 भ्रू॒णह॑त्या-मे॒वास्मा॑-दप॒हत्यै॑ । पु॒ण्येन॑ गन्धे॒नो भय॑तः परिगृ॑ह्णाति ।
 षड्बै॒ल्वा भव॑न्ति । ब्र॒ह्मव॑र्च॒सस्या॑-वरु॒द्ध्यै । षट्खा॑दि॒राः ।
 तेज॑सो-ऽव॒रु॒ध्यै ॥ 77 ॥

T.B.3.8.20.2

षट्पा॒ला॒शाः । सोम॑पी॒थस्या-वरु॑ध्यै । एक॑वि॒ंशतिः॑ संप॑द्यन्ते ।
 एक॑वि॒ंशतिर्वै॑ दे॒वल॒ोकाः । द्वाद॑श मा॒साः पञ्च॑र्तवः ।
 त्रय॑ इ॒मे लो॒काः । अ॒सावा॑दि॒त्य एक॑वि॒ंशः । ए॒ष सु॒वर्गो॑ लो॒कः ।
 सु॒वर्ग॑स्य लो॒कस्य॑ सम॑ष्ट्यै । श॒तं प॒शवो॑ भव॑न्ति ॥ 78 ॥

T.B.3.8.20.3

श॒तायुः॑ पु॒रुषः॑ श॒तेन्द्रि॑यः । आ॒युष्ये॒वेन्द्रि॑ये प्र॒तिति॑ष्ठति ।
 सर्वं॑ वा अ॒श्वमे॑ध्याप्नोति । अ॒परि॑मिता भव॑न्ति ।
 अ॒परि॑मितस्या-वरु॑ध्यै । ब्र॒ह्मवा॑दिनो॑ वद॑न्ति । कस्मा॑त्स॒त्यात् ।
 दक्षि॑णतो॒-ऽन्ये॑षां प॒शूना॑म-व॒द्यन्ति॑ । उ॒त्तर॑तो॒-ऽश्व॑स्येति॑ ।
 वा॒रु॒णो वा अ॒श्वः ॥ 79 ॥

T.B.3.8.20.4

ए॒षा वै वरु॑णस्य दिक् । स्वा॒यामे॑वास्य दि॒श्यव॑द्यति ।
 यदित॑ रेषां प॒शूना॑म-व॒द्यति॑ । श॒तदे॒वत्यं॑ तेना॒वरु॑न्धे ।
 चि॒तै-ऽग्ना॑-व॒धिवै॑त॒से क॒टेऽश्वं॑ चि॒नोति॑ । अ॒प्सु-यो॑नि॒र्वा अ॒श्वः ।

अ॒प्सु॒जो वे॑त॒सः । स्व॒ ए॒वैनं॑ यो॒नौ प्र॑ति॒ष्ठाप॑यति ।

पु॒रस्ता॑-त्प्र॒त्यञ्चं॑ तू॒परं॑ चि॒नोति॑ । प॒श्चात्प्रा॒चीनं॑ गो॒मृग॑म् ॥ 80 ॥

T.B.3.8.20.5

प्रा॒णापा॒ना-वे॒वास्मि॑-न्त्स॒म्यञ्चौ॑ द॒धाति॑ ।

अ॒श्वं तू॒परं॑ गो॒मृग॑मि॒ति सर्व॑हु॒त ए॒ताञ्जु॑होति ।

ए॒षां लो॒काना॑म॒भिजि॑त्यै । आ॒त्मना॑-ऽभि॒जुहो॑ति ।

सा॒त्मान॑मे॒वैनं॑ स॒तनुं॑ करो॒ति । सा॒त्माऽमु॑ष्मिं लो॒के भ॑वति ।

य ए॒वं वे॑द । अथो॒ वसो॑रे॒व धा॑रां ते॒नाव॑रुन्धे ।

इ॒लुव॑र्दा॒य स्वा॑हा ब॒लिव॑र्दा॒य स्वा॑हेत्या॒ह ।

सँव॑थ्स॒रो वा इ॑लुव॒र्दः । परि॑वथ्स॒रो ब॒लिव॑र्दः ।

सँव॑थ्स॒रादे॒व परि॑वथ्स॒रा-दा॒युर व॑रुन्धे । आ॒युरे॒वास्मि॑-न्द॒धाति॑ ।

तस्मा॑द॒श्व-मे॒धया॒जी ज॒रसा॑ वि॒स्रसा॑ऽमुं लो॒कमे॑ति ॥ 81 ॥

T.B.3.8.21.1

ए॒क॒वि॒ं॒ शो॑ऽग्नि॒र्भव॑ति । ए॒क॒वि॒ं॒शः॑ स्तो॒मः॑ ।
 ए॒क॒वि॒ं॒श॒ति॒र्यू॒पाः॑ । य॒था वा॑ अ॒श्वा व॒र्ष॒भा वा॑ वृ॒षाणः॑ स॒स्फुरे॑रन् ।
 ए॒वमे॒तत्स्तो॒माः स॒स्फुर॑न्ते । यदे॒क॒वि॒ं॒शः॑ । ते य॒त्समृ॑च्छे॒रन् ।
 ह॒न्येता॑स्य य॒ज्ञः । द्वा॒द॒श ए॒वाग्निः॑ स्या॒दित्या॑हुः ।
 द्वा॒द॒शः स्तो॒मः ॥ 82 ॥

T.B.3.8.21.2

एका॒द॒श यू॒पाः॑ । यद्द्वा॒द॒शो॑-ऽग्नि॒र्भव॑ति ।
 द्वा॒द॒श मा॒साः सँ॒व॒त्स॒रः॑ । सँ॒व॒त्स॒रेणै॑-वा॒स्मा अ॒न्नम॑व॒रुन्धे॑ ।
 यद्द॒श यू॒पा भ॑वन्ति । द॒शाक्ष॑रा वि॒राट् । अ॒न्नं वि॒राट् ।
 वि॒राजै॑-वा॒न्नाद्य॑म-व॒रुन्धे॑ । य ए॒काद॑शः । स्त॒न ए॒वास्यै॑ सः । 83

T.B.3.8.21.3

दु॒ह ए॒वैनां॑ ते॒न । तदा॑हुः । यद्द्वा॒द॒शो॑ऽग्निः स्या॒द्द्वा॒द॒शः स्तो॒म
 ए॒काद॑श यू॒पाः॑ । य॒था स्था॑रि॒णा या॒यात् । ता॒दृक्ता॑त् ।
 ए॒क॒वि॒ं॒श ए॒वाग्निः॑ स्या॒दित्या॑हुः । ए॒क॒वि॒ं॒शः॑ स्तो॒मः॑ ।

ए॒क॒वि॒ं॒श॒ति॒र्यू॒पाः॑ । य॒था प्र॒ष्टि॒भि॒र्या॒ति । ता॒दृ॒गे॒व तत् ॥ 84 ॥

T.B.3.8.21.4

यो॒ वा अ॒श्वमे॒धे ति॒स्रः॑ क॒कु॒भो॒ वेद॑ । क॒कु॒ब्ध॒ रा॒ज्ञां॑ भवति ।
 ए॒क॒वि॒ं॒शो॒-ऽग्नि॑र्भवति । ए॒क॒वि॒ं॒शः॑ स्तोमः ।
 ए॒क॒वि॒ं॒श॒ति॒र्यू॒पाः॑ । ए॒ता वा अ॒श्वमे॒धे ति॒स्रः॑ क॒कु॒भः॑ ।
 य॒ एवं॑ वैद॑ । क॒कु॒ब्ध॒ रा॒ज्ञां॑ भवति ।
 यो॒ वा अ॒श्वमे॒धे त्री॒णि शी॒र्षा॒णि वेद॑ । शि॒रो ह॑ रा॒ज्ञां॑ भवति ।
 ए॒क॒वि॒ं॒शो॒-ऽग्नि॑र्भवति । ए॒क॒वि॒ं॒शः॑ स्तोमः ।
 ए॒क॒वि॒ं॒श॒ति॒र्यू॒पाः॑ । ए॒तानि॑ वा अ॒श्वमे॒धे त्री॒णि शी॒र्षा॒णि ।
 य॒ एवं॑ वैद॑ । शि॒रो ह॑ रा॒ज्ञां॑ भवति ॥ 85 ॥

T.B.3.8.22.1

दे॒वा वा अ॒श्वमे॒धे प॒व॒मा॒ने । सु॒व॒र्गं लो॒कं॑ न प्रा॒जा॒न॒न् ।
 तम॑श्वः प्रा॒जा॒ना॒त् । यद॑श्वमे॒धे-ऽश्वे॑न मे॒ध्ये॒नोद॑ञ्चो ब॒हि॒ष्प॒व॒मा॒न॒ऽ
 सर्प॑न्ति । सु॒व॒र्गस्य॑ लो॒कस्य॑ प्र॒ज्ञा॒त्यै । न वै म॑नु॒ष्यः॑ सु॒व॒र्गं

लो॒कम॒ञ्जसा॑ वे॒द । अ॒श्वो वै सु॒वर्गं लो॒कम॒ञ्जसा॑ वे॒द ।
यदु॒द्गा-तो॒द्गाये॑त् । यथाऽक्षे॒त्रज्ञोऽन्ये॑न प॒था प्र॑तिपा॒दये॑त् ।
तादृ॒क्तत् ॥ 86 ॥

T.B.3.8.22.2

उ॒द्गाता॑रम-प॒रुद्ध्य॑ । अ॒श्व-मु॒द्गीथा॑य वृ॒णीते॑ ।
यथा॑ क्षे॒त्रज्ञो-ऽञ्जसा॑ नयति ।
ए॒वमे॒वैनम॑श्वः सु॒वर्गं लो॒कम॒ञ्जसा॑ नयति । पु॒च्छम॑न्वा-र॒भन्ते॑ ।
सु॒वर्गस्य॑ लो॒कस्य॑ सम॒ष्ट्यै । हिं॑ करोति । सा॒मैवा॒कः ।
हिं॑ करोति । उ॒द्गीथ॑ ए॒वास्य॑ सः ॥ 87 ॥

T.B.3.8.22.3

वड॑बा उप॒ रुन्ध॑न्ति । मि॒थुन॑त्वाय प्र॒जात्यै॑ ।
अथो॑ यथो॒पगा॑तार उप॒गाय॑न्ति । तादृ॒गेव॑ तत् ।
उद॑गासीद॒श्वो मे॒ध्य इ॒त्याह॑ । प्रा॒जाप॑त्यो वा अ॒श्वः ।
प्र॒जाप॑ति-रु॒द्गीथः॑ । उ॒द्गीथ॑मे-वाव॒रुन्धे॑ ।

अथो॑ ऋ॒ख॒सामयो॑रेव॒ प्रति॑तिष्ठति । हिर॑ण्येनोपा-करोति ।
 ज्योति॑र्वै हिर॒ण्यम् । ज्योति॑रेव॒ मुख॑तो॒ दधा॑ति ।
 यज॑माने च प्रजा॑सु च ।
 अथो॑ हिर॒ण्य-ज्योति॑रेव॒ यज॑मानः सुव॑र्गं लो॒कमे॑ति ॥ 88 ॥

T.B.3.8.23.1

पुरु॑षो वै य॒ज्ञः । य॒ज्ञः प्र॒जाप॑तिः । यद॑श्चे॒ पशू॑न्नि-यु॒ञ्जन्ति॑ ।
 य॒ज्ञादे॑व तद्य॒ज्ञं प्र॑युङ्क्ते । अ॒श्वं तू॒परं॑ गो॒मृग॑म् ।
 तान॑ग्निष्ठ आल॑भते । से॒नामु॒खमे॒व तथ्स॑ञ्श्यति ।
 तस्मा॑-द्राज॒मुखं॑ भी॒ष्मं भा॒वुक॑म् ।
 आ॒ग्नेयं॑ कृ॒ष्णाग्री॑वं पु॒रस्ता॑-ल्ल॒लाटे॑ । पू॒र्वाग्नि॑मे॒व तं कु॑रुते ॥ 89 ॥

T.B.3.8.23.2

तस्मा॑-त्पू॒र्वाग्निं॑ पु॒रस्ता॑-थ॒स्थाप॑यन्ति । पौ॒ष्णम॑न्वञ्च॒म् ।
 अ॒न्नं वै पू॒षा । तस्मा॑-त्पू॒र्वाग्ना॑-वा॒हार्य॑मा-हर॑न्ति ।
 ऐ॒न्द्रा॒पौष्ण॑ मु॒परि॑ष्ठात् । ऐ॒न्द्रो वै रा॒जन्यो॑ऽन्नं पू॒षा ।

अ॒न्नाद्ये॑ नै॒वैन॑-मु॒भय॑तः परि॒गृह्णा॑ति । तस्मा॑-द्रा॒ज॒न्यो॑न्नादो॒ भावु॑कः ।
आ॒ग्ने॒यौ कृ॑ष्ण॒ग्री॒वौ बा॒हुवोः॑ । बा॒हुवो॑रेव॒ वीर्यं॑ धत्ते ॥ 90 ॥

T.B.3.8.23.3

तस्मा॑-द्रा॒ज॒न्यो॑ बा॒हुब॒ली भावु॑कः । त्वाष्ट्रौ॑ लो॒मश॑सक्थौ सक्थ्योः ।
सक्थ्यो॑रेव॒ वीर्यं॑ धत्ते । तस्मा॑द्रा॒ज॒न्य ऊ॒रुब॒ली भावु॑कः ।
शि॒तिपृ॑ष्ठौ बा॒र्ह॒स्पत्यौ॑ पृ॒ष्ठे । ब्र॒ह्मव॑र्च॒समे॑-वोपरि॑ष्ठाद्धत्ते ।
अथो॑ क॒वचे॑ ए॒वैते॑ अ॒भितः॑ पर्यू॒हते॑ ।
तस्मा॑द्रा॒ज॒न्यः स॒न्नद्धो॑ वी॒र्यं॑ करोति । धा॒त्रे पृ॑षो॒दर॒म-ध॑स्तात् ।
प्र॒तिष्ठा॑मे॒वैतां॑ कुरुते । अथो॑ इ॒यं वै॑ धा॒ता । अ॒स्यामे॒व प्र॒ति॒तिष्ठ॑ति ।
सौ॒र्यं ब॒लक्षं॑ पु॒च्छे॑ । उ॒थ्स॑ेधमे॒व तं॑ कुरुते ।
तस्मा॑दु॒थ्स॑ेधं भ॒ये प्र॒जा अ॒भिस॑ञ्च श्रय॑न्ति ॥ 91 ॥

हरिः ओम् ॥

2.2 अश्वमेधस्य द्वितीय-तृतीया हर्विधानम्

तैत्तिरीय ब्राह्मणे तृतीयाष्टके नवम प्रपाठकः

॥ हरिः ओं ॥

T.B.3.9.1.1

प्रजापति-रश्वमेधम-सृजत । सोऽस्मात्सृष्टो-ऽपाक्रामत् ।
 तमष्टा दशिभिरनु प्रायुङ्क्त । तमाप्नोत् ।
 तमाप्त्वाऽष्टा दशिभिर वारुन्ध ।
 यदष्टादशिन आलभ्यन्ते । यज्ञमेव तैराप्त्वा यजमानो-ऽवरुन्धे ।
 सँवत्सरस्य वा एषा प्रतिमा । यदष्टादशिनः ।
 द्वादश मासाः पञ्चर्तवः ॥ 1 ॥

T.B.3.9.1.2

सँवत्सरोऽष्टादशः । यदष्टादशिन आलभ्यन्ते ।
 सँवत्सरेमेव तैराप्त्वा यजमानो-ऽवरुन्धे । अग्निष्ठे ऽन्यान्
 पशूनुपा-करोति । इतरेषु यूपेष्वष्टा दशिनो-ऽजामित्वाय ।

न॒व न॒वा॒ल॒भ्यन्ते॑ स॒वीर्य॑त्वाय । यदाऽऽर॒ण्यैः स॒॒स्थाप॑येत् ।
व्यव॑स्येतां पिता पु॒त्रौ । व्य॒ध्वानः॑ क्रा॒मेयुः॑ ।
विदू॑रं ग्रा॒मयो॑ ग्रा॒मान्तौ॑ स्याताम् ॥ 2 ॥

T.B.3.9.1.3

ऋक्षी॑काः पु॒रुष॑व्याघ्राः परि॒मोषि॑ण आ॒व्याधि॑नी-स्तस्करा
अ॒रण्येष्वा-जा॑येरन् । तदा॑हुः । अ॒प॒शवो॑ वा ए॒ते । यदा॑र॒ण्याः ।
यदा॑र॒ण्यैः स॒॒स्थाप॑येत् । क्षि॒प्रे यज॑मान-म॒रण्यं मृ॒तं ह॑रेयुः ।
अ॒र॒ण्याय॑तना ह्या॒र॒ण्याः प॒शव॑ इति । यत्प॒शून्ना-ल॑भेत ।
अ॒न॒व॒रु॒द्धा अ॒स्य प॒शवः॑ स्युः । यत्प॒र्यग्नि॑-कृ॒तानु॑त्सृ॒जेत् ॥ 3 ॥

T.B.3.9.1.4

य॒ज्ञवै॑शसं कुर्यात् । यत्प॒शूना-ल॑भते । तेनै॒व प॒शून्व॑रुन्धे ।
यत्प॒र्यग्नि॑-कृ॒तानु॑त्सृ॒जत्य॑-य॒ज्ञवै॑शसाय । अ॒व॒रु॒द्धा अ॒स्य प॒शवो॑
भ॒वन्ति॑ । न य॒ज्ञवे॑श सं॒भव॑ति । न यज॑मान-म॒रण्यं मृ॒तं ह॑रन्ति ।
ग्रा॒म्यैः स॒॒स्थाप॑यति । ए॒ते वै प॒शवः॑ क्षे॒मो नाम॑ ।

सं पि॒ता पु॒त्राव॑ व॒स्यतः॑ । सम॒ध्वानः॑ क्रा॒मन्ति॑ ।
 सम॒न्तिकं॑ ग्रा॒मयो-ग्रा॑मा॒न्तौ भ॑वतः । न॒क्षीकाः॑ पु॒रुष॑व्याघ्राः
 परि॒मोषि॑ण आ॒व्याधि॑नी-स्त॒स्करा॑ अ॒रण्ये॑ष्वा जा॒यन्ते॑ ॥ 4 ॥

T.B.3.9.2.1

प्र॒जाप॑तिर-का॒मय॑तोभौ लो॒काव-व॑रुन्धीयेति ।
 स ए॒तानु॑भ॒यान् प॒शून् प॑श्यत् । ग्रा॒म्याञ्श्चा-र॑ण्याञ्श्च ।
 ता॒नाल॑भत । तै॒र्वै स उ॒भौ लो॒काव वा॑रुन्ध ।
 ग्रा॒म्यैरे॒व प॒शुभि॑रिमं लो॒कम वा॑रुन्ध । आ॒रण्यै॑रमुम् ।
 यद्ग्रा॒म्यान् प॒शूना॑ल॒भते॑ । इ॒ममे॒व तैर्लो॒कम-व॑रुन्धे ।
 यदा॒रण्यान्॑ ॥ 5 ॥

T.B.3.9.2.2

अ॒मुं तैः॑ । अ॒नव॑रुद्धो वा ए॒तस्य॑ सँव॒थ्सर॑ इत्याहुः ।
 य इ॒त इ॒तश्चा॒तुर्मा॑स्यानि सँव॒थ्सरं॑ प्र॒युङ्क्त॑ इति । ए॒तावा॑न् वै
 सँव॒थ्सरः॑ । यच्चा॒तुर्मा॑स्यानि । यदे॒ते चा॒तुर्मा॑स्याः प॒शव॑

आल॒भ्यन्ते॑ । प्र॒त्यक्ष॑मेव तैः सँव॑त्सरं यज॑मानो-ऽवरु॑न्धे ।
 वि वा ए॒ष प्र॒जया॑ प॒शुभिर् ऋ॑द्ध्यते । यः सँव॑त्सरं प्र॒युङ्क्ते॑ ।
 सँव॑त्सरः सु॒वर्गो॑ लो॒कः ॥ 6 ॥

T.B.3.9.2.3

सु॒वर्गं तु लो॒कं नाप॑राध्नोति । प्र॒जा वै प॒शव॑ एका॒दशिनी॑ ।
 यदे॒त ऐ॒काद॑शिनाः प॒शव॑ आल॒भ्यन्ते॑ ।
 साक्षा॑देव प्र॒जां प॒शून् यज॑मानो-ऽवरु॑न्धे ।
 प्र॒जाप॑तिर्वि॒ राज॑मसृजत । सा सृ॒ष्टाऽश्व॑मेधं प्रावि॑शत् ।
 तां द॒शिभि॑रनु प्रायु॑ङ्क्त । तामा॑प्नोत् । तामा॑प्त्वा द॒शिभि॑र वारु॑न्ध ।
 यद्द॒शिन॑ आल॒भ्यन्ते॑ ॥ 7 ॥

T.B.3.9.2.4

वि॒राज॑मेव तैरा॑प्त्वा यज॑मानो-ऽवरु॑न्धे । एका॑दश द॒शत॑
 आल॒भ्यन्ते॑ । एका॑दशाक्षरा त्रि॒ष्टुप् । त्रै॒ष्टुभाः॑ प॒शवः॑ ।
 प॒शूने॒वा वरु॑न्धे । वै॒श्वदे॒वो वा अश्वः॑ । ना॒नादे॒वत्याः॑ प॒शवो॑ भवन्ति ।

अ॒श्वस्य॑ सर्व॒त्वाय॑ । नाना॑रूपा भवन्ति । तस्मान्नाना॑रूपाः प॒शवः॑ ।
 बहु॑रूपा भवन्ति । तस्मा॑-ब॒हुरूपाः॑ प॒शवः॑ समृ॒द्ध्यै ॥ 8 ॥

T.B.3.9.3.1

अस्मै॑ वै लो॒काय॑ ग्रा॒म्याः प॒शव॑ आल॒भ्यन्ते॑ ।
 अमु॑ष्मा आ॒रण्याः॑ । यद्ग्रा॒म्यान् प॒शूनाल॑भते ।
 इममे॒व तैर्लो॒कम-व॑रुन्धे । यदा॒रण्यान् । अमुं॑ तैः ।
 उभया॑न् प॒शूनाल॑भते । ग्रा॒म्याञ्श्चा-र॑ण्याञ्श्च ।
 उभयो॑र् लो॒कयो॒र व॑रु॒द्ध्यै । उभया॑न् प॒शूनाल॑भते ॥ 9 ॥

T.B.3.9.3.2

ग्रा॒म्याञ्श्चा-र॑ण्याञ्श्च । उभय॑स्या-न्नाद्य॑स्या-व॑रु॒द्ध्यै ।
 उभया॑न्प॒शूना-ल॑भते । ग्रा॒म्याञ्श्चा॒रण्याञ्श्च॑ ।
 उभये॑षां प॒शूनाम॑-व॑रु॒द्ध्यै । त्रय॑स्त्रयो भवन्ति । त्रय॑ इमे लो॒काः ।
 एषां॑ लो॒काना॑माप्त्यै॑ । ब्र॒ह्मवा॑दिनो॑ वदन्ति । कस्मा॑त्स॒त्यात् ॥ 10 ॥

T.B.3.9.3.3

अ॒स्मिँ॑ लो॒के ब॒हवः॑ का॒मा इति॑ ।
य॒थ्स॒मा॒नी॒भ्यो दे॒वता॑भ्यो-ऽन्ये॑ऽन्ये प॒शव॑ आल॒भ्यन्ते॑ ॥
अ॒स्मिन्ने॒व त॒ल्लो॒के का॒मान्द॒धाति॑ । तस्मा॑द॒स्मिँ-ल्लो॒के ब॒हवः॑
का॒माः । त्रया॑णां त्रया॑णां सह॒ वपा॑ जुहोति । त्र्या॑वृ॒तो वै दे॒वाः ।
त्र्या॑वृ॒त इ॒मे लो॒काः । ए॒षां लो॒काना॑माप्त्यै ॥
ए॒षां लो॒कानां॑ क्लृ॒प्त्यै ॥
पर्य॑ग्नि-कृ॒ता-ना॒र॒ण्यानु॑-थ्सृ॒जन्त्य॑हि-सायै ॥ 11 ॥

T.B.3.9.4.1

यु॒ञ्जन्ति॑ ब्र॒ध्नमि॒त्याह॑ । अ॒सौ वा आ॑दि॒त्यो ब्र॒ध्नः ।
आ॒दि॒त्य-मे॒वास्मै॑ यु॒नक्ति॑ । अ॒रु॒षमि॒त्याह॑ । अ॒ग्नि॒र्वा अ॒रु॒षः ।
अ॒ग्नि॒मे॒वास्मै॑ यु॒नक्ति॑ । च॒रन्त॑मि॒त्याह॑ । वा॒युर्वै च॒रन् ।
वा॒यु॒मे॒वास्मै॑ यु॒नक्ति॑ । प॒रि॒त॒स्थुष॑ इ॒त्याह॑ ॥ 12 ॥

T.B.3.9.4.2

इ॒मे वै लो॒काः परि॒तस्थु॑षः । इ॒मने॒वास्मै॑ लो॒कान् यु॑नक्ति ।
 रो॒चन्ते॑ रो॒चना दि॒वीत्या॑ह । नक्ष॒त्राणि॑ वै रो॒चना दि॒वि ।
 नक्ष॒त्राण्ये॑ वास्मै॑ रोचयति । यु॒ञ्जन्त्य॑स्य का॒म्येत्या॑ह ।
 का॒माने॒वास्मै॑ यु॒नक्ति॑ । हरी॑ वि॒पक्ष॑सेत्याह ।
 इ॒मे वै हरी॑ वि॒पक्ष॑सा । इ॒मे ए॒वास्मै॑ यु॒नक्ति॑ ॥ 13 ॥

T.B.3.9.4.3

शो॒णा धृ॒ष्णू नृ॒वाह॑सेत्याह । अ॒हो॒रा॒त्रे वै नृ॒वाह॑सा ।
 अ॒हो॒रा॒त्रे ए॒वास्मै॑ यु॒नक्ति॑ । ए॒ता ए॒वास्मै॑ दे॒वता॑ यु॒नक्ति॑ ।
 सु॒वर्ग॑स्य लो॒कस्य॑ स॒मष्ट्यै॑ । के॒तुं कृ॑ण्वन्न-के॒तव॑ इति॑ ध्वजं
 प्र॒तिमु॑ञ्चति । यश॑ ए॒वैनं॑ रा॒ज्ञां ग॑मयति ।
 जी॒मूत॑स्येव भवति॑ प्र॒तीक॑मित्याह । य॒था य॒जुरे॒वैतत् ।
 ये ते॑ प॒न्थानः॑ स॒वितः॑ पू॒र्व्यास॑ इत्य॒ध्वर्यु॑-र्य॒जमा॑नं
 वा॒चय॑त्य-भि॒जित्यै॑ ॥ 14 ॥

T.B.3.9.4.4

परा॒ वा ए॒तस्य॑ य॒ज्ञ ए॒ति । यस्य॑ प॒शुरु॒पा-कृ॑तो-ऽन्यत्र॑ वे॒द्या ए॒ति ।
 ए॒त७ स्तो॒तरे॒तेन॑ प॒था पुन॑रश्व-माव॒र्तया॑सि न इ॒त्याह॑ ।
 वा॒युर्वै स्तो॒ता । वा॒युमे॒वास्य॑ पर॒स्ता-द॒धात्या॑-वृ॒त्त्यै ।
 यथा॑ वै ह॒विषो॑ गृही॒तस्य॑ स्क॒न्दति॑ । ए॒वं वा॑ ए॒तद॑श्च॒स्य स्क॒न्दति॑ ।
 यद॑स्यो-पाकृ॒तस्य॑ लो॒मानि॑ शी॒यन्ते॑ । यद्वा॒लेषु॑ का॒चाना॑-व॒यन्ति॑ ।
 लो॒मान्ये॒वास्य॑ तथ्सं॒भर॑न्ति ॥ 15 ॥

T.B.3.9.4.5

भूर्भुव॑स्सुव॒रिति॑ प्रा॒जाप॑त्या-भि॒राव॑यन्ति । प्रा॒जाप॑त्यो वा अश्वः॑ ।
 स्वयै॑वैनं॑ दे॒वत॑या॒ सम॑र्धयन्ति । भू॒रिति॑ म॒हिषी॑ । भुव॑ इति॑ वा॒वाता॑ ।
 सुव॒रिति॑ परि॒वृत्ती॑ । ए॒षां लो॒काना॑म-भि॒जित्यै॑ । हि॒रण्य॑याः का॒चा
 भव॑न्ति । ज्योति॑र्वै हि॒रण्य॑म् । रा॒ष्ट्रम॑श्चमे॒धः ॥ 16 ॥

T.B.3.9.4.6

ज्योति॑श्चै॒वास्मै॑ रा॒ष्ट्रं च॑ स॒मीची॑ द॒धाति॑ । स॒हस्रं॑ भव॑न्ति ।
 स॒हस्रं॑ सं॒मितः॑ सुव॒र्गो लो॒कः । सुव॒र्गस्य॑ लो॒कस्या॑-भि॒जित्यै॑ ।
 अ॒प वा॑ ए॒तस्मा॑त्तेज इन्द्रि॒यं प॑शवः॒ श्रीः॑ क्रा॒मन्ति॑ ।

योऽश्वमेधेन यजते । वसवस्त्वा-ऽञ्जन्तु गायत्रेण छन्दसेति
महिष्यभ्यनक्ति । तेजो वा आज्यम् । तेजो गायत्री ।
तेजसैवास्मै तेजोऽवरुन्धे ॥ 17 ॥

T.B.3.9.4.7

रुद्रास्त्वा-ऽञ्जन्तु त्रैष्टुभेन छन्दसेति वावाता । तेजो वा आज्यम् ।
इन्द्रियं त्रिष्टुप् । तेजसै-वास्मा इन्द्रियम-वरुन्धे ।
आदित्या-स्त्वा-ऽञ्जन्तु जागतेन छन्दसेति परिवृक्ती ।
तेजो वा आज्यम् । पशवो जगती । तेजसै-वास्मै पशून-वरुन्धे ।
पत्नयो-ऽभ्यञ्जन्ति । श्रिया वा एतद्रूपम् ॥ 18 ॥

T.B.3.9.4.8

यत्पत्नयः । श्रिय-मेवास्मि-न्तद्दधति ।
नास्मात्तेज इन्द्रियं पशवः श्रीरपकामन्ति ।
लाजी(3)ञ्छाची(3)न्. यशो ममाँ(4) इत्यतिरिक्त-मन्नमश्वायो
पाहरन्ति । प्रजामेवान्नादीं कुर्वते ।

ए॒तद्दे॒वा अ॒न्नम॑त्तै॒त-द॑न्नम॒द्धि प्र॑जाप॒त इ॒त्याह॑ ।
 प्र॒जाया॑मे-वा॒न्नाद्यं॑ द॒धते॑ । यदि॒ नाव॑जिघ्रै॒त् ।
 अ॒ग्निः प॒शुरा॑सी-दि॒त्यव॑-घ्राप॒येत् ।
 अव॑ है॒व जि॑घ्रति । आ॒क्रान् वा॒जी क्र॑मैर॒त्य-क्र॑मी॒द्वाजी॑
 द्यौ॒स्ते पृ॑ष्ठं पृ॒थिवी॑ स॒धस्थ॑मित्य॒श्व-म॑नु॒मन्त्र॑यते ।
 ए॒षां लो॒काना॑म-भि॒जित्यै॑ । स॒मिद्धो॑ अ॒ञ्जन्कृ॑द॒रं म॑ती॒ना-
 मित्य॑श्च॒स्या प्रि॑यो भव॒न्ति स॑रूप॒त्वाय॑ ॥ 19 ॥

T.B.3.9.5.1

तेज॑सा वा ए॒ष ब्र॑ह्मव॒र्चसे॑न व्यृ॒द्ध्यते॑ । यो-ऽश्व॑मे॒धेन॑ यज॒ते ।
 हो॒ता च॑ ब्र॒ह्मा च॑ ब्र॒ह्मोद्यं॑ व॒दतः॑ ।
 तेज॑सा चै॒वैनं॑ ब्र॒ह्मव॒र्चसे॑न च॒ सम॑र्धय॒तः । दक्षि॑णतो ब्र॒ह्मा भ॑वति ।
 दक्षि॑णत आय॒तनो॑ वै ब्र॒ह्मा । बा॒र्हस्प॑त्यो वै ब्र॒ह्मा ।
 ब्र॒ह्मव॒र्चस॑मे॒वास्य॑ दक्षि॒णतो॑ दधाति । तस्मा॑-दक्षि॒णोऽर्धो॑
 ब्र॒ह्मव॒र्चसि॑तरः ॥ उत्त॑रतो हो॒ता भ॑वति ॥ 20 ॥

T.B.3.9.5.2

उ॒त्तर॑त आ॒यत॑नो॒ वै हो॑ता ॥ आ॒ग्ने॒यो॒ वै हो॑ता ॥ ते॒जो॒ वा अ॒ग्निः ।
 ते॒ज ए॒वा॒स्यो॒त्तर॑तो॒ दधा॑ति । तस्मा॑दु॒त्तरो॒ऽर्ध-स्ते॒जस्वि॑तरः ।
 यू॒पम॑भि॒तो व॑दतः । यज॑मानदे॒वत्यो॒ वै यू॒पः ।
 यज॑मानमे॒व ते॒जसा॑ च ब्र॒ह्मव॑र्च॒सेन॑ च स॒मर्ध॑यतः ।
 कि॒ञ्च स्वि॑दासी-त॒पूर्व॑चित्ति-रि॒त्याह॑ । द्यौर्वै॑ वृ॒ष्टिः पू॒र्वचि॑त्तिः॥ 21 ॥

T.B.3.9.5.3

दि॒वमे॒व वृ॒ष्टि॒मव॑रुन्धे । कि॒ञ्च स्वि॑दासी-बृ॒हद्व॑य इ॒त्याह॑ ।
 अ॒श्वो वै बृ॒हद्व॑यः । अ॒श्वमे॒वा व॑रुन्धे ।
 कि॒ञ्च स्वि॑दासी-त्पि॒शङ्गि॑-ले॒त्याह॑ । रा॒त्रिर्वै पि॒शङ्गि॑ला ।
 रा॒त्रिमे॒वा व॑रुन्धे । कि॒ञ्च स्वि॑दासी-त्पि॒लिप्पि॑-ले॒त्याह॑ ।
 श्रीर्वै॑ पि॒लिप्पि॑ला । अ॒न्नाद्य॑मे॒वाव॑रुन्धे ॥ 22 ॥

T.B.3.9.5.4

कः स्वि॑दे॒काकी॑ च॒रती॑त्याह । अ॒सौ वा आ॑दि॒त्य ए॒काकी॑ च॒रति॑ ।

तेज॑ ए॒वा॒वरु॑न्धे । क॒ उ॒ स्वि॑ज्जायते पुनरि॒त्याह॑ ।
चन्द्र॑मा॒ वै जा॑यते पुनः । आ॒यु॒रे॒वा॒वरु॑न्धे ।
कि॒ञ्स्वि॑द्धि॒मस्य॑ भेषजमि॒त्याह॑ । अ॒ग्नि॒र्वे हि॒मस्य॑ भेषजम् ।
ब्र॒ह्म॒वर्च॑स॒मे वा॑वरुन्धे । कि॒ञ्स्वि॑दा-वपनं॒ मह॑दि॒त्याह॑ ॥ 23 ॥

T.B.3.9.5.5

अयं॑ वै लो॒क आ॒वप॑नं॒ मह॑त् । अ॒स्मिन्ने॒व लो॒के प्र॑ति॒तिष्ठ॑ति ।
पृ॒च्छामि॑ त्वा॒ पर॑मन्तं पृथि॒व्या इ॒त्याह॑ । वेदि॒र्वे प॒रोऽन्तः॑ पृथि॒व्याः ।
वेदि॒मे-वा॑वरुन्धे । पृ॒च्छामि॑ त्वा॒ भुव॑नस्य नाभि॒मि॒त्याह॑ ।
य॒ज्ञो वै भु॑व॒नस्य॑ नाभिः । य॒ज्ञमे॒-वा॑वरुन्धे ।
पृ॒च्छामि॑ त्वा॒ वृ॒ष्णो अ॑श्वस्य॒ रेत॑ इ॒त्याह॑ । सोमो॑ वै वृ॒ष्णो अ॑श्वस्य
रेतः॑ । सोम॒पी॒थमे॒-वा॑वरुन्धे । पृ॒च्छामि॑ वाचः॒ पर॑मं॒ व्यो॑मे॒त्याह॑ ।
ब्र॒ह्म॒ वै वा॒चः प॒रमं॑ व्यो॒म । ब्र॒ह्म॒वर्च॑स॒मे-वा॑वरुन्धे ॥ 24 ॥

T.B.3.9.6.1

अप॑ वा ए॒तस्मा॑-त्प्रा॒णाः क्रा॑मन्ति । योऽश्व॑मे॒धेन॑ यज॒ते ।
प्रा॒णाय॑ स्वाहा॒ व्या॒नाय॑ स्वाहेति॒ संज॑प्यमा॒न आ॑हु॒ती-र्जु॑होति ।

प्रा॒णाने॑वास्मि॒-न्दधा॑ति । नास्मा॑-त्प्रा॒णा अप॑क्रामन्ति ।
 अव॑न्ती-स्स्थाव॑न्ती-स्त्वा-ऽव॑न्तु । प्रि॒यं त्वा॑ प्रि॒याणा॑म् ।
 वर्षि॑ष्ठमा॒प्याना॑म् । नि॒धीनां॑ त्वा नि॒धिप॑तिꣳ ह॒वामहे॑
 वसो॑म-मे॒त्याह॑ । अपै॒वास्मै॑ तद्ध॒नुव॑ते ॥ 25 ॥

T.B.3.9.6.2

अथो॑ धुव॒न्त्येवैन॑म् । अथो॑ न्ये॒वास्मै॑न्-हु॒वते॑ । त्रिः॑ परि॒यन्ति॑ ।
 त्रय॑ इ॒मे लो॒काः । ए॒भ्य ए॒वैनं॑ लो॒केभ्यो॑ धुव॒ते ।
 त्रिः॑ पुनः॑ परि॒यन्ति॑ । षट्-थ्सं॑पद्यन्ते । षड्वा॑ ऋ॒तवः॑ ।
 ऋ॒तुभिरे॒वैनं॑ धुव॒ते । अप॑ वा ए॒तेभ्यः॑ प्रा॒णाः क्रा॑मन्ति ॥ 26 ॥

T.B.3.9.6.3

ये य॒ज्ञे धुव॑नं तन्व॒ते । न॒वकृ॑त्वः परि॒यन्ति॑ । न॒व वै पु॑रु॒षे प्रा॒णाः ।
 प्रा॒णाने॑-वा॒त्मन्द॑धते । नै॒भ्यः प्रा॒णा अप॑क्रामन्ति ।
 अ॒म्बे अ॒म्बाल्य॑म्बि॒क इति॑ प॒त्नी मु॒दान॑यति । अ॒ह्वतै॑वैना॑म् ।
 सु॒भगे॑ का॒म्पील॑-वा॒सिनी॑त्याह । तप॑ ए॒वैना॑-मु॒पन॑यति ।

सुवर्गे लोके संप्रोर्ण्वा॑था-मि॒त्याह ॥ 27 ॥

T.B.3.9.6.4

सुवर्गमे॒वैनानां॑ लो॒कं ग॑मयति ।

आऽह॑मजा॒नि गर्भ॑ध॒मा त्वम॑जा॒सि गर्भ॑धमि॒त्याह ।

प्र॒जा वै प॑शवो॒ गर्भः॑ । प्र॒जामे॒व प॑शूना॒त्मन्ध॑त्ते ।

दे॒वा वा अ॑श्वमे॒धे प॑वमाने । सुवर्गं॑ लो॒कं न प्रा॑जानन् ।

तम॑श्चः प्रा॒जाना॑त् । यत्सू॒चीभि॑-रसि॒पथा॑-न्कल्प॑यन्ति ।

सुवर्ग॑स्य लो॒कस्य॑ प्र॒ज्ञात्यै॑ । गा॒यत्री त्रि॒ष्टुब्ज॑गती॒त्याह ॥ 28 ॥

T.B.3.9.6.5

यथा॑ यजु॒रेवै॑तत् । त्रय्यः॑ सू॒च्यो भ॑वन्ति ।

अ॒यस्म॑य्यो रज॒ता हरि॑ण्यः । अ॒स्य वै लो॒कस्य॑ रू॒पम॑यस्म॒य्यः ।

अ॒न्तरि॑क्षस्य रज॒ताः । दि॒वो हरि॑ण्यः । दि॒शो वा अ॒यस्म॑य्यः ।

अ॒वा॒न्तरि॑दि॒शा रज॑ताः । ऊ॒र्ध्वा हरि॑ण्यः । दि॒श ए॒वास्मै॑ कल्प॑यति ।

क॒स्त्वा-छ्य॑ति क॒स्त्वा वि॒शास्ती॑-त्या॒हा हि॑सायै ॥ 29 ॥

T.B.3.9.7.1

अप॒ वा ए॒तस्मा॑च्छ्री॒ राष्ट्रं॑ क्रा॒मति॑ । योऽ॒श्वमे॑धेन॒ यज॑ते ।
ऊ॒र्ध्वा॒मे॒ना-मु॑च्छ्रय॒ता-दि॒त्याह॑ । श्रीर्वै॒ राष्ट्र॑मश्वमे॒धः ।
श्रि॒यमे॒वास्मै॑ रा॒ष्ट्रमू॒र्ध्व-मु॑च्छ्रयति । वे॒णुभा॒रं गि॒रावि॑-वे॒त्याह॑ ।
रा॒ष्ट्रं वै॑ भा॒रः । रा॒ष्ट्रमे॒वास्मै॑ पर्यू॒हति॑ ।
अथा॒स्या म॑ध्यमे॒धता॑-मि॒त्याह॑ । श्रीर्वै॒ राष्ट्र॑स्य म॒ध्यम् ॥ 30 ॥

T.B.3.9.7.2

श्रि॒यमे॒वा-वरु॑न्धे । शी॒ते वा॒ते पु॒नन्नि॑-वे॒त्याह॑ ।
क्षे॒मो वै रा॒ष्ट्रस्य॑ शी॒तो वा॒तः । क्षे॒ममे॒वा-वरु॑न्धे ।
य॒द्धरि॑णी॒ यव॑म॒त्तीत्या॑ह । वि॒ड्वै ह॒रिणी॑ । रा॒ष्ट्रं य॑वः ।
वि॒शं चै॒वास्मै॑ रा॒ष्ट्रं च॑ स॒मीची॑ दधाति ।
न पु॒ष्टं प॒शु म॑न्यत॒ इत्या॑ह । तस्मा॒द्राजा॑ प॒शून् पु॑ष्यति ॥ 31 ॥

T.B.3.9.7.3

शू॒द्रा य॑दर्य॒जारा॑ न पो॒षाय॑ ध॒नाय॑तीत्याह ।
तस्मा॑-द्वै॒शीपु॒त्रं ना॑भिषि॒ञ्चन्ते॑ । इ॒यं य॑का श॒कुन्तिके॑त्याह ।

वि॒ड्वै॑ श॒कु॒न्ति॒का । रा॒ष्ट्र॒म॒श्व॒मे॒धः । वि॒शं॑ चै॒वास्मै॑ रा॒ष्ट्र॒ च॑ स॒मी॒ची॑
द॒धा॒ति । आ॒ह॒ल॒मि॒ति॒ सर्प॑तीत्याह । तस्मा॑द्वा॒ष्ट्राय॑ वि॒शः॑ सर्प॑न्ति ।
आ॒ह॒तं॑ ग॒भे प॒स इ॒त्याह॑ । वि॒ड्वै॑ ग॒भः ॥ ३२ ॥

T.B.3.9.7.4

रा॒ष्ट्रं प॒सः॑ । रा॒ष्ट्र॒मे॒व वि॒श्या॑हन्ति । तस्मा॑द्वा॒ष्ट्रं वि॒शं॑ घा॒तु॒कम् ।
मा॒ता च॑ ते पि॒ता च॑ त इ॒त्याह॑ । इ॒यं वै॑ मा॒ता । अ॒सौ पि॒ता ।
आ॒भ्या॒मे॒वैनं॑ परि॒द॒दा॒ति । अ॒ग्रं वृ॒क्ष॒स्य॑ रो॒हत॑ इ॒त्याह॑ ।
श्री॒र्वै वृ॒क्ष॒स्या॒ग्रम् । श्रि॒य॒मे॒वा॒व॒रु॒न्धे ॥ ३३ ॥

T.B.3.9.7.5

प्र॒सु॒ला॒मी॒ति॒ ते पि॒ता ग॒भे मु॒ष्टि॒म॒त॒स्य॑-दि॒त्याह॑ । वि॒ड्वै॑ ग॒भः॑ ।
रा॒ष्ट्रं मु॒ष्टिः॑ । रा॒ष्ट्र॒मे॒व वि॒श्या॑हन्ति । तस्मा॑द्वा॒ष्ट्रं वि॒शं॑ घा॒तु॒कम् ।
अ॒प वा ए॒तेभ्यः॑ प्रा॒णाः क्रा॑मन्ति । ये य॒ज्ञेऽपू॑तं व॒दन्ति॑ ।
द॒धि॒क्रा॒व्णो अ॒का॒रि॒षमि॑ति सु॒रभि॑-म॒ती॒मृ॒चं व॒दन्ति॑ ।
प्रा॒णा वै सु॒र॒भयः॑ । प्रा॒णा॒ने॒वा॒त्म॑न्दधते ।

नै॒भ्यः॑ प्रा॒णा अ॒प॒क्राम॑न्ति । आ॒पो हि॒ष्ठा म॒यो॒भुव॑
 इ॒त्य॒द्भि॒र्मा-॑र्ज॒यन्ते॑ । आ॒पो वै सर्वा॑ दे॒वताः॑ ।
 दे॒वता॑भि॒रे-वा॒त्मानं॑ प॒वय॑न्ते ॥ 34 ॥

T.B.3.9.8.1

प्र॒जाप॑तिः प्र॒जाः सृ॒ष्ट्वा प्रे॒णाऽनु॑ प्रा॒विश॑त् ।
 ता॒भ्यः पुनः॑ सं॒भवि॑तुं नाश॒क्नोत् । सोऽब्र॑वीत् । ऋ॒ध्नव॑दि॒त्सः ।
 यो मे॒तः पुनः॑ सं॒भर॑दिति । तं दे॒वा अ॑श्वमे॒धेनै॒व स॒म॒भर॑न् ।
 ततो॑ वै त आ॒र्ध्नुव॑न्न । योऽश्व॑मे॒धेन॑ यज॒ते ।
 प्र॒जाप॑तिमे॒व सं॒भर॑त्यृ॒ध्नोति॑ । पु॒रुष॑मा॒लभ॑ते ॥ 35 ॥

T.B.3.9.8.2

वैरा॒जो वै पु॒रुषः॑ । वि॒राज॑मे॒वा-ल॑भ॒ते । अथो॑ अ॒न्नं वै वि॒राट् ।
 अ॒न्नमे॒वा-व॑रु॒न्धे । अ॒श्वमा॑-ल॒भते॑ । प्रा॒जाप॑त्यो वा अ॒श्वः ।
 प्र॒जाप॑तिमे॒वा-ल॑भ॒ते । अथो॑ श्री॒र्वा ए॒क॒श॒फम् ।
 श्रि॒यमे॒वा-व॑रु॒न्धे । गा॒मा॒लभ॑ते ॥ 36 ॥

T.B.3.9.8.3

य॒ज्ञो वै गौः । य॒ज्ञमे॒वा ल॑भते । अथो अन्नं॑ वै गौः ।
 अन्नमे॒वा वरु॑न्धे । अजा॒वी आ॑लभते भू॒म्ने । अथो पु॒ष्टिर्वै भू॒मा ।
 पु॒ष्टिमे॒वा वरु॑न्धे । पर्य॒ग्निकृ॑तं पु॒रुषं॑ चा॒रण्या॑-श्चो॒त्सृज॑न्त्यहि॒-
 सायै । उ॒भौ वा ए॒तौ प॒शू आ॑लभ्येते । यश्चा॒वमो॑ यश्च॒ पर॑मः ।
 तेऽस्यो॒भये॑ य॒ज्ञे ब॒द्धाः । अभी॑ष्टा अभि॒प्रीताः ।
 अभि॒जिता॑ अभि॒हुता॑ भवन्ति । नैनं॑ द॒ङ्क्ष्णवः॑ प॒शवो॑ य॒ज्ञे ब॒द्धाः ।
 अभी॑ष्टा अभि॒प्रीताः । अभि॒जिता॑ अभि॒हुता॑ हि॒-सन्ति॑ ।
 योऽश्व॑मे॒धेन॑ यजते । य उ॒ चैन॑मे॒वं वै॑द ॥ 37 ॥

T.B.3.9.9.1

प्रथ॑मे॒न वा ए॒ष स्तो॑मे॒न रा॑ध्वा । चतु॒ष्टोमे॑न कृ॒तेना॑या॒ना-मु॒त्तरे॑ऽह॒न् ।
 ए॒कवि॑-ंशे प्र॒तिष्ठा॑यां प्र॒तिति॑ष्ठति ।
 ए॒कवि॑-ंशा-त्प्र॒तिष्ठा॑या ऋ॒तून॑न्वा-रो॒हति॑ ।
 ऋ॒तवो॑ वै पृ॒ष्ठानि॑ । ऋ॒तवः॑ सँव॒त्सरः॑ ।

ऋ॒तु॒ष्वे॒व सँ॑व॒त्सरे॑ प्र॒ति॒ष्ठा॒य । दे॒वता॑ अ॒भ्या॒रो॒हति॑ ।

श॒क्व॒रयः॑ पृ॒ष्ठं भ॑वन्त्य-न्यद॒न्य-च्छ॑न्दः ।

अ॒न्यै॒ऽन्ये॑ वा ए॒ते प॒शव॑ आल॒भ्यन्ते॑ ॥ 38 ॥

T.B.3.9.9.2

उ॒ते॒व ग्रा॒म्याः । उ॒ते॒वा॒र॒ण्याः । अ॒हरे॑व रू॒पेण॑ स॒म॒र्ध॒यति॑ ।

अथो॑ अ॒ह ए॒वैष॑ ब॒लिर्ह्रि॑यते । तदा॒हुः । अ॒प॒शवो॑ वा ए॒ते ।

यद॒जा-व॑यश्चा॒र॒ण्याश्च॑ । ए॒ते वै स॑र्वे प॒शवः॑ । यद्ग॒व्या इति॑ ।

ग॒व्यान् प॒शूनु॑त्तमे-ऽह॒न्नाल॑भते ॥ 39 ॥

T.B.3.9.9.3

तेनै॒वोभ॑यान् प॒शून्व॑रुन्धे । प्रा॒जाप॑त्या भ॒वन्ति॑ ।

अ॒न॒भि॒जित॑स्या-भि॒जित्यै॑ । सौ॒री॒र्न॒व श्रे॒ता॒व॒शा अ॒नू॒ब॒न्ध्या भ॑वन्ति ।

अ॒न्त॒त ए॒व ब्र॑ह्मव॒र्च॒स॒म-व॑रुन्धे ।

सो॒मा॒य स्व॑रा॒ज्ञे-ऽनो॑वा॒हा॒व-न॒ड्वा-हा॑विति॒ द्व॒न्दि॒नः प॒शूना॑ल॒भते॑ ।

अ॒हो॒रा॒त्राणा॑-म॒भि॒जित्यै॑ । प॒शुभि॑र्वा ए॒ष व्यृ॑द्ध्यते ।

योऽश्वमेधेन यजते । छगलं कल्माषं किकिदीविं विदीगयमिति
 त्वाष्ट्रान् पशूनालभते । पशुभिरेवात्मानं समर्धयति ।
 ऋतुभिर्वा एष व्यृद्ध्यते । योऽश्वमेधेन यजते ।
 पिशङ्गा-स्त्रयो वासन्ता इत्यृतु-पशूना-लभते ।
 ऋतुभिरे-वात्मानं समर्धयति । आ वा एष पशुभ्यो वृश्च्यते ।
 योऽश्वमेधेन यजते । पर्यग्निकृता उत्सृजन्त्य-नाव्रस्काय ॥ 40 ॥

T.B.3.9.10.1

प्रजापतिर-कामयत महानन्नादः स्यामिति ।
 स एतावश्वमेधे महिमानाव-पश्यत् । तावगृहीत ।
 ततो वै स महानन्नादो-ऽभवत् । यः कामयेत महानन्नादः
 स्यामिति । स एतवश्वमेधे महिमानौ गृहीत ।
 महानेवान्नादो भवति । यजमानदेवत्या वै वपा । राजा महिमा ।
 यद्वपां महिम्नोभयतः परियजति । यजमानमेव राज्येनोभयतः
 परिगृह्णाति । पुरस्ता-थस्वाहाकारा वा अन्ये देवाः ।

उपरि॑ष्टा-थ्स्वा॑हाकारा अन्ये ।

ते वा ए॒तेऽश्व॑ ए॒व मे॒ध्य उ॒भये-ऽव॑रुध्यन्ते ।

यद्व॒पां म॒हि॒म्नो॒भय॑तः प॒रि॒यज॑ति । ताने॒वो॒भया॑न् प्रीणाति ॥ 41 ॥

T.B.3.9.11.1

वैश्व॑दे॒वो वा अ॒श्वः । तं य॑त्प्राजापत्यं कुर्यात् ।

या दे॒वता॑ अ॒पि॒भागाः । ता भा॒ग॒धे॒येन॑ व्य॒र्धये॑त् ।

दे॒वता॑भ्यः स॒म॒दं द॑ध्यात् ।

स्ते॒गा॒न्द॒ष्ट्राभ्यां॑ म॒ण्डू॒का-ज्ज॑म्भ्ये-भिरि॒ति ।

आज्य॑-म॒व॒दानं॑ कृ॒त्वा प्र॑ति॒स॒ख्याय॑-माहु॒ती-र्जु॑होति ।

या ए॒व दे॒वता॑ अ॒पि॒भागाः । ता भा॒ग॒धे॒येन॑ स॒म॒र्धय॑ति ।

न दे॒वता॑भ्यः स॒म॒दं द॑धाति ॥ 42 ॥

T.B.3.9.11.2

चतु॑र्द॒शै॒तान॑नु॒वा-का॑ज्जुहोत्य-नन्त॒रित्यै॑ ।

प्र॒या॒साय॑ स्वाहेति पञ्च॒द॒शम् । पञ्च॒द॒श वा अ॑र्ध॒मा॒सस्य॑ रा॒त्रयः॑ ।

अ॒र्ध॒मा॒स॒शः॑ सँ॒व॒त्स॒र आ॑प्यते । दे॒वा॒सु॒राः सँ॒य॒त्ता आ॑सन् ।
 ते॒ऽब्रु॒वन् न॒ग्नयः॑ स्वि॒ष्ट॒कृतः॑ । अ॒श्व॒स्य मे॒ध्य॒स्य व॒यमु॑द्धार-मु॒द्ध॒राम॑है ।
 अथै॒तान॑भि-भ॒वामे॑ति । ते लो॒हित॑-मु॒द॒हर॑न्त ।
 ततो॑ दे॒वा अ॑भवन् ॥ 43 ॥

T.B.3.9.11.3

परा॑ऽसु॒राः । यत्स्वि॑ष्ट॒कृद्भ्यो॑ लो॒हितं जु॑होति भ्रातृ॒व्याभि॑-भू॒त्यै ।
 भव॑त्यात्म॒ना । परा॑ऽस्य भ्रातृ॒व्यो भव॑ति ।
 गो॒मृ॒गक॑ण्ठेन प्रथ॒मा-मा॑हुतिं जुहोति ।
 प॒शवो॑ वै गो॒मृ॒गः । रु॒द्रोऽग्निः॑ स्वि॒ष्ट॒कृत् ।
 रु॒द्रादे॑व प॒शून्त॑र्दधाति । अथो॒ यत्रै॑षा-ऽऽहु॒तिर् हू॑यते ॥
 न तत्र॑ रु॒द्रः प॒शून्भि॑-म॒न्यते ॥ 44 ॥

T.B.3.9.11.4

अ॒श्व॒श॒फेन॑ द्वितीया-मा॑हुतिं जुहोति । प॒शवो॑ वा ए॒क॒श॒फम् ।
 रु॒द्रोऽग्निः॑ स्वि॒ष्ट॒कृत् । रु॒द्रादे॑व प॒शून्त॑र्दधाति ।

अथो॑ यत्रै॒षा-ऽऽहु॑तिर् हू॒यते॑ ॥ न तत्र॑ रु॒द्रः प॒शून्भि॑मन्यते ।
 अय॑स्मये॒न क॒मण्ड॑लुना तृतीया॑म् ।
 आहु॑तिं जुहो॒त्या-या॑स्यो वै प्र॒जाः । रु॒द्रोऽग्निः॑ स्वि॒ष्टकृ॑त् ।
 रु॒द्रादे॑व प्र॒जा अ॒न्तर्द॑धाति । अथो॑ यत्रै॒षा-ऽऽहु॑तिर् हू॒यते॑ ॥
 न तत्र॑ रु॒द्रः प्र॒जा अ॒भि॑मन्यते ॥ 45 ॥

T.B.3.9.12.1

अश्व॑स्य वा आल॑ब्धस्य मे॒ध उद॑क्रामत् । तद॑श्वस्तो मी॒य-म॑भवत् ।
 यद॑श्वस्तो मी॒यं जु॑होति । स मे॒धमे॑-वैन॒मा-ल॑भते ।
 आज्ये॑न जुहोति । मे॒धो वा आ॒ज्यम् । मे॒धोऽश्व॑स्तो-मी॒यम् ।
 मे॒धेनै॑-वास्मिन् मे॒धं द॑धाति । षट्त्रिं॑शतं जुहोति ।
 षट्त्रिं॑शदक्षरा बृ॒हती ॥ 46 ॥

T.B.3.9.12.2

बा॒र्ह॒ताः प॒शवः॑ । सा प॒शूनां॑ मा॒त्रा ॥ प॒शूने॑व मा॒त्रया॑ स॒मर्ध॑यति ।
 ता यद्भू॑यसी॒र्वा क॑नीयसी॒र्वा जु॑हुयात् । प॒शून्मा॒त्रया॑ व्य॒र्धये॑त् ।

षट्त्रिं॑शतं जुहोति । षट्त्रिं॑शदक्षरा बृ॒हती । बार्॒हताः प॒शवः ।
सा प॒शूनां मा॒त्रा । प॒शूने॒व मा॒त्रया॒ सम॑र्धयति ॥ 47 ॥

T.B.3.9.12.3

अश्व॒स्तोमी॒यं हु॒त्वा द्वि॒पदा जुहोति । द्वि॒पाद्वै पु॒रुषो॒ द्विप्र॑तिष्ठः ।
तदे॒नं प्र॑तिष्ठया॒ सम॑र्धयति । तदाहुः ।

अश्व॒स्तोमी॒यं पूर्॒व हु॒तव्या(३)न्दि॒पदा(३) इति॑ ।

अश्वो॒ वा अश्व॒स्तोमी॒यम् । पु॒रुषो॒ द्वि॒पदाः ।

अश्व॒स्तोमी॒यं हु॒त्वा द्वि॒पदा जुहोति । तस्मा॑-दि॒द्विपा॑च्चतु॒ष्पाद॑मत्ति ।

अथो॑ द्वि॒पद्ये॒व चतु॑ष्पदः प्र॑तिष्ठापयति । द्वि॒पदा हु॒त्वा ।

नान्यामु॒त्त-रामा॑हुतिं जुहुयात् । यदन्यामु॒त्त-रामा॑हुतिं जुहुयात् ।

प्र प्र॑तिष्ठायाश्च्यवेत । द्वि॒पदा अ॒न्ततो॑ जुहोति प्र॑तिष्ठित्यै ॥ 48 ॥

T.B.3.9.13.1

प्रजा॑पति-रश्व॒मेध॑म-सृ॒जत । सो-ऽस्मा॑त्सृ॒ष्टो-ऽपा॑क्रामत् ।

तं य॑ज्ञ-क्र॒तुभि॑-रन्वै॒च्छत् । तं य॑ज्ञ-क्र॒तुभि॑-र्नान्वि॒न्दत् ।

तमि॑ष्टिभि॒-रन्वै॒च्छत् । तमि॑ष्टिभि॒र-न्वि॒न्दत् ।

तदिष्टी॑ना-मिष्टि॑त्वम् । यथ्स॑ँवथ्स॑र-मिष्टि॑भि-र्यज॑ते ।
अश्व॑मे॒व तदन्वि॑च्छति । सा॒वि॒त्रियो॑ भवन्ति ॥ 49 ॥

T.B.3.9.13.2

इयं॑ वै स॒विता । यो॑ वा अस्यां॑ नश्यति॑ यो निलय॑ते ।
अस्यां॑ वा॒व तं वि॑न्दन्ति । न वा इ॒मां कश्च॑ नेत्याहुः ।
तिर्यङ्॑नो॒र्ध्वो-ऽत्ये॑तुमर्हतीति॑ । यथ्सा॑वि॒त्रियो॑ भवन्ति ।
स॒वितृ-प्र॑सूत ए॒वैन॑मिच्छति । ईश्व॑रो वा अश्वः॑ प्रमु॒क्तः परां॑
परा॒वतं॑ गन्तोः॑ । यथ्सा॑यं धृ॒तीर्जु॑होति । अश्व॑स्य॒ यत्यै॑ धृ॒त्यै ॥ 50 ॥

T.B.3.9.13.3

यत्प्रा॑तरिष्टि॒भिर्-यज॑ते । अश्व॑मे॒व तदन्वि॑च्छति ।
यथ्सा॑यं धृ॒तीर्जु॑होति । अश्व॑स्यै॒व यत्यै॑ धृ॒त्यै ।
तस्मा॑त्सा॒यं प्र॒जाः क्षो॒म्या भव॑न्ति । यत्प्रा॑त-रिष्टि॒भिर्-यज॑ते ।
अश्व॑मे॒व तदन्वि॑च्छति । तस्मा॑द्दि॒वा नष्टै॑ष एति ।
यत्प्रा॑तरिष्टि॒भिर्-यज॑ते सा॒यं धृ॒तीर्जु॑होति ।

अ॒हो॒रा॒त्रा॒भ्या॑-मे॒वैन॑म-न्वि॒च्छति॑ ।

अथो॑ अ॒हो॒रा॒त्रा॒भ्या॑-मे॒वास्मै॑ यो॒गक्षे॑मं क॒ल्पय॑ति ॥ 51 ॥

T.B.3.9.14.1

अप॑ वा ए॒तस्मा॑च्छ्री॒ राष्ट्रं॑ क्रा॒मति॑ । योऽ॒श्वमे॑धेन॒ यज॑ते ।
ब्रा॒ह्मणौ॑ वी॒णागा॑थिनौ॒ गाय॑तः । श्रि॒या वा ए॒तद्रू॑पम् । य॒द्वीणा॑ ।
श्रि॒य-मे॒वास्मि॑-न्तद्ध॒त्तः । यदा॑ ख॒लु वै पु॑रुषः श्रि॒य म॑श्नुते ।
वी॒णाऽस्मै॑ वा॒द्यते॑ । तदा॑हुः । यदु॒भौ ब्रा॒ह्मणौ॑ गा॒येता॑म् ॥ 52 ॥

T.B.3.9.14.2

प्र॒भ्रञ्शु॑का-ऽस्मा॑च्छ्रीः स्या॒त् । न वै ब्रा॒ह्मणे॑ श्री॒ रमत॑ इति ।
ब्रा॒ह्मणो॑ऽन्यो गा॒येत् । रा॒ज॒न्योऽन्यः॑ ।
ब्र॒ह्म वै ब्रा॒ह्मणः॑ । क्ष॒त्रञ् रा॒ज॒न्यः॑ ।
तथा॑ हा॒स्य ब्र॒ह्मणा॑ च क्ष॒त्रेण॑ चो॒भय॑तः श्रीः॑ परि॒गृही॑ता भवति ।
तदा॑हुः । यदु॒भौ दि॒वा गा॒येता॑म् । अ॒पास्मा॑द्राष्ट्रं क्रा॒मेत् ॥ 53 ॥

T.B.3.9.14.3

न वै ब्रा॒ह्म॒णे रा॒ष्ट्रं र॑म॒त इति॑ । यदा॑ ख॒लु वै रा॒जा का॑म॒यते॑ ।
 अथ॑ ब्रा॒ह्म॒णं जि॑नाति । दि॒वा ब्रा॒ह्म॒णो गा॑येत् । न॒क्तं रा॒ज॒न्यः ।
 ब्रा॒ह्म॒णो वै रू॒पम॑हः । क्ष॒त्र॒स्य रा॒त्रिः ।
 तथा॑ हा॒स्य ब्रा॒ह्म॒णा च॑ क्ष॒त्रेण॑ चो॒भय॑तो रा॒ष्ट्रं परि॑गृही॒तं भ॑वति ।
 इत्य॑द॒दा इत्य॑यज॒था इत्य॑प॒च इति॑ ब्रा॒ह्म॒णो गा॑येत् ।
 इ॒ष्टापूर्तं॑ वै ब्रा॒ह्म॒णस्य॑ ॥ 54 ॥

T.B.3.9.14.4

इ॒ष्टापूर्ते॑-नै॒वैनं॑ स॒ सम॑र्धयति ।
 इत्य॑जि॒ना इत्य॑यु॒ध्यथा॑ इत्य॑मु॒ संग्राम॑-म॒हन्नि॑ति रा॒ज॒न्यः ।
 यु॒द्धं वै रा॒ज॒न्यस्य॑ । यु॒द्धेनै॒वैनं॑ स॒ सम॑र्धयति ।
 अ॒क्लृ॒प्ता वा ए॒तस्य॑र्त॒व इत्या॑हुः । योऽश्व॑मे॒धेन॑ यज॒त इति॑ ।
 ति॒स्रोऽन्यो॑ गा॒यति॑ ति॒स्रोऽन्यः॑ । षट्॑थ्सं॒पद्य॑न्ते । षड्वा॑ ऋ॒तवः॑ ।
 ऋ॒तूने॒वास्मै॑ क॒ल्प॑यतः । ताभ्यां॑ स॒ स्था॒याम् ॥

अ॒नो॒यु॒क्ते च॑ श॒ते च॑ द॒दाति॑ । श॒ता॒युः पु॒रुषः॑ श॒तेन्द्रि॑यः ।
आ॒यु॒ष्ये॒वेन्द्रि॑ये प्र॒ति॒ति॒ष्ठति॑ ॥ 55 ॥

T.B.3.9.15.1

सर्वे॑षु वा ए॒षु लो॒केषु॑ मृ॒त्यवो॑ऽन्वाय॒ताः ।
तेभ्यो॑ यदाहु॒तीर्न॑ जुहु॒यात् । लो॒के लो॒क ए॒नं मृ॒त्युर्वि॑न्देत् ।
मृ॒त्यवे॒ स्वाहा॑ मृ॒त्यवे॒ स्वाहे॑त्यभि॒ पूर्व॑माहु॒ती-जु॑होति ।
लो॒का॒ल्लो॒कादे॒व मृ॒त्युम॑वयजते । नैनं॑ लो॒के लो॒के मृ॒त्युर्वि॑न्दति ।
यदमु॒ष्मै स्वाहा॑ऽमु॒ष्मै स्वाहे॑ति जुह्व॒त्सं चक्षी॑त ।
ब॒हुं मृ॒त्युम॑मि॒त्रं कु॑र्वीत । मृ॒त्यवे॒ स्वाहे॑त्येक॒स्मा ए॒वैका॑-ञ्जुहु॒यात् ।
एको॒ वा अ॒मुष्मि॑ लो॒के मृ॒त्युः ॥ 56 ॥

T.B.3.9.15.2

अ॒श॒न॒या मृ॒त्यु॒रे॒व । तमे॒वामु॒ष्मिं-लो॒केऽव॑यजते ।
भ्रू॒ण॒ह॒त्यायै॑ स्वाहे॒त्यव॑भृथ आहु॒तिं जु॑होति ।
भ्रू॒ण॒ह॒त्यामे॒ वा व॑यजते ।

तदाहुः । यद्भ्रूणहत्या ऽपान्याऽथ । कस्माद्यज्ञेऽपि क्रियत इति ।
 अमृत्युर्वा अन्यो भ्रूणहत्याया इत्याहुः । भ्रूणहत्या वाव मृत्युरिति ।
 यद्भ्रूणहत्यायै स्वाहेत्यवभृथ आहुतिं जुहोति ॥ 57 ॥

T.B.3.9.15.3

मृत्युमे वा हुत्या तर्पयित्वा परिपाणं कृत्वा ।
 भ्रूणघ्ने भेषजं करोति । एतां ह वै मुण्डिभ औदन्यवः ।
 भ्रूणहत्यायै प्रायश्चित्तिं विदाञ्चकार । यो हास्यापि प्रजायां
 ब्राह्मणं हन्ति । सर्वस्मै तस्मै भेषजं करोति ।
 जुम्बकाय स्वाहेत्यवभृथ उत्तमामाहुतिं जुहोति ।
 वरुणो वै जुम्बकः । अन्तत एव वरुणमवयजते ।
 खलतेर्विक्लिधस्य शुक्लस्य पिङ्गाक्षस्य मूर्धञ्जुहोति ।
 एतद्वै वरुणस्य रूपं । रूपेणैव वरुणमवयजते ॥ 58 ॥

T.B.3.9.16.1

वारु॒णो वा अ॒श्वः । तं दे॒वत॑या व्य॒र्धय॑ति । यत्प्रा॒जाप॑त्यं करो॒ति ।
 नमो॑ रा॒ज्ञे नमो॑ वरु॒णाये॑त्याह । वारु॒णो वा अ॒श्वः ।
 स्वयै॒वैनं॑ दे॒वत॑या सम॒र्धय॑ति । नमो॑ऽश्वा॒य नमः॑ प्र॒जाप॑तय॒ इत्या॑ह ।
 प्रा॒जाप॑त्यो वा अ॒श्वः । स्वयै॒वैनं॑ दे॒वत॑या सम॒र्धय॑ति ।
 नमो॑ऽधि॒पत॑य॒ इत्या॑ह ॥ 59 ॥

T.B.3.9.16.2

धर्मो॑ वा अधि॒पतिः॑ । धर्म॑मेवा-वरु॒न्धे ।
 अधि॒पति-र॑स्यधि॒पतिं॑ मा कुर्व॑धि॒पति॑रहं प्र॒जानां॑ भूया॒स-मि॑त्याह ।
 अधि॒पति-मे॒वैनं॑ समा॒नानां॑ करो॒ति । मां धे॑हि मयि॒ धेही॑त्याह ।
 आ॒शिष॑मे॒वै तामा-शा॑स्ते । उपा॒कृता॑य स्वा॒हेत्यु॒पाकृ॑ते जुहो॒ति ।
 आल॑ब्धाय स्वा॒हेति॑ नियु॒क्ते जुहो॑ति । हु॒ताय॑ स्वा॒हेति॑ हु॒ते जुहो॑ति ।
 ए॒षां लो॒काना॑म-भिजि॒त्यै ॥ 60 ॥

T.B.3.9.16.3

प्र॒ वा ए॒ष ए॒भ्यो लो॒केभ्य॑श्च॒यव॑ते । योऽ॒श्वमे॑धेन॒ यज॑ते ।
 आ॒ग्नेय॑-मै॒न्द्रा॒ग्न-मा॒श्विन॑म् । तान् प॒शूना॑ल॒भते॑ प्र॒तिष्ठि॑त्यै ।
 यदाऽ॒ग्नेयो॑ भव॒ति । अ॒ग्निः सर्वा॑ दे॒वताः॑ ।
 दे॒वता॑ ए॒वाव॑रुन्धे ॥ ब्र॒ह्म वा अ॒ग्निः ।
 क्ष॒त्रमि॑न्द्रः । यदै॒न्द्रा॒ग्नो भव॑ति ॥ 61 ॥

T.B.3.9.16.4

ब्र॒ह्मक्ष॑त्रे ए॒वाव॑रुन्धे । यदाऽ॒श्विनो॑ भव॒ति । आ॒शिषाम॑-व॒रुद्ध्यै॑ ।
 त्रयो॑ भव॒न्ति । त्रय॑ इ॒मे लो॒काः । ए॒ष्वेव॑ लो॒केषु॑ प्र॒तिति॑ष्ठति ।
 अ॒ग्नये॑-ऽ॒होमु॑चे-ऽ॒ष्टा क॑पा॒ल इति॑ द॒शह॑विष॒मिष्टिं॑ निर्व॒पति॑ ।
 द॒शाक्ष॑रा वि॒राट् । अ॒न्नं वि॒राट् । वि॒राजै॑-वा॒न्नाद्य॑म-व॒रुन्धे॑ ।
 अ॒ग्नेर्म॑न्वे प्र॒थम॑स्य प्र॒चेत॑स इति॑ या॒ज्यानु॑वा॒क्या
 भव॑न्ति सर्व॒त्वाय॑ ॥ 62 ॥

T.B.3.9.17.1

यद्य॑श्चमु॒पत-॑प॒द्विन्दे॑त् । आ॒ग्ने॒यम॑ष्टा क॒पालं॑ निर्व॑पेत् ।
 सौ॒म्यं च॒रुम् । सा॒वि॒त्र-म॑ष्टाक॒पालम् । यदा॑ग्ने॒यो भ॑वति ।
 अ॒ग्निः सर्वा॑ दे॒वताः॑ । दे॒वता-॑भिरे॒वैनं॑ भिष॒ज्यति॑ ।
 यथ्सौ॒म्यो भ॑वति । सोमो॑ वा ओष॒धीना॑ञ् राजा॑ ।
 याभ्य॑ ए॒वैनं॑ वि॒न्दति॑ ॥ 63 ॥

T.B.3.9.17.2

ताभिरे॒वैनं॑ भिष॒ज्यति॑ । यथ्सौ॒म्यो भ॑वति ।
 स॒वि॒तृप्र॑सूत ए॒वैनं॑ भिष॒ज्यति॑ । ए॒ताभिरे॒वैनं॑ दे॒वता॑भिर्-भिष॒ज्यति॑ ।
 अ॒गदो॑ है॒व भ॑वति । पौ॒ष्णं च॒रुं निर्व॑पेत् । यदि॑ श्लो॒णः स्या॑त् ।
 पू॒षा वै श्लो॑ण्यस्य भिष॒क् । स ए॒वैनं॑ भिष॒ज्यति॑ ।
 अ॒श्लो॒णो है॒व भ॑वति ॥ 64 ॥

T.B.3.9.17.3

रौ॒द्रं च॒रुं निर्व॑पेत् । यदि॑ म॒हती॑ दे॒वता-॑ऽभि॒मन्ये॑त् ।
 ए॒तद्दे॒वत्यो॑ वा अ॒श्वः । स्वयै॒वैनं॑ दे॒वत॑या भिष॒ज्यति॑ ।
 अ॒गदो॑ है॒व भ॑वति ।

वै॒श्वान॑रं द्वा॒दश॑-क॒पालं॑ निर्व॑पेन्मृ॒गाख॑रे यदि नागच्छेत् ।
 इ॒यं वा॑ अ॒ग्निर्वै॑श्वान॒रः । इ॒यमे॒वैन॑-म॒र्चिभ्यां॑ परि॒रोध॑मानयति ।
 आ है॒व सु॒त्यम॑ह-र्गच्छति । यद्य॒धीया॑त् ॥ 65 ॥

T.B.3.9.17.4

अ॒ग्नये॑-ऽ॒हो-मु॒चेऽष्टा॑ क॒पालः॑ । सौ॒र्यं प॑यः ।
 वा॒यव्य॑ आ॒ज्यभा॑गः । यज॑मानो वा अ॒श्वः ।
 अ॒हसा॑ वा ए॒ष गृ॑हीतः ।
 यस्या॑श्चो मे॒धाय॑ प्रो॒क्षितो॑-ऽ॒ध्येति॑ । यद॒होमु॒चे निर्व॑पति ।
 अ॒हस॑ ए॒व तेन॑ मुच्यते । यज॑मानो वा अ॒श्वः ।
 रे॒तसा॑ वा ए॒ष व्यृ॑ध्यते ॥ 66 ॥

T.B.3.9.17.5

यस्या॑श्चो मे॒धाय॑ प्रो॒क्षितो॑-ऽ॒ध्येति॑ । सौ॒र्यं रे॑तः ।
 यत्सौ॒र्यं प॑यो भवति । रे॒तसै॒वैन॑ स॒ सम॑र्धयति ।
 यज॑मानो वा अ॒श्वः । गर्भै॒र्वा ए॒ष व्यृ॑ध्यते ।

यस्याश्चो॑ मे॒धाय॑ प्रो॒क्षितो॑-ऽ॒ध्येति॑ । वा॒यव्या॑ गर्भाः॑ ।
यद्वा॒यव्य॑ आ॒ज्यभा॑गो भवति । गर्भै॑रे॒वैन॑ꣳ स॒ सम॑र्धयति ।
अथो॑ यस्यैषा-ऽश्वमे॒धे प्रा॑यश्चि॒तिः क्रि॑यते ।
इष्ट्वा॑ वसी॒यान् भ॑वति ॥ 67 ॥

T.B.3.9.18.1

तदाहुः॑ । द्वा॒दश॑ ब्र॒ह्मौद॑नान्त्सꣳ-स्थि॒ते निर्व॑पेत् ।
द्वा॒दश॑-भि॒र्वेष्टि॑भि-र्यजे॒तेति॑ । यदिष्टि॑-भि॒र्यजे॑त ।
उ॒पना॑मु॒क ए॒नं य॑ज्ञः स्यात् । पा॒पीया॑ꣳस्तु स्यात् ॥
आ॒प्तानि॑ वा ए॒तस्य॑ छन्दाꣳसि॑ । य ई॒जानः॑ ।
ता॒नि क॑ ए॒ताव॑दाशु पुनः॑ प्रयु॒ञ्जीते॑ति ।
स॒र्वा वै सꣳस्थि॑ते य॒ज्ञे वा॑गाप्यते ॥ 68 ॥

T.B.3.9.18.2

साऽऽप्ता॑ भवति या॒तया॑म्नी । क्रू॒रीकृ॑तेव हि भवत्य॒रुष्क॑ता ।
सा न पुनः॑ प्रयु॒ज्येत्याहुः॑ । द्वा॒दशै॒व ब्र॒ह्मौद॑नान्त्सꣳ स्थि॒ते
निर्व॑पेत् । प्र॒जाप॑तिर्वा ओ॒दनः॑ । य॒ज्ञः प्र॒जाप॑तिः ।

उपनामु॑क ए॒नं य॑ज्ञो भ॒वति॑ । न पा॒पीया॑न् भ॒वति॑ । द्वा॒दश॑ भ॒वन्ति॑ ।
द्वा॒दश॑ मा॒साः सँ॒वत्स॑रः । सँ॒वत्स॑र ए॒व प्र॑ति॒तिष्ठ॑ति ॥ 69 ॥

T.B.3.9.19.1

ए॒ष वै वि॒भूर्ना॑म॒ यज्ञः॑ । स॒र्व॒ ह वै तत्र॑ वि॒भु भ॑वति ।
य॒त्रैते॑न॒ यज्ञे॑न॒ यज॑न्ते । ए॒ष वै प्र॒भूर्ना॑म॒ यज्ञः॑ ।
स॒र्व॒ ह वै तत्र॑ प्र॒भु भ॑वति । य॒त्रैते॑न॒ यज्ञे॑न॒ यज॑न्ते ।
ए॒ष वा ऊ॒र्जस्वा॑न्ना॒म॒ यज्ञः॑ । स॒र्व॒ ह वै तत्रो॑र्ज॒स्व-॑द्भवति ।
य॒त्रैते॑न॒ यज्ञे॑न॒ यज॑न्ते । ए॒ष वै प॒यस्वा॑न्ना॒म॒ यज्ञः॑ ॥ 70 ॥

T.B.3.9.19.2

स॒र्व॒ ह वै तत्र॑ प॒यस्व॑-द्भवति । य॒त्रैते॑न॒ यज्ञे॑न॒ यज॑न्ते ।
ए॒ष वै वि॒धृ॒तो ना॑म॒ यज्ञः॑ । स॒र्व॒ ह वै तत्र॑ वि॒धृ॒तं भ॑वति ।
य॒त्रैते॑न॒ यज्ञे॑न॒ यज॑न्ते । ए॒ष वै व्या॒वृ॒तो ना॑म॒ यज्ञः॑ ।
स॒र्व॒ ह वै तत्र॑ व्या॒वृ॒तं भ॑वति । य॒त्रैते॑न॒ यज्ञे॑न॒ यज॑न्ते ।
ए॒ष वै प्र॑ति॒ष्ठि॒तो ना॑म॒ यज्ञः॑ ।
स॒र्व॒ ह वै तत्र॑ प्र॑ति॒ष्ठि॒तं भ॑वति ॥ 71 ॥

T.B.3.9.19.5

यत्रै॒तेन॑ य॒ज्ञेन॑ यज॒न्ते । ए॒ष वै ते॑ज॒स्वी ना॑म॒ यज्ञः॑ ।
 सर्व॑ꣳ ह॒ वै तत्र॑ तेज॒स्वि भ॑वति । यत्रै॒तेन॑ य॒ज्ञेन॑ यज॒न्ते ।
 ए॒ष वै ब्र॑ह्मवर्च॒सी ना॑म॒ यज्ञः॑ ।
 आ ह॒ वै तत्र॑ ब्रा॒ह्मणो॑ ब्र॒ह्मवर्च॑सी जा॒यते॑ ।
 यत्रै॒तेन॑ य॒ज्ञेन॑ यज॒न्ते । ए॒ष वा अ॑तिव्या॒धी ना॑म॒ यज्ञः॑ ।
 आ ह॒ वै तत्र॑ राज॒न्यो-ऽति॑व्या॒धी जा॒यते॑ । यत्रै॒तेन॑ य॒ज्ञेन॑ यज॒न्ते ।
 ए॒ष वै दी॒र्घो ना॑म॒ यज्ञः॑ । दी॒र्घायु॑षो ह॒ वै तत्र॑ म॒नुष्या॑ भ॒वन्ति॑ ।
 यत्रै॒तेन॑ य॒ज्ञेन॑ यज॒न्ते । ए॒ष वै क्लृ॑प्तो ना॑म॒ यज्ञः॑ ।
 कल्प॑ते ह॒ वै तत्र॑ प्र॒जाभ्यो॑ यो॒गक्षे॑मः ।
 यत्रै॒तेन॑ य॒ज्ञेन॑ यज॒न्ते ॥ 72 ॥

T.B.3.9.20.1

ता॒प्ये॒णाश्च॑ꣳ सं॒ज्ञप॑यन्ति । य॒ज्ञो वै ता॒प्यम् ।
 य॒ज्ञेनै॒वैन॑ꣳ स॒मर्ध॑यन्ति । या॒मेन॑ सा॒म्ना प्र॑स्तो॒ता-ऽनू॑पतिष्ठते ।

यमलोक-मेवैनं गमयति ॥ तार्प्ये च कृत्यधीवासे चाश्वं
 संजपयन्ति । एतद्वै पशूनां रूपम् । रूपेणैव पशूनवरुन्धे ।
 हिरण्यकशिपु भवति । तेजसो-ऽवरुद्ध्यै ॥ 73 ॥

T.B.3.9.20.2

रुक्मो भवति । सुवर्गस्य लोकस्या-नुख्यात्यै । अश्वो भवति ।
 प्रजापते-राप्त्यै ॥ अस्य वै लोकस्य रूपं तार्प्यम् ।
 अन्तरिक्षस्य कृत्य-धीवासः । दिवो हिरण्यकशिपु ।
 आदित्यस्य रुक्मः । प्रजापतेरश्वः ।
 इममेव लोकं तार्प्येणाप्नोति ॥ 74 ॥

T.B.3.9.20.3

अन्तरिक्षं कृत्यधीवासेन । दिवं हिरण्यकशिपुना ।
 आदित्यं रुक्मेण । अश्वेनैव मेध्येन प्रजापतेः सायुज्यं
 सलोकता-माप्नोति । एतासामेव देवतानां सायुज्यम् ।
 सार्ष्टितां समान लोकतामाप्नोति ।

योऽश्वमे॒धेन॑ य॒जते॑ । य उ॑ चैनमे॒वं वे॑द ॥ 75 ॥

T.B.3.9.21.1

आ॒दि॒त्याश्चाङ्गि॑र॒सश्च॑ सु॒वर्गे॑ लो॒केऽस्पर्ध॑न्त । तेऽङ्गि॑र॒स आ॒दि॒त्येभ्यः॑ ।
अमु॑मा॒दि॒त्य-मश्च॑ श्वे॒तं भू॑तं दक्षि॑णा-मनय॒न् ।
तेऽब्रु॑वन् । यं नोऽनै॑ष्ट । स वर्योऽभू॑दिति ।
तस्मा॑दश्च॑ स॒वर्ये॑त्या-ह्वय॒न्ति । तस्मा॑द्य॒ज्ञे वरो॑ दी॒यते॑ ।
यत्प्र॑जाप॒ति-राल॑ब्धो-ऽश्वो-ऽभव॑त् । तस्मा॑दश्वो॒ नाम॑ ॥ 76 ॥

T.B.3.9.21.2

यच्छ॑वय-दरु॒रासी॑त् । तस्मा॑दर्वा॒ नाम॑ ।
यथ्स॑द्यो वा॒जान्थ्स॑-मज॒यत् । तस्मा॑द्वा॒जी नाम॑ ।
यदसु॑राणां लो॒काना॑दत्त । तस्मा॑दा॒दि॒त्यो नाम॑ ।
अग्नि॑र्वा अश्वमे॒धस्य॑ योनि॑राय॒तनम्॑ । सूर्यो॑-ऽग्नेर्यो॑नि-राय॒तनम्॑ ।
यदश्वमे॒धे-ऽग्नौ॑ चि॒त्य उत्तर॑वेदि-मु॒पव॑पति ।
योनि॑-मन्तमे॒वैन॑-माय॒तनव॑न्तं करोति ॥ 77 ॥

T.B.3.9.21.3

यो॒नि-मा॒नाय॑तनवान् भवति । स ए॒वं वै॑द ।
 प्रा॒णापा॒नौ वा ए॒तौ दे॒वाना॑म् । यद॒र्काश्व॑मे॒धौ ।
 प्रा॒णापा॒नावे-वा॑वरुन्धे । ओ॒जो ब॒लं वा ए॒तौ दे॒वाना॑म् ।
 यद॒र्काश्व॑मे॒धौ । ओ॒जो ब॒लमे॒वावरु॑न्धे ।
 अ॒ग्निर्वा अ॒श्वमे॒धस्य॑ यो॒नि-रा॑यतनम् ।
 सू॒र्यो-ऽग्ने॑र्यो॒नि-रा॑यतनम् ।
 यद॒श्वमे॒धे-ऽग्नौ॑ चि॒त्य उत्तर॑वेदिं चि॒नोति॑ ।
 ताव॑र्काश्वमे॒धौ । अ॒र्काश्व॑मे॒धावे॒वा वरु॑न्धे ।
 अथो॑ अ॒र्काश्व-मे॒धयो॑रे॒व प्र॒ति॒तिष्ठ॑ति ॥ 78 ॥

T.B.3.9.22.1

प्र॒जाप॑तिं वै दे॒वाः पि॒तरम् । प॒शुं भू॑तं मे॒धाया-ल॑भन्त ।
 तमा॒लभ्यो॑-पा॒वसन् । प्रा॒तर्य॑ष्टास्म॒ह इति॑ ।
 ए॒कं वा ए॒तद्दे॒वाना॑म॒हः । यथ्सँ॑व॒त्सरः॑ ।
 तस्मा॑द॒श्वः पु॒रस्ता॑-थ्सँ॑व॒त्सर आ॒लभ्य॑ते ।

यत्प्रजापति-रालब्धो-ऽश्वोऽभवत् । तस्मादश्वः ।
यथ्सद्यो मेधोऽभवत् ॥ 79 ॥

T.B.3.9.22.2

तस्मादश्वमेधः । वेदुको-ऽश्वमाशुं भवति । य एवं वेद ।
यद्वै तत्प्रजापति-रालब्धो-ऽश्वोऽभवत् ।
तस्मादश्वः प्रजापतेः पशूना-मनुरूपतमः ॥
आऽस्य पुत्रः प्रतिरूपो जायते । य एवं वेद ।
सर्वाणि भूतानि संभृत्यालभते ।
समेनं देवा-स्तेजसे ब्रह्मवर्चसाय भरन्ति ।
योऽश्वमेधेन यजते ॥ 80 ॥

T.B.3.9.22.3

य उ चैनमेवं वेद । एतद्वै तद्देवा एतां देवताम् ।
पशुं भूतं मेधायालभन्त । यज्ञमेव । यज्ञेन यज्ञम-यजन्त देवाः ।
कामप्रं यज्ञम कुर्वत । तेऽमृतत्वम-कामयन्त ।
तेऽमृतत्वम-गच्छन् । योऽश्वमेधेन यजते । देवानामेवा-यनेनैति ॥ 81

T.B.3.9.22.4

प्राजापत्येनै॒व य॒ज्ञेन॑ यज॒ते का॒मप्रे॑ण । अ॒पुन॑-मा॒रमे॒व ग॑च्छति ।
 ए॒तस्य॑ वै रू॒पेण॑ पु॒रस्ता॑-त्प्राजापत्य-मृ॒षभं॑ तू॒परं॑
 बहु॒रूप॑-मा॒लभ॑ते । सर्वे॑भ्यः का॒मेभ्यः॑ । सर्व॑स्याप्त्यै ॥
 सर्व॑स्य जि॒त्यै ॥ सर्व॑मे॒व तेना॑प्नोति । सर्वं॑ जयति ।
 योऽश्व॑मे॒धेन॑ यज॒ते । य उ॑ चैनमे॒वं वे॑द ॥ 82 ॥

T.B.3.9.23.1

यो वा अश्व॑स्य मे॒ध्यस्य॑ लो॒मनी॑ वे॒द ।
 अश्व॑स्यै॒व मे॒ध्यस्य॑ लो॒मं लो॒मञ्जु॑होति ।
 अ॒होरा॑त्रे वा अश्व॑स्य मे॒ध्यस्य॑ लो॒मनी॑ । यथ॑सायं प्रा॒तर्जु॑होति ।
 अश्व॑स्यै॒व मे॒ध्यस्य॑ लो॒मं लो॒मञ्जु॑होति । ए॒तद॑नु॒कृति॑ ह॒स्म
 वै पु॒रा । अश्व॑स्य मे॒ध्यस्य॑ लो॒मं लो॒मञ्जु॑हति ।
 यो वा अश्व॑स्य मे॒ध्यस्य॑ प॒दे वे॑द । अश्व॑स्यै॒व मे॒ध्यस्य॑
 प॒दे प॒दे जु॑होति । द॒र्श॒पू॒र्णमा॒सौ वा अश्व॑स्य मे॒ध्यस्य॑ प॒दे ॥ 83

T.B.3.9.23.2

यद्दर्शपूर्णमासौ यजते । अश्वस्यैव मेध्यस्य पदे पदे जुहोति ।
एतदनुकृति ह स्म वै पुरा । अश्वस्य मेध्यस्य पदे पदे जुह्वति ।
यो वा अश्वस्य मेध्यस्य विवर्तनं वेद ।
अश्वस्यैव मेध्यस्य विवर्तने विवर्तने जुहोति ।
असौ वा आदित्योऽश्वः । स आहवनीयमागच्छति । तद्विवर्तते ।
यदग्निहोत्रं जुहोति । अश्वस्यैव मेध्यस्य विवर्तने विवर्तने जुहोति ।
एतदनुकृति ह स्म वै पुरा ।
अश्वस्य मेध्यस्य विवर्तने विवर्तने जुह्वति ॥ 84 ॥

॥ हरिः ओम् ॥

3 कृष्णयजुर्वेदीय काठकं

3.1 तैत्तरीय यजुर्ब्राह्मणे काठके प्रथमः प्रश्नः

॥ हरिः ओं ॥

T.B.3.10.1.1

सं॒ज्ञानं॑ वि॒ज्ञानं॑ प्र॒ज्ञानं॑ जान॒दभि॑जानत् ।
 सं॒कल्प॑मानं प्र॒कल्प॑मान-मु॒पकल्प॑मान-मु॒पक्लृ॑प्तं क्लृ॒प्तं ।
 श्रेयो॑ वसी॒य आय॑त्संभू॒तं भू॒तं। चि॒त्रः के॒तुः प्र॒भाना॑भान्त् सं॒भान् ।
 ज्योति॑ष्मा॒-स्तेज॑स्वाना॒तप॑-स्तप॒न्नभि॑-तप॒न् ।
 रोच॑नो रोच॒मान-॑श्शो॒भन-॑श्शो॒भमानः॑ क॒ल्याणः॑ ।
 दर्॒शा दृ॒ष्टा दर्॒शता॑ वि॒श्वरू॑पा सु॒दर्श॑ना । आ॒प्याय॑माना
 प्या॒यमा॑ना प्या॒या सूनृ॑तेरा॒ । आ॒पूर्य॑माणा पू॒र्यमा॑णा पू॒रय॑न्ती पू॒र्णा
 पौ॒र्णमा॑सी । दा॒ता प्र॒दाताऽऽन॑न्दो मो॒दः प्र॒मोदः॑ ॥ 1

T.B.3.10.1.2

आवेशय-न्निवेशयन्-थ्सँवेशन् स्सञ्-शान्त इशान्तः ।
 आभवन् प्रभवन्-थ्संभवन्-थ्संभूतो भूतः ।
 प्रस्तुतं विष्टुतञ् सञ्स्तुतं कल्याणं विश्वरूपं ।
 शुक्रममृतं तेजस्वि तेज स्समिद्धं ।
 अरुणं भानुमन् मरीचिम-दभितपत् तपस्वत् ।
 सविता प्रसविता दीप्तो दीपयन् दीप्यमानः ।
 ज्वलं ज्वलिता तपन् वितपन्-थ्संतपन् ।
 रोचनो रोचमान इशुंभू इशुंभमानो वामः ।
 सुता सुन्वती प्रसुता सूयमाना ऽभिषूयमाणा ।
 पीती प्रपा संपा तृप्ति-स्तर्पयन्ती ॥ 2

T.B.3.10.1.3

कान्ता काम्या कामजाता ऽऽयुष्मती कामदुघा ॥
 अभिशस्ता ऽनुमन्ता-ऽऽनन्दो मोदः प्रमोदः ।

आ॒सा॒दयन्॑ नि॒षा॒दयन्॑-थ्स॒ꣳ सा॒दनः॑ स॒ꣳ स॒न्न स्स॒न्नः॑ ।
 आ॒भू वि॒भूः प्र॒भू इ॒शंभू॑ भु॒वः । प॒वि॒त्रं प॒वि॒यिष्यन्॑ पू॒तो मे॒ध्यः॑ ।
 य॒शो य॒शस्वा॑-ना॒युरमृ॑तः । जी॒वो जी॒विष्यन्॑ थ्स॒वर्गो॑ लो॒कः ।
 स॒हस्वान् थ्स॒हीया॑नो-ज॒स्वान् थ्स॒हमा॑नः । ज॒यन्त॑-भि॒जयन्॑-
 थ्सु॒द्रवि॑णो द्र॒विणो॑दाः । आ॒र्द्रप॒वित्रो॑ ह॒रि॒केशो॑ मो॒दः प्र॒मोदः॑॥ 3

T.B.3.10.1.4

अ॒रु॒णो ऽरु॒णर॑जाः पु॒ण्डरी॑को वि॒श्वजि॑द-भि॒जित् ।
 आ॒र्द्रः पि॒न्वमा॑नो ऽन्न॒वान्-र॒सवा॑-नि॒रावा॑न् । स॒र्वौष॑धः सं॒भरो॑
 म॒हस्वान् । ए॒ज॒त्का जी॑व॒त्काः । क्षु॒ल्ल॒का इ॒शि॒पिवि॑ष्ट॒काः ।
 स॒रि॒स्त्ररा॑ स्सु॒शोर॑वः । अ॒जि॒रासो॑ ग॒मि॒ष्णवः॑ ।
 इ॒दानीं॑ त॒दानी॑-मे॒तर्हि॑ क्षि॒प्रम॑जि॒रं । आ॒शु नि॑मेषः फ॒णो
 द्र॒वन्त॑ति-द्र॒वन् । त्वर॑ꣳ स्त्वर॑माण आ॒शुरा॑शी॒याणं॑ ज॒वः ।
 अ॒ग्नि॒ष्टोम॑ उ॒क्थ्यो॑ ऽति॒रात्रो॑ द्वि॒रात्र॑-स्त्रि॒रात्र॑-श्च॒तूरा॑त्रः ।

अ॒ग्निर् ऋ॒तु॑ स्सूर्य॑ ऋ॒तुश्चन्द्र॑मा॒ ऋ॒तुः ।

प्र॒जाप॑ति॒ स्सँव॑त्सरो॒ महा॑न्कः ॥ 4

T.B.3.10.2.1

भू॒रग्निं॑ च॒ पृथि॑वीं च॒ मां च॑ । त्री॒ऽश्च॑ लो॒कान् थ्सँव॑त्सरं च ।
 प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद्-ध्रु॑वा सीद ।
 भुवो॑ वा॒युं चान्तरि॑क्षं च॒ मां च॑ । त्री॒ऽश्च॑ लो॒कान् थ्सँव॑त्सरं च ।
 प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद् ध्रु॑वा सीद ।
 स्व॒रादि॑त्यं च॒ दिवं च॑ मां च । त्री॒ऽश्च॑ लो॒कान् थ्सँव॑त्सरं च ।
 प्र॒जाप॑तिस्त्वा सादयतु । तया॑ दे॒वतया॑ ऽङ्गि॒रस्वद् ध्रु॑वा सीद ।
 भूर्भु॑वस्स्व-श्चन्द्र॑मसं च॒ दिशश्च॑ मां च ।
 त्री॒ऽश्च॑ लो॒कान् थ्सँव॑त्सरं च । प्र॒जाप॑तिस्त्वा सादयतु ।
 तया॑ दे॒वतया॑ ऽङ्गि॒रस्वद् ध्रु॑वासीद ॥ 5

T.B.3.10.3.1

त्वमे॒व त्वां वै॑त्थ यो॒ऽसि सो॒ऽसि । त्वमे॒व त्वामे॑चैषीः ।
 चि॒तश्चा॑सि संचि॒त-श्चा॑स्यग्ने । ए॒तावा॑श्चा॒सि भू॒याश्चा॑स्यग्ने ।

यत्ते॑ अ॒ग्ने न्यूनं॑ ँ॒यदु॑ ते॒ऽतिरि॑क्तं ।
 आ॒दि॒त्या-स्तदं॑ङ्गिर॒स-श्चि॑न्वन्तु । वि॒श्वे ते॑ दे॒वाश्चि॑ति॒मा-पू॑रयन्तु ।
 चि॒तश्चा॑सि संचि॒त-श्चा॑स्यग्ने । ए॒तावा॑ञ्चा॒सि भू॒याञ्चा॑स्यग्ने ।
 मा ते॑ अ॒ग्ने च ये॑न मा॒ऽति च ये॑नायुरावृ॒क्षि ।
 स॒र्वे॒षां ज्यो॑ति॒षां ज्यो॑ति र्यददा॒वुदे॑ति । तप॑सो जा॒तम॑नि-भृ॒ष्टमो॑जः ।
 तत्ते॑ ज्योति॒रिष्ट॑के । ते॒न मे॑ तप । ते॒न मे॑ ज्वल । ते॒न मे॑ दीदि॒हि ।
 यव॑द्दे॒वाः । याव॑द॒साति॑ सूर्यः । याव॑दु॒तापि॑ ब्र॒ह्म ॥ 6

T.B.3.10.4.1

सँव॑त्सरो॒ऽसि परि॑वत्सरो॒ऽसि । इ॒दाव॑त्सरो॒ऽसी-दु॑वत्सरो॒ऽसि ।
 इ॒द्वत्स॑रो॒ऽसि व॑त्सरो॒ऽसि । तस्य॑ ते॒ वस॑न्तः शि॒रः ।
 ग्री॒ष्मो दक्षि॑णः पक्षः । वर्॒षाः पु॒च्छं॑ । शर॑दुत्तरः पक्षः ।
 हे॒मन्तो॑ मद्ध्यं॑ । पू॒र्वप॑क्षाश्चि॒तयः॑ । अ॒पर॑पक्षाः पु॒रीषं॑ ॥ 7

T.B.3.10.4.2

अ॒हो॒रा॒त्रा-॒णी॒ष्ट॒काः । ऋ॒ष॒भो॒ऽसि॒ स्वर्गो॑ लो॒कः ।
 यस्यां॑ दि॒शि म॒ही॒य॒से । ततो॑ नो॒ मह॑ आ॒व॒ह ।
 वा॒यु भू॒त्वा सर्वा॑ दि॒श आ॒वा॒हि । सर्वा॑ दि॒शोऽनु॑ वि॒वा॒हि ।
 सर्वा॑ दि॒शोऽनु॑ सँवा॒हि । चि॒त्या चि॒ति-मा॒पृ॒ण ।
 अचि॒त्या चि॒ति-मा॒पृ॒ण । चि॒द॒सि स॒मु॒द्रयो॑निः ॥ 8

T.B.3.10.4.3

इ॒न्दु र्दक्षः॑ इ॒येन॑ ऋ॒तावा॑ ॥ हि॒र॒ण्य॒पक्षः॑ श॒कुनो॑ भु॒र॒ण्युः ।
 म॒हान् थ्स॒ध॒स्थे ध्रु॒व आ॒नि॒षत्तः॑ । नम॑स्ते अस्तु॒ मा मा॑
 हि॒ऽसीः॑ । ए॒ति प्रे॒ति वी॒ति स॒मित्यु॑दि॒ति । दि॒वं मे॑ यच्छ ।
 अ॒न्त॒रि॒क्षं मे॑ यच्छ । पृ॒थि॒वीं मे॑ यच्छ । पृ॒थि॒वीं मे॑ यच्छ ।
 अ॒न्त॒रि॒क्षं मे॑ यच्छ । दि॒वं मे॑ यच्छ । अ॒ह्ना प्र॑सा॒रय॑ ।
 रा॒त्र्या स॑म॒च । रा॒त्र्या प्र॑सा॒रय॑ । अ॒ह्ना स॑म॒च ।
 का॒मं प्र॑सा॒रय॑ । का॒मं स॑म॒च ॥ 9

T.B.3.10.5.1

भूर्भुवस्स्वः । ओजो बलं । ब्रह्म क्षत्रं । यशो महत् ।
 सत्यं तपो नाम । रूप-ममृतं । चक्षुः श्रोत्रं । मन आयुः ।
 विश्वं यशो महः । समं तपो हरो भाः । जातवेदा यदि वा
 पावकोऽसि । वैश्वानरो यदि वा वैद्युतोऽसि । शं प्रजाभ्यो
 यजमानाय लोकं । ऊर्जं पुष्टिं दद-दभ्याववृथस्व ॥ 10

T.B.3.10.6.1

राज्ञी विराज्ञी । सम्राज्ञी स्वराज्ञी । अर्चिः शोचिः ।
 तपो हरो भाः । अग्नि-रिन्द्रो बृहस्पतिः ।
 विश्वे देवा भुवनस्य गोपाः । ते मा सर्वे यशसा सञ्सृजन्तु ॥ 11

T.B.3.10.7.1

असवे स्वाहा वसवे स्वाहा । विभुवे स्वाहा विवस्वते स्वाहा ।
 अभिभुवे स्वाहा-ऽधिपतये स्वाहा ।
 दिवां पतये स्वाहा ऽहस्पत्याय स्वाहा ।
 चाक्षुष्मत्याय स्वाहा ज्योतिष्मत्याय स्वाहा ।

रा॒ज्ञे स्वा॒हा वि॒रा॒ज्ञे स्वा॒हा । स॒म्रा॒ज्ञे स्वा॒हा स्व॒रा॒ज्ञे स्वा॒हा ।
 शू॒षाय॒ स्वा॒हा सू॒र्याय॒ स्वा॒हा । च॒न्द्रम॒से स्वा॒हा ज्यो॒तिषे॒ स्वा॒हा ।
 स॒र्प॒ाय स्वा॒हा क॒ल्याणाय॒ स्वा॒हा । अ॒र्जु॒नाय॒ स्वा॒हा ॥ 12

T.B.3.10.8.1

वि॒पश्चि॒ते प॒वमा॒नाय॒ गाय॑त । म॒ही न॒ धारा॑ ऽत्य॒न्धो अ॒र्षति॑ ।
 अ॒हिर् ह॒जीर्णामि॑ति॒ सर्प॑ति॒ त्वचं॑ । अ॒त्यो न॒ क्रीड॑न्न॒ सर॒द्वृषा॒ हरिः॑ ।
 उ॒पया॑म॒गृही॑तो ऽसि॒ मृ॒त्यवे॑ त्वा जु॒ष्टं गृ॑ह्णामि ।
 ए॒ष ते यो॑नि॒र्मृ॒त्यवे॑ त्वा । अ॒प॒ मृ॒त्यु-म॒पक्षु॑धं । अ॒पेतः॑ श॒पथं॑ ज॒हि ।
 अ॒था नो॑ अ॒ग्न आ॒वह॑ । रा॒यस्पोष॑ सह॒स्रिणं॑ ॥ 13

T.B.3.10.8.2

ये ते॑ स॒हस्र॑म॒युतं॑ पा॒शाः । मृ॒त्यो र्म॒र्त्याय॑ ह॒न्तवे॑ ।
 ता॒न् य॒ज्ञस्य॑ मा॒यया॑ । स॒र्वान॑व॒ यजा॑महे ।
 भ॒क्षो ऽस्य॑मृ॒त भ॒क्षः । तस्य॑ ते॒ मृ॒त्यु-पी॑त॒स्या-मृ॑त॒वतः॑ ।
 स्व॒गा-कृ॑त॒स्य म॑धु॒मतः॑ । उ॒पहू॑त॒स्यो-प॑हू॒तो भ॑क्षयामि ।

म॒न्द्रा ऽभि॑भूतिः के॒तु र्य॒ज्ञानां॑ वाक् । असा॒वेहि॑ ॥ 14

T.B.3.10.8.3

अ॒न्धो जा॑गृविः प्रा॒ण । असा॒वेहि॑ । ब॒धिर आ॑क्रन्दयित-र॒पान ।
असा॒वेहि॑ । अ॒हस्तो॑स्त्वा चक्षुः । असा॒वेहि॑ । अ॒पादा॑शो मनः ।
असा॒वेहि॑ । क॒वे वि॑प्रचि॒त्ते श्रो॑त्र । असा॒वेहि॑ ॥ 15

T.B.3.10.8.4

सु॒हस्तः॑ सु॒वासाः॑ । शू॒षो ना॑मा॒स्य-मृ॑तो म॒र्त्येषु॑ ।
त॒न्त्वाऽहं॑ त॒था वे॑द । असा॒वेहि॑ । अ॒ग्निर्मे॑ वा॒चि श्रि॑तः ।
वा॒ग्घृ॑दये । हृ॒दयं॑ म॒यि । अ॒हम॑मृ॒ते ॥
अ॒मृतं॑ ब्र॒ह्मणि॑ । वा॒युर्मे॑ प्रा॒णो श्रि॑तः ॥ 16

T.B.3.10.8.5

प्रा॒णो हृ॑दये । हृ॒दयं॑ म॒यि । अ॒हम॑मृ॒ते ॥ अ॒मृतं॑ ब्र॒ह्मणि॑ ।
सू॒र्यो मे॑ चक्षु॒षि श्रि॑तः । चक्षु॒र् हृ॑दये । हृ॒दयं॑ म॒यि । अ॒हम॑मृ॒ते ॥
अ॒मृतं॑ ब्र॒ह्मणि॑ । च॒न्द्रमा॑ मे॒ मन॑सि श्रि॑तः ॥ 17

T.B.3.10.8.6

मनो॑ हृदये॑ । हृदयं॑ मयि॑ । अ॒हममृ॑ते॑ ॥ अमृतं॑ ब्रह्म॑णि ।
 दि॒शो मे॑ श्रो॒त्रे श्रि॑ताः । श्रो॒त्रं हृदये॑ । हृदयं॑ मयि॑ । अ॒हममृ॑ते॑ ॥
 अमृतं॑ ब्रह्म॑णि । आपो॑ मे॒ रेत॑सि श्रि॒ताः ॥ 18

T.B.3.10.8.7

रेतो॑ हृदये॑ । हृदयं॑ मयि॑ । अ॒हममृ॑ते॑ ॥ अमृतं॑ ब्रह्म॑णि ।
 पृ॒थि॒वी मे॑ शरी॑रे श्रि॒ता । शरी॑रं हृदये॑ । हृदयं॑ मयि॑ । अ॒हममृ॑ते॑ ॥
 अमृतं॑ ब्रह्म॑णि । ओष॑धि वनस्प॑तयो मे॒ लोम॑सु श्रि॒ताः ॥ 19

T.B.3.10.8.8

लो॒मानि॑ हृदये॑ । हृदयं॑ मयि॑ । अ॒हममृ॑ते॑ ॥ अमृतं॑ ब्रह्म॑णि ।
 इन्द्रो॑ मे॒ बले॑ श्रि॒तः । बलं॑ हृदये॑ । हृदयं॑ मयि॑ । अ॒हममृ॑ते॑ ॥
 अमृतं॑ ब्रह्म॑णि । पर्ज॑न्यो मे॒ मूर्ध्नि॑ श्रि॒तः ॥ 20

T.B.3.10.8.9

मूर्धा॑ हृदये॑ । हृदयं॑ मयि॑ । अ॒हममृ॑ते॑ ॥ अमृतं॑ ब्रह्म॑णि ॥
 ई॒शानो॑ मे॒ मन्यौ॑ श्रि॒तः । मन्यु॑र हृदये॑ । हृदयं॑ मयि॑ । अ॒हममृ॑ते॑ ॥

अ॒मृतं॑ ब्र॒ह्मणि॑ । आ॒त्मा म॑ आ॒त्मनि॑ श्रि॒तः ॥ 21

T.B.3.10.8.10

आ॒त्मा हृ॒दये॑ । हृ॒दयं॑ म॒यि । अ॒हम॑मृ॒ते ॥ अ॒मृतं॑ ब्र॒ह्मणि॑ ।
पुन॑र्म आ॒त्मा पुन॑रायु॒रागात्॑ । पुनः॑ प्रा॒णः पुन॑राकू॒त-मा॑गात् ॥
वैश्वा॑नरो र॒श्मिभि॑ र्वावृ॒धानः॑ । अ॒न्तस्ति॑ष्ठ॒त्वमृ॑तस्य गो॒पाः ॥ 22

T.B.3.10.9.1

प्र॒जाप॑ति र्दे॒वान्-सृ॑जत । ते पा॒प्मना॑ संदि॒ता अ॑जायन्त ।
तान् व्य॑द्यत् । यद् व्य॑द्यत् । तस्मा॑द् वि॒द्युत् । तम॑वृश्चत् ।
यद॑वृश्चत् । तस्मा॑द् वृ॒ष्टिः । तस्मा॑द् यन्नै॒ते दे॒वते॑ अभि॒प्राप्नु॑तः ।
वि॒च है॒वास्य॑ तन्न पा॒प्मान॑न्द्यतः ॥ 23

T.B.3.10.9.2

वृ॒श्चत॑श्च । सै॒षा मी॒माꣳसा॑ग्नि॒होत्र॑ ए॒व संप॑न्ना ।
अथो॑ आहुः । सर्वे॑षु य॒ज्ञक्र॑तुष्वि॒ति ।
होष्य॑न्नप॒ उप॑स्पृ॒शेत् । वि॒द्युद॑सि वि॒द्यमे॑ पा॒प्मान॑मि॒ति ।

अथ॑ हु॒त्वो॒प-स्पृ॑शेत् । वृ॒ष्टि॑रसि॒ वृश्च॑ मे॒ पाप्मान॑मिति ।
 यक्ष्य॑माणो वे॒ष्ट्वा वा॑ । वि च॑ है॒वास्यै॒ते दे॒वते॑ पाप्मानं॒ द्यतः॑ ॥ 24

T.B.3.10.9.3

वृ॒श्चत॑श्च । अत्य॒॑ हो॒ हारु॑णिः ।
 ब्र॒ह्म॒चा॒रिणे॑ प्र॒श्नान् प्रो॑च्य प्र॒जिघा॑य । प॒रेहि॑ ।
 प्लक्षं॑ दै॒यां पा॒तिं पृ॑च्छ । वे॒त्थ सा॒वित्रां(३) न वे॒त्था(३) इति॑ ।
 तमा॑गत्य पप्रच्छ । आ॒चार्यो॑ मा प्रा॒हैषी॑त् ।
 वे॒त्थ सा॒वित्रां(३) न वे॒त्था(३) इति॑ । स॒होवा॑च वे॒देति॑ ॥ 25

T.B.3.10.9.4

स कस्मिन्॑ प्र॒तिष्ठि॑त इति॑ । प॒रो रज॑सीति॑ ।
 कस्त॑द्यत् प॒रोरजा॑ इति॑ । ए॒ष वाव॑ स प॒रोरजा॑ इति॑ हो॒वाच॑ ।
 य ए॒ष तप॑ति । ए॒षो ऽर्वा॑ग्रजा॑ इति॑ । स कस्मिन्॑ त्वे॒ष इति॑ ।
 स॒त्य इति॑ । किं॑ तथ्स॒त्यमि॑ति । तप॑ इति॑ ॥ 26

T.B.3.10.9.5

कस्मिन्नु॑ तप॑ इति॑ । ब॒ल इति॑ । किं॑ तद् ब॒लमि॑ति ।

प्रा॒ण इति॑ । मा॒स्म प्रा॒णम॑ति पृ॒च्छ इति॑ माऽऽचा॒र्यो॑ ऽब्रवी॒दिति॑
 हो॒वाच॑ ब्रह्म॒चा॒री । स॒हो॒वाच॑ प्लक्षो॒ दैयां॑ पातिः ।
 यद्वै ब्रह्म॒चा॒रिन् प्रा॒णम॑त्यप्रक्ष्यः । मूर्धा॑ ते व्यप॑तिष्यत् ।
 अ॒हमु॑त आ॒चार्या॑-च्छे॒यान् भ॑विष्यामि ।
 यो मा॑ सा॒वित्रे॑ स॒मवा॑दिष्टेति ॥ 27

T.B.3.10.9.6

तस्मा॑त् सा॒वित्रे॑ न सँव॑देत ।
 स यो॑ ह॒वै सा॒वित्रं॑ वि॒दुषा॑ सा॒वित्रे॑ सँव॑दते ।
 स॒हा॒स्मि-जि॒ह्वयं॑ दधाति ।
 अनु॑ ह॒वा अ॒स्मा असौ॑ तप॒ज्जि॒ह्वयं॑ मन्यते ।
 अ॒न्वस्मै॑ श्री॒स्तपो॑ मन्यते । अ॒न्वस्मै॑ तपो॒ बलं॑ मन्यते ।
 अ॒न्वस्मै॑ बलं॑ प्रा॒णं मन्य॑ते । स यदा॑ह ।
 सं॒ज्ञानं॑ वि॒ज्ञानं॑ द॒र्शा दृ॒ष्टेति॑ । ए॒ष ए॒व तत् ॥ 28

T.B.3.10.9.7

अथ॑ यदा॑ह । प्र॒स्तु॑तं वि॒ष्टु॑तꣳ सु॒ता सु॒न्वती॑ति । ए॒ष ए॒व तत् ।
 ए॒ष ह्ये॒व ता॑न्यहा॒नि । ए॒ष रा॑त्रयः । अथ॑ यदा॑ह ।
 चि॒त्रः के॒तु दा॑ता प्र॒दाता॑ स॒विता॑ प्र॒सवि॑ता ऽभि॒शास्ता॑ ऽनु॒मन्ते॑ति ।
 ए॒ष ए॒व तत् । ए॒ष ह्ये॒व ते॒ऽहो॑ मु॒हूर्ताः॑ । ए॒ष रा॑त्रेः ॥ 29

T.B.3.10.9.8

अथ॑ यदा॑ह । पवि॒त्रं प॑वयिष्यन्-थ्सह॑स्वान्-थ्सही॑यानरु॒णो
 ऽरु॒णर॑जा इति॑ । ए॒ष ए॒व तत् । ए॒ष ह्ये॒व ते॒ ऽर्ध॑मा॒साः ।
 ए॒ष मा॒साः । अथ॑ यदा॑ह ।
 अ॒ग्नि॒ष्टोम॑ उ॒क्थ्यो॑ ऽग्नि॒र्ऋ॒तुः प्र॒जाप॑तिः सँव॑त्सर इति॑ ।
 ए॒ष ए॒व तत् । ए॒ष ह्ये॒व ते॒ यज्ञ॑क्र॒तवः॑ । ए॒ष ऋ॒तवः॑ ॥ 30

T.B.3.10.9.9

ए॒ष सँव॑त्सरः । अथ॑ यदा॑ह । इ॒दानीं॑ तदानी॑मिति॑ ।
 ए॒ष ए॒व तत् । ए॒ष ह्ये॒व ते॒ मु॒हूर्तानां॑ मु॒हूर्ताः॑ ।
 ज॒नको॑ ह॒ वैदे॑हः । अ॒हो॒रा॒त्रैः स॒माज॑गाम । तꣳ हो॑चुः ।

यो वा अ॒स्मान् वे॒द । वि॒ज॒ह॒त्-पा॒प्मान॑मेति ॥ 31

T.B.3.10.9.10

सर्व॑-मायु॑रेति । अभि॑ स्वर्गं लो॒कं ज॑यति । नास्या॑-मुष्मिन् लो॒के
ऽन्नं॑ क्षीय॑त इति । वि॒ज॒ह॒द्ध वै पा॒प्मान॑मेति । सर्व॑मायु॑रेति ।
अभि॑ स्वर्गं लो॒कं ज॑यति । नास्या॑-मुष्मिन् लो॒के ऽन्नं॑ क्षीय॑ते ।
य ए॒वं वे॒द । अ॒हीना॑ हाश्च॑त्थ्यः । सा॒वि॒त्रं वि॒दां च॑कार ॥ 32

T.B.3.10.9.11

स ह॒ ह॒ सो॒ हिर॑ण्मयो भू॒त्वा । स्वर्गं॑ लो॒कमि॑याय ।
आ॒दि॒त्यस्य॑ सायु॑ज्यं । ह॒ सो॒ ह॒ वै हिर॑ण्मयो भू॒त्वा ।
स्वर्गं॑ लो॒कमे॑ति । आ॒दि॒त्यस्य॑ सायु॑ज्यं । य ए॒वं वे॒द ।
दे॒वभा॑गो ह॒ श्रौ॒तर्षः॑ । सा॒वि॒त्रं वि॒दां च॑कार ।
त॒ ह॒ वा॒गदृ॑श्यमा॒ना ऽभ्यु॑वाच ॥ 33

T.B.3.10.9.12

सर्व॑म्बत गौ॒तमो॑ वे॒द । यः सा॒वि॒त्रं वे॒देति॑ । स हो॑वाच ।

कै॒षा वा॒गसी॑ति । अ॒यम॒हं सा॒वि॒त्रः ।
 दे॒वाना॑-मु॒त्तमो॑ लो॒कः । गु॒ह्यं म॒हो बि॒भ्रदि॑ति ।
 ए॒ताव॑ति ह गौ॒तमः॑ । य॒ज्ञोप॑वी॒तं कृ॒त्वा-ऽधो॑ नि॒पपा॑त ।
 नमो॑ नम॒ इति॑ ॥ 34

T.B.3.10.9.13

स हो॑वाच । मा भै॑षी गौ॒तम । जि॒तो वै ते॑ लो॒क इति॑ ।
 तस्मा॑द्ये के च सा॒वि॒त्रं वि॒दुः । सर्वे॑ ते जि॒तलो॑काः ।
 स यो ह॒वै सा॒वि॒त्र-स्या॑ष्टाक्ष॒रं प॒दं श्रि॒या ऽभि॑षि॒क्तं वे॑द ।
 श्रि॒या है॒वाभि॑षि॒च्यते॑ । घृ॒णिरि॑ति द्वे अक्ष॑रे ।
 सूर्य॑ इति॒ त्रीणि॑ । आ॒दि॒त्य इति॒ त्रीणि॑ ॥ 35

T.B.3.10.9.14

ए॒तद्वै सा॒वि॒त्र-स्या॑ष्टाक्ष॒रं प॒दं श्रि॒याभि॑षि॒क्तं । य ए॒वं वे॑द ।
 श्रि॒या है॒वाभि॑षि॒च्यते॑ । तदे॒-तदृ॑चा-ऽभ्यु॑क्तं ।
 ऋ॒चो अक्ष॑रे पर॒मे व्यो॑मन् । यस्मिन् दे॒वा अधि॑ विश्वे निषे॒दुः ।
 यस्तन्न वे॒द कि॒मृ॒चा करि॑ष्यति ।

य इत् तद्विदुस्त इमे समासत इति ।

न हवा एतस्यर्चा न यजुषा न साम्ना-ऽर्थोऽस्ति ।

यः सावित्रं वेद ॥ 36

T.B.3.10.9.15

तदेतत् परि यद्देवचक्रं । आर्द्रं पिन्वमानः स्वर्गे लोक एति ।

विजहद् विश्वा भूतानि संपश्यत् । आर्द्रो ह वै पिन्वमानः स्वर्गे
लोक एति । विजहन् विश्वा भूतानि संपश्यन् ।

य एवं वेद । शूषो हवै वाष्प्यः । आदित्येन समाजगाम ।

तः होवाच । एहि सावित्रं विद्धि । अयं वै स्वर्ग्योऽग्निः

पारयिष्णु-रमृता-त्संभूत इति । एष वाव स सावित्रः ।

य एष तपति । एहि मां विद्धि । इति हैवैनं तदुवाच ॥ 37

T.B.3.10.10.1

इयं वाव सरघा । तस्या अग्निरेव सारघं मधु ।

या एताः पूर्व पक्षा-परपक्षयो रात्रयः । ता मधुकृतः ।

यान्य॑हानि । ते॑ मधु॑वृषाः ।

स यो॑ ह वा ए॒ता मधु॑कृतश्च मधु॑वृषा॒ञ्च वेद॑ ।

कुर्व॑न्नि हा॒स्यैता॑ अ॒ग्नौ मधु॑ । ना॒स्ये॒ष्टापूर्त॑न् ध॒यन्ति॑ ।

अथ॑ यो न वेद ॥ 38

T.B.3.10.10.2

न हा॒स्यैता॑ अ॒ग्नौ मधु॑ कुर्व॑न्ति । ध॒यन्त्य॑-स्ये॒ष्टापूर्त॑न् ।

यो ह वा अ॒होरा॒त्राणां॑-नाम॑धे॒यानि॑ वेद॑ ।

नाहो॑रात्रे॒ष्वार्ति॑-मा॒र्च्छति॑ । सं॒ज्ञानं॑ वि॒ज्ञानं॑ दर्॒शा दृ॒ष्टेति॑ ।

ए॒ता-व॒नुवा॒कौ पूर्॒वपक्ष॑स्या-हो॒रात्रा॒णां नाम॑धे॒यानि॑ ।

प्र॒स्तुतं॑ वि॒ष्टुत॑ सु॒ता सु॒न्वतीति॑ ।

ए॒ताव॒नु-वा॒काव॑-पर॒पक्ष॑स्या-हो॒रात्रा॒णां नाम॑धे॒यानि॑ ।

नाहो॑रात्रे॒ष्वार्ति॑-मा॒र्च्छति॑ । य ए॒वं वेद॑ ॥ 39

T.B.3.10.10.3

यो ह वै मु॒हूर्त॑नां॑ नाम॑धे॒यानि॑ वेद॑ । न मु॒हूर्ते॑ष्वार्ति॑-मा॒र्च्छति॑ ।

चि॒त्रः के॒तुर्दा॑ता प्र॒दाता॑ स॒विता॑ प्र॒सवि॑ता ऽभि॒शास्ता॑ ऽनु॒मन्तेति॑ ।

ए॒ते॒ऽनु॒वा॒का मु॒हूर्ता॑नां॑ नाम॒धेया॑नि ।
 न मु॒हूर्ते॑ष्वा॒र्ति-मा॒च्छति॑ । य ए॒वं वै॑ वे॒द ।
 यो ह॒ वा अ॒र्धमा॑सा-नाञ्च॑ मा॒सानाञ्च॑ नाम॒धेया॑नि वे॒द ।
 ना॒र्धमा॑सेषु न मा॒सेष्वा॒र्ति-मा॒च्छति॑ ।
 प॒वि॒त्रं प॒वि॒यिष्य॑न्-थ्सह॑स्वान्-थ्स॒ही॒यान॑रु॒णो ऽरु॑ण॒रजा॑ इति॑ ।
 ए॒ते॒ऽनु॒वा॒का अ॒र्धमा॑सानाञ्च॑ मा॒सानाञ्च॑ नाम॒धेया॑नि ॥ 40

T.B.3.10.10.4

ना॒र्धमा॑सेषु न मा॒सेष्वा॒र्ति-मा॒च्छति॑ । य ए॒वं वै॑ वे॒द ।
 यो ह॒ वै य॒ज्ञक्र॑तूनां॑ च॒र्तूनां॑ च सँव॑थ्स॒रस्य॑ च नाम॒धेया॑नि वे॒द ।
 न य॒ज्ञक्र॑तुषु न॒र्तुषु॑ न सँव॑थ्स॒र आ॒र्तिमा॒च्छति॑ ।
 अ॒ग्नि॒ष्टोम॑ उक्थ्यो-ऽग्नि॒र्ऋ॒तुः प्र॒जाप॑तिः सँव॑थ्स॒र इति॑ ।
 ए॒ते॒ऽनु॒वा॒का य॒ज्ञक्र॑तूनां॑ च॒र्तूनां॑ च सँव॑थ्स॒रस्य॑ च नाम॒धेया॑नि ।
 न य॒ज्ञक्र॑तुषु न॒र्तुषु॑ न सँव॑थ्स॒र आ॒र्तिमा॒च्छति॑ ।
 य ए॒वं वै॑ वे॒द । यो ह॒ वै मु॒हूर्ता॑नां॑ मु॒हूर्तान्॑ वे॒द ।

न मु॒हूर्तानां॑ मु॒हूर्ते॑ष्वार्ति॒ मा॒च्छति॑ ॥ 41

इ॒दानीं॑ तदानीमिति॑ । ए॒ते वै मु॒हूर्तानां॑ मु॒हूर्ताः॑ ।
 न मु॒हूर्तानां॑ मु॒हूर्ते॑ष्वार्ति॒ मा॒च्छति॑ । य ए॒वं वै॑द ।
 अथो॒ यथा॑ क्षे॒त्रज्ञो॑ भू॒त्वा ऽनु॑ प्रविश्यान्न॒ म॒त्ति ।
 ए॒वमे॒वैतान्॑ क्षे॒त्रज्ञो॑ भू॒त्वा ऽनु॑ प्रविश्यान्न॒ म॒त्ति ।
 स ए॒तेषामे॒व स॒लो॒कता॑ ५ सायु॒ज्य॒ म॒श्नुते॑ ।
 अ॒प पुन॑र्मृत्युं जयति । य ए॒वं वै॑द ॥ 42

T.B.3.10.11.1

कश्चि॑द्ध॒वा अ॒स्मा-ल्लो॒कात् प्रे॒त्य । आ॒त्मानं॑ वै॒द ।
 आ॒य-म॒ह-म॒स्मीति॑ । कश्चि॑त्स्व॒ं लो॒कं न॒ प्रति॑ प्र॒जाना॑ति ।
 अ॒ग्निमु॒ग्धो है॒व धु॒म॒तान्तः॑ । स्व॒ं लो॒कं न॒ प्रति॑ प्र॒जाना॑ति ।
 अथ॒ यो है॒वैत॒-म॒ग्निं॑ सा॒वि॒त्रं वै॒द ।
 स ए॒वास्मा॑ ल्लो॒कात् प्रे॒त्य । आ॒त्मानं॑ वै॒द ।
 अ॒य-म॒ह-म॒स्मीति॑ ॥ 43

T.B.3.10.11.2

स॒ स्वं लो॒कं प्र॒ति प्र॒जा॒ना॒ति । ए॒ष उ॒ वे॒वैनं॑ त॒त्सा॒वि॒त्रः ।
 स्व॒र्गं लो॒क-म॒भि व॒हति॑ । अ॒हो॒रा॒त्रै र्वा इ॒दं स॒यु॒ग्भिः॑ क्रि॒यते॑ ।
 इति॑ रा॒त्राया॑ ऽदी॒क्षि॒षत॑ । इति॑ रा॒त्राय॑ व्र॒त-मु॒पा॒गु॒रिति॑ ।
 ता॒नि हा॒ने॒वं वि॒दुषः॑ । अ॒मु॒ष्मिन् लो॒के शे॒वधिं॑ ध॒यन्ति॑ ।
 धी॒तं है॒व स शे॒वधि-म॒नु परै॑ति ।
 अथ॑ यो है॒वैत॒मग्निं॑ सा॒वि॒त्रं वे॒द ॥ 44

T.B.3.10.11.3

तस्य॑ है॒वा-हो॒रा॒त्राणि॑ । अ॒मु॒ष्मिन् लो॒के शे॒वधिं॑ न ध॒यन्ति॑ ।
 अधी॑तं है॒व स शे॒वधि-म॒नु परै॑ति ।
 भ॒र॒द्वा॒जो ह॒ त्रि॒भि॒रा॒यु॒र्भि ब्र॒ह्म॒च॒र्य॒मु॒वा॒स ।
 तं ह॒ जी॒र्णिं स्थ॒वि॒रं श॒यानं॑ ।
 इन्द्र॑ उप॒व्र॒ज्यो वा॒च । भ॒र॒द्वा॒ज । यत्ते॑ च॒तु॒र्थ॒मा॒यु र्द॒द्यां ।
 कि॒मे॒ने॒न कुर्या॑ इति॑ । ब्र॒ह्म॒च॒र्य॒मे॒वैने॑न च॒रे॒य॒मिति॑ हो॒वाच॑ ॥ 45

T.B.3.10.11.4

त॒ ह॒ त्रीन्॑ गि॒रि-रू॒पा॒न वि॒ज्ञा॒ता॒नि॒व द॒र्श॒यां च॑का॒र ।
 तेषा॑ ह॒ कै॒कस्मा॑न् मु॒ष्टि॒नाऽऽद॑दे । स हो॒वाच॑ ।
 भ॒रद्वा॒जे॒त्या म॒न्त्र्य॑ । वे॒दा वा ए॒ते । अ॒नन्ता॑ वै वे॒दाः ॥
 ए॒तद्वा ए॒तै स्त्रि॒भि-रा॒यु॒र्भि-र॒न्ववो॑च॒थाः ।
 अथ॑ त॒ इ॒तर-द॒न॒नू॒क्तमे॒व । ए॒ही॒मं वि॑बु॒द्धि॒ ।
 अ॒यं वै स॒र्व वि॒द्येति॑ ॥ 46

T.B.3.10.11.5

तस्मै॑ है॒तम॒ग्निं सा॒वि॒त्रमु॑वाच । त॒ स वि॑दि॒त्वा ।
 अ॒मृ॒तो भू॒त्वा । स्व॒र्गं लो॒कमि॑याय । आ॒दि॒त्यस्य॑ सा॒यु॒ज्यं ।
 अ॒मृ॒तो है॒व भू॒त्वा । स्व॒र्गं लो॒कमे॑ति । आ॒दि॒त्यस्य॑ सा॒यु॒ज्यं ।
 य ए॒वं वे॑द । ए॒षो ए॒व त्रयी॑ वि॒द्या ॥ 47

T.B.3.10.11.6

याव॑न्त॒ ह वै त्र॒य्या वि॒द्यया॑ लो॒कं ज॑यति । ताव॑न्तं लो॒कं ज॑यति ।
 य ए॒वं वे॑द । अ॒ग्ने र्वा ए॒तानि॑ ना॒मधे॑यानि ।

अ॒ग्ने॒रे॒व सा॒यु॒ज्यꣳ स॒लो॒क॒ता-मा॒प्नो॒ति ।
 य ए॒वं वै॒द । वा॒यो र्वा ए॒ता॒नि ना॒म॒धे॒या॒नि ।
 वा॒यो॒रे॒व सा॒यु॒ज्यꣳ स॒लो॒क॒ता-मा॒प्नो॒ति ।
 य ए॒वं वै॒द । इ॒न्द्र॒स्य वा ए॒ता॒नि ना॒म॒धे॒या॒नि ॥ 48

T.B.3.10.11.7

इ॒न्द्र॒स्यै॒व सा॒यु॒ज्यꣳ स॒लो॒क॒ता-मा॒प्नो॒ति । य ए॒वं वै॒द ।
 बृ॒ह॒स्प॒ते र्वा ए॒ता॒नि ना॒म॒धे॒या॒नि ।
 बृ॒ह॒स्प॒ते॒रे॒व सा॒यु॒ज्यꣳ स॒लो॒क॒ता-मा॒प्नो॒ति ।
 य ए॒वं वै॒द । प्र॒जा॒प॒ते र्वा ए॒ता॒नि ना॒म॒धे॒या॒नि ।
 प्र॒जा॒प॒ते॒रे॒व सा॒यु॒ज्यꣳ स॒लो॒क॒ता-मा॒प्नो॒ति । य ए॒वं वै॒द ।
 ब्र॒ह्म॒णो वा ए॒ता॒नि ना॒म॒धे॒या॒नि ।
 ब्र॒ह्म॒ण ए॒व सा॒यु॒ज्यꣳ स॒लो॒क॒ता-मा॒प्नो॒ति ।
 य ए॒वं वै॒द । स वा ए॒षो ऽग्नि॑-र॒प॒क्ष॒पु॒च्छो वा॒यु॒रे॒व ।
 तस्या॒ग्नि॑ र्मु॒खं ॥ अ॒सा॒वा॒दि॒त्यः शि॒रः । स य॒दे॒ते दे॒वते॑ अ॒न्त॒रे॒ण ।

तथ्सर्व॑ सीव्यति । तस्मा॑त् सावि॒त्रः ॥ 49

हरिः॑ ओं

॥ इति तैत्तरीय यजुर्ब्राह्मणे काठके प्रथमः प्रश्नः समाप्तः ॥

3.2 तैत्तरीय यजुर्ब्राह्मणे काठके द्वितीयः प्रश्नः

हरिः ओं

T.B.3.11.1.1

लो॒को॒ऽसि॑ स्वर्गो॑ऽसि॑ । अनन्तो॑ऽस्य॑ पा॒रो॒ऽसि॑ ।
 अक्षि॑तो॒ऽस्य॑ क्ष॒य्यो॑ऽसि॑ । तप॑सः प्र॒तिष्ठा॑ ।
 त्वयी॑दमन्तः । वि॒श्वं य॑क्षं वि॒श्वं भू॑तं वि॒श्वं सु॒भूतं॑ ।
 वि॒श्वस्य॑ भ॒र्ता वि॒श्वस्य॑ ज॒नयि॑ता ।
 तन्त्वो॑-प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गि॒रस्वद्-ध्रु॒वासी॑द ॥ 50

T.B.3.11.1.2

तपो॑ऽसि॒ लोके॑ श्रि॒तं । तेज॑सः प्र॒तिष्ठा॑ ।
 त्वयी॑द-मन्तः । वि॒श्वं य॑क्षं वि॒श्वं भू॑तं वि॒श्वं सु॒भूतं॑ ।
 वि॒श्वस्य॑ भ॒र्तु वि॒श्वस्य॑ ज॒नयि॑तु ।
 तत् त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।

तया॑ दे॒वतया॑-ऽङ्गिर॒स्वद्-ध्रु॒वासी॑द ॥ 51

T.B.3.11.1.3

तेजो॑ऽसि॒ तप॑सि श्रि॒तं । स॒मुद्र॑स्य॒ प्रति॑ष्ठा ।
 त्वयी॑दमन्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
 वि॒श्वस्य॑ भ॒र्तृ वि॒श्वस्य॑ ज॒नयि॑तृ । तत् त्वो॑प॒दधे॑ का॒मदु॒घ-म॑क्षि॒तं ।
 प्र॒जाप॑तिस्त्वा सा॒दय॑तु । तया॑ दे॒वतया॑-ऽङ्गिर॒स्वद्-ध्रु॒वासी॑द ॥ 52

T.B.3.11.1.4

स॒मुद्रो॑ऽसि॒ तेज॑सि श्रि॒तः । अ॒पां प्र॑तिष्ठा । त्वयी॑दमन्तः ।
 वि॒श्वं य॑क्षं वि॒श्वं भू॑तं वि॒श्वं सु॑भूतं ।
 वि॒श्वस्य॑ भ॒र्ता वि॒श्वस्य॑ ज॒नयि॑ता ।
 तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गिर॒स्वद् ध्रु॒वासी॑द ॥ 53

T.B.3.11.1.5

आप॑स्स्थ-स्स॒मुद्रे॑ श्रि॒ताः । पृ॒थिव्याः॑ प्र॒तिष्ठा॑ युष्मा॑सु ।
 इ॒दमन्तः॑ । वि॒श्वं य॑क्षं वि॒श्वं भू॑तं वि॒श्वं सु॑भूतं ।

वि॒श्वस्य॑ भ॒र्त्र्यो॑ वि॒श्वस्य॑ ज॒नयि॑त्र्यः ।
 ता व॑ उ॒प॒द॒धे॑ का॒म॒दु॒घा॒ अ॒क्षि॒ताः । प्र॒जा॒प॒ति॒स्त्वा सा॑दयतु ।
 तया॑ दे॒व॒तया॑-ऽङ्गि॒र॒स्वद् ध्रु॒वासी॑द ॥ 54

T.B.3.11.1.6

पृ॒थि॒व्य-स्य॑प्सु श्रि॒ता । अ॒ग्नेः॑ प्र॒ति॒ष्ठा । त्वयी॑द॒म॒न्तः ।
 वि॒श्वं य॑क्षं वि॒श्वं भू॑तं वि॒श्वं सु॒भू॒तं ।
 वि॒श्वस्य॑ भ॒र्त्री वि॒श्वस्य॑ ज॒नयि॑त्री । तां त्वो॑प॒द॒धे॑ का॒म॒दु॒घा-म॑क्षि॒तां ।
 प्र॒जा॒प॒ति॒स्त्वा सा॑दयतु । तया॑ दे॒व॒तया॑-ऽङ्गि॒र॒स्वद् ध्रु॒वासी॑द ॥ 55

T.B.3.11.1.7

अ॒ग्नि॒र॒सि पृ॒थि॒व्या॑ श्रि॒तः । अ॒न्त॒रि॒क्षस्य॑ प्र॒ति॒ष्ठा ।
 त्वयी॑द॒म॒न्तः । वि॒श्वं य॑क्षं वि॒श्वं भू॑तं वि॒श्वं सु॒भू॒तं ।
 वि॒श्वस्य॑ भ॒र्ता वि॒श्वस्य॑ ज॒नयि॑ता ।
 तं त्वो॑प॒द॒धे॑ का॒म॒दु॒घ-म॑क्षि॒तं । प्र॒जा॒प॒ति॒स्त्वा सा॑दयतु ।
 तया॑ दे॒व॒तया॑-ऽङ्गि॒र॒स्वद् ध्रु॒वासी॑द ॥ 56

T.B.3.11.1.8

अ॒न्तरि॑क्ष-मस्य॒ग्नौ श्रि॑तं । वा॒योः प्र॑तिष्ठा । त्वयी॒दम॑न्तः ।
वि॒श्वं य॑क्षं वि॒श्वं भू॑तं वि॒श्वं सु॒भूतं॑ ।
वि॒श्वस्य॑ भ॒र्तु वि॒श्वस्य॑ ज॒नयि॑तृ ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 57

T.B.3.11.1.9

वा॒युर-स्य॒न्तरि॑क्षे श्रि॑तः । दि॒वः प्र॑तिष्ठा ।
त्वयी॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॒भूतं॑ ।
वि॒श्वस्य॑ भ॒र्ता वि॒श्वस्य॑ ज॒नयि॑ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 58

T.B.3.11.1.10

द्यौर॑सि वा॒यौ श्रि॒ता । आ॒दि॒त्यस्य॑ प्र॒तिष्ठा ।
 त्वयी॑दमन्तः । वि॒श्वं य॑क्षं वि॒श्वं भू॒तं वि॒श्वं सु॒भूतं ।
 वि॒श्वस्य॑ भ॒र्त्रि वि॒श्वस्य॑ ज॒नयि॑त्री ।
 तां त्वो॑प॒दधे॑ का॒मदु॒घ-म॑क्षि॒तां । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 59

T.B.3.11.1.11

आ॒दि॒त्योऽसि॑ दि॒वि श्रि॒तः । च॒न्द्रम॑सः प्र॒तिष्ठा ।
 त्वयी॑दमन्तः । वि॒श्वं य॑क्षं वि॒श्वं भू॒तं वि॒श्वं सु॒भूतं ।
 वि॒श्वस्य॑ भ॒र्ता वि॒श्वस्य॑ ज॒नयि॑ता ।
 तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 60

T.B.3.11.1.12

च॒न्द्रमा॑ अ॒स्यादि॒त्ये श्रि॒तः । नक्ष॑त्राणां प्र॒तिष्ठा ।
 त्वयी॑दमन्तः । वि॒श्वं य॑क्षं वि॒श्वं भू॒तं वि॒श्वं सु॒भूतं ।

वि॒श्वस्य॑ भ॒र्ता वि॒श्वस्य॑ ज॒नयि॑ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 61

T.B.3.11.1.13

नक्ष॑त्राणि॒स्थ च॑न्द्र॒मसि॑ श्रि॒तानि॑ । सँव॑त्स॒रस्य॑ प्र॒तिष्ठा॑ यु॒ष्मासु॑ ।
इ॒दम॑न्तः । वि॒श्वं य॑क्षं वि॒श्वं भू॑तं वि॒श्वञ् सु॑भू॒तं ।
वि॒श्वस्य॑ भ॒र्तृणि॑ वि॒श्वस्य॑ ज॒नयि॑तृ॒णि ।
तानि॑ व उ॒पद॑धे का॒मदु॒घा-न्य॑क्षि॒तानि॑ । प्र॒जाप॑तिस्त्वा सा॒दय॑तु ।
तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 62

T.B.3.11.1.14

सँव॑त्स॒रस्यो॑ऽसि॒ नक्ष॑त्रेषु श्रि॒तः । ऋ॒तूनां॑ प्र॒तिष्ठा॑ । त्वयी॑द॒मन्तः॑ ।
वि॒श्वं य॑क्षं वि॒श्वं भू॑तं वि॒श्वञ् सु॑भू॒तं ।
वि॒श्वस्य॑ भ॒र्ता वि॒श्वस्य॑ ज॒नयि॑ता ।
तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।

तया॑ दे॒वतया॑-ऽङ्गिर॒स्वद् ध्रु॒वासी॑द ॥ 63

T.B.3.11.1.15

ऋ॒तव॑स्स्थ सँव॒त्सरे॑ श्रि॒ताः । मा॒सानां॑ प्र॒तिष्ठा॑ यु॒ष्मासु॑ ।
 इ॒दम॑न्तः । वि॒श्वं यँक्षं॑ वि॒श्वं भू॒तं वि॒श्वं सु॒भूतं॑ ।
 वि॒श्वस्य॑ भ॒र्तारो॑ वि॒श्वस्य॑ ज॒नयि॑तारः ।
 तान् व॒ उप॑दधे॒ काम॒दुघा॑-नक्षि॒तान् । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गिर॒स्वद् ध्रु॒वासी॑द ॥ 64

T.B.3.11.1.16

मा॒सास्स्थ॑र्तुषु श्रि॒ताः । अ॒र्ध मा॒सानां॑ प्र॒तिष्ठा॑ यु॒ष्मासु॑ ।
 इ॒दम॑न्तः । वि॒श्वं यँक्षं॑ वि॒श्वं भू॒तं वि॒श्वं सु॒भूतं॑ ।
 वि॒श्वस्य॑ भ॒र्तारो॑ वि॒श्वस्य॑ ज॒नयि॑तारः ।
 तान् व॒ उप॑दधे॒ काम॒दुघा॑-नक्षि॒तान् । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गिर॒स्वद् ध्रु॒वासी॑द ॥ 65

T.B.3.11.1.17

अ॒र्ध॒मा॒सा-स्स्थ॑ मा॒सु श्रि॒ताः । अ॒हो॒रा॒त्रयोः॑ प्र॒तिष्ठा॑ यु॒ष्मासु॑ ।
 इ॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भू॒तं ।
 वि॒श्वस्य॑ भ॒र्तारो॑ वि॒श्वस्य॑ ज॒नयि॑तारः ।
 तान् व॒ उप॑दधे का॒मदु॒घा-न॑क्षि॒तान् । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 66

T.B.3.11.1.18

अ॒हो॒रा॒त्रेस्थो॑ ऽर्ध॒मासे॑षु श्रि॒ते ।
 भू॒तस्य॑ प्र॒तिष्ठे॑ भ॒व्यस्य॑ प्र॒तिष्ठे॑ । यु॒वयो-रि॑दम॒न्तः ।
 वि॒श्वं य॑क्षं वि॒श्वं भू॑तं वि॒श्वं सु॑भू॒तं ।
 वि॒श्वस्य॑ भ॒र्त्र्यो वि॒श्वस्य॑ ज॒नयि॑त्र्यौ ।
 ते वा॒मुप॑दधे का॒मदु॒घे-अ॑क्षि॒ते । प्र॒जाप॑तिस्त्वा सा॒दय॑तु ।
 तया॑ दे॒वतया॑-ऽङ्गि॒रस्व॑द् ध्रु॒वासी॑द ॥ 67

T.B.3.11.1.19

पौ॒र्ण॒मा-स्य॑ष्ट॒का ऽमा॑वास्या॒ ॥ अ॒न्ना॒दाः स्था॑न्नदु॒घो यु॑ष्मासु ।
 इ॒दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
 वि॒श्वस्य॑ भ॒र्त्र्यो वि॒श्वस्य॑ ज॒नयि॑त्र्यः ।

ता व॒ उप॑दधे॒ काम॑दु॒घा-अ॑क्षिताः । प्र॒जाप॑तिस्त्वा सादयतु ।
 तया॑ दे॒वत॑या-ऽङ्गि॒रस्व॑द् ध्रु॒वासी॑द ॥ 68

T.B.3.11.1.20

रा॒डसि॑ बृ॒हती॑ श्री॒रसी॑न्द्र-प॒त्नी ध॑र्मप॒त्नी । वि॒श्वं भू॑तम॒नु प्र॑भूता ।
 त्वयी॑दम॑न्तः । वि॒श्वं य॑क्षं वि॒श्वं भू॑तं वि॒श्वं सु॑भूतं ।
 वि॒श्वस्य॑ भ॒र्त्री वि॒श्वस्य॑ ज॒नयि॑त्री ।

तां त्वो॑पदधे॒ काम॑दु॒घा-म॑क्षितां । प्र॒जाप॑तिस्त्वा सादयतु ।
 तया॑ दे॒वत॑या-ऽङ्गि॒रस्व॑द् ध्रु॒वासी॑द ॥ 69

T.B.3.11.1.21

ओ॒जो॑ऽसि स॒हो॑ऽसि । ब॒लम॑सि भ्रा॒जो॑ऽसि ।
 दे॒वानां॑ धा॒ मामृ॑तं ॥ अ॒मर्त्य॑-स्तपो॒जाः । त्वयी॑दम॑न्तः ।

वि॒श्वं॑ य॒क्षं॑ वि॒श्वं॑ भू॒तं॑ वि॒श्व॑ सु॒भू॒तं॑ ।
 वि॒श्वस्य॑ भ॒र्ता वि॒श्वस्य॑ ज॒नयि॑ता ।
 तं त्वो॑प॒दधे॑ का॒मदु॒घ-म॑क्षि॒तं । प्र॒जाप॑तिस्त्वा सा॒दय॑तु ।
 तया॑ दे॒वत॑या-ऽङ्गि॒रस्व॑द् ध्रु॒वासी॑द ॥ 70

T.B.3.11.2.1

त्वम॑ग्ने रु॒द्रो अ॑सु॒रो म॒हो दि॒वः । त्व॑ श॒र्द्धो॑ मा॒रुतं॑ पृ॒क्ष ई॑शि॒षे ।
 त्वं वा॑तैर॒रुणै॑ र्या॒सि शं॑गयः । त्वं पू॒षा वि॑ध॒तः पा॑सि नु॒त्मनाः॑ ।
 दे॒वा दे॒वेषु॑ श्रय॑द्ध्वं । प्र॒थमा॑ द्वि॒तीये॑षु श्रय॑द्ध्वं ।
 द्वि॒तीया-स्तृ॑तीये॑षु श्रय॑द्ध्वं । तृ॒तीया-श्च॑तु॒र्थेषु॑ श्रय॑द्ध्वं ।
 च॒तुर्थाः॑ पञ्च॒मेषु॑ श्रय॑द्ध्वं । पञ्च॒माः ष॑ष्ठेषु॑ श्रय॑द्ध्वं ॥ 71

T.B.3.11.2.2

ष॒ष्ठाः स॑प्त॒मेषु॑ श्रय॑द्ध्वं । स॒प्तमा॑ अ॒ष्टमेषु॑ श्रय॑द्ध्वं ।
 अ॒ष्टमा॑ न॒वमेषु॑ श्रय॑द्ध्वं । न॒वमा॑ द॒शमेषु॑ श्रय॑द्ध्वं ।
 द॒शमा॑ ए॒काद॑शेषु॑ श्रय॑द्ध्वं । ए॒कद॑शा द्वा॒दशेषु॑ श्रय॑द्ध्वं ।
 द्वा॒दशा-स्त्र॑यो॒दशेषु॑ श्रय॑द्ध्वं । त्रयो॒दशा-श्च॑तु॒र्दशेषु॑ श्रय॑द्ध्वं ।

च॒तु॒र्द॒शाः॑ प॒ञ्च॒द॒शेषु॑ श्रय॒द्ध्वं॑ ।

प॒ञ्च॒द॒शाः॑ षोड॒शेषु॑ श्रय॒द्ध्वं॑ ॥ 72

T.B.3.11.2.3

षोड॒शाः॑ स॒प्त॒द॒शेषु॑ श्रय॒द्ध्वं॑ । स॒प्त॒द॒शा अ॒ष्टा॒द॒शेषु॑ श्रय॒द्ध्वं॑ ।

अ॒ष्टा॒द॒शा ए॒कान्न॑-वि॒ंशेषु॑ श्रय॒द्ध्वं॑ ।

ए॒कान्न॑-वि॒ंशा वि॒ंशेषु॑ श्रय॒द्ध्वं॑ ।

वि॒ंशा ए॒कवि॒ंशेषु॑ श्रय॒द्ध्वं॑ ।

ए॒कवि॒ंशा द्वावि॒ंशेषु॑ श्रय॒द्ध्वं॑ ।

द्वावि॒ंशा-स्त्रयो॑-वि॒ंशेषु॑ श्रय॒द्ध्वं॑ ।

त्रयो॑वि॒ंशा-श्चतु॑ वि॒ंशेषु॑ श्रय॒द्ध्वं॑ ।

चतु॑र्वि॒ंशाः प॒ञ्चवि॒ंशेषु॑ श्रय॒द्ध्वं॑ ।

प॒ञ्चवि॒ंशाः॑ षड्-वि॒ंशेषु॑ श्रय॒द्ध्वं॑ ॥ 73

T.B.3.11.2.4

षड्विं॒शा-स्सप्त॑ वि॒ंशेषु॑ श्रय॑द्ध्वं ।
 सप्तवि॒ंशा अष्टावि॒ंशेषु॑ श्रय॑द्ध्वं ।
 अष्टावि॒ंशा एकान्न॑त्रि॒ंशेषु॑ श्रय॑द्ध्वं ।
 एकान्न॑त्रि॒ंशा-स्त्रि॒ंशेषु॑ श्रय॑द्ध्वं ।
 त्रि॒ंशा एक॑त्रि॒ंशेषु॑ श्रय॑द्ध्वं ।
 एक॑त्रि॒ंशा द्वात्रि॒ंशेषु॑ श्रय॑द्ध्वं ।
 द्वात्रि॒ंशा-स्त्रय॑स्त्रि॒ंशेषु॑ श्रय॑द्ध्वं ।
 दे॒वास्त्रि॑रे-काद॑शा-स्त्रि॑स्त्रय॑-स्त्रि॒ंशाः ।
 उत्त॑रे भव॑त । उत्त॑र वर्त॑मान उत्त॑र स॒त्वानः॑ ।
 यत्काम॑ इदं जुहो॑मि । तन्मे॑ समृ॑द्ध्यतां ।
 वय॑स्याम॑ पत॑यो रयी॑णां । भूर्भुव॑स्वस्स्वाहा॑ ॥ 74

T.B.3.11.3.1

अ॒ग्नावि॑ष्णू स॒जोष॑सा । इ॒मा वर्द्ध॑न्तु वाङ्गि॑रः ।
 द्यु॒म्नै र्वा॑जेभि॒-रा॑गतं । रा॒ज्ञी वि॒राज्ञी॑ ॥ स॒म्राज्ञी॑ स्व॒राज्ञी॑ ॥

अ॒र्चिः शो॒चिः । तपो॑ ह॒रो भाः । अ॒ग्निः सोमो॑ बृ॒हस्पतिः॑ ।
 वि॒श्वे दे॒वा भु॒वनस्य॑ गो॒पाः । ते सर्वे॑ स॒ङ्गत्य॑ ।
 इ॒दं मे॑ प्रा॒वता॑ वचः । वय॑ꣳ स्या॒म पत॑यो र॒यीणां॑ ।
 भूर्-भु॒वस्-स्वस् स्वाहा॑ ॥ 75

T.B.3.11.4.1

अ॒न्नप॑ते ऽन्नस्य॑ नो दे॒हि । अ॒नमी॒वस्य॑ शु॒ष्मिणः॑ ।
 प्र॒प्रदा॑ता-र॒न्तारि॑षः । ऊ॒र्जं नो॑ धे॒हि द्वि॒पदे॑ चतु॒ष्पदे॑ ।
 अ॒ग्ने पृ॑थि॒वी प॑ते । सोम॑ वी॒रुधां॑ प॑ते । त्वष्टः॑ स॒मिधां॑ प॑ते ।
 वि॒ष्ण-वा॑शा॒नां प॑ते । मि॒त्र स॒त्यानां॑ प॑ते । वरु॑ण ध॒र्मणां॑ प॑ते ॥ 76

T.B.3.11.4.2

म॒रुतो॑ ग॒णानां॑ पत॑यः । रु॒द्र प॑शू॒नां प॑ते । इ॒न्द्रौज॑सां प॑ते ।
 बृ॒हस्प॑ते ब्र॒ह्मण॑स्प॒ते । आ॒रुचा॑रो॒चे ऽह॑ꣳ स्व॒यं ।
 रु॒चा रु॒रुचे॑-रो॒चमा॑नः । अ॒तीत्या॑दः स्वर॑भ॒रेह॑ ।
 तस्मि॑न्. यो॒नौ प्र॒जनौ॑ प्र॒जाये॑य । वय॑ꣳ स्या॒म पत॑यो र॒यीणां॑ ।

भूर्भुवस्स्वस्स्वाहा ॥ 77

T.B.3.11.5.1

सप्त ते॑ अ॒ग्ने॑ स॒मिधः॑ स॒प्त जि॒ह्वाः ।
 स॒प्तर्ष॑यः स॒प्तधा॑म प्रि॒याणि॑ । स॒प्त हो॑त्रा अनुवि॒द्वान् ।
 स॒प्त यो॒नी-रा॑पृ॒णस्वा॑ घृ॒तेन॑ । प्रा॒ची दिक् । अ॒ग्नि दे॒वता॑ ॥
 अ॒ग्निꣳ स दि॒शां दे॒वं दे॒वता॑ना-मृ॒च्छतु॑ । यो मै॒तस्यै॑
 दि॒शो ऽभि॒दास॑ति । दक्षि॒णा दिक् । इन्द्रो॑ दे॒वता॑ ॥ 78

T.B.3.11.5.2

इन्द्रꣳ स दि॒शां दे॒वं दे॒वता॑ना-मृ॒च्छतु॑ ।
 यो मै॒तस्यै॑ दि॒शो ऽभि॒दास॑ति । प्र॒तीची॑ दिक् । सोमो॑ दे॒वता॑ ।
 सोमꣳ स दि॒शां दे॒वं दे॒वता॑ना-मृ॒च्छतु॑ । यो मै॒तस्यै॑ दि॒शो
 ऽभि॒दास॑ति । उ॒दीची॑ दिक् । मि॒त्रा-व॑रु॒णौ दे॒वता॑ ।
 मि॒त्रा-व॑रु॒णौ स दि॒शां दे॒वौ दे॒वता॑ना-मृ॒च्छतु॑ ।
 यो मै॒तस्यै॑ दि॒शो ऽभि॒दास॑ति ॥ 79

T.B.3.11.5.3

ऊ॒र्ध्वा दिक् । बृ॒हस्प॑ति॒ दे॒वता॑ ॥ बृ॒हस्प॑ति॒ ऽ स दि॒शां दे॒वं
 दे॒वता॑ना-मृ॒च्छतु॑ । यो मै॒तस्यै॑ दि॒शो ऽभि॑दासति ।
 इ॒यन्दिक् । अ॒दि॒ति दे॒वता॑ ॥ अ॒दि॒ति॒ ऽ स दि॒शां दे॒वीं दे॒वता॑ना-
 मृ॒च्छतु॑ । यो मै॒तस्यै॑ दि॒शो ऽभि॑दासति ।
 पु॒रुषो॑ दिक् । पु॒रुषो॑ मे॒ कामा॑न् त्सम॒र्द्धय॑तु ॥ 80

T.B.3.11.5.4

अ॒न्धो जा॑गृ॒विः प्रा॑ण । अ॒सावे॑हि । ब॒धिर आ॑क्र॒न्दयि॑त-र॒पान॑ ।
 अ॒सावे॑हि । उ॒षस॑-मु॒षस॑-म॒शीय॑ । अ॒हम॑सो ज्यो॒तिर॑शीय ।
 अ॒हम॑सो ऽपो॒शीय॑ । व॒य ऽ स्या॑म प॒तयो॑ र॒यीणां॑ ।
 भूर्भु॑वस्स्वस्स्वाहा ॥ 81

T.B.3.11.6.1

य॒त्ते ऽचि॑तं यँदु॒चित॑न्ते अ॒ग्ने । य॒त्त ऊ॑नं यँदु॒ते ऽति॑रिक्तं ।
 आ॒दि॒त्यास्त॑-द॒ङ्गिर॑स-श्चि॒न्वन्तु॑ । वि॒श्वे ते॑ दे॒वाश्चि॑ति॒मा-पू॑रयन्तु ।

चि॒तश्चा॒सि स॒ञ्चित॑श्चा-स्य॒ग्ने ।

ए॒तावा॑ञ्चा॒सि भू॒याञ्चा॑श्चास्य॒ग्ने । लो॒कं पृ॑णच्छि॒द्रं पृ॑ण ।

अथो॑ सीद॒ शिवा॑ त्वं । इन्द्रा॒ग्नी त्वा॑ बृ॒हस्प॑तिः ।

अ॒स्मिन् यो॒ना-व॑सीषदन् ॥ 82

T.B.3.11.6.2

तया॑ दे॒वतया॑-ऽङ्गिर॒स्वद् ध्रु॒वासी॑द । ता अ॒स्य सू॑ददो॒हसः॑ ।

सोम॑ञ् श्री॒णन्ति॑ पृ॒श्नयः॑ । जन्मं॑ दे॒वानां॑ वि॒शः ।

त्रि॒ष्वा रो॑चने दि॒वः । तया॑ दे॒वतया॑-ऽङ्गिर॒स्वद् ध्रु॒वासी॑द ।

अ॒ग्ने दे॒वाञ् इ॒हाव॑ह । ज॒ज्ञानो॑ वृ॒क्त बर्हि॑षे ।

अ॒सि हो॒ता न॒ ईड्यः॑ । अ॒गन्म॑ म॒हा म॒नसा॑ यवि॒ष्ठं ॥ 83

T.B.3.11.6.3

यो दी॒दाय॑ समि॒द्धस्स्वे॑ दु॒रोणे॑ । चि॒त्रभा॑नू रो॒दसी॑ अ॒न्तरु॑र्वी ।

स्वा॒हुतं॑ वि॒श्वतः॑ प्र॒त्यञ्चं॑ ॥ मे॒धाका॑रं वि॒दथ॑स्य प्र॒साध॑नं ।

अ॒ग्निञ् हो॒तारं॑ परि॒भूत॑मं म॒तिं । त्वा॒मर्भ॑स्य ह॒विषः॑ स॒मान॑मि॒त् ।

त्वां म॒हो वृ॑णते॒ नरो॑ ना॒न्यं-त्वत् । म॒नुष्व॑त्वा नि॒धीम॑हि ।

मनु॒ष्वथ्॑ समि॒धीम॑हि । अग्ने॑ मनु॒ष्व-द॑ङ्गिरः ॥ 84

T.B.3.11.6.4

दे॒वान् दे॒वाय॑ ते यज । अ॒ग्निर्हि॑ वा॒जिनं॑ वि॒शे ।
 ददा॑ति वि॒श्वच॑र्षणिः । अ॒ग्नी रा॒ये स्वा॒भुव॑ ॥
 स प्री॒तो या॑ति वा॒र्य ॥ इष॑ स्तो॒तृभ्य॑ आ॒भर ।
 पृ॒ष्ठो दि॒वि पृ॒ष्ठो अ॒ग्निः पृ॒थि॒व्यां । पृ॒ष्ठो वि॒श्वा ओष॑धी-रा॒विवे॑श ।
 वैश्वा॒नरः॑ सह॒सा पृ॒ष्ठो अ॒ग्निः ।
 स नो॑ दि॒वा स॒रिषः॑ पा॒तु नक्तं॑ ॥ 85

T.B.3.11.7.1

अयं॑ वा॒व यः प॑वते । सौ॒ग्निर्ना॑चि॒केतः॑ । स यत् प्रा॒ङ् प॑वते ।
 तद॑स्य शि॒रः । अथ॑ यद् दक्षि॒णा । स दक्षि॑णः पक्षः ।
 अथ॑ यत् प्र॒त्यक् । तत् पु॒च्छं ॥ य दु॒दङ् । स उत्तरः॑ पक्षः ॥ 86

T.B.3.11.7.2

अथ यत् सँवाति । तदस्य समञ्चनं च प्रसारणं च ।
 अथो संपदेवास्य सा । सँ ह वा अस्मै स कामः पद्यते ।
 यत् कामो यजते । योऽग्निं नाचिकेतं चिनुते ।
 य उ चैन-मेवं वैद । यो ह वा अग्ने नाचिकेतस्या-यतनं
 प्रतिष्ठां वैद । आयतनवान् भवति । गच्छति प्रतिष्ठां ॥ 87

T.B.3.11.7.3

हिरण्यं वा अग्ने नाचिकेतस्या-यतनं प्रतिष्ठा । य एवं वैद ।
 आयतनवान् भवति । गच्छति प्रतिष्ठां ।
 यो ह वा अग्ने नाचिकेतस्य शरीरं वैद ।
 स शरीर एव स्वर्गं लोकमेति । हिरण्यं वा अग्ने नाचिकेतस्य
 शरीरं । य एवं वैद । स शरीर एव स्वर्गं लोकमेति ।
 अथो यथा रुक्म उत्-तप्तो भाय्यात् ॥ 88

T.B.3.11.7.4

एवमेव स तेजसा यशसा । अस्मिँश्च लोके -ऽमुष्मिँश्च भाति ।
 उरवो ह वै नामैते लोकाः । ये-ऽवरेणादित्यं ।

अथ॑ है॒ते वरी॑याँसो॒ लो॒काः । ये॒ प॒रेणा॑दित्यं ।
 अ॒न्तव॑न्तँ ह॒ वा ए॒ष क्ष॑य्यं लो॒कं ज॑यति । यो-ऽव॑रेणा॒दित्यं॑ ।
 अथ॑ है॒षो-ऽन॑न्त-म॒पा॒र-म॒क्ष॑य्यं लो॒कं ज॑यति ।
 यः प॒रेणा॑दित्यं ॥ 89

T.B.3.11.7.5

अ॒न॒न्तँ ह॒ वा अ॒पा॒र-म॒क्ष॑य्यं लो॒कं ज॑यति । योऽग्निं॑ ना॒चि॒केतं॑
 चि॒नुते॑ । य उ॑ चैन-मे॒वं वे॑द । अथो॑ यथा॒ रथे॑ तिष्ठन् पक्ष॑सी
 पर्या॑-वर्त्त॒माने॑ प्र॒त्यपे॑क्षते ॥ ए॒व-म॑हो॒रात्रे॑ प्र॒त्यपे॑क्षते ।
 नास्या॑-हो॒रात्रे॑ लो॒कमा॑प्नुतः । योऽग्निं॑ ना॒चि॒केतं॑ चि॒नुते॑ ।
 य उ॑ चैन-मे॒वं वे॑द ॥ 90

T.B.3.11.8.1

उ॒श॒न् ह॒ वै वा॑ज॒श्रव॑सः सर्व॑वेद॒ संद॑दौ ।
 तस्य॑ ह॒ नचि॑केता॒ नाम॑ पु॒त्र आ॑स । तँ ह॒ कु॒मा॒रँ स॑न्तं ॥
 दक्षि॑णासु नी॒यमा॑नासु श्रद्धा॑ वि॒वेश॑ । स हो॑वाच ।

त॒त क॒स्मै मां दा॑स्यसीति । द्वितीयं॑ तृतीयं॑ । त॒ञ् ह॒ परी॑त उवाच ।
मृ॒त्यवे॑ त्वा द॒दामी॑ति । त॒ञ् ह॒ स्मो-त्थि॑तं वा॒गभि॑-व॒दति॑ ॥ 91

T.B.3.11.8.2

गौ॒तम॑ कु॒मारमि॑ति । स हो॑वाच । प॒रेहि॑ मृ॒त्यो गृ॑हान् ।
मृ॒त्यवे॑ वै त्वाऽदा॑-मि॒ति । तं वै प्र॑व॒सन्तं ग॑न्ता-सीति होवाच ।
तस्य॑स्म तिस्रो रा॒त्री-र॑नाश्चान् गृ॒हे व॑सतात् ।
स यदि॑ त्वा पृ॒च्छेत् । कु॒मार॑ कति रा॒त्री-र॑वाथ्सी-रि॒ति ।
ति॒स्र इति॑ प्र॒ति ब्रू॑तात् । किं प्र॒थमाञ् रा॒त्रि-मा॑श्ना इति ॥ 92

T.B.3.11.8.3

प्र॒जां त इति॑ । किं द्वि॒तीया॑-मि॒ति । प॒शूञ्स्त इति॑ ।
किं त्रि॒तीया॑-मि॒ति । साधु॑कृ॒त्यां त इति॑ । तं वै प्र॑व॒सन्तं ज॑गाम ।
तस्य॑ ह तिस्रो रा॒त्री-र॑नाश्चान् गृ॒ह उ॑वास । तमा॑गत्य पप्रच्छ ।
कु॒मार॑ कति रा॒त्री-र॑वाथ्सी-रि॒ति । ति॒स्र इति॑ प्रत्युवाच ॥ 93

T.B.3.11.8.4

किं प्रथ॒माꣳ रा॒त्रि-मा॒श॒ना इति॑ । प्र॒जां त इति॑ ।
 किं द्वि॒तीया-मि॒ति । प॒शूꣳस्त इति॑ । किं त्रि॒तीया-मि॒ति ।
 साधु॑कृ॒त्यां त इति॑ । नम॑स्ते अस्तु भगव इति॑ होवाच ।
 वरं॑ ँवृ॒णीष्वेति॑ । पि॒तरमे॒व जी॒वन्न॒यानीति॑ ।
 द्वि॒तीयं॑ ँवृ॒णीष्वेति॑ ॥ 94

T.B.3.11.8.5

इ॒ष्टापूर्॒तयो॒ मे ऽक्षि॑तिं ब्रू॒हीति॑ होवाच ।
 तस्मै॑ है तम॒ग्निं नाचि॑के॒त-मु॒वाच ।
 ततो॑ वै तस्ये॒-ष्टापूर्॒ते ना क्षी॑येते ।
 नास्ये॒ष्टा-पूर्॒ते क्षी॑येते । योऽग्निं॑ नाचि॑के॒तं चि॒नुते॑ ।
 य उ॑ चैन-मे॒वं वे॒द । तृ॒तीयं॑ ँवृ॒णीष्वेति॑ ।
 पुन॑ मृ॒त्यो मे॒ ऽप॒जितिं॑ ब्रू॒हीति॑ होवाच ।
 तस्मै॑ है तम॒ग्निं नाचि॑के॒त-मु॒वाच ।

ततो॑ वै सोऽप॑ पुन॑ मृत्यु॑-मजयत् ॥ 95

T.B.3.11.8.5

अप॑ पुन॑ मृत्युं॑ जयति॑ । योऽग्निं॑ नाचिके॑तं चिनु॑ते ।
य उ॑ चैन॑-मेव॑ं वेद॑ । प्रजा॑पति॒ वै प्रजा॑काम॒-स्तपो॑-ऽतप्यत॑ ।
स हिर॑ण्य-मुदा॑स्यत् । त-द॒ग्नौ प्रा॑स्यत् ।
त-द॒स्मै नाच्छ॑दयत् । तद् द्वि॒तीयं प्रा॑स्यत् ।
त-द॒स्मै नै वाच्छ॑दयत् । तत् तृ॒तीयं प्रा॑स्यत् ॥ 96

T.B.3.11.8.6

त-द॒स्मै नै वाच्छ॑दयत् । त-दा॒त्म-न्ने॒व हृद॑य्येऽग्नौ॑
वैश्वा॒नरे प्रा॑स्यत् । त-द॒स्मा अ॑च्छदयत् ।
तस्मा॑द् हिर॑ण्यं कनि॑ष्ठं धना॑नां ।
भुज्ज॑त् प्रि॒यत॑मं । हृद॑यज॒ हि । स वै तमे॒व नावि॑न्दत् ।
यस्मै॑ तां दक्षि॑णा-मने॑ष्यत् ।
तां॑ स्वायै॒व हस्ता॑य दक्षि॑णायानयत् । तां प्र॑त्यगृह्णात् ॥ 97

T.B.3.11.8.7

दक्षाय॑ त्वा॒ दक्षि॑णां प्रति॒गृह्णामी॑ति । सो॒ ऽदक्ष॑त दक्षि॑णां प्रति॒गृह्य॑ ।
 दक्ष॑ते ह॒ वै दक्षि॑णां प्रति॒गृह्य॑ । य॒ एवं॑ वे॒द ।
 ए॒तद्ध॑स्म॒ वै तद् वि॒द्वाँसो॑ वाज॒श्रव॑सा गो॒तमाः॑ ।
 अ॒प्यनू॑दे॒श्यां दक्षि॑णां प्रति॒गृह्णन्ति॑ । उ॒भये॑न व॒यं दक्षि॑ष्याम॒ह
 ए॒व दक्षि॑णां प्रति॒गृह्ये॑ति । ते॒ ऽदक्ष॑न्त दक्षि॑णां प्रति॒गृह्य॑ ।
 दक्ष॑ते ह॒ वै दक्षि॑णां प्रति॒गृह्य॑ । य॒ एवं॑ वे॒द ।
 प्र॒ हान्यं॑ व्ली॒नाति॑ ॥ 98

T.B.3.11.9.1

तँ॒ है॒त-मे॑के॒ पशु॑बन्ध॒ एवो॑त्तर-वे॒द्यां चि॑न्वते ।
 उ॒त्तर॑वे॒दि स॑म्मित॒ एषो॑ऽग्नि॒रिति॑ वदन्तः ।
 तन्न॑ तथा॒ कुर्या॑त् । ए॒त-म॑ग्निं॒ कामे॑न व्य॒र्द्धये॑त् ।
 स॒ ए॒नं कामे॑न व्य॒र्द्धः । कामे॑न व्य॒र्द्धये॑त् ।
 सौ॒म्ये वा॒वै न॑मध्व॒रे चि॑न्वीत ।

य॒त्र वा॒ भू॒यि॒ष्ठा आ॒हु॒तयो॑ हू॒येर॑न् ।

ए॒त-म॒ग्निं का॒मेन॑ स॒मर्द्ध॑यति । स ए॒नं का॒मेन॑ स॒मृद्धः॑ ॥ 99

T.B.3.11.9.2

का॒मेन॑ स॒मर्द्ध॑यति । अथ॑ है॒नं पु॒र॒र्षयः॑ ।

उ॒त्तर॑वे॒द्या-मे॒व स॒त्रिय॑म-चि॒न्वत॑ । ततो॑ वै तेऽवि॒न्दन्त॑ प्र॒जां ।

अ॒भि स्व॒र्गं लो॒क-म॑जयन् । वि॒न्दत॑ ए॒व प्र॒जां ।

अ॒भि स्व॒र्गं लो॒कं ज॑यति । योऽग्निं॑ नाचि॒केतं॑ चि॒नुते॑ ।

य उ॑ चैन-मे॒वं वे॒द । अथ॑ है॒नं वा॒यु ऋ॒द्धि॒कामः॑ ॥ 100

T.B.3.11.9.3

य॒थान्यु॑प्त-मे॒वोप॑दधे । ततो॑ वै स ए॒ता-मृ॒द्धि-मा॑द्ध॒नोत् ।

या॒मिदं॑ वा॒यु ऋ॒द्धः । ए॒ता-मृ॒द्धि-मृ॑द्ध॒नोति॑ ।

या॒मिदं॑ वा॒यु ऋ॒द्धः । योऽग्निं॑ नाचि॒केतं॑ चि॒नुते॑ ।

य उ॑ चैन-मे॒वं वे॒द । अथ॑ है॒नं गो॒ब॒लो वा॒र्ष्णः॑ प॒शु॒कामः॑ ।

पा॒क्तमे॒व चि॒क्ये । पञ्च॑ पु॒रस्ता॑त् ॥ 101

T.B.3.11.9.4

पञ्च॑ दक्षि॑णतः । पञ्च॑ पश्चात् । पञ्चो॑त्तरतः । एकां॑ मद्ध्ये॑ ।
 ततो॑ वै स सह॑स्रं पशून् प्राप्नो॑त् । प्र सह॑स्रं पशू-नाप्नोति॑ ।
 योऽग्निं॑ नाचि॑केतं चिनु॑ते । य उ॑ चैन-मे॒वं वे॑द ।
 अथ॑ है॒नं प्र॒जाप॑ति ज्यै॑ष्ठ्यकामो॑ यश॑स्कामः प्र॒जन॑नकामः ।
 त्रिवृ॑तमे॒व चि॒क्ये ॥ 102

T.B.3.11.9.5

सप्त॑ पु॒रस्ता॑त् । तिस्रो॑ दक्षि॑णतः । सप्त॑ पश्चात् । तिस्र॑ उत्तर॑तः ।
 एकां॑ मद्ध्ये॑ । ततो॑ वै स प्र॒यशो॑ ज्यै॑ष्ठ्य-माप्नो॑त् ।
 ए॒तां प्र॒जातिं॑ प्रा॒जाय॑त । या॒मिदं॑ प्र॒जाः प्र॒जाय॑न्ते ।
 त्रिवृ॑द् वै ज्यै॑ष्ठ्यं । मा॒ता पि॒ता पु॒त्रः ॥ 103

T.B.3.11.9.6

त्रिवृ॑त् प्र॒जन॑नं । उप॒स्थो यो॒नि र्म॑द्ध्यमा ।
 प्र॒यशो॑ ज्यै॑ष्ठ्य-माप्नोति॑ । ए॒तां प्र॒जातिं॑ प्र॒जाय॑ते ।
 या॒मिदं॑ प्र॒जाः प्र॒जाय॑न्ते । योऽग्निं॑ नाचि॑केतं चिनु॑ते ।

य उ चैनमेवं वेद । अथ हैन-मिन्द्रो ज्यैष्ठ्यकामः ।
ऊर्ध्वा एवो-पदधे । ततो वै स ज्यैष्ठ्यम-गच्छत् ॥ 104

T.B.3.11.9.7

ज्यैष्ठ्यं गच्छति । योऽग्निं नाचिकेतं चिनुते ।
य उ चैन-मेवं वेद । अथ हैन-मसावादित्यः स्वर्गकामः ।
प्राचीरेवो-पदधे । ततो वै सोऽभि स्वर्गं लोक-मजयत् ।
अभि स्वर्गं लोकं जयति । योऽग्निं नाचिकेतं चिनुते ।
य उ चैन-मेवं वेद । स यदीच्छेत् ॥ 105

T.B.3.11.9.8

तेजस्वी यशस्वी ब्रह्मवर्चसी स्यामिति । प्राडा होतु द्विष्या-
दुथ्सर्पेत् । येयं प्रागाद् यशस्वती । सा मा प्रोर्णोतु ।
तेजसा यशसा ब्रह्मवर्चसेनेति । तेजस्व्येव यशस्वी
ब्रह्मवर्चसी भवति । अथ यदीच्छेत् । भूयिष्ठं मे श्रद्दधीरन् ।
भूयिष्ठा दक्षिणा नयेयुरिति । दक्षिणासु नीयमानासु प्राच्येहि

प्राच्ये॑हीति प्राची॑ जुषा॑णा वे॒त्वाज्य॑स्य स्वाहेति॑
 सु॒वे॒णो-प॒हत्या॑ हव॒नीये॑ जुहुयात् ॥ 106

T.B.3.11.9.9

भूयि॑ष्ठ-मे॒वास्मै॑ श्रद्द॑धते । भूयि॑ष्ठा दक्षि॑णा नयन्ति ।
 पुरी॑ष-मुप॒धाय॑ । चि॒ति-क्लृ॑प्तिभि॑-रभि॒मृश्य॑ ।
 अग्निं॑ प्रणी॒योप॑-समा॒धाय॑ । चत॑स्र ए॒ता आहु॑ती र्जुहोति ।
 त्वम॑ग्ने रु॒द्र इति॑ शत॒रुद्री॑यस्य रूपं ।
 अग्ना॑-विष्णू॑ इति॑ वसो॒र्धायाः॑ । अन्न॑पत इत्य॒न्न होमः॑ ।
 सप्त॑ ते अग्ने॒ समि॑धः सप्त॒ जिह्वा॑ इति॒ विश्व॑प्रीः ॥ 107

T.B.3.11.10.1

यां प्रथ॑मा-मि॒ष्टका॑-मुप॒दधा॑ति । इ॒मं तया॑ लो॒क-म॒भि ज॑यति ।
 अथो॒ या अ॒स्मिन् लो॒के दे॒वताः॑ ।
 तासां॑ सायु॒ज्यं सलो॑कता-माप्नोति । यां द्वि॒तीया॑-मुप॒दधा॑ति ।
 अन्तरि॑क्षलो॒कं तया॑-ऽभि ज॑यति ।

अथो॒ या अ॒न्तरि॑क्ष लो॒के दे॒वताः॑ ॥

तासा॑ꣳ सायु॑ज्यꣳ सलो॒कता॑-मा॒प्नोति॑ ।

यां तृ॒तीया॑-मुप॒दधा॑ति । अ॒मुं तया॑ लो॒क-म॒भि ज॑यति ॥ 108

T.B.3.11.10.2

अथो॒ या अ॒मुष्मिन् लो॒के दे॒वताः॑ ॥ तासा॑ꣳ सायु॑ज्यꣳ

सलो॒कता॑-मा॒प्नोति॑ । अथो॒ या अ॒मूरि॑तरा अ॒ष्टाद॑श ।

य ए॒वामी॑ उ॒रवश्च॑ वरी॒याꣳसश्च॑ लो॒काः ।

ताने॒व ता॒भिर॑भि ज॑यति । का॒मचा॑रो ह वा अ॒स्यो॒रुषु॑ च वरी॒यस्सु॑

च लो॒केषु॑ भ॒वति॑ । योऽग्निं॑ नाचि॒केतं॑ चि॒नुते॑ ।

य उ॒ चैन॑-मे॒वं वैद॑ । स॒व॒थ्स॒रो वा अ॒ग्नि ना॑चि॒केतः॑ ।

तस्य॑ वस॒न्तः शि॒रः ॥ 109

T.B.3.11.10.3

ग्री॒ष्मो दक्षि॑णः प॒क्षः । वर्षा॑ उत्त॒रः । श॒रत् पु॒च्छं॑ ॥

मा॒साः क॒र्मका॑राः । अ॒हो॒रा॒त्रे श॑तरु॒द्रीयं॑ ॥ प॒र्जन्यो॑ वसो॒र्धारा॑ ॥

यथा॒ वै प॒र्जन्यः॑ सुवृ॒ष्टं वृ॑ष्ट्वा ।

प्र॒जाभ्यः॑ सर्वा॒न् कामा॑न्त् संपू॒रय॑ति । ए॒व-मे॒व स तस्य॑ सर्वा॒न्
कामा॑न्त् संपू॒रय॑ति । योऽग्निं॑ नाचि॒केतं॑ चि॒नुते॑ ॥ 110

T.B.3.11.10.4

य उ॑ चैन-मे॒वं वै॑द । सँव॑त्सरो॒ वा अ॒ग्नि नाचि॑केतः ।
तस्य॑ वसन्तः शिरः । ग्री॒ष्मो दक्षि॑णः पक्षः ।
वर्षाः पु॒च्छं॑ । शर॒दुत्तरः॑ पक्षः । हे॒मन्तो॑ मद्ध्यं॑ ।
पूर्व॑ पक्षाश्चितयः । अपर॑ पक्षाः पुरीषं । अ॒होरा॑त्राणीष्टकाः ।
एष॑ वाव सौ॒ऽग्नि-र॒ग्निमयः॑ पुनर्णवः ।
अ॒ग्निमयो॑ ह वै पुनर्णवो भू॒त्वा । स्वर्गं॑ लो॒क-मे॒ति ।
आ॒दि॒त्यस्य॑ सायुज्यं । योऽग्निं॑ नाचि॒केतं॑ चि॒नुते॑ ।
य उ॑ चैन-मे॒वं वै॑द ॥ 111

हरिः॑ ओं

॥ इति तैत्तरीय यजुर्ब्राह्मणे काठके द्वितीयः प्रश्नः समाप्तः ॥

=====

3.3 तैत्तरीय यजुर्ब्राह्मणे काठके तृतीयः प्रश्नः

॥ हरिः ओं ॥

T.B.3.12.1.1

तु॒भ्यन्ता॑ अ॒ङ्गिर॑स्त-मा॒श्याम॑ त॒ङ्काम॑मग्ने ।
 आ॒शानां॑ त्वा वि॒श्वा आ॒शाः । अनु॑ नोऽद्यानु॑मति-रन्वि-दनु॑मते॒ त्वं ।
 कामो॑ भू॒तस्य॑ का॒मस्तद॑ग्रे । ब्र॒ह्म ज॒ज्ञानं॑ पि॒ता वि॒राजां॑ ।
 य॒ज्ञो रा॒योऽयं॑ य॒ज्ञः । आपो॑ भ॒द्रा आ॒दित्य॑श्यामि ।
 तु॒भ्यं भ॑रन्ति यो दे॒ह्यः । पूर्वं॑ दे॒वा अप॑रेण प्राणापा॒नौ ।
 ह॒व्यवा॑ह॒ः स्वि॑ष्टं ॥ 112

T.B.3.12.2.1

दे॒वेभ्यो॑ वै स्वर्गो लो॒कस्ति॑रो ऽभवत् । ते प्र॒जाप॑ति-मब्रुवन् ।
 प्र॒जाप॑ते स्वर्गो वै नो लो॒कस्ति॑रो ऽभूत् । तमन्वि॑च्छेति ।
 तं य॒ज्ञक्र॑तुभि-रन्वै॑च्छत् । तं य॒ज्ञक्र॑तुभि-रान्वि॑न्दत् ।
 तमिष्टि॑भि-रन्वै॑च्छत् । तमिष्टि॑भि-रान्वि॑न्दत् ।

तदिष्टी॑ना-मिष्टि॑त्वं । ए॒ष्ट्यो॑ ह॒वै नाम॑ ।

ता इ॒ष्ट्य इ॒त्याच॑क्षते॒ परो॑क्षेण । प॒रोक्ष॑ प्रि॒या इ॒व हि दे॒वाः ॥ 113

T.B.3.12.2.2

तमा॑शा-ऽब्रवी॑त् । प्र॒जाप॑त आ॒शया॑ वै श्राम्य॑सि ।

अह॑मु॒वा आ॒शाऽस्मि॑ । मां नु॑ यज॒स्व ।

अथ॑ ते स॒त्याऽऽशा॑ भवि॒ष्यति॑ । अनु॑ स्व॒र्गं लो॑कं वे॒त्स्यसी॑ति ।

स ए॒तम॑ग्नये॒ कामा॑य पु॒रोडा॑श-म॒ष्टाक॑पालं॒ निर॑वपत् ।

आ॒शायै॑ च॒रुं । अनु॑म॒त्यै च॒रुं । ततो॑ वै तस्य॑ स॒त्या-ऽऽशा॑ ऽभवत् ।

अनु॑ स्व॒र्गं लो॑क-म॒विन्द॑त् । स॒त्या ह॒ वा अ॒स्याशा॑ भवति ।

अनु॑ स्व॒र्गं लो॑कं वि॒न्दति॑ । य ए॒तेन॑ ह॒विषा॑ यजते ।

य उ॑ च॒नैदे॑वं वे॒द । सोऽत्र॑ जुहोति ।

अ॒ग्नये॑ का॒माय॑ स्वाहा-ऽऽशा॒यै स्वाहा॑ ।

अनु॑म॒त्यै स्वाहा॑ प्र॒जाप॑तये॒ स्वाहा॑ ।

स्व॒र्गाय॑ लो॒काय॑ स्वाहा॒ऽग्नये॑ स्वि॒ष्टकृ॑ते स्वाहेति॑ ॥ 114

T.B.3.12.2.3

तं॑ कामो॑ ऽब्रवीत् । प्रजा॑पते कामे॑न वै श्राम्य॑सि ।
 अ॒हमु॒वै कामो॑ऽस्मि । मां॑ नु॒ यज॑स्व । अथ॑ ते सत्यः॑ कामो॑
 भवि॑ष्यति । अनु॑ स्वर्गं॑ लो॒कं वे॑त्स्यसीति॑ । स ए॒तम॒ग्नये॑
 कामा॑य पु॒रोडा॑श-म॒ष्टाक॑पालं॒ निर॑वपत् । कामा॑य च॒रुं ।
 अनु॑मत्यै च॒रुं । ततो॑ वै तस्य॑ सत्यः॑ कामो॑ऽभवत् ।
 अनु॑ स्वर्गं॑ लो॒कम॑विन्दत् । सत्यो॑ ह वा अ॒स्य कामो॑ भवति ।
 अनु॑ स्वर्गं॑ लो॒कं वि॑न्दति । य ए॒तेन॑ ह॒विषा॑ यजते ।
 य उ॑ चैनदे॒वं वे॑द । सोऽ॒त्र जु॑होति । अ॒ग्नये॑ कामा॑य स्वाहा
 कामा॑य स्वाहा ॥ अनु॑मत्यै स्वाहा॑ प्रजा॑पतये स्वाहा ।
 स्वर्गा॑य लो॒काय॑ स्वाहा॒ऽग्नये॑ स्वि॒ष्टकृ॑ते स्वाहेति॑ ॥ 115

T.B.3.12.2.4

तं॑ ब्रह्मा॑ऽब्रवीत् । प्रजा॑पते ब्रह्म॑णा वै श्राम्य॑सि । अ॒हमु॒वै ब्रह्मा॑ऽस्मि ।
 मां॑ नु॒ यज॑स्व । अथ॑ ते ब्रह्म॑ण्वान् यज्ञो॑ भवि॑ष्यति ।
 अनु॑ स्वर्गं॑ लो॒कं वे॑त्स्यसीति॑ ।

स ए॒तम॒ग्नये॑ का॒माय॑ पु॒रोडा॑श-म॒ष्टाक॑पालं॒ निर॑वपत् ।
 ब्र॒ह्म॒णे च॒रुं । अनु॑म॒त्यै च॒रुं । ततो॑ वै तस्य ब्र॒ह्म॒ण्वान् य॒ज्ञोऽभ॑वत् ।
 अनु॑ स्व॒र्गं लो॒कम॑विन्दत् । ब्र॒ह्म॒ण्वान् ह॒ वा अ॑स्य य॒ज्ञो भ॑वति ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यजते ।
 य उ॒चै॒नदे॒वं वे॒द । सोऽत्र॑ जुहोति ।
 अ॒ग्नये॑ का॒माय॑ स्वाहा ब्र॒ह्म॒णे स्वाहा॑ ॥
 अनु॑म॒त्यै स्वाहा॑ प्र॒जाप॑तये स्वाहा ॥
 स्व॒र्गाय॑ लो॒काय॑ स्वाहा॒ ऽग्नये॑ स्वि॒ष्टकृ॑ते स्वाहेति ॥ 116

T.B.3.12.2.5

तं य॒ज्ञोऽब्र॑वीत् । प्र॒जाप॑ते य॒ज्ञेन॑ वैश्रा॒म्यसि॑ ।
 अ॒हमु॒वै य॒ज्ञोऽस्मि॑ । मां नु॑ यजस्व ।
 अथ॑ ते स॒त्यो य॒ज्ञो भ॑विष्यति । अनु॑ स्व॒र्गं लो॒कं वे॒त्स्य॑सीति ।
 स ए॒तम॒ग्नये॑ का॒माय॑ पु॒रोडा॑श-म॒ष्टाक॑पालं॒ निर॑वपत् ।
 य॒ज्ञाय॑ च॒रुं । अनु॑म॒त्यै च॒रुं । ततो॑ वै तस्य स॒त्यो य॒ज्ञोऽभ॑वत् ।

अनु॑ स्व॒र्गं लो॒कम॑विन्दत् । स॒त्यो ह॑ वा अ॒स्य य॑ज्ञो भ॒वति॑ ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॒ते ।
 य उ॒चैन॑दे॒वं वे॑द । सोऽ॒न्न जु॑होति ।
 अ॒ग्नये॑ का॒माय॑ स्वाहा य॒ज्ञाय॑ स्वाहा ॥
 अनु॑म॒त्यै स्वाहा॑ प्र॒जाप॑तये स्वाहा ॥
 स्व॒र्गाय॑ लो॒काय॑ स्वाहा॒ऽग्नये॑ स्वि॒ष्टकृ॑ते स्वाहेति ॥ 117

T.B.3.12.2.6

तमा॒पो-ऽब्रु॑वन् । प्र॒जाप॑ते॒ऽप्सु वै॑ स॒र्वे का॒माः श्रि॒ताः ।
 व॒यमु॒ वा आ॑प॒स्मः । अ॒स्मान्नु॑ यज॒स्व ।
 अथ॑ त्वयि॒ स॒र्वे का॒माः श्रि॒यिष्य॑न्ते ।
 अनु॑ स्व॒र्गं लो॒कं वे॑त्स्यसीति । स ए॒तम॑ग्नये॒ का॒माय॑ पु॒रोडा॑श-
 म॒ष्टाक॑पालं नि॒रव॑पत् । अ॒द्भ्यश्च॑रुं । अनु॑म॒त्यै च॑रुं ।
 ततो॑ वै तस्मिन्-स॒र्वे का॒मा अ॑श्रयन्त । अनु॑स्व॒र्गं लो॒कम॑विन्दत् ।
 स॒र्वे ह॑ वा अ॒स्मिन् का॒माः श्रि॒यन्ते॑ । अनु॑ स्व॒र्गं लो॒कं वि॑न्दति ।

य ए॒तेन॑ ह॒विषा॑ यज॑ते । य उ॒चैन॑दे॒वं वे॑द । सोऽ॒न्न जु॑होति ।
 अ॒ग्नये॑ का॒माय॑ स्वा॒हा ऽद्भ्य॑स्स्वा॒हा ॥
 अ॒नु॒म॒त्यै स्वा॒हा प्र॒जाप॑तये स्वा॒हा ॥
 स्व॒र्गाय॑ लो॒काय॑ स्वा॒हाऽग्नये॑ स्वि॒ष्टकृ॑ते स्वा॒हेति॑ ॥ 118

T.B.3.12.2.7

तम॒ग्निर्ब॑लि॒मान् ब्र॑वीत् । प्र॒जाप॑ते ऽग्नये॑ वै ब॒लिम॑ते सर्वा॑णि
 भू॒तानि॑ ब॒लिं ह॑रन्ति । अ॒हमु॑ वा अ॒ग्निर्ब॑लि॒मानस्मि॑ ।
 मां नु॑ यज॒स्व । अथ॑ ते सर्वा॑णि भू॒तानि॑ ब॒लिं ह॑रिष्यन्ति ।
 अनु॑ स्व॒र्गं लो॒कं वे॑त्स्यसीति । स ए॒तम॒ग्नये॑ का॒माय॑ पु॒रोडा॑श-
 म॒ष्टाक॑पाल-॒न्निर॑वपत् । अ॒ग्नये॑ ब॒लिम॑ते च॒रुं । अ॒नु॒म॒त्यै च॒रुं ।
 ततो॑ वै तस्मै॑ सर्वा॑णि भू॒तानि॑ ब॒लि-म॑हरन् ।
 अनु॑ स्व॒र्गं लो॒कम॑विन्दत् ।
 सर्वा॑णि ह वा अ॒स्मै भू॒तानि॑ ब॒लिं ह॑रन्ति ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॑ते ।

य उ॒चैन॑दे॒वं वै॑द । सोऽ॒त्र जु॑होति ।

अ॒ग्नये॑ का॒माय॑ स्वा॒हा अ॒ग्नये॑ ब॒लिम॑ते स्वा॒हा ॥

अ॒नुम॑त्यै स्वा॒हा प्र॒जाप॑तये स्वा॒हा ।

स्व॒र्गाय॑ लो॒काय॑ स्वा॒हा अ॒ग्नये॑ स्वि॒ष्टकृ॑ते स्वा॒हेति॑ ॥ 119

T.B.3.12.2.8

तम॑नु॒वित्ति॑र-ब्र॒वीत् । प्र॒जाप॑ते स्व॒र्गं वै॑ लो॒कम॑नु-वि॒विथ्स॑सि ।

अ॒हमु॑ वा अ॒नुवि॑त्तिरस्मि । मां नु॑ यज॒स्व ।

अथ॑ ते स॒त्या अ॒नुवि॑त्ति-र्भ॒विष्य॑ति । अ॒नु स्व॒र्गं लो॒कं वै॑थ्स्यसीति॑ ।

स ए॒तम॑ग्नये॑ का॒माय॑ पु॒रोडा॑श-म॒ष्टाक॑पालं॒ निर॑वपत् । अ॒नुवि॑त्त्यै

च॒रुं । अ॒नुम॑त्यै च॒रुं । ततो॑ वै तस्य॑ स॒त्या अ॒नुवि॑त्तिर भवत् ।

अ॒नु स्व॒र्गं लो॒क-म॑विन्दत् । स॒त्या ह॒ वा अ॒स्यानु॑वि॒त्ति-र्भ॑वति ।

अ॒नु स्व॒र्गं लो॒कं वि॑न्दति । य ए॒तेन॑ ह॒विषा॑ यजते ।

य उ॒चैन॑दे॒वं वै॑द । सोऽ॒त्र जु॑होति ।

अ॒ग्नये॑ का॒माय॑ स्वा॒हा-अ॒नुवि॑त्त्यै स्वा॒हा ॥

अ॒नुम॑त्यै स्वा॒हा प्र॒जाप॑तये स्वा॒हा ।

स्व॒र्गाय॑ लो॒काय॑ स्वाहा॒ऽग्नये॑ स्वि॒ष्टकृ॑ते स्वा॒हेति॑ ॥ 120

T.B.3.12.2.9

ता वा ए॒तास्सप्त॑ स्व॒र्गस्य॑ लो॒कस्य॑ द्वा॒रः ।
 दि॒वः श्ये॑नयो॒ ऽनु॒वित्त॑यो नाम । आ॒शा प्र॑थमा॒ ऽरक्ष॑ति ।
 का॒मो द्वि॑तीयां । ब्र॒ह्म तृ॑तीयां । य॒ज्ञश्च॑तु॒र्थी । आ॒पः पञ्च॑मीं ।
 अ॒ग्निर्ब॑लि॒मान्-थ्ष॑ष्ठीं । अ॒नु॒वित्तिः॑ सप्त॒मीं ।
 अनु॑ ह वै स्व॒र्गं लो॒कं वि॑न्दति ।
 का॒मचा॑रो॒ऽस्य॑ स्व॒र्गे लो॒के भ॑वति । य ए॒ताभि॑-रि॒ष्टिभि॑-र्य॒जते॑ ।
 य उ॒चैना॑ ए॒वं वे॑द । तास्व॒न्विष्टि॑ ।
 प॒ष्ठौही॑ व॒रां द॑द्यात् क॒ ऽसञ्च॑ ।
 स्त्रि॒यै चा॑भा॒रं स॑मृ॒द्ध्यै ॥ 121

T.B.3.12.3.1

तप॑सा दे॒वा दे॒वता॑-म॒ग्रे आ॑यन् । तप॑स॒र्षय॑स्स्व॒-र॒न्वि॑न्दन् ।
 तप॑सा स॒पत्नान्॑ प्र॒णु॒दामा॑रातीः । येने॒दं वि॑श्वं परि॒भूतं॑ य॒दस्ति॑ ।

प्रथ॒मजं॑ दे॒वꣳ ह॒विषा॑ वि॒धेम॑ । स्वयं॑भु ब्र॒ह्म पर॑मं तपो॒ यत् ।
 स ए॒व पु॒त्रः स पि॒ता स मा॒ता । तपो॑ ह य॒क्षं प्र॑थमꣳ सं॒बभू॑व ।
 श्रद्ध॑या दे॒वो दे॒वत्व॑-मश्नु॒ते । श्रद्धा॑ प्र॒तिष्ठा लो॒कस्य॑ दे॒वी ॥ 122

T.B.3.12.3.2

सा नो॑ जुषा॒णोप॑ य॒ज्ञ-मा॒गात् । काम॑व॒त्सा ऽमृतं॑ दु॒हाना॑ ।
 श्रद्धा॑ दे॒वी प्र॑थम॒जा ऋ॒तस्य॑ । विश्व॑स्य भ॒र्त्री ज॒गतः॑ प्र॒तिष्ठा ।
 ताꣳ श्रद्धाꣳ ह॒विषा॑ य॒जामहे॑ । सा नो॑ लो॒क-म॒मृतं॑ दधातु ।
 ईशा॑ना दे॒वी भुव॑नस्याधि॒ पत्नी॑ । आगा॑त्सत्यꣳ ह॒विरि॒दं जुषा॑णं ।
 यस्मा॑द्दे॒वा ज॒ज्ञिरे॑ भुव॒नञ्च॑ विश्वे॑ ।
 तस्मै॑ वि॒धेम॑ ह॒विषा॑ घृ॒तेन॑ ॥ 123

T.B.3.12.3.3

यथा॑ दे॒वैः स॒धमा॑दं म॒देम॑ । यस्य॑ प्र॒तिष्ठो॑-र्व॒न्तरि॑क्षं ।
 यस्मा॑द्दे॒वा ज॒ज्ञिरे॑ भुव॒नञ्च॑ सर्वे॑ । तत्स॑त्य-म॒र्चदु॑प-य॒ज्ञं न
 आगा॑त् । ब्र॒ह्माहु॑ती-रु॒प मो॑द॒मानं॑ । मन॑सो व॒शे सर्व॑मि॒दं ब॒भूव॑ ।
 नान्य॑स्य॒ मनो॑ व॒शम॑न्वि॒याय॑ । भी॒ष्मो हि दे॒वः स॒हसः॑ स॒हीयान्॑ ।

स नो जुषाण उप यज्ञमागात् ।
 आकूतीना-मधिपतिं चेतसां च ॥ 124

T.B.3.12.3.4

सङ्कल्पजूतिं देवं विपश्चिं । मनो राजानमिह वर्द्धयन्तः ।
 उपहवै ऽस्य सुमतौ स्याम । चरणं पवित्रं विततं पुराणं ।
 येन पूतस्तरति दुष्कृतानि । तेन पवित्रेण शुद्धेन पूताः ।
 अति पाप्मान-मरातिं तरेम । लोकस्य द्वार-मर्चिमत् पवित्रं ।
 ज्योतिष्मद् भ्राजमानं महस्वत् । अमृतस्य धारा बहुधा दोहमानं ।
 चरणं नो लोके सुधितां दधातु । अग्नि मूर्धा भुवः ।
 अनु नो ऽद्यानुमतिरन्वि-दनुमतेत्वं । हव्यवाह७ स्विष्टं ॥ 125

T.B.3.12.4.1

देवेभ्यो वै स्वर्गो लोकस्तिरो ऽभवत् । ते प्रजापति-मब्रुवन् ।
 प्रजापते स्वर्गो वै नो लोकस्तिरो ऽभूत् । तमन्विच्छेति ।
 तं यज्ञक्रतुभि-रन्वैच्छत् । तं यज्ञक्रतुभि नान्वविन्दत् ।

तमिष्टिभि॑-रन्वै॑च्छत् । तमिष्टिभि॑-रन्वविन्दत् ।
 तदिष्टी॑ना-मिष्टि॑त्वं । एष्ट्यो॑ ह वै नाम । ता इष्ट्य॑ इत्या चक्षते
 परोक्षे॑ण । परोक्ष॑प्रिया इव हि दे॒वाः ॥ 126

T.B.3.12.4.2

तं तपोऽ॑ ब्रवीत् । प्रजा॑पते तपसा॑ वै श्राम्य॑सि ।
 अहमु॑ वै तपोऽ॑ स्मि । मां नु यज॑स्व ।
 अथ ते सत्यं॑ तपो भविष्यति । अनु॑ स्वर्गं लो॒कं वे॒थ्स्यसीति॑ ।
 स ए॒तमाग्ने॑य-मष्टा॑कपालं॑ निरवपत् । तप॑से चरुं ।
 अनु॑मत्यै चरुं । ततो॑ वै तस्य॑ सत्यं॑ तपो ऽभवत् ।
 अनु॑ स्वर्गं लो॒कमवि॑न्दत् । सत्य॑ ऽ ह वा अस्य॑ तपो भवति ।
 अनु॑ स्वर्गं लो॒कं वि॑न्दति । य ए॒तेन॑ हविषा॑ यजते ।
 य उ चैनदे॑वं वे॒द । सोऽ॒त्र जुहो॑ति । अ॒ग्नये॑ स्वाहा॒ तप॑से स्वाहा॑ ।
 अनु॑मत्यै स्वाहा॑ प्रजा॑पतये स्वाहा॑ ।
 स्वर्गा॑य लो॒काय॑ स्वाहा॒ऽग्नये॑ स्विष्ट॑कृते स्वाहेति॑ । 127

T.B.3.12.4.3

त७ श्रद्धा-ऽब्रवीत् । प्रजापते श्रद्धया वै श्राम्यसि ।
 अहमुवै श्रद्धाऽस्मि । मां नु यजस्व ।
 अथ ते सत्या श्रद्धा भविष्यति । अनु स्वर्गं लोकं वैथ्स्यसीति ।
 स एतमाग्नेय-मष्टाकपालं निरवपत् । श्रद्धायै चरुं ।
 अनुमत्यै चरुं । ततो वै तस्य सत्या श्रद्धाऽभवत् ।
 अनु स्वर्गं लोकमविन्दत् । सत्या ह वा अस्य श्रद्धा भवति ।
 अनु स्वर्गं लोकं विन्दति । य एतेन हविषा यजते ।
 य उ चैनदेवं वेद । सोऽत्र जुहोति ।
 अग्नये स्वाहा श्रद्धायै स्वाहा ।
 अनुमत्यै स्वाहा प्रजापतये स्वाहा ।
 स्वर्गाय लोकाय स्वाहाऽग्नये स्विष्टकृते स्वाहेति । 128

T.B.3.12.4.4

त॒ स॒त्य-म॒ब्रवी॑त् । प्र॒जा॒प॒ते स॒त्येन॑ वै श्राम्य॑सि ।
 अ॒ह॒मु॒ वै स॒त्यम॑स्मि । मां नु॑ यज॒स्व ।
 अथ॑ ते स॒त्यं स॒त्यं भ॑विष्यति । अनु॑ स्व॒र्गं लो॒कं वे॒थ्स्य॑सीति ।
 स ए॒तमा॑ग्ने॒य-म॒ष्टाक॑पालं॒ निर॑वपत् । स॒त्याय॑ च॒रुं ।
 अनु॑म॒त्यै च॒रुं । ततो॑ वै तस्य॑ स॒त्यं स॒त्यम॑भवत् ।
 अनु॑ स्व॒र्गं लो॒कम॑विन्दत् । स॒त्यं ह॒ वा अ॑स्य स॒त्यं भ॑वति ।
 अनु॑ स्व॒र्गं लो॒कं वि॑न्दति । य ए॒तेन॑ ह॒विषा॑ यज॒ते ।
 य उ॒चै॒नदे॑वं वे॒द । सोऽ॒त्र जु॑होति । अ॒ग्नये॑ स्वा॒हा स॒त्याय॑ स्वा॒हा ।
 अनु॑म॒त्यै स्वा॒हा प्र॒जा॒प॒तये॑ स्वा॒हा ।
 स्व॒र्गाय॑ लो॒काय॑ स्वा॒हा अ॒ग्नये॑ स्वि॒ष्टकृ॑ते स्वा॒हेति॑ । 129

T.B.3.12.4.5

तं म॒नोऽ॒ब्रवी॑त् । प्र॒जा॒प॒ते म॒नसा॑ वै श्राम्य॑सि ।
 अ॒ह॒मु॒ वै म॒नोऽ॒स्मि । मां नु॑ यज॒स्व ।
 अथ॑ ते स॒त्यं म॒नो भ॑विष्यति । अनु॑ स्व॒र्गं लो॒कं वे॒थ्स्य॑सीति ।

स ए॒तमा॒ग्ने॒य-म॒ष्टाक॑पालं॒ निर॑वपत् । मन॒से च॑रुं ।
 अनु॒मत्यै॑ च॒रुं । ततो॑ वै तस्य॒ सत्यं॑ मनो॒ऽभवत् ।
 अनु॒ स्वर्गं॑ लो॒कम॑विन्दत् । सत्य॑ ह॒ वा अ॑स्य मनो॒ भवति॑ ।
 अनु॒ स्वर्गं॑ लो॒कं वि॑न्दति । य ए॒तेन॑ ह॒विषा॑ यजते ।
 य उ॒चैन॑ दे॒वं वै॑द । सो॒ऽत्र जु॑होति । अ॒ग्नये॑ स्वाहा॒ मन॒से स्वाहा॑ ॥
 अनु॒मत्यै॑ स्वाहा॒ प्रजा॑पतये॒ स्वाहा॑ ।
 स्वर्गा॑य लो॒काय॑ स्वाहा॒ऽग्नये॑ स्वि॒ष्टकृ॑ते स्वाहेति । 130

T.B.3.12.4.6

तं च॒रणम॑-ब्रवीत् । प्रजा॑पते च॒रणेन॑ वै श्रा॒म्यसि॑ ।
 अ॒हमु॒ वै च॒रणम॑स्मि । मां नु॒ यज॑स्व ।
 अथ॑ ते सत्यं च॒रणं भ॑विष्यति । अनु॒ स्वर्गं॑ लो॒कं वै॑थ्स्यसीति ।
 स ए॒तमा॒ग्ने॒य-म॒ष्टाक॑पालं॒ निर॑वपत् । च॒रणा॑य च॒रुं ।
 अनु॒मत्यै॑ च॒रुं । ततो॑ वै तस्य॒ सत्यं॑ च॒रणम॑भवत् ।
 अनु॒ स्वर्गं॑ लो॒कम॑विन्दत् । सत्य॑ ह॒ वा अ॑स्य च॒रणं भ॑वति ।

अनु॑स्वर्गं॑ लो॒कं॑ वि॒न्दति॑ । य ए॒तेन॑ ह॒विषा॑ यज॑ते ।

य उ॒चैन॑दे॒वं वे॒द । सोऽ॒त्र जु॑होति ।

अ॒ग्नये॑ स्वा॒हा च॑र॒णाय॑ स्वा॒हा । अ॒नु॒म॒त्यै स्वा॒हा प्र॑जा॒प॒तये॑ स्वा॒हा ।

स्व॒र्गाय॑ लो॒काय॑ स्वा॒हाऽ॒ग्नये॑ स्वि॒ष्ट॒कृ॒ते स्वा॑हेति । 131

T.B.3.12.4.7

ता वा ए॒ताः पञ्च॑ स्व॒र्गस्य॑ लो॒कस्य॑ द्वा॒रः ।

अपा॑घा अ॒नु॒वि॒त्तयो॑ नाम । तपः॑ प्रथ॒माञ् र॑क्षति ।

श्र॒द्धा द्वि॒तीयां॑ । स॒त्यं तृ॒तीयां॑ । म॒नश्च॑तु॒र्थीं । च॑र॒णं पञ्च॑मीं ।

अनु॑ ह॒वै स्व॒र्गं लो॒कं वि॒न्दति॑ । का॒म॒चा॒रौऽस्य॑ स्व॒र्गे

लो॒के भ॑वति । य ए॒ताभि॑-रि॒ष्टिभि॑-र्यज॑ते । य उ॒चैना॑ ए॒वं वे॒द ।

तास्व॑न्वि॒ष्टि । प॒ष्ठौही॑ व॒रां द॑द्यात् क॒ञ् सञ्च॑ ।

स्त्रि॒यै चा॑भा॒रञ् स॑मृ॒द्ध्यै । 132

T.B.3.12.5.1

ब्र॒ह्म वै च॑तु॒र्हो॒तारः॑ । च॒तुर्हो॒तृभ्यो॑ऽधि॒ यज्ञो॑ निर्मि॒तः ।

नैन॑ञ् श॒प्तं । नाभि॑च॒रित॑-मा॒गच्छ॑ति ।

य॒ ए॒वं॑ वै॒द । यो॒ ह॒ वै चतु॑र्.हो॒तृ॒णां चतु॑र्.हो॒तृ॒त्वं वै॒द ।
 अथो॒ पञ्च॑ हो॒तृ॒त्वं । सर्वा॑ हा॒स्मै दि॒शः क॒ल्पन्ते॑ ।
 वा॒चस्प॑ति॒र्. हो॒ता द॒शहो॑तृ॒णां । पृ॒थि॒वी हो॒ता चतु॑र् हो॒तृ॒णां । 133

T.B.3.12.5.2

अ॒ग्नि॒ हो॒ता पञ्च॑हो॒तृ॒णां । वा॒ग्घो॑ता ष॒ड्हो॑तृ॒णां ।
 म॒हाह॑वि॒र्. हो॒ता स॒प्तहो॑तृ॒णां । ए॒तद्वै चतु॑र्.हो॒तृ॒णां चतु॑र्.हो॒तृ॒त्वं ।
 अथो॒ पञ्च॑हो॒तृ॒त्वं । सर्वा॑ हा॒स्मै दि॒शः क॒ल्पन्ते॑ । य॒ ए॒वं॑ वै॒द ।
 ए॒षा वै स॑र्व वि॒द्या । ए॒तद् भे॑ष॒जं ।
 ए॒षा प॒ङ्क्तिः॑ स्व॒र्गस्य॑ लो॒कस्यां॑ ज॒साय॑निः स्रु॒तिः । 134

T.B.3.12.5.3

ए॒तान् यो॒ऽद्ध्यै॑-त्य॒च्छदि॑र्-द॒र्.शो॑ याव॒त्तर॑सं ।
 स्व॒रेति॑ । अ॒नप॑ब्र॒वः स॑र्व॒मायु॑रेति । वि॒न्दते॑ प्र॒जां ।
 रा॒यस्पो॑षं गौ॒पत्यं॑ । ब्र॒ह्मव॑र्च॒सी भ॑वति । ए॒तान्. यो॒ऽद्ध्यै॑ति ।
 स्पृ॒णोत्या॑त्मानं॑ । प्र॒जां पि॑तृन् ।

ए॒तान्॑ वा अ॒रु॒ण औ॒प॒वे॒शि वि॒दाञ्च॑का॒र । 135

T.B.3.12.5.4

ए॒तैर॑धि॒-वा॒दम॑पा॒-ज॒यत् । अथो॑ वि॒श्वं पा॒प्मानं॑ ॥
 स्व॒र्य॒यौ । ए॒तान् योऽ॒द्ध्यै॑ति । अ॒धि॒वा॒दं ज॒यति॑ ।
 अथो॑ वि॒श्वं पा॒प्मानं॑ ॥ स्व॒रे॑ति । ए॒तैर॑ग्निं चि॒न्वी॑त स्व॒र्गका॑मः ।
 ए॒तैरा॑युष्का॒मः । प्र॒जा प॒शुका॑मो वा । 136

T.B.3.12.5.5

पु॒रस्ता॑-द॒शहो॑ता॒र-मु॒दञ्च॑-मु॒प॒दधा॑ति यावत्प॒दं ।
 हृ॒दयं॑ य॒जुषी॑ प॒त्न्यौ च॑ । दक्षि॑णतः प्राञ्चं चतु॒र्हो॑ता॒रं ।
 पश्चा॑दु॒दञ्चं॑ पञ्च हो॒ता॒रं । उत्त॑रतः प्राञ्चं षड्द्वो॒ता॒रं ।
 उप॑रि॒ष्टात् प्राञ्चं॑ स॒प्तहो॑ता॒रं । हृ॒दयं॑ य॒जूषि॑ प॒त्न्यश्च॑ ।
 यथा॑वका॒शं ग्र॑हान् । यथा॑वका॒शं प्र॑तिग्र॒हान् लो॑कं पृ॒णाश्च॑ ।
 सर्वा॑ हा॒स्यै॒ता दे॒वताः॑ प्री॒ता अ॒भीष्टा॑ भवन्ति । 137

T.B.3.12.5.6

सदे॑वम॒ग्निं चि॑नुते । रथ॑सं॒मित-श्वे॑तव्यः । वज्रो॑ वै रथः ।
 वज्रे॑णै॒व पा॒प्मानं॑ भ्रातृ॒व्यञ् स्तृ॑णुते । पक्षः॑ सं॒मित-श्वे॑तव्यः ।
 ए॒तावा॒न् वै रथः॑ । यावत्पक्षः॑ । रथसं॒मितमे॒व चि॑नुते ।
 इ॒ममे॒व लो॒कं प॑शुबन्धे॒नाभि॑ जयति । अथो॑ अ॒ग्निष्ठी॒मेन॑ । 138

T.B.3.12.5.7

अ॒न्तरि॑क्ष-मु॒क्थ्ये॑न । स्वर॑ति-रा॒त्रेण॑ । सर्वा॑न् लो॒कान॑ही॒नेन॑ ।
 अथो॑ स॒त्रेण॑ । वरो॑ दक्षि॒णा । वरे॑णै॒व वर॑ञ् स्पृ॒णोति॑ ।
 आ॒त्मा हि॑ वरः । ए॒कवि॑ञ्शति॒र्दक्षि॑णा ददाति ।
 ए॒कवि॑ञ्शो॒ वा इ॒तः स्व॒र्गो लो॒कः ।
 प्र॒स्वर्गं॑ लो॒कमा॑प्नोति । 139

T.B.3.12.5.8

अ॒सावा॑दि॒त्य ए॒कवि॑ञ्शः । अ॒मुमे॒वा-दि॒त्यमा॑प्नोति ।
 श॒तं द॑दाति । श॒तायुः॑ पु॒रुषः॑ श॒तेन्द्रि॑यः ।

आयु॑ष्ये॒वेन्द्रि॑ये॒ प्रति॑तिष्ठति । सह॑स्रं ददाति ।
 सह॑स्रं सं॒मितः॑ स्वर्गो॒ लोकः॑ । स्वर्ग॑स्य॒ लोक॑स्या-भिजि॑त्यै ।
 अन्वि॑ष्टकं दक्षि॑णा ददाति । सर्वा॑णि वया॑ँसि । 140

T.B.3.12.5.9

सर्व॑स्याप्त्यै॑ । सर्व॑स्या-वरु॑द्ध्यै । यदि न वि॒न्देत॑ ।
 मन्था॑ने-तावतो॑ दद्यादो॒दनान्॑ वा । अ॒श्नुते॑ तं कामं॑ ।
 यस्मै॑ कामा॒या-ग्नि॑श्चीयते॑ । प॒ष्ठौहीं॑ त्वन्तर्वतीं॑ दद्यात् ।
 सा हि सर्वा॑णि वया॑ँसि । सर्व॑स्याप्त्यै॑ । सर्व॑स्या-वरु॑द्ध्यै । 141

T.B.3.12.5.10

हिर॑ण्यं ददाति । हिर॑ण्य-ज्योति॑रेव स्वर्गं॑ लो॒कमे॑ति ।
 वासो॑ ददाति । तेनायुः॑ प्रति॒रते॑ । वेदि॑तृतीये॒ यजे॑त ।
 त्रिष॑त्या हि दे॒वाः । स स॑त्यमग्निं चिनुते॑ ।
 तदे॒तत् प॑शुबन्धे॒ ब्राह्म॑णं ब्रूयात् । नेत॑रेषु यज्ञेषु॑ ।
 यो ह॒ वै च॑तर् । होतृ॑-ननु॒सवनं॑-तर्प॑यित॒व्यान् वे॑द । 142

T.B.3.12.5.11

तृ॒प्यति॑ प्र॒जया॑ प॒शुभिः॑ । उपै॑नꣳ सोम॒पीथो॑ न॒मति॑ ।
 ए॒ते वै च॒तुर्हो॒तारो॑ ऽनु॒सवनं॑ त॒र्पयित॒व्याः॑ । ये ब्रा॒ह्मणा॑ बहु॒विदः॑ ।
 तेभ्यो॑ यद॒क्षिणा॑ न नये॑त् । दु॒रिष्टꣳस्यात्॑ ।
 अ॒ग्निम॑स्य वृ॒ज्जीर॑न् । तेभ्यो॑ यथा श्रद्धं द॒द्यात् ।
 स्वि॒ष्टमे॑ वै तत्क्रि॑यते । नास्या॒ग्निं वृ॑ज्जते । 143

T.B.3.12.5.12

हि॒रण्ये॑ष्टको भ॒वति॑ ।
 यावदु॒त्तम॑-मङ्गु॒लि-काण्डं॑ य॒ज्ञ परु॑षा संमि॒तं ।
 तेजो॑ हि॒रण्यं । यदि॑ हि॒रण्यं न वि॒न्देत् । शर्करा॑ अ॒क्ता उप॑दध्यात् ।
 तेजो॑ घृ॒तं । सते॑जसमे-वा॒ग्निं चि॑नुते ।
 अ॒ग्निञ्चि॒त्वा सौ॑त्राम॒ण्या य॑जेत मै॒त्रावरु॑ण्या वा ।
 वी॒र्ये॑ण वा ए॒ष व्यृ॑द्ध्यते । योऽग्निञ्चि॒नुते॑ । 144

याव॑दे॒व वी॒र्यं॑ । तद॑स्मिन् दधाति । ब्र॒ह्मणः॑ सायु॑ज्यं स॒लोक॑ता-
 मा॒प्नोति॑ । ए॒तासा॑मे॒व दे॒वता॑नां सायु॑ज्यं ।
 सा॒र्षितां॑ स॒मान लो॑कता-मा॒प्नोति॑ । य ए॒तम॒ग्निं चि॑नुते ।
 य उ॒चैन॑मे॒वं वे॑द । ए॒तदे॒व सा॒वित्रे॑ ब्रा॒ह्मणं॑ ।
 अथो॑ नाचि॒केते॑ । 145

T.B.3.12.6.1

यच्चा॑मृतं यच्च॑ म॒र्त्यं॑ । यच्च॑ प्रा॒णिति॑ यच्च॑ न ।
 सर्वा॑स्ता इ॒ष्टकाः॑ कृ॒त्वा । उप॑ का॒मदु॒घा द॑धे ।
 तेन॑र्षि॒णा ते॒न ब्र॒ह्मणा॑ । तया॑ दे॒वत॑या-ऽङ्गि॒रस्व॑द् ध्रु॒वा सी॑द ।
 सर्वाः॑ स्त्रि॒यः सर्वा॑न् पु॒ंसः । सर्वं॑ न स्त्री-पु॒मञ्च॑ यत् ।
 सर्वा॑स्ताः । याव॑न्तः पा॒ंसवो॑ भु॒मेः॑ । 146

T.B.3.12.6.2

सङ्ख्या॑ता दे॒वमा॑यया॑ । सर्वा॑स्ताः । याव॑न्त ऊ॒षाः प॑शूनां ।
 पृ॒थिव्यां॑ पु॒ष्टिर् हि॒ताः । सर्वा॑स्ताः । याव॑तीः सि॒कताः॑ सर्वाः॑ ।

अ॒फ॒स्व॒न्तश्च॑ याः श्रि॒ताः । सर्वा॒स्ताः । या॒व॒तीः शर्क॑रा धृ॒त्यै ॥
अ॒स्यां पृ॒थि॒व्याम॑धि । 147

T.B.3.12.6.3

सर्वा॒स्ताः । या॒व॒न्तो-ऽश्मा॑नो-ऽस्यां पृ॒थि॒व्यां ।
प्र॒ति॒ष्ठासु॑ प्र॒ति॒ष्ठि॒ताः । सर्वा॒स्ताः । या॒व॒ती र्वी॑रुधः सर्वाः ॥
वि॒ष्ठि॒ताः पृ॒थि॒वीम॑नु । सर्वा॒स्ताः । या॒व॒ती रो॑षधीः सर्वाः ॥
वि॒ष्ठि॒ताः पृ॒थि॒वीम॑नु । सर्वा॒स्ताः । 148

T.B.3.12.6.4

या॒व॒न्तो व॒नस्प॑तयः । अ॒स्यां पृ॒थि॒व्याम॑धि । सर्वा॒स्ताः ।
या॒व॒न्तो ग्रा॒म्याः प॒शवः॑ सर्वे ॥ आ॒र॒ण्याश्च॑ ये ।
सर्वा॒स्ताः । ये द्वि॒पाद॑-श्चतु॒ष्पादः॑ । अ॒पाद॑ उ॒दर॑स॒र्पिणः॑ ।
सर्वा॒स्ताः । या॒व॒दाञ्ज॑न मु॒च्यते ॥ 149

T.B.3.12.6.5

दे॒वत्रा॑ यच्च॑ मा॒नुषं॑ । सर्वा॒स्ताः । याव॑त्कृ॒ष्णाय॑ स॒ꣳ सर्वं॑ ॥
 दे॒वत्रा॑ यच्च॑ मा॒नुषं॑ । सर्वा॒स्ताः । याव॑ ल्लो॒हाय॑ स॒ꣳ सर्वं॑ ॥
 दे॒वत्रा॑ यच्च॑ मा॒नुषं॑ । सर्वा॒स्ताः । सर्व॑ꣳ सीस॑ꣳ सर्वं॑ त्रपु॑ ।
 दे॒वत्रा॑ यच्च॑ मा॒नुषं॑ । 150

T.B.3.12.6.6

सर्वा॒स्ताः । सर्व॑ꣳ हि॒र॒ण्यꣳ रज॑तं । दे॒वत्रा॑ यच्च॑ मा॒नुषं॑ ।
 सर्वा॒स्ताः । सर्व॑ꣳ सुव॑र्णꣳ ह॒रि॒तं । दे॒वत्रा॑ यच्च॑ मा॒नुषं॑ ।
 सर्वा॒स्ता इ॒ष्टकाः॑ कृ॒त्वा । उप॑कामदु॒घा द॑धे ।
 तेन॑र्षि॒णा तेन॑ ब्र॒ह्म॒णा । तया॑ दे॒वत॑या-ऽङ्गि॒रस्व॑द् ध्रु॒वासी॑द । 151

T.B.3.12.7.1

सर्वा॑ दि॒शो दि॒क्षु । यच्चा॒न्त भू॑तं प्र॒तिष्ठि॑तं ।
 सर्वा॒स्ता इ॒ष्टकाः॑ कृ॒त्वा । उप॑ कामदु॒घा द॑धे ।
 तेन॑र्षि॒णा तेन॑ ब्र॒ह्म॒णा । तया॑ दे॒वत॑या-ऽङ्गि॒रस्व॑द्-ध्रु॒वासी॑द ।
 अ॒न्तरि॑क्षञ्च॑ के॒वलं॑ । यच्चा॒स्मि-न्न॑न्तरा॒हितं॑ ।

स॒र्वा॒स्ताः । आ॒न्त॒रि॒क्ष्य॑श्च॒ याः प्र॒जाः । 152

T.B.3.12.7.2

ग॒न्ध॒र्वा-फ॒सर॑सश्च॒ ये । स॒र्वा॒स्ताः । स॒र्वा-नु॑दा॒रान्-थ्स॑लि॒लान् ।
अ॒न्त॒रि॒क्षे॒ प्र॒ति॒ष्ठि॑तान् । स॒र्वा॒स्ताः । स॒र्वा-नु॑दा॒रान्-थ्स॑लि॒लान् ।
स्था॒वराः प्रो॑ष्याश्च॒ ये । स॒र्वा॒स्ताः ।
स॒र्वा॑ धु॒नि॒ꣳ स॒र्वान्-ध्व॑ꣳसान् । हि॒मो यच्च॑ शी॒यते॑ ॥ 153

T.B.3.12.7.3

स॒र्वा॒स्ताः । स॒र्वान् म॑री॒चीन् वित॑तान् । नी॒हारो यच्च॑ शी॒यते॑ ॥
स॒र्वा॒स्ताः । स॒र्वा वि॑द्युतः स॒र्वान्थ् स्त॑नयि॒न्नून् ।
हा॒दुनी॑ र्यच्च॑ शी॒यते॑ ॥ स॒र्वा॒स्ताः । स॒र्वाः स्र॑वन्तीः स॒रितः॑ ।
स॒र्वम॑प्सु च॒रञ्च॑ यत् । स॒र्वा॒स्ताः । 154

T.B.3.12.7.4

याश्च॑ कू॒प्या याश्च॑ ना॒द्याः स॒मु॒द्रि॒याः ॥
याश्च॑ वै॒श॒न्ती॒रुत॑ प्रा॒स॒ची॒र्याः । स॒र्वा॒स्ताः ।

ये चो॒त्ति॒ष्ठन्ति॑ जी॒मू॒ताः॑ । याश्च॑ वर्॒षन्ति॑ वृ॒ष्टयः॑ ।
 सर्वा॒स्ताः । तप॒स्तेज॑ आका॒शं । यच्चा॑का॒शे प्र॑ति॒ष्ठितं॑ ।
 सर्वा॒स्ताः । वा॒युं व॑या॒सि सर्वा॑णि । 155

T.B.3.12.7.5

अन्त॑रि॒क्षच॑रञ्च॒ यत् । सर्वा॒स्ताः । अ॒ग्नि॒सूर्यं॑ च॒न्द्रं ।
 मि॒त्रं व॑रु॒णं भ॑गं । सर्वा॒स्ताः । स॒त्य॒श्रद्धां॑ तपो॒ दमं॑ ।
 ना॒म रू॒पञ्च॑ भू॒तानां॑ । सर्वा॒स्ता इ॒ष्टकाः॑ कृ॒त्वा ।
 उप॑ का॒मदु॑घा दधे । तेन॑र्षि॒णा तेन॑ ब्र॒ह्मणा॑ ।
 तया॑ दे॒वत॑या-ऽङ्गि॒रस्व॑द्-ध्रु॒वा सी॑द । 156

T.B.3.12.8.1

सर्वा॑ दि॒व्सर्वान्॑ दे॒वान् दि॒वि । यच्चा॑न्त॒ भू॒तं प्र॑ति॒ष्ठितं॑ ।
 सर्वा॒स्ता इ॒ष्टकाः॑ कृ॒त्वा । उप॑ का॒मदु॑घा दधे ।
 तेन॑र्षि॒णा तेन॑ ब्र॒ह्मणा॑ । तया॑ दे॒वत॑या-ऽङ्गि॒रस्व॑द्-ध्रु॒वा सी॑द ।
 याव॑ती स्ता॒रकाः॑ सर्वाः॑ । वि॒तता॑ रो॒चने॑ दि॒वि । सर्वा॒स्ताः ।

ऋचो॑ यजू॑षि॑ सामानि॑ । 157

T.B.3.12.8.2

अथ॑र्वाङ्गिर॑सश्च॑ ये । सर्वा॑स्ताः । इति॑हासपु॒राणञ्च॑ ।
 सर्प॑दे॒वजना॑श्च॑ ये । सर्वा॑स्ताः । ये च॑ लो॒का ये चा॑लो॒काः ।
 अन्त॑ भू॒तं प्रति॑ष्ठितं । सर्वा॑स्ताः । यच्च॑ ब्र॒ह्म यच्चा॑ब्र॒ह्म ।
 अन्त॑ ब्र॒ह्मन् प्रति॑ष्ठितं । 158

T.B.3.12.8.3

सर्वा॑स्ताः । अहो॑रात्राणि॑ सर्वा॑णि । अर्ध॑मासा॑श्च॑ के॒वलान् ।
 सर्वा॑स्ताः । सर्वा॑नृ॒तून्-थ्सर्वा॑न् मा॒सान् । सँव॑थ्स॒रञ्च॑ के॒वलं ।
 सर्वा॑स्ताः । सर्वं॑ भू॒तञ्च॑ सर्वं॑ भव्यं॑ । यच्चा॑तोऽधि॑ भवि॑ष्यति ।
 सर्वा॑स्ताः इष्ट॑काः कृ॒त्वा । उप॑ का॒मदु॑घा दधे॑ ।
 तेन॑र्षि॒णा तेन॑ ब्र॒ह्मणा॑ । तया॑ दे॒वतया॑-ऽङ्गिर॑स्वद्-ध्रु॒वा सीद॑ । 159

T.B.3.12.9.1

ऋ॒चां प्रा॒ची॑ म॒हती॑ दि॒गुच्य॑ते । दक्षि॑णा-मा॒हुर्य॑ जु॒षाम॑पारां ।
 अथ॑र्वणा-म॒ण्डि॒रसां॑ प्र॒तीची॑ ॥ सा॒म्ना-मु॒दीची॑ म॒हती॑ दि॒गुच्य॑ते ।
 ऋ॒ग्भिः पू॒र्वाह्ने॑ दि॒वि दे॒व ई॑यते । य॒जुर्वे॑दे ति॒ष्ठति॑ म॒द्ध्ये अ॒हः ।
 सा॒मवे॑दे-ना॒स्तम॑ये म॒हीय॑ते । वे॒दै-र॒शून्य॑-स्त्रि॒भिरे॑ति॒ सूर्यः॑ ।
 ऋ॒ग्भ्यो जा॒ताꣳ स॒र्वशो॑ मूर्ति॑-माहुः ।
 सर्वा॑ गति॑ र्याजु॒षी है॒व श॑श्चत् ॥ 160

T.B.3.12.9.2

सर्वं॑ तेज॑ स्साम॒रूप्यꣳ ह॑ शश्चत् । सर्वꣳ हे॒दं ब्र॑ह्मणा है॒व सृ॑ष्टं ।
 ऋ॒ग्भ्यो जा॒तं वै॒श्यं व॑र्ण-माहुः । य॒जुर्वे॑दं क्ष॒त्रिय॑स्या-हु॒र्योनिं॑ ।
 सा॒मवे॑दो ब्रा॒ह्मणा॑नां प्र॒सूतिः॑ । पू॒र्वे पू॒र्वेभ्यो॑ वच॑ एत॒-दूचुः॑ ।
 आ॒दर्श॑-म॒ग्निं चि॑न्वा॒नाः । पू॒र्वे वि॒श्व सृ॑जोऽमृ॒ताः ।
 श॒तं व॑र्ष॒ सह॑स्राणि । दी॒क्षिता॑ स्स॒त्र-मा॑सत ॥ 161

T.B.3.12.9.3

तप॑ आसीद् गृ॒हप॑तिः । ब्र॒ह्म ब्र॒ह्मा॑भवत् स्वयं॑ ।
 सत्य॑ ह॒ हो तै॒षामा॑सीत् । यद् विश्व॑सृज॒ आस॑त ।
 अमृत॑-मे॒भ्य उ॑दगायत् । सह॑स्रं॒ परिव॑त्स॒रान् ।
 भूत॑ ह॒ प्रस्तो॑ तै॒षामा॑सीत् । भवि॑ष्यत् प्रति॑ चाहरत् ।
 प्रा॒णो अ॑र्ध्वर्यु-र॒भवत् । इ॒दं स॑र्वं॒ सिषा॑सतां ॥ 162

T.B.3.12.9.4

अ॒पानो॑ वि॒द्वा-ना॑वृतः । प्र॒ति प्रा॑तिष्ठ-द॒र्ध्वरे॑ ।
 आ॒र्त्त॒वा उ॑पगा॒तारः॑ । स॒दस्या॑ ऋ॒तवो॑-ऽभवन् ।
 अ॒र्द्धमा॑साश्च मा॒साश्च॑ । च॒मसा॑-र्ध्वर्य॒वो-ऽभवन्॑ ।
 अ॒शं स॑द् ब्र॒ह्मण॑-स्तेजः॑ । अ॒च्छा॒वाको॑ ऽभवद् यशः॑ ।
 ऋ॒त-मे॑षां प्र॒शास्ता॑-ऽसीत् । यद् विश्व॑ सृज॒ आस॑त ॥ 163

T.B.3.12.9.5

ऊ॒र्ग राजा॑न-मु॒दव॑हत् । ध्रु॒व गो॑प र॒स्सहो॑-ऽभवत् ।
 ओ॒जो-ऽभ्य॑ष्टौद् ग्रा॒व्णः॑ । यद् विश्व॑ सृज॒ आस॑त ।

अप॑चि॒तिः पो॒त्रीया॑-मयजत् । ने॒ष्ट्रीया॑-मयजत् त्वि॒षिः ।
 आ॒ग्नी॑द्धाद् वि॒दुषी॑ सत्यं । श्र॒द्धा है॒वा यज॑त् स्व॒यं ।
 इ॒रा प॒त्नी वि॒श्व सृ॒जां । आ॒कू॒ति-रपि॑नङ्गु॒विः ॥ 164

T.B.3.12.9.6

इ॒ध्मꣳ ह॒ क्षुच् चै॑भ्य उ॒ग्रो । तृ॒ष्णा चा॑ वह॒तामु॑भे ।
 वा॒गेषाꣳ सु॒ब्रह्म॑ण्या-ऽऽसीत् । छ॒न्दो यो॒गान् वि॒जान॑ती ।
 क॒ल्प॒तन्त्रा॑णि तन्वा॒ना-ऽहः॑ । सꣳ स्थाश्च॑ सर्व॒शः ।
 अ॒हो॒रा॒त्रे प॑शु॒पाल्यौ॑ । मु॒हूर्ताः प्रे॒ष्या अ॑भवन् ।
 मृ॒त्युस् तद॑-भव॒-द्धा॒ता । श॒मितो॑ ग्रो वि॒शां प॑तिः ॥ 165

T.B.3.12.9.7

वि॒श्वसृ॑जः प्रथ॒मा स्स॑त्र-मा॒सत॑ । स॒हस्र॑ समं प्र॒सुते॑न यन्तः ।
 ततो॑ ह जज्ञे भु॒वन॑स्य गो॒पाः । हि॒र॒ण्म॒य इ॒शकु॑नि ब्र॒ह्म ना॑म ।
 येन॑ सू॒र्य-स्त॑पति ते॒जसे॑-द्धः । पि॒ता पु॒त्रेण॑ पि॒तृमा॑न् यो॒नियो॑नौ ।

ना॒वे॒द॒वि॒न् म॒नु॒ते तं बृ॒ह॒न्तं॑ । स॒र्वानु॒भु-मा॒त्मानं॑ संप॒रा॒ये ।
 ए॒ष नि॒त्यो म॒हि॒मा ब्रा॒ह्म॒ण॒स्य॑ ।
 न क॒र्म॒णा व॒र्द्ध॒ते नो क॒नी॒यान् ॥ 166

T.B.3.12.9.8

तस्यै॒वा॒त्मा प॒द॒वि॒त्तं वि॒दि॒त्वा । न क॒र्म॒णा लि॒प्य॒ते पा॒प॒के॒न॑ ।
 पञ्च॑पञ्चा श॒त-स्त्रि॑वृ॒त स्सं॑व॒त्स॒राः ।
 पञ्च॑पञ्चा श॒तः पञ्च॑द॒शाः । पञ्च॑ पञ्चा॒श॒तं स्स॒प्त॒द॒शाः ।
 पञ्च॑पञ्चा श॒त ए॒क॒विं॒शाः ।
 वि॒श्व॒सृ॒जां॑ स॒ह॒स्रं सं॑व॒त्स॒रं ।
 ए॒तेन॑ वै वि॒श्व॒सृ॒ज इ॒दं वि॒श्व-म॑सृ॒जन्त॑ । यद् वि॒श्व-म॑सृ॒जन्त॑ ।
 तस्मा॑द् वि॒श्व॒सृ॒जः । वि॒श्व-मे॒ना-न॑नु प्र॒जा॒य॒ते ।
 ब्रा॒ह्म॒ण स्सा॒यु॒ज्यं॑ स॒लो॒क॒तां य॑न्ति ।
 ए॒ता॒सा॒मे॒व दे॒व॒ता॒नां॑ सा॒यु॒ज्यं॑ । सा॒र्षि॒तां॑ स॒मा॒न लो॒क॒तां य॑न्ति ।

य ए॒त-दु॒प॒य॒न्ति॑ । ये चै॒न॒त् प्राहुः॑ ।

येभ्य॑-श्चै॒न॒त् प्राहुः॑ ॥ ओं ॥ 167

हरिः॑ ओं

॥ इति तैत्तिरीय यजुर्ब्राह्मणे काठके तृतीय प्रश्नः समाप्तः ॥
